

श्रेष्ठ नारायणदास और श्रेष्ठ जेठानंद आसनमल  
पुष्टिमार्गीय ग्रंथमाला-रत्न-१९

श्रीमदवल्लभाचार्य विरचित

## षोडशग्रन्थ

गोस्वामी श्रीनृसिंहलालजी महाराज कृत  
व्रजभाषा टीका सहित

प्रकाशक :—

नगरठठ्ठा निवासी सहित श्रेष्ठ नारायणदास  
और श्रेष्ठ जेठानंद आसनमल ट्रस्टफंडस्के ट्रस्टीओ

ठि. २३६ कालबादेवी रोड, मुंबई २

शाके : १८८२ संवत : २०१७

वसंत पंचमी

प्रथम आवृत्ति ]

ॐ

[ प्रत : १०००

न्योच्छावर रु. २=२५ न. पै.

श्रीकृष्णाय नमः श्रीगोपीजनवह्नभाय नमः ॥

## अथ श्रीयमुनाष्टककी संक्षेपसू भावार्थटीका लिखी हे ॥

श्लोकः—नमामि यमुनामहं सकलसिद्धिहेतुं मुदा  
मुरारिपदपंकजस्फुरदमंदरेणूत्कटाम् । तटस्थ-  
नवकाननप्रकटमोदपुष्पांबुना सुरासुरसुपूजित-  
स्मरपितुः श्रियं विश्रतीम् ॥१॥

टीका—श्रीयमुनाजीकूं में नमन करूं हूं, श्रीयमुनाजी केसें  
हैं सो निरूपणकरतहें, सब सिद्धीनके कारणहें तामें भगवद्भा-  
वकी वृद्धि करेहें, भगवानको संबंध होयवेमें जो जो प्रतिबंध  
होय तिन सबनकूं मिटायकें भगवानको अनुभव करिवेमें जितनी  
शुद्धिकि आवश्यकताहे तितनी शुद्धि करे हैं, विनाहिश्रम  
भगवानको संबंधकरावेहें, भगवानको प्रियपनो सिद्ध करेहें,  
कलिकी निवृत्ति करे एसी भगवदीयनकी बड़ाई धारणकरेहें,  
नवीन (प्रभुसेवोपयोगी) देह संपादनकरेहें इत्यादिक अष्टविध  
ऐश्वर्यकी सिद्धि हे ओर प्रभुकी लीलाको दर्शन करावेहें,  
प्रभुकी लीलाके आनंदको अनुभव करावेहें, सर्वात्मभावकी  
सिद्धि करेहें, भगवानके वियोगमेंहू भगवानके आवेशवारो  
देह सिद्धकरेहें, जिनकी लौकिक सब विषयनमें दृष्टि न होय

ओर भीतर दृष्टि होय तिनकूं प्रभुकी लीलाके दर्शनकी सिद्धि करावे हैं, प्रभुको विरह होय तब जैसो सर्वात्मभाव चाहिये तेसो सर्वात्मभाव सिद्ध करे हैं, इत्यादिक अनेक सिद्धि हैं इन सब सिद्धिनके कारण श्रीयमुनाजी हैं, मुरारि जो श्रीकृष्ण तिनके चरणारविदकी रज, जलक्षेपसं अधिक जामें स्फुरायमान हैं, प्रभुके बहोत नाम हैं तिनमें मुरारि नाम लिखिवेको अभिप्राय एसो हे जो जैसे भौमासुरने सोरह हजार राज-कन्यानकूं रोकी हती तिनकूं भगवानकी प्राप्ति होयवेमें प्रतिबंध-रूप जलके दोषात्मक मुरदैत्य हतो ताकूं मारिकें भगवानने सबनकूं अंगीकार किनी तेसेहि प्रभुकी प्राप्तिमें प्रतिबंधरूप जो दोष होय ताकूं मिटायकें प्रभु आप भक्तनकों अंगीकार करे हैं, एसे प्रभुके चरणारविदकी रज श्रीयमुनाजीमें स्फुराय-मान हैं ये जतायवेके लिये मुरारिनाम कह्यो हे, तटमें जो नये घन हैं तिनको सुगंध जिनके पुष्पनमें प्रकट हो रह्यो हे तासूं सुगंधयुक्तजलकरिकें सुरभाव ओर असुरभावधारे भक्तनकूं प्रभुको स्मरण होय एसी शोभाकूं धारणकरे हैं, तामें दैन्य-भाववारे भक्त हैं सो सुरभाववारे ओर मानभाववारे भक्त हैं सो आसुरभाववारे हैं एसे दोउप्रकारके भक्त, भगवानकी प्राप्तिके लिये श्रीयमुनाजीको पूजन करत हैं ॥ १ ॥

अब श्रीयमुनाजीके आधिभावको प्रकार कहत हैं.

श्लोकः—कलिदगिरिमस्तके पतदमंदपूरोज्वला  
 विलासगमनोल्लसत्प्रकटगंडशैलोन्नता । सधो-  
 षगतिदंतुरा समधिरूढदोलोत्तमा मुकुंदरति-  
 वर्द्धिनी जयति पद्मबंधोः सुता ॥ २ ॥

टीका-सूर्यमंडलमें जो नारायण हैं तिनके आनंदात्मक हृदयसं द्रवीभूत रसात्मक प्रकट होयके सूर्यमंडलमें कलिदपर्वतकी उपर गिरे हैं तहां कालिदीकू अपनेमें मिलावे हैं ओर अत्यंत उंचेते गिरवेसूं फेन बहोत होय हैं तासूं पूर बहोत आवे हे ताकरिकें उज्वल हे, उंचे नीचे पर्वतनपें चडनों उतरनों हैं सो विलासगतिरूप हे तामें सुशोभित ओर प्रवाहको वेग पाषाणकूं उंचे फेंके हे तासूं वे पाषाण प्रकट दीखे हे ताकरिकें श्रीयमुना-जीको प्रवाह उंचो दीखवेहें आवे हे, शब्दसहित प्रवाहकी गतिरू विकसयुक्त दीखे हैं अथवा सब ब्रजवासी जहां जाय हैं वहां ब्रजकूं संग लेकें जाय हैं ऐसे ब्रजसहितब्रजवासीनकी गतिरूकिकें विकसयुक्त हैं, हिंडोलामें नहिं बिराजे हैं तथापि उंचे नीचे स्थलपें जो प्रवाह चले हे ताकरिकें उत्तम हिंडोलामें बिराजते होय एसें जानपरतहें, यहां उत्तमदोला कहेवेको अभिप्राय यह हे जो दोलाको स्वभाव आयवे जायवेको हे ओर श्रीयमुनाजीको प्रवाह भगवानके दर्शनको आतुरता होय तेसें सन्मुखही जायहें तासूं उत्तम दोलामें अधिरूढ हैं एसें

कहो है, मुकुन्द जो मोक्षदेववारे श्रीकृष्ण तिनकी प्रीति भक्तनमें बढावे हैं ओर कमलके बंधुरूपसूर्यकी पुत्री हे एसे श्रीयमुनाजी सवनतें बडाईसूं बिराजित हैं ॥ २ ॥

श्रीयमुनाजी भूमिमें पधारें तापिछेके धर्मको निरूपण कहत हैं.

**श्लोक :-**भुवं भुवनपावनीमधिगतामनेकस्वनैः प्रिया-  
भिरिव सेवितां शुक्रमयूरहंसादिभिः । तरंग-  
भुजकंकणप्रकटमुक्तिकावालुकानितंबतटसुंदरीं  
नमन कृष्णतूर्यप्रियाम् ॥३॥

टीका—श्रीयमुनाजी पृथ्वीपर पधारें हैं सो भक्तनकूं भगव-  
न्नाव संपादन करिकें अन्यभावसूं रहित करे हैं ओर भगव-  
त्सेवामें योग्य शरीरकी शुद्धि करे हैं एसे लोककूं पवित्र करे हैं.  
श्रीगोपीजन सब जैसे श्रीयमुनाजीको सेवन करें हैं तैसें अनेक  
शब्दवारे शुक, मयूर ओर हंसप्रभृति सब पक्षीन करिकेंहू  
श्रीयमुनाजी सेवित हैं. तरंग, तीरपें आवे हैं तब पसरि जाय  
हैं ताविरियां बालुका प्रकाशित होय हैं सो बालुका नहीं हे  
किंतु तरंगहैं सो श्रीयमुनाजीके श्रीहस्त हे तिनमें जो कंकण  
धारण किये हैं तिन कंकणनमें मुक्ताफल लगे हैं सो प्रकाशित  
दीखे हैं ओर उंचे तट हैं सो नितंबरूप हैं तिनमें तरंगके बलसूं  
बालुका लगे हैं सो श्रीहस्त नितंबरमें लगाये होय एसें शोभे हैं

तिनमें बालुका प्रकाशे हैं सो कंकणनके मुक्ताफल हैं. भक्तनके चार यूथ मुख्य हैं तिनमें चतुर्थयूथमें मुख्य श्रीयमुनाजी हैं ऐसेकूं नमन सिवाय ओर जोब कहा करि सके ? तास्र श्रीआचार्यजी सब सेत्रकनकूं आज्ञा करें हैं जो एसे श्रीयमुना-जीकूं तुम सब नमन करो ॥ ३ ॥

श्रीयमुनाजीमें भगवानके समान धर्म हैं एसें जतायवेके लिये दोउको समान धर्मपनो निरूपण करत हैं.

**श्लोक :-**अनंतगुणभूषिते शिवत्रिरंविदेवस्तुते घना-  
घननिभे सदा ध्रुवपराशराभीष्टदे । विशुद्ध-  
मथुरातटे सकलगोपगोपीवृते कृपाजलधिसं-  
श्रिते मम मनः सुखं भावय ॥४॥

टीका-यामें षट्धर्मयुक्त सप्तम धर्मको निरूपण हे एसें जतायवेके लिये सात विशेषण हैं तामें भगवानमें विशेषण लगावनें तब सप्तमी विभक्तिको अर्थ करनो ओर श्रीयमुनाजीमें लगावनें तब सब विशेषणमें संबोधनको अर्थ करनो. श्रीठाकुरजी असंख्यगुणनकरिकें अलंकृत हैं ओर श्रीयमुनाजी, रासोत्सवादिजनमें अनंतरूप धरिवेवारे भगवानके गुणनकरिकें अलंकृत हैं. शिव ओर ब्रह्माप्रभृति सब देव भगवानकी तथा यमुनाजीकी स्तुति करें हैं. मंदमंदवर्षायुक्त श्याममेघजेसी शोभा-युक्त दोऊ हैं ध्रुव ओर पराशरकूं सदा सबप्रकारको इच्छित

देववारे भगवान् तथा श्रीयमुनाजी हैं, श्रीठाकोरजीके निकटमें अत्यंत शुद्ध श्रीमथुराजी हे ओर श्रीयमुनाजीके तटपे श्रीमथुराजी हे, श्रीठाकुरजी, समग्र गोप ओर श्रीगोपीजननकरिके आवृत हे ओर श्रीयमुनाजीके तीरपे पहलेले गोपगोपीनको श्रीठाकुरजीके संबन्धको अनुभव भयो हे तासूं समग्र गोप ओर श्रीगोपीजननकरिके श्रीयमुनाजीहू आवृत हैं श्रीठाकुरजी कृपारूप समुद्रके आश्रयको सुंदर स्थान हैं इतने कृपारूप समुद्र श्रीठाकुरजीको आश्रय करिके रहे हे ओर श्रीयमुनाजी कृपाके समुद्ररूप श्रीठाकुरजीको आश्रय करिके रहे हैं ऐसे षट्धर्मयुक्त हे श्रीयमुनाजी ! आप, अपार कृष्णासागर श्रीठाकोरजीमें मिले हो सो आपमें जो मिले सो आपके बरसूंही श्रीठाकुरजीमें मिले हैं, तासूं ऐसे षट्धर्मयुक्त ओर कृपाको समुद्र जामें रहे हैं ऐसे श्रीठाकुरजीमें मेरो मन भावकरिके आनंदको अनुभव कैसें करे ? सो आप विचारो अथवा भगवत्स्वरूपके अनुभवको मेरे मनमें जो सुख होय ताकी भावना आपके मनमें करो इतने आपके मनमें ये विचार होयगो तब ये सुख मिलेगो, ॥४॥

अब भगवदीयनकीहू बडाई करिवेघारें श्रीयमुनाजीहें तिनकी बडाई कहिवेकूं कोन समर्थ

१. यह श्रीको निरूपण हे. २. यह ज्ञानको निरूपण हे. ३. यह वैराग्यको निरूपण हे. ४. यह धर्मीको निरूपण हे.

हे ? सो निरूपण करत हे,

श्लोकः—यया चरणपद्मजा मुररिपोः प्रियंभावुका  
समागमनतोऽभवत्सकलसिद्धिदा सेवताम् ।  
तया सदृशतामियात्कमलजा सपत्नीव यद्द-  
रिप्रियकल्लिंदया मनसि मे सदा स्थीयताम् ॥५॥

टीका—गंगाजी भगवानके चरणकमलतें प्रकठ भई हे तासूं भक्तिमार्गीय ओर निर्दोषगुणपूर्ण हे सोहू जो श्रीयमुनाजी संग (प्रयागमें) मिले हे तामेंसूं मुररिपु जो भक्तनके प्रतिबंध दूर करिवेवारे हरि भगवान् हैं तिनकों अत्यंत प्रिय भई हे ओर सेवनकरिवेवारेनकूं समग्र सिद्धि देवेवारी भई हे, एसे श्रीयमुनाजीकी बराबरीकूं कोऊ प्राप्त होय हे कहा ? कदाचित् प्राप्त होय तो श्रीलक्ष्मीजी होय, क्यों जो श्रीलक्ष्मीजीहू भगवानकी स्त्री हैं तासूं श्रीयमुनाजीकी सपत्नी (सोति) होय हैं यहां श्रीलक्ष्मीजी श्रीयमुनाजीकी सपत्नी (सोति) हैं एसें कहीं हैं ताको अभिप्राय एसो हे जो जाकी जो सपत्नी (सोति) होय सो ताके स्वभावसूं विरुद्ध स्वभाववारी होय हे तेसूं श्रीलक्ष्मीजी श्रीयमुनाजीके स्वभावतें विरुद्ध स्वभाववारी हे एसो सूचन कियो हे, तासूं कहे हैं जो भक्तनके दुःख तथा पापकूं हरिवेवारे भगवानके भक्तनके कलिनके दोषनकूं खंडन करिवेवारे श्रीयमुनाजी हैं तिनकी मेरे मनमें स्थिति होय



इतने श्रीलक्ष्मीजी भक्तनकों अनुकूल नहीं हैं और श्रीयमुनाजी भक्तनकों अनुकूल हैं ॥५॥

एसे भक्तनकों अनुकूल श्रीयमुनाजी, भगवानकूं अत्यंत प्रिय हैं तिनकों नमन सिवाय ओर कछु होयसके नहीं एसे अभिप्रायसूं कहत हैं.

श्लोकः—नमोऽस्तु यमुने ! सदा तव चरित्रमत्य-  
द्भुतं न जातु यमयातना भवति ते पयः-  
पानतः । यमोऽपि भगिनीसुतान्कथमु हंति  
दुष्टानपि प्रियो भवति सेवनात्तव हरेर्यथा  
गोपिकाः ॥६॥

टीका—भगवानको माहात्म्य तो सबशास्त्रनमें अति प्रसिद्ध हे तासूं भगवानकूं नमन होयसकें हे ओर श्रीयमुनाजीको माहात्म्य तो लीलासृष्टिमें प्रवेश भये पिछें तेसो भाव प्राप्त होय तब जान्यो जाय ता पिछें नमन होय, तासूं नमन होय-वेकी प्रार्थना करत हैं जो हे श्रीयमुनाजी ! आपकूं सदा नमन होऊं, आपके पयःपानसूं कोऊ बिरियां यमयातना होय नहिं यह आपको चरित्र अति अद्भुत हे. जेसें भगवान् अद्भुत कर्मवारे हैं सो काम, भय, द्वेष प्रभृति जो भगवानकूं मिलवेके साधन नहिं हैं, किंतु उत्तम गतिके प्रतिबंधक हैं, तथापि श्रीगोपीजन कामते, कंस भयतें ओर शिशुपालादिक द्वेषतें

भगवान्कू प्राप्त भये हैं तहां कामादिक असाधन हैं तिनकू भगवाननें साधनरूप किये हैं तैसें तृषाकी निवृत्तिके लिये श्रीयमुनाजीको पयःपान करे सो कहू उत्तमगति मिलवेको अथवा यमयातना मिटवेको साधन भयो नहिं तथापि यमयातना मिटे हे ये श्रीयमुनाजीको अद्भुत चरित्र हे श्रीयमुनाजीके 'पयःपानते' यमयातना मिटे हे तामें युक्ति कहत हैं जो यमहू बहिनिके पुत्र कदाचित् दृष्ट होय तोहू तिनकू दंड कैसें देय ? क्यों जो बहिनिको पुत्र तो सर्वदा मान्य हे. ओर यम उत्पन्न भये पिछें वाके दोषकी निवृत्तिके लिये श्रीयमुनाजी प्रकट भयें हैं तासूं यमकू अतिमान्य हैं. ओर पयःशब्दको अर्थ दूध तथा जल दोउ प्रकारको होय हे, तासूं श्रीयमुनाजीको पयःपान करिवेवारे बिनके पुत्रभये ओर यमके भानेज भये तिनकू यम दंड कैसें देय ? एसें दोषनिवारक अद्भुत चरित्रको निरूपण करिकें फलसंपादक अद्भुत चरित्रको निरूपण करें हैं जो जैसें श्रीगोपीजन हरिकू प्रिय भये हैं तैसें तुम्हारे सेवनतें जीव हरिकू प्रिय होय हैं; लोकमेंहू अन्यके सेवनसूं अन्य प्रसन्न होय एसो देख्यो नहिं हे ओर यहां तो श्रीयमुनाजीके सेवनसूं प्रभु प्रसन्न होय हैं, जैसें कात्यायनीव्रतके प्रसंगमें कुमारिकानकू श्रीयमुनाजीके सेवनतें प्रभु प्रसन्न भयें हैं यह श्रीयमुनाजीको अद्भुत चरित्र हे ॥ ६ ॥

देहको अवश्य धर्म यह हे जो जेसो कर्म करे तेसो दूसरो देह

प्राप्त होय एसो आवश्यक वैहिकधर्ममेंहू जहां तुम्हारे  
 संबंध भयो इतने पिछे मुक्ति अधिक भक्तिही  
 प्राप्ति हांय हे तहां यमयातनाको अभाव  
 होय तामें कहा शंका हे यह निरूपण  
 कहत हैं.

श्लोकः—ममास्तु तव सन्निधौ तनुनवत्वमेतावता  
 न दुर्लभतमा रतिर्मुररिपौ मुकुन्दप्रिये ।  
 अतोऽस्तु तव लालना सुरधुनी परं संग-  
 मातवैव भुवि कीर्तिता न तु कदापि  
 पुष्टिस्थितः ॥ ७ ॥

टीका—मोकू तुम्हारे सन्निधानमें लीलोपयोगी नवीन  
 देहसंपत्ति होय. लौकिक देह मिटिके अलौकिक देह भयेसंहि  
 सुररिपु (भगवान्)में प्रीति अत्यंत दुर्लभ नहीं हे कदाचित्  
 प्रतिबंधक होयेंगे तोहू तुम्हारे संबंधमें भगवान् आपतेंही दूर  
 करि घरमेंहि मोक्षसुख प्राप्त होय तसें चतुर्विध पुरुषार्थके  
 सुखको अनुभव होयगो यह जतायवेके लिये सुररिपुपद कह्यो  
 हे तथा मुकुन्दप्रिये ! एसो संशोधन दियो हे ओर तुम्हारे  
 सन्निधानमें अलौकिक देहकी प्राप्ति होयवेको कह्यो हे तस्य  
 जहां दुष्टनके सन्निधानमें श्रीयमुनाजीको तिरोभाव हे तहां  
 अलौकिक देहकी प्राप्ति नहीं होय एसो सूचन कियो हे तुम्हारे

सन्निधानमेंहि जहां अलौकिकदेहकी प्राप्ति होय तहां यम-  
यातनाको अभाव होयवेमें शंका कहाहे ? एसें जतायो हे;  
तासूं जवताई आधुनिक शरीरकी निवृत्ति होय तवताई, जैसें  
माता बालककूं लाड करतीविरियां बालककी प्रशंसा (स्तुति)  
करे हे सो गुणवर्णन नहिं हे तेसें तुह्यारी यह स्तुतिहू लालन-  
रूप होय. जिनकी बहोत बडाई हे एसी गंगाजीको कीर्त्तन,  
जो निःसाधनअनुग्रहमागंवारे पृथ्वीपर करेहें सो तुह्यारेहि  
संगमतें करेहें क्योंजो गीताजीमे विभूतिके अध्यायमें गंगाजी  
भगवानकी विभूति हे एसें लिखयो हैं ताको ज्ञान न होय  
अथवा जो विभूतिके उपासक होय सो तो कदाचित् विभूति-  
रूप गंगाजीकी स्तुति करे परंतु पुष्टिमार्गीयभक्ततो पूर्ण-  
पुरुषोत्तमके उपासक हैं सो विभूतिरूप केवल गंगाजीकी  
स्तुति करेहि नहिं. तुम्हारे (श्रीयमुनाजीके) संगततेंही  
गंगाजीकी स्तुति करे हैं. ॥७॥

सबनकूं वंदनकरिवेयोग्य गंगाजीकी स्तुति हू तुह्यारे  
संबंधतें होयहे तहां तुह्यारी स्तुति करिवेकूं कोन समर्थ  
हे ? ऐसे अभिप्रायसूं कहत हैं,

**श्लोकः—स्तुति तव करोति कः कमलजासपत्नि !**  
**प्रिये ! हरेर्यदनुसेवया भवति सौख्यमामोक्षतः ।**  
**इयं तव कथाऽधिका सकलगोपिकासंगम-**  
**स्मरश्रमजलाणुभिः सकलगात्रजैः संगमः ॥८॥**

टीका-लक्ष्मीजीके सपत्नि (सौति) हरिकों प्रिय हे श्रीयमुनाजी ! आपकी स्तुति कोन करसके ? कौऊ कर सके नहिं. क्यों जो आप लक्ष्मीजीके समानसौभाग्यवारे हो तथापि हरिकों विशेष प्रिय हो और मुख्यतासं हरिको सेवन करिकें ताकी अनुकूलतासं जव गौणभावसं लक्ष्मीजीको सेवन करे तब मोक्षपर्यंत सुख मिलेहे केवल (विभूतिरूप) लक्ष्मीजी तौ धनादिसंपत्तिद्वारा विषयासक्ति करायके मोक्षको विघात करे हे. और तुम्हारी तो यह कथा अधिक हे जो आप मोक्ष सुखको अनुभव करावो हो और समग्र श्रीगोपीजननके संगमकरिकें स्मरसंबंधी श्रम होय हे ताकरिकें जो स्वेदजलके थिदु सकल शरीरमेंतें उत्पन्न होय हे तिनको संगत जिनकों हे ताको संबंध भक्तनकूं कराओ हो. एसें तुम्हारी (श्रीयमुना-जीकी) कथा अधिक हे; तासं लक्ष्मीजीकीस्तुति होय परंतु आपको स्तुति कोन कर सके ? ॥ ८ ॥

एसें श्रीयमुनाजीकी स्तुति करिकें यास्तोत्रको पाठ करिवेको फल कहतहें.

श्लोकः—तवाष्टकमिदं मुदा पठति सूरसूते ! सदा  
 समस्तदुरितक्षयो भवति वै मुकुंदे रतिः ।  
 तथा सकलसिद्धयो मुररिपुश्च संतुष्यति  
 स्वभावविजयो भवेद्वदति वल्लभः श्रीहरेः ॥९॥  
 इति श्रीमद्वल्लभाचार्यविरचितं श्रीयमुनाष्टकं संपूर्णं ॥

टीका—हे सूर्यपुत्रि श्रीयमुनाजी ? तुम्हारे या अष्टकको आनंदकरिकें जों सदा पाठ करे हे ताके समस्त दुरितको क्षय होय, मोक्षदेविवारे भगवानमें निश्चय प्रीति होय, ताकरिकें पहिले बताई हैं सो सब सिद्धि प्राप्त होय, प्रतिबंध निवृत्त-करिवेवारे प्रभु प्रसन्न होय, अंतःकरणकोवासनासहित स्वभाव फिरजाय ओर भगवानको स्वभाव हे जो ब्रजभक्तनकों देवेको आनंद ओरकूं नहिं देयँहे सो स्वभाव फिरजाय हे; इतनें यास्तोत्रको पाठ करिवेवारेकूं यह आनंदको दान करत हैं; एमें, भक्तनके दुःख तथा पापकूं हरिवेवारे प्रभुकों प्रिय श्रीआचार्यजी महाप्रभुजी कहत हैं. यद्यपि श्रीयमुनाजीके अन्यस्तोत्र हैं तथापि यास्तोत्रके पाठसूंही सब फल मिलें हैं अन्यस्तोत्रके पाठसूं नहिं मिलेहें, क्यों जो अन्यस्तोत्रमें एसो स्वरूपनिरूपण नहिं हे. तेमें आनंदकरिकें सदा पाठ करे तब फल मिले, क्योंजो अर्थको ज्ञान होय तब आनंद प्राप्त होय ओर सदा पाठ करे तब आसुरावेश न होय. तेमें श्रीयमुनाजीके स्तोत्रसूंही यह फल मिलेहें आरके स्तोत्रसूं नहिं मिलेहें, क्यों जो भगवानमें अष्टविध ऐश्वर्य श्रीयमुनाजीकों दियोहे; तासूं श्रीयमुनाजीके या अष्टकको अर्थानुसंधानपूर्वक आनंदसूं सदा पाठ करे तो सब फल प्राप्त होय. ॥ ९ ॥

इति श्रीयमुनाष्टककी टीका ब्रजभाषामें गोस्वामि-  
श्रीनृसिंहलालजीमहाराजकृत संपूर्ण भई ॥

इति श्रीयमुनाष्टकं समाप्तम् ॥

श्रीकृष्णाय नमः श्रीगोपीजनवल्लभाय नमः ॥

## अथ श्रीबालबोधकी ब्रजभाषामें भावार्थटीका लिखी है ॥



दूसरे मतमें धर्म, अर्थ, काम और मोक्ष ये चारो पुरुषार्थ ही फलरूप से एसे कहें हैं; तासूं जीवनकी प्रवृत्ति पुरुषार्थ सिद्धकरिवेमें होयहे; परंतु भक्तिमें जो बड़ाई हे सो जीव नहिं जानें हैं सो जतायवेकेलिये पुरुषार्थके स्वरूपनिरूपणपूर्वक अपने सिद्धांतरूप मंगलाचरण कहत हैं.



श्लोकः—नत्वा हरिं सदानंदं सर्वसिद्धांतसंग्रहम् ॥  
बालप्रबोधनार्थाय वदामि सुविनिश्चितम् ॥१॥

टीका—भक्तनके दुःख तथा पापकूं हरिवेवारे सदानंद-  
(श्रीकृष्ण) भगवानकूं नमन करिकें बालकनकों आछीतरेहसूं  
बोध होयवेकेलिये सबप्रमाणनसूं निश्चित कियोभयो सर्व-  
सिद्धांतको संग्रह कहूंगो. भगवान् हरि हैं तासूं दुःखकी निवृत्ति  
करें हैं ओर सदानंद हैं तासूं सुखकी प्राप्ति करें हैं तिनकूं  
श्रीआचार्यजीनें नमन करिके एसें जतायो जो जीवनकूं  
दुःखकी निवृत्ति तथा सुखकी प्राप्तिकी इच्छा होय तो दीनता-  
पूर्वक भगवानकों नमन करनों सो करिकें सर्वसिद्धांतको  
संग्रह कहूंगो एसें कह्यो हे इतने पुरुषार्थको प्रतिपादन करिवे-

वारे जो शास्त्र हैं तिनको जामें सिद्धांत हे एसो ग्रंथ कहूं हूं. ये ग्रंथ बालककूं बोध करिवेकेलिये हे इतने आगनो हित कहा तथा अहित कहा ? एसें नहिं जानें हैं ओर भाव शुद्ध हे तासूं दयाके पात्र हैं सो बालक कहेजाय हैं तिनकों दूसरे फलसाधनविषयक उपाय ग्रहणकरिवेको भ्रम मिटायकें जेसो अधिकार ताप्रमाण भक्तिमें अथवा श्रणागतिमें प्रवेश होयवेको सामर्थ्य होय एसो बोध उत्पन्न करिवेकेलिये यह ग्रंथ हे ॥१॥

एसें प्रकार ओर फलको संबन्ध बतायकें पहिलेसूं  
 पुरुषार्थनके विषय संदेह मिटायवेकेलिये  
 संक्षेपसूं तिनको निश्चय कहत हैं-

**श्लोकः-धर्मार्थकाममोक्षाख्याश्रत्वारोऽर्था मनीषिणाम् ।  
 जीवेश्वरविचारेण द्विधा ते हि विचारिताः ॥२॥**

टीका-धर्म, अर्थ, काम ओर मोक्ष एसे नामके चार्यों अर्थ बुद्धिमाननके हैं (इतने साधारणकूं प्राप्त होय एसें नहिं हैं) सो वेहि अर्थ जीवविचारित ओर ईश्वरविचारित एसें दोय-प्रकारके हैं. तिनमें वेदादिकनमें करिवेकी अथवा नहिंकरिवेकी आज्ञा हे सो धर्म कहेजाय, माला, चंदन, स्त्री, पुत्र, देह, प्राण, आभरण, गृह, धनप्रभृति सब अर्थ कहेजाय, शब्द,

१ स्वर्गकी कामनावारो ज्यातिष्टोमयज्ञसूं यजन करे इत्यादिक करिवेकी आज्ञा हे. २ ब्राह्मण मारिवेयोग्यनहिं हे इत्यादिक नहिंकरिवेकी आज्ञा हे.



स्पर्श, रूप, रस, गंधप्रभृति विषयनमें इंद्रियनकी अनुकूलतासं प्रवृत्ति होय सो काम ओर अहंताममतात्मकसंसारकी निवृत्ति होयकें अपने स्वरूपमें जो स्थिति सो मोक्ष ये चारो नामसंहि अर्थ कहेजाय हैं; वस्तुतासं तो भक्तिहि मुख्यपुरुषार्थ हे तासंहि मूलमें पुरुषार्थ हैं एसें नहि कहतें अर्थ हैं एसेंहि कद्यो हे. ओर इनपुरुषार्थको जीवनने विचार कियो हे तथा ईश्वरने विचार कियो हे एसें दोयप्रकारसं ये विचारित हैं ॥ २ ॥

एसें पुरुषार्थनके दोय प्रकार प्रतिपादनकरिकें ईश्वर-  
विचारित पुरुषार्थनको स्वरूप कहत हैं.

श्लोकः—अलौकिकास्तु वेदोक्ताः साध्यसाधनसंयुताः॥  
लौकिका ऋषिभिः प्रोक्तास्तथैवेश्वरशिक्षया ॥३॥

टीका—साध्य ओर साधनकरिकें युक्त अलौकिक पुरुषार्थ तो वेदमें कहें हैं. जैसें अमुकसाधनकरिकें अमुकयज्ञादिक धर्म सिद्ध होयहे, अमुकसाधनकरिकें अमुक अर्थ सिद्ध होयहे, अमुकसाधनकरिकें अमुक काम सिद्ध होयहे ओर अमुकसाधन-  
करिकें मोक्ष सिद्ध होय हे एसें वेदमें निरूपण कियो हे ओर वेद ईश्वरप्रोक्त हे तासं वेदमें कहेंहें सो लौकिक (जीव-  
विचारित) पुरुषार्थ हैं. यद्यपि सब ऋषि वेदकूं जानिवेवारें हैं तथापि तेसेंहि निरूपणकरिवेकी ईश्वरकी आज्ञा हे; तासं भिन्न निरूपण कियो हे ॥ ३ ॥

श्लोकः-लौकिकांस्तु प्रवक्ष्यामि वेदादाद्या यतः स्थिताः।  
धर्मशास्त्राणि नीतिश्च कामशास्त्राणि च क्रमात् ॥४॥  
त्रिवर्गसाधकानीति न तन्निर्णय उच्यते ॥

टीका-अलौकिक पुरुषार्थ तो वेदसं स्थित हैं तिनको विचार करिवेकी आवश्यकता नहिंहे क्यों जो जिनकों अलौकिक पुरुषार्थ सिद्धकरिवेकी इच्छा होय वे वेदमें लिखे-प्रमाण करें परंतु ये होयसके एसे नहिंहे ये जतायवेकेलिये स्थित हैं एसें कद्योहे इतने प्रचलित नहिंहे ? तासं लौकिक-पुरुषार्थकूं तो कहूंगो. तिनमें धर्मशास्त्र धर्मकूं सिद्धकरिवेवारे हैं, नीतिशास्त्र अर्थकूं सिद्धकरिवारे हैं और कामशास्त्र कामकूं सिद्धकरिवारे हैं ये धर्म, अर्थ और काम तीनों त्रिवर्ग कहें जायें हैं सो शुद्धभावचारे अनन्यभक्तनकों तो प्रभुहि सिद्ध करेहैं ओर साधारणभक्तनकों सिद्ध करें तो इतनेहीमें अटकजाय तासं तिनमें श्रमको प्रभु नाश करेहैं, तासं तिनको निर्णय (यहां) नहिंकेहोजाय हे ॥ ४ ॥

एसें त्रिवर्गकी व्यवस्थाको सूचनकरिकें  
मोक्षरूप फल एक हे किंवा अनेक हे ? एसें  
जानिवेकी इच्छा होय तहां कहतहें.

श्लोकः-मोक्षे चत्वारि शास्त्राणि लौकिके परतः स्वतः।  
द्विधा द्वे द्वे स्वतस्तत्र सांख्ययोगौ प्रकीर्तितौ ॥  
त्यागात्यागविभागेन सांख्ये त्यागः प्रकीर्तितः ॥६॥

टीका—लौकिकमोक्षमें द्योय शास्त्र परतः मोक्ष सिद्ध-  
करिवेवारे हैं और द्योय शास्त्र स्वतः मोक्ष सिद्धकरिवेवारे हैं  
ऐसें स्मार्तमोक्षविषयक चारों शास्त्र हैं. जामें शास्त्रमें कहीरीति-  
प्रमाण साधनकरिवेतें जीव कृतार्थ होय सो स्वतःमोक्षसाधक  
शास्त्र ओर जामें शास्त्रमें कहीरीतिप्रमाण साधनकरिवेतें कोउके  
प्रसादसँ जीव कृतार्थ होय सो परतःमोक्षसाधक शास्त्र हैं;  
तामें स्वतः(जीवके स्वाधीन) मोक्षमें त्याग ओर अत्यागके  
भेदसँ सांख्य ओर योगशास्त्र कहेंहैं इतने त्याग करिवेसँ  
मोक्ष सिद्ध होय ऐसों प्रतिपादन करिवेवारो एक शास्त्र हे  
तामें सांख्यशास्त्रमें त्याग कछो हे; इतने नित्यानित्यवस्तुको  
विवेक होय तत्र वैराग्य भयेसँ त्याग करे तत्र मोक्ष होय;  
ऐसें त्यागकरिकें मोक्ष जिवके स्वाधीन हैं ऐसो ब्रतायवेवारो  
सांख्यशास्त्र हे ॥५॥६॥

देहाधिक संघात विद्यमान हे तत्र त्यागमात्रते कैसे मुक्ति  
होय ? पत्नी शंकाकरिकें मुक्तिको प्रकार कहतहैं.

श्लोकः—अहंताममतानाशे सर्वथा निरहंकृतौ ॥

स्वरूपस्थो यदा जीवः कृतार्थः स निगद्यते ॥७॥

टीका—अहंताममताको नाश भयेतें सर्वथा अहंकारशून्य  
होयवेसँ जब जीव अपने स्वरूपमें रहे तब सो जीव कृतार्थ  
कछोजाय हे इतने स्थूल शरीर तथा लिंगशरीरकी अहंता ओर  
इनके परस्कर जो गुहादिक तथा प्राण इन्द्रिय प्रभृति हैं तिनमें

ममताको त्याग होय तब बुद्धितत्त्वमें जो प्रतिबिंब रह्यो हे तामें अभिमान मिटजाय तब कर्त्तापनो तथा भोक्तापनोहू मिटजाय तब जीव अपने स्वरूपमेंही प्रकाशमान होय सो जीव मुक्त भयो एसे सांख्याचार्यनने कह्यो हे ॥ ७ ॥

गौतमादिकनके मतमें जेसें वेदविरुद्ध अंश हे तेसें सांख्यमेंहु वेदविरुद्ध अंश हे तब सांख्यमें जो मोक्षको प्रतिपादन कियो हे तामें शिष्टनको आदर केसें हे ? ओर गौतमादिकेननें जो मोक्षको प्रतिपादन कियो हे तामें शिष्टनको अनादर बर्यो हे ? एसें जानिवेकी इच्छा होय तहां कहत हैं.

**श्लोकः—तदर्थं प्रक्रिया काचित् पुराणेऽपि  
निरूपिता ॥ ऋषिभिर्बहुधा प्रोक्ता फलमे-  
कमबाह्यतः ॥ ८ ॥**

टीका—अन्यथारूपको त्यागकरिकें अपने स्वरूपसूं जो स्थिति हे सो मुक्ति हे एसे मोक्षके लिये कोऊ प्रक्रियाको पुराणमेंहु निरूपण कियो हे ओर पुगण वेदके अर्थकी वृद्धि-करिकें स्पष्ट निर्णय करिवेवारो हे ताके अनुकूल सांख्यको मोक्ष तासूं तामें शिष्टनको आदर हे ओर गौतमादिकनने मोक्षको प्रतिपादन कियो हे सो पुराणसूं अनुकूल नही हे तासूं तामें शिष्टनको आदर नही हे. यद्यपि ऋषीननें बहोतप्रकारकी सांख्यकी प्रक्रिया कही हे तथापि निरीश्वर-

सांख्यसिवाय ओर सबनमें आत्मव्यतिरिक्तसबनको त्याग करनो ये अंतरंग साधन एक हे तथा अपने स्वरूपमें स्थितिरूप मोक्षफलहू एक हे तासूं बाह्यसांख्यसिवाय सब सांख्य शिष्टनकों आदर करवेयोग्य हे. अथवा पुराणोक्त सांख्यमें आत्मदर्शनरूप प्रथम एक फल होय हे ओर पीछें ज्ञानद्वारा मोक्षरूप दूसरो फल होय हे; तामें ऋषीनने जो विचार कियो हे चाको आत्मदर्शनरूप एक फल होय हे सोहू निरीश्वर-सांख्यसिवायके सांख्यको फल हे. निरीश्वर सांख्यको फल तो नरकप्राप्तिरूपहि हे ॥ ८ ॥

पदे स्वतः (स्वाधीन) मोक्षके साधक एक  
शास्त्रको निरूपण करिकें दूसरे  
शास्त्रको निरूपण करत हे.

श्लोकः—अत्यागे योगमार्गो हि त्यागोऽपि  
मनसैव हि ॥ यमादयस्तु कर्त्तव्याः सिद्धे  
योगे कृतार्थता ॥ ९ ॥

टीका—त्याग नहि करनो एसो साधन करनो होय तो तामें योगमार्ग हे. इतनें चित्तवृत्तिको निरोध कारकें आत्माको बोधक मार्ग हे सो पूरणसूं अनुकूल हे; तामें त्यागहू मनसं हि हे. यम, नियम, आसन, प्रणायाम, प्रत्याहार, ध्यान, धारणा ओर समाधिरूप साधन तो करने तब योग सिद्ध भयेसूं आत्माके स्वरूपमें स्थितिरूप मोक्ष सिद्ध होय ॥ ९ ॥

पसँ स्वतः ( जीवके स्वाधीन ) मोक्षमें दूसरे  
शास्त्रको निर्णय कियो, अब परतः ( पराधीन )  
मोक्षके दोय शास्त्रको निर्णय करिवेकेलिये  
तामें मोक्षको जो स्वरूप हे ताके निरू-  
पणपूर्वक बिस्तार बतावत हैं.

**श्लोकः—**पराश्रयेण मोक्षस्तु द्विधा सोऽपि  
निरूप्यते । ब्रह्मा ब्राह्मणतां यातस्तद्रूपेण  
सुसेव्यते ॥ १० ॥

टीका—पराश्रयकरिकें मोक्षतो शिव तथा विष्णुके आश्रयसं  
होय हे सोहू दोयप्रकारको निरूपित कियोजायहे. यद्यपि  
गुणावतारनमें ब्रह्माहू हैं ओर गुणाभिमानिपनेसं तीनो समान  
हैं तथापि सरस्वतीके शापादिकसं ब्रह्माको पूज्यनो मिटगयो  
हे तासं वेदके जानिवेपनेकूं अथवा परब्रह्म जानिवेपनेकूं अथवा  
ब्राह्मणकी जातिके अभिमानवारी देवतापनेकूं प्राप्त भयें हैं  
तिनकी सेवा ब्राह्मणरूपसं होय हे. इतने वेदादिक जानिवेके  
लिये किंवा ब्रह्मज्ञानके लिये किंवा ब्रह्मतेजकी प्राप्तिके लिये  
ब्रह्माजीकी सेवा ब्राह्मणस्वरूपसं होय हे मोक्षके लिये ब्रह्मा-  
जीको सेवन नही हे क्यों जो ब्रह्माजीको कार्य सृष्टि करिवेको  
हे ओर मोक्ष हे सो सृष्टिकार्यसं विरुद्ध हे; तासं ब्रह्माजी  
मोक्षकूं नहिं देयें हैं ॥ १० ॥

ब्रह्माजी मोक्षकूं नही देतहैं तामें प्रमाण कहतहैं.

**श्लोकः—**ते सर्वार्था न चाद्येन शास्त्रं किञ्चिदुदीरितम् ।

अतः शिवश्च विष्णुश्च जगेतो हितकारकौ । ११ ।

वस्तुनः स्थितिसंहारौ कार्यौ शास्त्रप्रवर्तको ।

टीका—ये ( धर्म, अर्थ, काम, मोक्षरूप ) सब अर्थ ब्रह्माजीसँ प्राप्त नहि होय. अर्थात् दोय तीन अर्थ प्राप्त होय. अथवा ब्रह्माजीकँ सेववेवारे सबअर्थवारे नहि होयहँ. किंतु यद्किञ्चित् अर्थवारे होयँ हँ ओर विननेँ वैखानसमंत्ररूप शास्त्र कलुक कह्यो हे; तासँ शिव ओर विष्णु जगतको हितकरिवेवारे हँ ओर वस्तुको पालन विष्णुको अवश्य कर्त्तव्यहे तथा वस्तुको संहार शिवजीको अवश्य कर्त्तव्य हे. तेसँ चतुर्वर्गविषयक शास्त्रके प्रवर्तक ये दोऊ हँ; तामें जेसो जाको अधिकार हे ताप्रमाण प्रवृत्ति होय एसे शास्त्र करिवेवारे दोऊ हँ ॥११॥

शिवजीके शास्त्रमें शिवजीको सर्वात्मकपनो कह्योहे ओर

विष्णुके शास्त्रमें विष्णुको सर्वात्मकपनो कह्योहे तब

विष्णुको पालनरूप एक कार्य हे ओर शिवजीको

संहाररूप एक कार्य हे एसँ कसँ संभवे ?

एसी शंका होय तहां कहत हे.

**श्लोकः—**ब्रह्मव तादृशं यस्मात्सर्वात्मकतयोदितौ । १२ ।

टीका—अथर्वशिरश्चेताश्वतर प्रभृति उपनिषदनमें शिवरूपसँ

ओर महानारायणोपनिषदनारायणोपनिषत्प्रभृतिउपनिषदनमें

विष्णुरूपसँ ब्रह्मकोहि प्रतिपादन हे तिनसँ अविरोद्धतासँ पाशुपत

तथा पंचरात्रादिकनमें, जासूं सर्वात्मकपनेसूं दोऊको निरूपण हे तासूं ब्रह्म तेसो हे ॥१२॥

श्लोकः—निर्दोषपूर्णगुणता तत्तच्छास्त्रे तयोः कृता ।

भोगमोक्षफले दातुं शक्तौ द्वावपि यद्यपि ।१३।

भोगः शिवेन मोक्षस्तु विष्णुनेति विनिश्चयः ॥

टीका—शिवजीके (पशुपतादिक) शास्त्रमें शिवजी, निर्दोष-पूर्णगुण हैं एसें निरूपण कियोहे ओर विष्णुके (पंचरात्रादिक) शास्त्रमें विष्णु निर्दोषपूर्णगुण हैं एसें निरूपण कियोहे सोहू शिवरूपसूं तथा विष्णुरूपसूं परब्रह्मकोहि निरूपण हे गुणावतारनके जभिप्रायसूं नहिं हे; तासूंहि महाभारतमें मोक्षधर्ममें कह्योहे जो सांख्य, योग, पंचरात्र, वेद तथा पाशुपत ये पांचोको निष्ठा अंते नारायण प्रभु हैं; परंतु या अभिप्रायकूं नहिं जानिवेवारे अज्ञानी हैं तासूं तिनमें जा जा देवताको प्रतिपादन हे सो सो देवताहि अंते निष्ठारूप हे एसें माने हैं तासूं विनकूं फलहू तिन तिन देवतानमें सायुज्यादिक होय हे परंतु भगवानको आनंद अथवा भजनानंद नहिं मिले हे. यह जीवविचारित लौकिक मोक्षको निरूपण कियो तामें शिव तथा विष्णुके भजनको फल एक हे किंवा भिन्नभिन्न हे एसें जानिवेकी इच्छा होय तहां कहत हैं जो भोग तथा मोक्ष देवेमें यद्यपि दोऊ समर्थ हैं तथापि शिवजीके भजनतें भोग



ओर विष्णुके भजनते मोक्ष मिले हैं; एसे विशेष निश्चय हे। सो श्रीभागवतदशमस्कंधके ८८ में अध्यायमें कह्यो हे जो शिवजी शक्तियुक्त हैं ओर गुणनकरिके आवृत हैं तासूं शिवजीके भजनते गुणनकी विभूतीनको भोग मिले हे ओर हरि साक्षात् निर्गुण मायाते पर हैं तिनके भजनते निर्गुण होय अर्थात् मोक्ष मिले हे; तासूं श्रुतीनमें तथा पुराणादिकनमें कोउ कोउस्थलमे शिवजी मोक्ष देय हैं तथा विष्णु भोग देय हैं एसे लिख्यो हे सो एसो सामर्थ्य बतायवेके लिये हे देवेके अभिप्रायसूं नहिं हे ॥१३॥

शिवजी भोग देयें हैं ओर विष्णु मोक्ष देयें हैं तामें बालकनकेहु समझिवेमें आवे एसी युक्ति कहत हैं.

**श्लोकः—**लोकेऽपि यत्प्रभुर्भुक्ते तन्न यच्छति  
कहिंचित् ॥ १४ ॥

टीका—लोकमेंहु एसी रीति हे जो स्वामी होय सो अपने भोगवेकी जो वस्तु होय सो ओरकूं नहिं देयें हे तेसें शिवजी सदा वैराग्ययुक्त रहिकें मोक्षकूं भोगवे हैं ओर विष्णु सर्वदा लक्ष्मीजीके संग भोग भोगवे हैं तासूं शिवजीकूं भोग्य मोक्ष हे सो ओरकूं देयें नहिं ओर विष्णुकूं भोग्य भोग हे सो ओरकूं देयें नहिं ये लौकिक युक्ति बताई परंतु वास्तविक अभिप्राय एसो हे जो शिवजि घोरशक्तिसहित फिरें हैं तथा

विनके उपासक तामस होयहें तासूं शिवजी मोक्ष नहिं देयें हैं ओर भगवद्भक्त निर्गुण हैं तिनकों लौकिक समृद्धि देवेतें विनको पात होय एसें जिनकूं जाने तिनकों भगवान् भोग नहिं देयेंहें. ओर जिनकों समृद्धिको मद होय नहिं एसें जाने तिनकों ( श्रीदामाकी नाई ) भोगहू देयेंहें सो अगाडी आवेगो जो अतिप्रियकों देत हैं. अथवा वैष्णवजनकों मोक्षकी इच्छा तो हे नहिं तासूं वे विष्णुको भजन नहिं करेगें ओर भगवत्सेवामें भोग सिद्ध होय एसी समृद्धिकी इच्छा हे तासूं शिवजीको भजन करेगें एसी शंका होय तहां कहत हैं जो लोकमेंहू प्रभु (सेवकके पति) श्रीकृष्ण, भक्तसंबंधी जो वस्तुको अंगीकार करेहें सो वस्तु कोउत्रिरियां शिवजी नहिं देयहें; क्यों जो भगवान् भक्तकामपूरकहें ओर विनकी भक्ति कल्पवृक्षसदृशहे सो सबइच्छा पूर्ण करतहें तेसें प्रभुकी भक्तिसूं जो प्राप्त होयहे ताकूं अलौकिकपनो हे ओर अलौकिककोहि प्रभु अंगीकार करेहें तासूं लोकमेंहू प्रभुकों अंगीकारकरिवेकी वस्तु अलौकिक हे सो शिवजी नहिं देत हैं प्रभुहिं देत हैं ॥ १४ ॥

शिवजी मोक्षकूं नहिं देतें तो पाशुपत विष्णु, भोग नहिं देतें होय तो " पुत्र, धन, स्त्री, हार, मेहेल, घोडा, हाथी, भुख, स्वर्ग ओर मोक्ष हरिभक्ततें दूर नही हे' इत्यादिक वाक्यनमें भगवद्भक्तितें ऐहिक पारलौकिक सब सुख मिलवेको

लिख्यो हे तामें बाध भावेगो पसी शंका  
होय ताकी निवृत्तिके लिये कहत हैं.

**श्लोकः—अतिप्रियाय तदपि दीयते क्वचिदेव हि ।**

**नियतार्थप्रदानेन तदीयत्वं तदाश्रयः ॥१५॥**

**प्रत्येकं साधनं चैतद्वितीयार्थं महान् श्रमः ।**

टीका—शिवजीकूं जो अत्यंत प्रिय होय ताकूं शिवजी कोऊ समय मोक्ष देत हैं ओर विष्णुकूं जो अत्यंत प्रिय होय ताकूं विष्णु भोग देत हैं ये बातहू लोकसिद्ध हे तासूं शिव ओर विष्णुमें भोग तथा मोक्ष दौय देवेकी शक्ति हे क्यों जो तिनके भक्त होय ओर तिनको आश्रय करिके अति प्रिय जब होय तब शिवजी तथा विष्णु दोऊ वाभक्तको जेसो अधिकार होय ताके अनुसार भोग ओर मोक्ष देत हैं. अथवा शिवजी भोगकूंहि देते होय तब विष्णुके भक्तनकूंहू भोगके लिये शिवजीकी भक्ति तथा आश्रय करनो पडे ओर शिवजीके भक्तनकों मोक्षके लिये विष्णुको आश्रय करनो पडे; तासूं जो अत्यंत प्रिय होय ताकूं दौय पदार्थ दोऊ देत हैं. भगवद्भक्त न होय सो भोगकी इच्छा होय तो शिवजीको भजन करे तथा मोक्षकी इच्छा होय तो विष्णुको भजन करे ओर जो भगवद्भक्त होय ताकूं तो सब पदार्थ भगवानसूंहि सिद्ध होय तासूं प्रत्येककों अतिप्रियपनो होय तेसैं तदीयपनो तथा तिनको आश्रय करनो येही साधन हे; चाही साधनसूं सब सिद्ध होय

परंतु शिवजीकों मोक्ष देवेमें तथा विष्णुकों भोग देवेमें बड़ो श्रम होय हे. अथवा शिवभजन भोगकूं सिद्ध करे हे ओर विष्णुभजन मोक्षकूं सिद्ध करे हे ये प्रत्येक साधन हे एसें लौकिक मोक्षकी व्यवस्था कही ओर अलौकिक मोक्ष भक्ति मार्गीय हे ताके लिये जो श्रम हे सो साधनसूं, फलसूं, तथा स्वरूपसूं अति उत्तम हे. ॥ १५ ॥

शिवजीकों मोक्ष देवेमें तथा विष्णुकों भोग देवेमें बड़ो श्रम हे एसें कह्यो ताको कारण कहत हैं

श्लोकः ॥ जीवाः स्वभावतो दुष्टा दोषाभावाय  
सर्वदा ॥१६॥

श्रवणादि ततः प्रेम्णा सर्वं कार्यं हि सिध्यति ।

टीका—जीव भगवानके अंश हैं तासूं स्वरूपसूं दुष्ट नहिहैं परंतु स्वभावसूं दुष्ट भयें हैं; वादोषकी निवृत्तिके लिये सर्वदा श्रवणादिक करनों ताकारिकें प्रेम होय ओर प्रेमसूं सब कार्य सिद्ध होय हे. इतने श्रुतिमें लिख्यो हे “ जो स्वभावसूं देव, मनुष्य ओर असुर एसें तीनप्रकारके जीव हैं ” तेसें मत्स्यपुरायमें संकीर्ण, सात्विक, राजस ओर तामस एसें चारप्रकारके कल्प बतायकें “ अग्नि तथा शिवको माहात्म्य तामसमें अधिक कह्यो हे, ब्रह्माको माहात्म्य राजसमें अधिक कह्यो हे, सरस्वती तथा पितृको माहात्म्य संकीर्णमें अधिक

कह्यो हे ओर सात्विकमें हरिको माहात्म्य अधिक कह्यो हे ”  
 ऐसे चार्योंके लक्षण बतायके सांत्विकनमें मोक्षफल सहजमें  
 होय हे ऐसे लिख्यो हे. तेसें विष्णुभक्तिकरिवेवारे सात्विक  
 हैं ओर शिवभक्तिकरिवेवारे तामस हैं ऐसे वामनपुराणमें  
 दशमाध्यायमें लिख्यो हे तासूं विष्णुभक्ति करिवेवारे सात्विक  
 होयें हैं तिनकों सत्वगुणकी निवृत्ति होयके शीघ्रही गुणातीत-  
 पनो होयवेसूं मोक्ष होय तामें विष्णुकों श्रम न होय ओर  
 भोग देवेमें तो तिनको शांत स्वभाव होय सो फिरावनो पडे  
 तामेंहू भोगमें आसक्ति होयके दोष उत्पन्न न होय एसो  
 स्वभाव करिवेमेंहू विष्णुको श्रम होय तेसें शिवजीके भक्त  
 तामस होय हैं तिनकों तो तमोगुणके, रजोगुणके ओर सत्व-  
 गुणके धर्म मिटावे तब गुणातीतपनो होय तब मोक्षहोय तामें  
 शिवजीकों श्रम होय ओर तामसस्वभाववारेनकों भोग देवेमें  
 भक्तनको स्वभाव फिरावनो नहिं पडेहे तासूं शिवजीकों श्रम  
 न होय. तासूं जीवनके दोषकी निवृत्तिकेलिये श्रवणादिक  
 सर्वदा करनों तासूं प्रेम होय ताकरिकें तदीयत्व ओर तदा-  
 श्रयत्व सिद्ध होय. अथवा जीव भगवानके दास हैं तिनकों  
 भगवत्सेवा करनी ये स्वधर्म हे सो नहिं करत हैं तासूं दोषयुक्त  
 भयें हैं वादोषकी निवृत्तिके लिये श्रवणादिक करनों तासूं  
 भगवानमें प्रेम होय ओर प्रेमकरिकें सबकार्य सिद्ध होय  
 हे ॥ १६ ॥

पसैं सामर्थ्य तथा साधनकी व्यवस्था बतायकें  
ताकरिकें जो सिद्ध भयो सो कहत हें.

**श्लोकः-मोक्षस्तु सुलभो विष्णोर्भोगश्च शिवतस्तथा ॥  
समर्पणेनात्मनो हि तदीयत्वं भवेद् ध्रुवम् ॥१७॥**

टीका-उपर द्वितीय अर्थमें श्रम बताया हे तासूं मोक्ष तो  
विष्णुसूं सुलभ हे ओर भोग शिवसूं सुलभ हे और अतिप्रियत्व  
होयवेके लिये आत्माको समर्पण करे ताकरिकें निश्चित  
तदीयपनो होय, क्यों जो मेरो ओर मेरे ममताविषयक जिनने  
हैं तिनको, प्रभु इच्छाप्रमाण विनियोग करो एसी बुद्धि  
आत्मसमर्पणमें कारण हे सो जत्र होय तत्र तदीयपनो निश्चित  
होय ॥ १७ ॥

आत्मसमर्पण कियेतें तदीयपनो होय पसैं कद्यो तत्र  
आत्मसमर्पणन द्वि कियो होय ओर केवल आश्रयमात्र  
होय तामें उपरवताई पसी बुद्धि जाकी भई  
न होय तासूं तदीयपनोहु भयो न होय  
ताकूं फलसिद्धि केमें होय ? पसैं  
जानिवेकी ईच्छा होय तहां  
कहत हें.

**श्लोकः-अतदीयतया चापि केवलश्चेत्समाश्रितः ॥  
तदाश्रयतदीयत्वबुद्धयै किंचित्समाचरेत् ॥  
स्वधर्ममनुतिष्ठन्वै भारद्वागुण्यमन्यथा ॥१९॥**

टीका—तदीयपनो भयो न होय ओर. केवल ( प्रभु मेरे रक्षक हैं ऐसे अनुसंधानवारो ) आश्रित होय तोहू अपने वर्णाश्रमके धर्मको आचरण करे ओर आश्रय तथा तदीयपनेकी बुद्धि होयबेकेलिये कछुक श्रवणादिक करे; क्यों जो वर्णाश्रमधर्म करे नहिं ताके अधर्मको दोष, तथा उपर बतायेप्रमाण जीव स्वभावतें दुष्ट हैं सो स्वभावकृत दोष मिलकें द्विगुण (दुगुणो) दोष होय तत्र ताको उद्धार करिवेवारे (प्रभु) काँ श्रम अतिबडो होय. अथवा “ वर्णाश्रमधर्म छोडिकें प्रभुके चरणको भजन करतो होय सो अपूर्ण रहे तोहू ताको अकल्याण न होय ओर भगवच्चरणको भजन करते न होय तिनकाँ वर्णाश्रमके धर्मसू कहा अर्थ प्राप्त होय हे ? कछू नही ” ऐसे प्रथमस्कंधमें नारदजीको वाक्य हे तासू वर्णाश्रमके धर्म करतें करतें हू आश्रय तथा तदीयपनेकी बुद्धिकेलिये श्रवणादिक करनाँ. तेसैं करे नहिं ओर केवल वर्णाश्रमधर्म करे तो तासू कछू फल न होय ओर आश्रय तथा तदीयपनेकी बुद्धिकेलिये श्रवणादिक करे नहिं इतने प्रभुहू उद्धार न करें ऐसे दुगुणो भारहोय. अथवा भक्तिमार्गमें श्रीआचार्यजीद्वारा प्रभुकी शरणगति करनी येही जीवको स्वधर्म हे सो स्वधर्म करे ओर आश्रय तथा तदीयपनेकी बुद्धिकेलिये श्रवणादिक करे तो फलसिद्धि होय ओर ऐसे न करे तो दुगुणो भार होय इतने श्रवणादिक साधन करे ताको फल न होय ओर

भक्तिमार्गीय धर्मको आचरण नहीं करिवेसूं प्रत्यवाय होय ॥ १९ ॥

एसे बालकनको बोध होयवेकेलिये संक्षेपमें  
निरूपण करिकें उपसंहार करतहैं.

श्लोकः—इत्येवं कथितं सर्वं नैतज्ज्ञाने भ्रमः पुनः ।  
इतिश्रीमद्वल्लभाचार्यविरचितो बालबोधः समाप्तः ।

टीका—एसे पूर्वोक्तप्रकारसूं अपने ओर दूसरेनके सिद्धांतके संग्रहरूप सब कहोहे ताको ज्ञान होय तो पुरुषार्थनके स्वरूप समझिवेमें अन्यथाज्ञान फिर न होय इतने प्रथम जो अन्यथाज्ञान होय सो यामें लिखेप्रमाण समझे तो पीछें अन्यथाज्ञान न रहे. ॥

इति श्रीमद्गोस्वामिश्रीनृसिंहलालजीमहाराज-  
विरचित बालबोधकी ब्रजभाषामें  
संक्षेपभावार्थटीका संपूर्ण भई ।





श्रीकृष्णाय नमः श्रीगोपीजनवल्लभाय नमः ॥

## अथ सिद्धांतमुक्तावलीकी ब्रजभाषामें संक्षेपसू भावार्थटीका लिखी हे ॥

निबंधमें भगवानकी प्राप्तिकेलिये वैदिकमार्ग तथा भक्ति-  
मार्गको निरूपण कियो हे ओर दशमस्कंधके श्रीसुबोधिनीजीमें  
स्वतंत्रभक्तिमार्गको निरूपण कियो हे. सो भगवत्प्राप्तिकेलिये  
तीनोमार्गनमेंसू अमुककूं अमुकमार्ग मुख्य हे एसें बतायवेके-  
लिये हे किवा तीनानमें अमुकमार्ग मुख्य हे एसें बतायवेके  
लिये हे ? एसो संदेह अपने भक्तनकूं होय. तेसें वाके प्रसंगमें  
सेवाको स्वरूप कहाहे ? ओर वाके अधिकारी कौन हें ?  
इत्यादिकहू संदेह होय ताकी निवृत्तिके लिये यह (सिद्धांत-  
मुक्तावली ) ग्रंथ श्रीआचार्यजी महाप्रभुजी करत हें.

श्लोकः—नत्वा हरिं प्रवक्ष्यामि स्वसिद्धांतविनिश्चयम् ।

कृष्णसेवा सदा कार्या मानसी सा परा मता ॥१॥

टीका—भक्तनके दुःख तथा पापकूं हरिवेगारे प्रभूनको  
नमन करिकें अपने सिद्धांतको विशेषकरिकें जो निश्चय कियो  
हे सो कहूंगो. यहां विशेषकरिकें निश्चय कियो हे एसें कह्यो  
हे ताको अभिप्राय एसो हे जो श्रीभागवतद्वितीयस्कंधमें  
कह्योहे जो “ भगवाननें तीनविरियां वेद देखिकें यह निश्चय

कियो जो आत्मारूप भगवानमें प्रीति होय एसो साधन करनों-  
येहि समग्रवेदको अभिप्राय हे. " सो निश्चय जतावत हैं जा  
श्रीकृष्णकी सेवा सदा करनी सो तनुजा, वित्तजा तथा मानसी  
एसें तीन प्रकारकी हे; तामें मानसी फलरूप मानी हे श्रीकृष्ण  
फलात्मक हे तिनकी सेवा सदा करनी एसें कह्यो हे; ताको  
अभिप्राय एसो हे जो सेवाकरिकें ओर फलकी इच्छा नहि  
राखनी सेवाही स्वतः फलरूप हे. सदा सेवाकरिवेको लिख्यो  
हे ताको अभिप्राय एसो हे जो अपनमें दासपनेको अनुसंधान  
करिकें, सेवा हे सो स्वतंत्र फलरूप हे ओर जीवनकों अवश्य  
कर्तव्य हे एसें समझकें सर्वकाल सेवा करनी ॥ १ ॥

सदा सेवा करनी एसें लिख्यो हे सो राजाकी अथवा  
गुरूनकी सेवा शरीरसुं मनुष्य करत हैं तेसेही  
प्रभूनकी सेबाहू शरीरसुंदि करिवेको सिद्ध  
होय हे सो सर्वकाल कैसें बनें ? एसी  
शंका होय तहां कहतहैं.

**श्लोकः—चेतस्तत्प्रवणं सेवा तत्सिद्धयै तनुवित्तजा ।**

**ततः संसारदुःखस्य निवृत्तिर्ब्रह्मबोधनम् ॥२॥**

टीका-श्रीकृष्णमें चित्त, प्रथम कलुक लग्न होय, पिछें  
श्रीकृष्णके आधीन होय ओर तापिछें श्रीकृष्णमें एकतानरूपकूं  
प्राप्त होय (इतने तल्लीन होय) सो सेवा कहियें, एसी सेवा  
सिद्धहोयवेके लिये तनुवित्तजा सेवा हे; अर्थात् श्रीकृष्णमें  
चित्तकी एकतानता होयवेकेलिये तनुजा (शरीरसुं) तथा  
पो. ३

वित्तजा (धनसूँ) सेवाहे. यहाँ तनुजा तथा वित्तजा एसें भिन्न भिन्न पद नहिं कहेंतें तनुवित्तजा एसें समस्तपद कह्यो हे ताको अभिप्राय एसो हे जो अन्यकूं मूल्यरूप धन देकें सेवा करावे सो वित्तजा सेवा भई; परंतु ताकरिके राजस आयजाय तासूं मानसी सेवा सिद्ध न होय ओर मूल्यरूप धन लेकें शरीरसूं सेवा करे सो तनुजा सेवा भई; परंतु सोहू मानसी सेवाकूं सिद्ध नहिं करे हे. जेसें यज्ञमें जिनने ब्राह्मणनको वरण हीय तिनकों यज्ञकों फल नहिं होय हे तेसें हि मूल्य लेकें सेवा करे ताकों तनुजासेवाको फल (मानसी) सिद्ध न होय, तासूं भगवानमें निष्काम स्नेह होय ओर शरीरसूं तथा धनसूं संगहि जो सेवा करे, ताकूं मानसी सिद्ध होय; तासूं अहंताममतात्मक संसारके दुःखकी निवृत्ति ओर अपनो आत्मा तथा ये प्रपंच सब अक्षरब्रह्मात्मक हे एसो ज्ञान होय. यद्यपि भगवत्सेवामें जाको अभिनिवेश हे ताकूं इनफलनकी इच्छा नहिं हे तथापि मानसी सेवाहि एसी हे जो संसारके दुःखकी निवृत्ति तथा सर्व अक्षरब्रह्मरूप हे एसो ज्ञान ये दियो याके अशांतर फल हे तिनकूं तो सिद्ध करेहि हे ॥ २ ॥

अक्षरब्रह्म हे सोहि परब्रह्म हे एसें कोउके मनमें आवे तासूं कहत हे.

श्लोकः—परं ब्रह्म तु कृष्णो हि सच्चिदानंदकं बृहत् ।  
द्विरूपं तद्धि सर्वं स्यादेकं तस्माद्विलक्षणम् ॥३॥

टीका—श्रीयशोदोत्संगलालित श्रीकृष्णहि परब्रह्म हे; क्यों जो आपतो पूर्णानंद हैं ओर अक्षरब्रह्मके आनंद गिनतीमें आवे हे सो तैतरीयउपनिषदमें आनंदकी गिनती करी हे तामें मनुष्यनके आनंदसूं लेकें अक्षरब्रह्मताई सोगुने आनंद गिनेहैं सो अक्षरब्रह्मताई गिने हे तापिछें मन ओर वाणीमें आवे नहिं एसो (अगणित) आनंद लिख्यो हे, तासूं श्रीकृष्णमें अगणित आनंदहे ओर अक्षरब्रह्ममें गिनतीमें आवे तितनो आनंद हे. सो अक्षरब्रह्म दोयरूपवारो हे तामें सर्व प्रपंचात्मक इतने जगतमे जितने नामरूप हैं सो अक्षरब्रह्मकोहि एकरूप हे ओर दूसरो रूप प्रपंचसूं विलक्षण हे; अर्थात् श्रुतिनमें जाको प्रतिपादन हे, ज्ञानी जाकी उपासना करें हैं, ज्ञानीनकी मुक्तिको जो स्थान हे ओर श्रीपुरुषोत्तमके रहिवेको जो स्थान हे सो अक्षरब्रह्मको दूसरो स्वरूप हे ॥ ३ ॥

विरोध मिटायवेके अर्थ अपनो सिद्धांत कहिवेकूं  
ओरनके मतनको स्वरूप बतावत हे.

श्लोकः—अपरं तत्र पूर्वस्मिन् वादिनो बहुधा जगुः ।  
मायिकं सगुणं कार्यं स्वतंत्रं चेति नैकधा ॥४॥

टीका—अक्षरब्रह्म जगतके रूपसूं प्रकट भयो हे तामें बहोत वादीलोग वेदमतसूं भिन्न मत कहत हैं. रस्सीमें सर्पकी भ्रांति होय हे, अथवा शुक्तिका (सीप) में रजत (चाँदी) की भ्रांति होय हे तेसैं निर्गुणब्रह्ममें जगतकी भ्रांति भई हे, अथवा

मायायुक्त ईश्वरनें जगत् बनायो हे, एसें मायावादी मानें हैं. ओर सांख्यमतवारे एसें मानें हैं जो सत्वगुण, रजोगुण तथा तमोगुण, इन तीन गुणनसं जगत् भयो हे. सांख्यमत कहिवेसूं पतञ्जल (योगशास्त्र) मतहू यामें आयगयो ओर तर्कशास्त्रवारे एसें कहें हैं जो पृथिवी, जल, तेज तथा वायु, इन सबनके परमाणु (अत्यंत झीणे झीणे कण) को संयोग ईश्वरकी इच्छासं इनमें क्रिया उत्पन्न होयकें होय हे तब आपसमें मिलवेसूं कार्यरूप ये जगत् भयो हे. तार्किकमत कहिवेसूं जो जगतमें सातही पदार्थ हैं एसो प्रतिपादन करें हैं जाके प्रवर्तक गौतम ऋषि हैं एसो न्यायमत तथा जगतमें सातही पदार्थ हैं एसो जो प्रतिपादन करें हैं जाके प्रवर्तक कणाद मुनि हैं एसो वैशेषिकमतहू यामें आयगयो. ओर कर्ममार्गवारे मीमांसक एसें कहे हैं जो ये जगत् जेसो दीखे हे तेसोहि जगत् सर्वदा-संहि चलयोहि आवे हे याको कोउ कर्त्ता होइ नहिं. मूलमें चकार हे तासूं बौद्ध, आर्हत, लोकायतिकप्रभृतिनामिकमत तथा वाम शाक्तादि मत आयगये. एसें अनेकप्रकारसं कहतहैं. ॥४॥

परंतु ये मत वेदसूं भिन्न हे तासूं एसें वेदमतसूं भिन्नमतको निरूपण जो करेंहैं तिनको खंडनतो वेदके बलसंहि होयजायहे तासूं जूदो खंडन करिवेकी प्रयोजन नहिंहे एसें अभि-  
 प्रायसूं वेदके सिद्धांतरूप स्व-  
 सिद्धांतको निरूपण करतहैं.

श्लोकः—तदेवैतत्प्रकारेण भवतीति श्रुतेर्मतम् ।

द्विरूपं चापि गंगावज्ज्ञेयं सा जलरूपिणी ॥५॥

माहात्म्यसंयुता नृणां सेवतां भुक्तिमुक्तिदा ।

मर्यादामार्गविधिना तथा ब्रह्मापि बुद्ध्यताम् ॥६॥

टीका-जाको वेदमें प्रतिपादन हे सोहि अक्षरब्रह्म नामरूपात्मक जगतके प्रकारसं होय हे अर्थात् प्रपंचसं भिन्न जो अक्षरब्रह्मको स्वरूप उपर कछोहे सोहि अक्षरब्रह्म याजगतके रूपसं होयहैं जैसे गंगाजीके जाधिभौतिक ओर आध्यात्मिक दोय रूप हे तामे जो वृष्टिसं बड़े है ओर धूपसं घटेहे सो जलरूपहे सो गंगाजीको आधिभौतिकरूप हे ओर जो तीर्थरूप हे जाके माहात्म्यको निरूपण हे सो गंगाजीको आध्यात्मिकरूप हे जो मर्यादामार्गके विधिसं सेवन करिवे-वारेनकों भोग ओर मोक्ष देतहे, इतने तीर्थरूप जो आध्यात्मिक स्वरूप हैं सो प्रवाहमेंहि रहतहे; तासं प्रवाहमेंते जल भरिकें दूसरे देशमें लेजाय सो जलमें तारतम्य नहिहे. जलतों वोही हे तथापि वहां वाजलके स्नानादिकसं तीर्थ-स्नानादिकको फल होय एसो कोउ ग्रंथमें दीखवेमें नहि आवेहे तेसें वाजलसं तेसोहि फल होतो तो राजा तथा ओर द्रव्यपति-प्रभृतीनकों वहां जायवेको प्रयोजनहि नहि रहतो; तासं प्रवाहमेंहि तीर्थस्नानफल लिख्योहे सो तीर्थरूप गंगाजी

जलरूपसं भिन्न हे, तैसें अक्षरब्रह्म जगद्रूपहे ओर अजगतसं भिन्नहूहे. एसें जाननो ॥ ५ ॥ ६ ॥

अब आधिदैविक रूपको निरूपण करत हे.

श्लोकौः—तत्रैव देवता मूर्त्तिर्भक्त्या या दृष्यते  
क्वचित् ॥ गंगायां च विशेषेण प्रवाहाभेदबुद्धये । ७ ।  
प्रत्यक्ष सा न सर्वेषां प्राकाम्यं स्यात्तया जले ॥  
विहिताच्च फलात्तद्धि प्रतीत्यापि विशिष्यते । ८ ।

टीका—उपर गंगाजीको जो आधिभौतिक ओर आध्यात्मिक रूप कह्यो तामेहि देवतारूप गंगाजी भिन्न हे सो मूर्त्ति हे इतने मीष्मपितामहकी माता जो भई हती ओर भगीरथराजकों जाको दर्शन भयो हतो सो गंगाजीकी आधिदैविक मूर्त्ति हे सो भक्तिकरिकें कोउ गंजाद्वारप्रभृति स्थलमें अथवा गृहादिकमें भक्तिकी वृद्धि होय तब दीखवेंमें आवतहे. सो देवतारूप गंगाजी प्रवाहसं भिन्न नहिहे एसी जाकी बुद्धिहे तार्का प्रवाहमेंहि देवतारूप गंगाजी प्रत्यक्ष होयहे ताकरिकें निषिद्धि नहि एसो बहोत व्यवहार वाजलमें होय हे एसें जगतमेंहि भगवानके स्वरूप तथा भगवद्भक्तमें विशेष स्नेह

१ गंगाजीके दृष्टांतसूं एसो सिद्ध भयो जो तीर्थरूपकी उपासनासूं जो फल होयहे सो जगतकी उपासनासूं नहि होयहे तैसें अक्षरब्रह्मको उपासनासूं जो फल होयहे सो जगतकी उपासनासूं नहि होयहे.

होय तब भगवानसूं भिन्न नहिं हे एसी जाकी बुद्धि भई होय ताकेलिये भगवान् प्रकट होयहे तब अपने इच्छित प्रभुको यह स्थान हे एसो ज्ञान होय तब सर्वस्थलमें भगवद्भाव स्फुरायमान होय हे; इतने तेसी भक्तिकरिकें गंगाजीको दर्शन भयो तापिछे स्वर्ग ओर मोक्षरूप फल शास्त्रमें कहेहे तासूंहू ओर प्रतीतिकरिकेंहू प्रवाहरूपको दर्शन वाकों विशेष जानिवेमें आवतहे. तेसैं जगतमें भगवानको साक्षात्कार भये पिछें ज्ञानिकोफल मोक्षहे तासूंही ( जगतमें ) सर्वत्र भगवानको यह अधिष्ठानहे एसो ज्ञान विशेष हे एसे जानिवेमें आवत हे तब सर्वत्र अनिषिद्ध इच्छानुकूल व्यवहार होय हे ॥ ७ ॥ ८ ॥

श्लोकः—यथा जलं तथा सर्वं यथा शक्ता तथा बृहत् ॥

यथा देवी तथा कृष्णस्तत्राप्येतदिहोच्यते ॥ ९ ॥

जगत्तु त्रिविधं प्रोक्तं ब्रह्मविष्णुशिवास्ततः ॥

देवतारूपवत्प्रोक्ता ब्रह्मणीत्थं हरिर्मत ॥ १० ॥

टीका—जेसैं गंगाजीको प्रवाहरूप जलहे तेसैं यह सब जगत् हे, जेसैं ( पाप मिटायवेमें तथा फल देवेमें ) समर्थ तीर्थरूप गंगाजी हे तेसैं अक्षरब्रह्महे ओर जेसैं मूर्तिवारी गंगाजी देवी हे तेसैं श्रीकृष्ण हे; इतने गंगाजीको दर्शन जिनकां भयो होय तिनकां जेसैं जल; गंगाजीको स्थान हे एसो ज्ञान तासूं अनिषिद्ध इच्छानुसार व्यवहार होयहे ओर



तीर्थके दर्शनमें अन्यसू अतिकपनेको ज्ञान होत हे तेसें भगवत्स्वरूप तथा गुरुप्रभृति करिके जिनको जगतमें भगवानके दर्शन भये हैं, तिनको सबजगतमें प्राणिमात्रमें भगवद्भावकी स्फूर्ति होय हे ओर अक्षरब्रह्मवारेनके ज्ञानीनके मोक्षसू हू अधिक भगवद्भावपनेको ज्ञान होय ये फल होय हे. ओर जिनको गंगाजीको दर्शन नहिं भयो हे ओर आप श्रद्धावारे हैं तिनको जेसें जलमें श्रद्धासहित स्नानादिव्यवहार होय हे ओर तीर्थकरिके जलमें अन्यसू अधिकताको ज्ञानरूप फल क्रमसू होय हे तेसेंहि जगतमें भगवानके दर्शन जिनको नहिं भये हैं ओर आप श्रद्धावारे हैं तिनको भगवानके स्वरूपादिकनमें श्रद्धापूर्वक सेवादिव्यवहार होय हे ओर अक्षरब्रह्ममें ज्ञानीनके मोक्षसू अतिकपनेसू भगवानके धामपनेको परोक्षज्ञान होय हे; तामें आधिदैविकके दृष्टांतके विचारमेंहू यासिद्धांतमें यह कह्योजाय हे जो जगत् तो त्रिगुणात्मक कह्यो हे क्यों जो तीनस्वभाववारो प्रकट भयो हे तासू अक्षरब्रह्मके अंशरूप ब्रह्मा, विष्णु ओर शिव ये तीनो तीनगुणके नियामक भगवानने किये हैं सो कूर्मपुराणादिकनमें आधिदैविकपनेसू कहे हैं परंतु भगवाननेहि आधिदैविकजेसे किये हैं तासू भगवान् एकहि नियामक हैं. त्रिगुणात्मक जगतके नियामक जेसें त्रिगुणाभिमानीब्रह्मादिकतीनोनकू भगवानने किये हैं तेसें अक्षरब्रह्ममें नियामक भगवान्हि हैं एसें युक्तिकरिके निश्चय कियो

हे ॥ ९ ॥ १० ॥

गंगाजीके दृष्टांतसं एसो सिद्धभयो जो जलरूप तथा तीर्थरूपको मात्र नियामकपनो जेसैं देवीरूप गंगाजीकूं हे परंतु भक्तनकों आपतें फल देवेपनो नहिं हे तेसैंहि श्रीकृष्णखूह भयो तब विनकी सेवाको उपदेश क्यों करो हो ? एसैं काहूको शंका होय तहां कहत हैं.

श्लोकौः—कामचारस्तु लोकेऽस्मिन्ब्रह्मादिभ्यो

न चान्यथा ।

परमानंदरूपे तु कृष्णे स्वात्मनि निश्चयः ॥११॥

अतस्तु ब्रह्मवादेन कृष्णे बुद्धिर्विधीयताम् ।

आत्मनि ब्रह्मरूपे तु छिद्रा व्योम्नीव चेतनाः

॥१२॥

टीका—यालोकमें इच्छानुकूल भोगादिकनकी प्राप्ति ब्रह्मादिकनसं होयहे ब्रह्मादिकशिवाय नहिं होयहे तेसैं इच्छानुकूलहिं मिलेहे इच्छासू विरुद्ध नहिं मिलेहे ओर भक्तनकों तो अपने अर्थमें परमानंदरूप श्रीकृष्णमें निश्चय कामचार हे इतने भक्तनकों सब कामनाके समूहमेंतें निकसिकें केवल प्रभु विषयहि कामचार (इच्छानुकूल प्राप्ति तथा भोग) होय हे. अथवा भक्तनकों प्रभुनमें अत्यंत स्नेह होयहे तासूं भगवान्

अपने आत्मा हे एसी स्फुरणा होयवेसं सब रीतसं विनकी प्रार्थना करिवेमें शंका नहिं होय हे ॥११॥ तासं सब ब्रह्मरूप हे एसे सिद्धांतसं परब्रह्म श्रीकृष्णमें बुद्धि करनी. आकाशमें चालिनी प्रभृतिसं छिद्रकी बुद्धि होयहे तेसें ब्रह्मरूप आत्मामें दोषवारी बुद्धि होयहे जासं जीव अपने आत्माकूं ब्रह्मरूप नहिं जानेहें संसारी जानेहें आकाशमें छिद्र नहिंहे आकाश तो सर्वत्र व्याप्त समान हे परंतु चालिनीप्रभृति उपाधिसं आकाशमें छिद्र हे एसी बुद्धि होयहे तेसें जीव अक्षरब्रह्मके अंशरूप अणु हे परंतु अविद्याके अंतरायसं अपनो अक्षरब्रह्मात्मकपनो नहिं जानेहें तासं अपनेमें क्षुद्रत्वादिक धर्म दीखवेमें आवतहें ब्रह्मधर्म नहिं दीखतहें ॥१२॥

एसे बंधको निरूपण करिकें अब मोक्षको निरूपण करतहें ।

श्लोकः—उपाधिनाशे विज्ञाने ब्रह्मात्मत्वावबोधेने ।  
गंगातीरस्थितो यद्वद्देवतां तत्र पश्यति ॥१३॥  
तथा कृष्णं परं ब्रह्म स्वस्मिन् ज्ञानी प्रपश्यति ॥

टीका—जितने जीव हैं तिनमेसं जाजीवकों जाप्रकारसं उद्धार करिवेकी प्रभूनकी इच्छा होय हे वाप्रकारके गुरूनके उपदेशादिकनसं अधिधारूप उपाधिको नाश होय तब नामरूप-सहित (जडजीवात्मक) सब जगत् अक्षरब्रह्मरूप हे एसी ज्ञान होय तब गंगाजीके तीरपें रहिवेवारो गंगाजीको भक्त

भक्तिकी अधिकतासं जैसे प्रवाहमें मूर्तिरूप गंगाजीको दर्शन करे हे तेसैं जगत् तथा अपने आत्माकूं अक्षरब्रह्मात्मक जानिवे-वारो ज्ञानी अपनेमें परब्रह्मरूप श्रीकृष्णाकूं देखे हे क्यों जो अक्षरब्रह्म हे सो पुरुषोत्तमको निवासस्थान हे तासूं निवास-स्थानरूप अक्षरब्रह्मके ज्ञानसं तामें रहिवेवारे पुरुषोत्तमको दर्शन सहजमें होय हे ॥१३॥

अब हीनाधिकारीनकी व्यवस्था कहत हैं.

**श्लोकः—संसारी यस्तु भजते स दूरस्थो यथा तथा ।  
अपेक्षितजलादीनामभावात्तत्र दुःखभाक् ॥१४॥**

टीका-संसारी इतने जाकी अहंताममता छूटी नहिं हे एसो संतो जो भजन करे हे सो जेसैं गंगाजीतें दूर रह्यो होय ताकूं इच्छित जलप्रभृतिको अभाव होय तासूं दुःखहि भुगतेहे तेसैं आप भक्तिमार्गमें रह्यो होय ताकूं साक्षात् स्वरूपसंबंधी अर्थकी अपेक्षा होय ओर मिले नहिं तब क्लेश भुगते हे तथापि याकी सेवाको प्रभूनने अंगीकार कियो होय तासूं भजनकूं छोडे नहिं. ओर प्रभूनने सेवाको अंगीकार कियो न होय तो बीचमें प्रतिबंध होय तोहू जो भजन कियो हे सो तो व्यर्थ होय नहिं तासूं जन्मांतरमें फल होय ॥१४॥

**श्लोकः—तस्माच्छ्रीकृष्णमार्गस्थो विमुक्तः**

**सर्वलोकतः ।**

आत्मानंदसमुद्रस्थं कृष्णमेव विचिंतयेत् ॥१५॥

टीका—अहंताममतात्मक संसारयुक्त भजन करत हे सो क्लेश भुगते हे एसें उपर कह्यो हे तासूं श्रीकृष्णको मार्ग जो पुष्टिमार्ग हे तामें जो रह्यो हे ओर सर्वलोकसूं विमुक्त हे सो आत्माके आनंदरूप समुद्रमें रहे एसे श्रीकृष्णकोहि चिंतन करे. इहां श्रीकृष्णकोहि चिंतन करिवेको लिख्यो हे ताको अभि-  
प्राय एसो हे जो पुष्टिमार्गीय भक्तनको निखधी आनंद जहां प्रकट होय हे तहां विहार करिवेवारेको चिंतन करनो इतने ब्रजभक्तनमें विहार करिवेवारे श्रीकृष्णको चिंतन करिवेतें ब्रजभक्तनकीसीनाई लौकिकमेंते मनोवृत्ति निकसिकें श्रीकृष्ण-  
मेंहि लगे ॥१५॥

श्लोकः—लोकार्थी चेद्भजेत्कृष्णं क्लिष्टो भवति

सर्वथा ।

क्लिष्टोऽपि चेद्भजेत्कृष्णं लोको नश्यति सर्वथा

॥१६॥

टीका—लौकिक अर्थकी इच्छा राखिकें जो भगवद्भजनमें प्रवृत्त होय हे सो सर्वथा क्लेश पावे हे<sup>१</sup>; इतने कल्ल लाभके लिये पूजादिकमें प्रवृत्त होय सो तो पाखंडी ओर देवलक कह्यो

१ उपर जो संसारी ( अहंताममतायुक्त ) की व्यवस्था लीखी हे सामेहू जो दिनाधीकारीहे ताकीं व्यवस्था याश्लोकमें हे.

जाय हे तासूं लाभपूजार्थयत्न शिवाय जामें निषेध नहिं हे  
 एसी रीतसूं मेरो लौकिक सिद्ध होय एसी इच्छासूं जो भजनमें  
 प्रवृत्त भयो होय सो लोकार्थी कह्यो जाय हे सो श्रीकृष्णको  
 भजन करे तब वाकी उपर प्रभूनको अनुग्रह होय तासूं  
 लौकिकमेंतें आसक्ति छुडायवेके लिये प्रभु उपेक्षा करे तब  
 सब प्रकारसूं क्लेशकूं प्राप्त होय ओर क्लेशकूं प्राप्त तोहू श्री-  
 कृष्णकूं जो भजे हे ताको भीतरको तथा बाहिरको लौकिक  
 आग्रह नष्ट होय जाय. संसारी जो भजे हे ताकी व्यवस्था  
 प्रथम लिखी हे तामें तीन भेद हे. एक तीन प्रकारके संसारकी  
 निवृत्तिकी इच्छावारो, दूसरो लौकिक इच्छायुक्त सेवाको  
 आग्रही; ओर तीसरो सेवाको अनाग्रही एसे तीननकें फल यहां  
 ताँई कहे ॥१६॥

अपनो स्वरूप तथा भगवानको स्वरूप नहिं जानिवेवारे  
 भक्तह पुष्टि ओर मर्यादाके भेदसूं दोय प्रकारके हे  
 विनदोऊनको चित्त चंचल न होयवेके  
 लिये कहत हे.

श्लोकः—ज्ञानाभावे पुष्टिमार्गी तिष्ठेत्पूजोत्सवादिषु  
 ॥१७॥

मर्यादास्थस्तु गंगायां श्रीभागवततत्परः ।

अनुग्रहः पुष्टिमार्गे नियामक इति स्थितिः

॥१८॥

टीका—अपने स्वरूपको तथा भगवानके स्वरूपको ज्ञान न होय तोहू पुष्टिमार्गीय भक्त हे सो श्रीभागवतमें तत्पर होयके पूजा तथा उत्सवादिकनमें रहे इतने श्रीभागवत एकादश-स्कंधके उन्नीसमे अध्यायमें श्रीकृष्णने उद्धवजीकों अपने धर्म कहे हे जो मेरो स्मरण करे, ओर सब कार्य मेरे लिये करे, मेरी अमृतरूप कथामें श्रद्धा राखे इत्यादिक धर्म कहे हे तिनमें रहे ओर मर्यादामार्गीय भक्त हे सो तो भगवानके चरणरजके संबंधवारी गंगाजीमें श्रीभागवतमें तत्पर होयके रहे इतने जहां परीक्षितकूं तथा विदुरजीकूं श्रीभागवतमें सिद्धि भई हे तहां रहे ओर पुष्टिमार्गीय भक्तनों रहिवेके देशको नियम नहिं हे जहां प्रभु अनुग्रह करिके राखे तहां रहे इतने जहां रहिके भगवद्भजनादिकमें आछी रीतसूं प्रवृत्ति रहे तामें प्रतिबंधादिक कछु न आवे तहां रहे. १७।१८

मर्यादामार्गीय ज्ञानी ओर भक्त होय तिनकी उपर प्रभु विशेष अनुग्रह करे तो मर्यादामार्गीय ज्ञानी तथा भक्त ये दोऊ पुष्टिमार्गकूं प्राप्त होयके पुष्टिमार्गीय भक्तिकूं प्राप्त होय हे' सो कहत हे'.

श्लोकः—उभयोस्तु क्रमेणैव पूर्वोक्तैव फलिष्यति ।  
ज्ञानाधिको भक्तिमार्ग एवं तस्मान्निरूपितः ॥१९॥

टीका—मर्यादामार्गीय ज्ञानी तथा मर्यादामार्गीय भक्त होय बिनको पुष्टिमार्गमें अंगीकार होयगो तो क्रमसूं मानसी

सेवाको फल मिलेगो ओर जो मर्यादामें अंगीकार होयगो तो सायुज्यमुक्ति मिलेगी. एसें भक्तिमार्ग हे सो श्रीपुरुषोत्तमकी प्राप्ति करिवेवारो हे तासूं ज्ञानमार्गसूं उत्तम हे सो गंगाजीके दृष्टांतसूं निरूपण कियो हे, इतने लोकमें कितनेक कहत हैं जो भक्तिसूं ज्ञान मिले ओर ज्ञानसूं मुक्ति मिले परंतु आत्मा तथा अक्षरब्रह्मकी एकताको ज्ञान तथा सब जगत् अक्षरब्रह्मरूप हे एसे जाननो सो ज्ञान कखो जाय हे सो ज्ञान होय तोहू श्रीपुरुषोत्तमको संबंध तो अतिदूर रहे हे क्यों जो श्रीपुरुषोत्तम तो अक्षरातीत हे तासूंहि गीताजीके वारमें अध्यायमें लिख्यो हे जो अक्षरकी उपासनावारेनकों क्लेश अधिक हे ओर 'जो सबकर्मनको मेरेमें अर्पण करिकें मेरे परायण होयकें मेरी उपासना करत हैं तिनको उद्धार में शीघ्रहि करूंहूँ" एसें श्री कृष्णनें कह्या हे तासूं ज्ञानसूं अधिक भक्ति मार्ग हे १९ गंगाजीको दृष्टांत दियो हे ताको दूसरो तात्पर्य कहत हैं.

**श्लोकः—भक्त्यभावे तु तीरस्थो यथा दुष्टैः स्वकर्मभिः ।**

**अन्यथाभावमापन्नस्तस्मात्स्थानाच्च नश्यति ॥२०॥**

टीका—गंगाजीके तीरमें रह्यो होय ओर अपने दुष्टकर्मनकरिकें विपरीतभावकूं प्राप्त भयो होय सो जेसें वास्थानसूं नष्ट होय हे तेसें भक्तिको अभाव होय तो भगवानके संनिधानवारे देशमें रहत होय तोहु अपने दुष्टकर्मनकरिकें पाषंडिपनेकूं प्राप्त भयो होय सो आरूढपतित होय हे; इतने जेसें कोऊ उंचे



स्थलपे चढिके गिरे हे तेसे भक्तिमार्गमें आयो होय ओर भक्ति न होय तासं दुष्ट कर्मनसं पाषंडी होयके वामार्गते भ्रष्ट होय हे ॥२०॥

एसे भक्तिको अवश्यपनो निरूपणकरिके उपसंहार करत हे.

श्लोकः--एवं स्वशास्त्रसर्वस्वं मया गुप्तं निरूपितम् ।

एतद्युद्धा विमुच्येत पुरुषः सर्वसंशयात् ॥२१॥

इति श्रीमद्ब्रह्मभाचार्यविरचिता सिद्धांतमुक्तावली

समाप्ता ॥

टीकाः--एसे अपने शास्त्रको सर्वस्व जो गुप्त हतो सो मेने निरूपित कियो हे. ये जो निरूपित कियो हे ताकूं जानिके बुरूप सबसंशयनसं मुक्त होय. ॥२१॥

याग्रंथमें इतनो सिद्धभयो जो तनुजा तथा वित्तजा सेवाहि प्रथम साधन हे सो यथार्थ बने तो प्रभुमें चित्त लीन होयजाय ऐसी मानसी सिद्ध होय तब प्रभुसंबंधीहि सब कामना होय तासं सब ब्रह्मात्मक हे एसे ज्ञानसं भगवानमें बुद्धि राखनी ये साधनकी प्रथम (मुख्य) कक्षा हे, यामें अधिकार न होय तो ये मर्यादापुष्ट हे ताकों अक्षरब्रह्मात्मक अपनो स्वरूप हे ओर अक्षरब्रह्ममें श्री कृष्ण विराजत हैं एसो ज्ञान जेसे होय तेसो यत्न करनो ये साधनकी द्वितीय (मध्यम) कक्षा हे, यामेंहु जाको अधिकार नहि हे सो शरीर, पुत्र, धनादिकनमें अमिमान-

वारो संसारी कह्योजाय हे एसो पुरुष सेवा करतो होय तामें भगवानको उपयोगी पदार्थ मिले नहिं तब दुःख पावे तब सेवाहु आछीरीतसुं न बने एसेकों संसारमेंतें आसक्ति छुटवेकेलिये लीलाविशिष्टभगवानको चिंतन करनो ये साधनकी तीसरी- (हीन) कक्षा हे. ओर जाकों लौकिककी इच्छा निवृत्त नहिं होय सो तनुजावित्तजा सेवा करतो होय तब बाकी परी- क्षाकेलिये अथवा प्रारब्धभोगकेलिये प्रभु विलंब करे तब लौकिकतें क्लेश होय तोहु भगवत्सेवा छोडे नहिं तो लौकिका- सक्ति छूट जाय. एसो जो पुष्टिमागीय होय तो श्रीभागवतके पाठ श्रवणादिकमें तत्पर होयकें इच्छानुकूलदेशमें रहिकें पूजोत्सवादिक करनो ओर एसो जो मर्यादामागीय होय तो गंगाजीके तीरमें रहिकें श्रीभागवतको श्रवण अथवा पाठ वारंवार करयोकरे ये साधनकी चोथी (अतिहीन) कक्षा हे. ओर जो तनुजावित्तजा सेवा करतो होय तामें भक्तिहु न होय सो पांचमों आरूढपतित कह्योजाय हे. सो वारंवार जन्मकू प्राप्त होयकें संसारको अभिनिवेश शिथिल होय तब मुक्त होय ओर संसारको अत्यंत अभिनिवेश होय तो मुक्तिहु न होय, तासुं संसारावेश छोडिकें भक्तिके लिये तनुजा तथा वित्तजासेवामें यत्न करनो ॥

इति श्रीमद्गोस्वामिश्रीनृसिंहलालजीमहाराजविरचिता  
सिद्धांतमुक्तावलीभाषार्थसंक्षेपटीका संपूर्णा ॥

श्रीकृष्णाय नमः ॥ श्रीगोपीजनवल्लभाय नमः ॥

## अथ पुष्टिप्रवाहमर्यादाकी ब्रजभाषामें संक्षेपसूं भावार्थटीका लिखी हे ॥

याजगतमें जितने जीव हैं तितने सब चिदंशरूपकरिकें तथा भगवदंशपनेसूं समान हैं तिनमें कितनेकनकों श्रीपुरुषोत्तमकी प्राप्ति होय हे, कितनेकनकों अक्षरब्रह्मकी प्राप्ति होय हे, कितनेकनकों स्वर्गादिकनकी प्राप्ति होय हे और कितनेकनकों अंधतमकी प्राप्ति होय हे. एसे फलमें भेद क्यों होय हे ? ओर स्वभावमें भेद क्यों हे ? ओर कितनेकनके स्वभावतें विरुद्ध देह तथा क्रिया हे, कितनेकनके स्वभावानुकूल देह तथा क्रिया हे इत्यादिक भेद क्यों हे ? ऐसैं संदेहवारनको संदेह मिटायवेकेलिये विनके उपायभूत मार्ग तथा मार्गको सांकर्य निरूपणकरिवेकेलिये सबनको भेद जानिवेतें सब संदेहनकी निवृत्ति होयगी ऐसैं विचारिकें तीनमार्गके भेदको निरूपण करत हैं.

श्लोकः—पुष्टिप्रवाहमर्यादा विशेषेण पृथक् पृथक् ।

जीवदेहक्रियाभेदैः प्रवाहेण फलेन च ॥१॥

वक्ष्यामि सर्वसन्देहा न भविष्यन्ति यच्छ्रुतेः ।

## भक्तिमार्गस्य कथनात् पुष्टिरस्तीति निश्चयः ।२।

टीका—पुष्टि, प्रवाह ओर मर्यादा ये तीनों जूड़े जानिवेमें आवे एसे विनके धर्मकरिकें, जीवादिकनके भेदनसूं सृष्टिकी. परंपरा अविच्छिन्न चलीआवेहे ताकरिकें ओर विनकों फल मिले हे ताकरिकें भिन्न भिन्न समझिवेमें आवे तेसैं कहूंगो जाके श्रवणतें सब संदेह न होयंगे. इतने विनके धर्म, जीवको स्वरूप तथा देह तथा क्रियाके भेद, तथा सृष्टि तथा विनके फलको ज्ञान होयगो तब सब संदेह निवृत्त होयंगे. यालोककी तथा परलोककी कामना छोडिकें प्रभुमें मन लगावनों सो भक्ति कहिजाय हे सो भक्ति प्रभुनके अनुग्रहसूं मिले हे तासंहि पंचमस्कंधमें ऋषभदेवजीके चरित्रकी समाप्तिमें कछोहे जो “मोक्षदेवेवारे भगवान, भजनकरिवेवारेनकों मुक्ति देयेंहें परंतु काहुसमय भक्तियोग नहिं देयें हैं” तेसैं श्रीदेवकीजीने स्तुति करी तब प्रभुनके माहात्म्यको ज्ञान हतो तासूं सब माहात्म्यको वर्णन कियोतापाछेसुदृढ स्नेह भयो तब माहात्म्यकूं भूलिकें कछो जो आपके लिये मेरी बुद्धिमें धैर्य नहिं रहेहे में कंससूं डरपूहूं. एसैं कछोहे सो सुदृढ स्नेहको स्वरूप हे. तासूं प्रभुनको जब अनुग्रह होय तब एसी भक्ति मिलेहे वाअनुग्रहको नाम पुष्टि हे. जेसैं कोऊने पाप कियो होय ताको निवारण (प्रायश्चित्त) कष्टसूं बने एसो होय परंतु ताके लिये विद्वाननकी सभा भरी होय सो अनुग्रहसूं सुगम प्रायश्चित्त कहे तो

होय सके हे, जेसँ कर्ममार्गमेंहु अनुग्रहकी प्रार्थना होय हे सो फल सिद्ध होयवेके लियेहे तेसँ सुकर साधनरूप भक्तिमार्ग. श्रीकृष्णभगवानने उद्धवजीप्रति कह्योहे तासँ ताके मूलभूत पुष्टि हे एसो निश्चय हे ॥ १ ॥ २ ॥

पसँ पुष्टिकी विद्यमानताको निरूपण करिकें प्रवाह तथा मर्यादाकी विद्यमानताको निरूपण करत हें.

**श्लोक—‘द्वौ भूतसर्गा’ वित्युक्तेः प्रवाहोऽपि व्यवस्थितः।  
वेदस्य विद्यमानत्वान्मर्यादाऽपि व्यवस्थिता ॥३॥**

टीका—गीताजीमें कह्योहे जो “दैव और आसुर ऐसे दोयप्रकारके भूतसर्गहे” तासँ दैव ओर आसुर एसे विभागसँ सृष्टिकी परंपरा अविच्छिन्न चलीआवेहे ताको नाम प्रवाह हे इतने नदीको प्रवाह जेसँ आरंभसँ अंततौई चल्योजाय हे तेसँ दैव और आसुर ये दोयप्रकारकी सृष्टिको प्रवाह प्रलयपर्यंत चल्योजाय नहीं तो श्रीकृष्णने दोऊको विभाग कियोहे सो व्यर्थ होयजाय, तासँ प्रवाहहु रह्योहे ओर कर्म तथा ज्ञान-दिकनके प्रकारको जो नियम हे ताको नाम मर्यादा हे सो पूर्वकांड तथा उत्तरकांडरूप वेद जगतमें विद्यमान हे तासँ कर्म तथा ज्ञानादिकनके प्रकारको नियम रह्योहे, तासँ मर्यादाहु रहीहे. यहां एसे समजनो जो भगवानके अनुग्रह-प्रयुक्त भक्तिमार्ग जितनेहें तिनसबनको अंतर्भाव पुष्टिमार्गमेंहे तथा यालोक तथा परलोककी कामनावारे जो सृष्टिकी पर-

पराकों नही तोडेहें सो सब मार्ग प्रवाहमें अंतर्भूत हैं और जितने मार्ग वेदको मर्यादाको उल्लंघन नहिं करेहें तितने सब मार्ग मर्यादामें अंतर्भूत हैं इतने जगतमें जितने मार्ग हैं तिन-सवनको अंतर्भाव इनतीनमार्गनमें हे ॥ ३ ॥

ऊपर कहे एसे तीनो मार्ग विद्यमान हैं एसें कहिवेसंहु तीनो मार्गनको परस्पर भेद सिद्ध नहिं होयगो क्योंजो “सब फल भगवानसंहि होयहे” एसें व्याससूत्रादिकनसं सिद्ध हैं; तासं दूसरे देवको भजन करिवेवारे प्रवाहमार्गीयहु फलप्राप्ति-केलिये प्रभूनकोही भजन करेहें; क्योंजो ब्रह्मवादकी रीतिसं चैतन्यमें भेद नहिंहैं ओर फलतो प्रभूनसंहि प्राप्त होयहे; तासं प्रावाहिकहु भक्तहे एसें कहेनो चाहियें ओर अनुग्रहप्रयुक्त सब भक्तिमार्ग पुष्टिमार्गमें अंतर्भूत हैं एसें उपर कद्योहे सो अनुग्रह सवनकों समान हे; तासं प्रवाहसं पुष्टिमार्ग भिन्न नहिं होयगो ओर मर्यादा तो वेदोक्त नियमसं हे तासं भिन्नहिं हैं इतने दोऊ मार्ग हे एसें कहेनो चाहियें एसी कोऊ शंका करे तहां कहत हैं.

श्लोकः-कश्चिदेव हि भक्तो हि “योमद्भक्त”इतीरणात् ।

सर्वत्रोत्कर्षकथनात्पुष्टिरस्तीति निश्चयः ॥४॥

टीका—“ संतोषवारी, हमेंशां प्रभुमें चित्त जानें जोडयो हे, मन जाके स्वाधीन हे, प्रभु अपने स्वामी हे एसी जाको

दृढ निश्चय हे ओर मेरेमें जाने मन तथा बुद्धि अर्पणकरीहे एसो जो मेरो भक्त हे सो मोकूं प्रियहे ” एसें गीताजीमें कह्योहे तामें जो मेरो भक्त हे एसें कहिवेसूं कोईएक भक्त हे एसें जान्योजाय हे जो बहोत भक्त होय तो जो मेरो भक्त हे सो मोकूं प्रिय हे एसें नहिकहते. ओर गीताजीमें “ तपस्वी, ज्ञानी तथा कर्ममार्गीयनसूं योगीकूं अधिक लिखिकें सब योगिनमेंहु जो अंतःकरणपूर्वक श्रद्धायुक्त होयकें मोकूं भजेहे सो अत्यंतयुक्त मान्योहे ” एसेंश्रीकृष्णने कह्यो हे. तेसैं फिगहु पंचदशम अध्यायमें कह्योहे जो “ आछी रीतिसूं मोहरहित जो पुरुष, में पुरुषोत्तम है ताकूं जानेहे सो सबजानिवेवारो हे सो सर्वभावकरिकें मोकूं भजे हैं ” एसें कह्योके सो सर्वभावसूं भजन पुष्टिमार्गमेंहि हे ओर एसे भजनकों सबस्थलनमें उत्तम कह्यो हे तासूं पुष्टि हे एसो निश्चय हे ॥ ४ ॥

सब मार्गमें जूदे जूदे प्रकारसूं भजन तो रह्योहि हे, तासूं भजनको प्रकार भिन्न भिन्न हे परंतु सब भक्तिमार्गहि हे एसें फोऊ कहे तहां कहत हैं.

**श्लोकः—न सर्वोऽतः प्रवाहाद्धि भिन्नो वेदाच्चभेदतः ।**

**“यदा यस्येति” वचनान्ना “हंवेदै” रितीरणात् । ५ ।**

टीका—उपरके श्लोकमें गीताजीको प्रमाण देकें बहोत भक्त नहिं हे परंतु कोईएक भक्त हे एसें निरूपण कियो हे

तासुं सब, भक्त नहिं हे; तब जामार्गमें ये भक्त हे सो पुष्टि-  
मार्गहु प्रवाहसुं भिन्न हे एसें अर्थात् सिद्ध होय हे तहां एसी  
शंका होय जो प्रवाहसुं पुष्टिमार्ग भिन्न हे एसें सिद्ध भयो  
परंतु पुष्टिमार्गप्रतिपादक जो जो वाक्य हैं सो सो वेद, स्मृति  
अथवा पुराणादिकनके हैं सो वेदविधिमेंहि आयजाय हे; तासुं  
मर्यादासुं पुष्टिमार्ग भिन्न नहिंहोयसके हे एसी शंकाकी  
निवृत्तिकेलिये कहत हैं जो “ आत्मासुं जाकी भावना करी  
हे एसे भगवान जाके उपर अनुग्रह करत हैं सो लोकमें तथा  
वेदमें लागीरही एसी मतिकों छोडे हैं ” एसें श्रीभागवतमें  
कह्यो हे. तेसुं “ वेदकरिकें, तपकरिकें, दानकरिकें और  
ज्ञानयज्ञकरिकेंहु मेरो दर्शन नहिं होयसके हे, ओर अनन्य-  
भक्तिकरिकें मेरो दर्शन होयसके हे ” एसें गीताजीमें कह्यो हे  
इतने सब स्थलमें पुष्टिमार्गको प्रतिपादन हे तथापि जीवकृत  
विधिपूर्वक साधननमें पुष्टिमार्गको प्रवेश नहिं हे किंतु भग-  
वानके अनुग्रहरूप हे तासुं वेदके नियमरूप मर्यादासुंहु  
पुष्टिमार्ग भिन्न हे ॥ ५ ॥

जामें भगवद्भक्ति होय नहिं एसे धर्म, कर्म तथा ज्ञानकी  
निंदा सर्वशास्त्रमें लिखी हे, परंतु भक्तिसहितकी निंदा नहिं हे  
तासुं गीताजीमें “ निबंधायासुरी मता ” इत्यादिक वाक्यनसुं  
प्रावाहिक जीवनकी निंदा लिखी हे सो भक्तिरहितकी हे  
भक्तिसहित प्रावाहिक तो दैवीमें गिनेजाय हैं तासुं सबमार्ग



भक्तिमार्गके अंगभूत हैं एसी मूलमेंहि शंका करिकें समाधान करत हैं.

**श्लोकः—**मार्गैकत्वेऽपि चेदन्त्यौ तनू भक्त्यागमौ मतौ ।  
न तद्युक्तं सूत्रतो हि भिन्नो युक्त्या हि वैदिकः । ६ ।

टीका—भक्तिमार्ग एकहि हे ओर प्रवाह तथा मर्यादा, भक्ति के अंगरूप हे ओर भक्तिकी प्राप्तिके साधनरूप हे, एसें शास्त्रमें मान्यो हे एसें वादी कहे तहां कहत हैं जो एसें कहेनों युक्त नहि हे क्यों जो भक्तिमार्गमें प्राप्तहोयवेयोग्य श्रीपुरुषोत्तममें निष्ठावारेकूं अमृतपनो होय हे एसें श्रीभागवतादिकमें कह्यो हे ” एसें भक्तिसूत्रमें लिख्यो हे तेसें जैमिनीयसूत्रमें हु लिख्यो हे जो ज्योतिष्टोमादिकयज्ञरूप कर्म, स्वर्गादिकफलकूं उत्पन्न करिकें निवृत्त होय हे; तासूं सो कर्म, भक्तिके अंगभूत होयसके नहिं तेसे ज्ञानमार्गहु मोक्षरूपफलकूं प्राप्त करे हे भक्तिकूं प्राप्त नहिं करे हे एसे व्याससूत्रमें लिख्यो हैं सो भक्तिके अंगभूत नहिं होयसके हे, तासूं वैदिकमार्ग भिन्न हे ओर अनुग्रहप्रैयुक्त मार्ग भिन्न हे तेसें दैवसर्गरूप प्रवाहहु मोक्षफल देवेवारो हे ओर आसुरसर्गरूप प्रवाह बंधनकरिवेवारो हे सो भक्तिके अंगरूप होयसके नहिं. तेसें प्रवाहमार्ग भक्तिके अंगरूप होय तो श्रीकृष्णभगवाननें दैवीसंपत्तिको भावकहिकें आसुरीसंपत्तिको भाव कह्यो हे सो

नहिं कहते तेसैं गीताजीमें द्वादशाध्यायमें कह्यो हे जो अश्रब्रह्मके उपासकनकों क्लेश अधिक हे ओर पूर्णपुरुषोत्तमके उपासनको उद्धार प्रभु शीघ्रहि करे हें तेसैं श्रीभागवतदशम-स्कंधमें कह्यो हे जो “श्रीयशोदानंदन श्रीकृष्ण भक्तिवारेनकों सुखसूं जेसैं प्राप्त होय तेसैं देहीनकों तथा आत्मारूपनाववारे ज्ञानीनकों सुखसूं प्राप्त नहिं होय हे” इत्यादिक युक्तीनकरिकेंहु पुष्टिमार्गसूं प्रवाहमार्ग तथा मर्यादामार्ग भिन्न हे ॥ ६ ॥

पसैं प्रवाह तथा मर्यादामार्गते पुष्टिमार्ग  
भिन्न हे सो सूत्र तथा युक्तिसूं सिद्ध  
करिकें विनके जीव, देह तथा  
कृतिके भेदको निरूपण करत हें.

श्लोकः—जीवदेहकृतीनां च भिन्नत्वं नित्यता श्रुतेः ।  
यथा तद्वत्पुष्टिमार्गे द्वयोरपि निषेधतः ॥७॥  
प्रमाणभेदाद्भिन्नो हि पुष्टिमार्गो निरूपितः ।

टीका—प्रवाहमार्गवारे जीव आसुर हें, विनके देह भग-वद्भजनसूं प्रतिकूल हें, विनकी क्रिया स्वार्थकेलिये दूसरेकों दुःख देवेकी हे, ओर मर्यादामार्गीय जीव दैव हें, विनके देह त्रैदिकधर्म तथा भगवत्पूजादिक शास्त्रोक्तधर्ममें अनुकूल हें, विनकी कृति अग्निहोत्रादिकश्रौतस्मात्तर्कमकरिवेकी तथा ज्ञानादिकके अनुकूल त्यागादिककरिवेकी हे, ओर पुष्टिमार्गीय

जीव हैं सो दैव<sup>१</sup> हैं तथापि भगवानके अनुग्रहविशिष्ट हैं, विनके देह भगवत्सेवामें अनुकूल तथा भगवत्स्वरूपमेंहि आसक्त, विनकी कृति लोकिकवैदिकफलनकी इच्छारहित होयके भगवत्सेवाकरिवेकी तथा साक्षात्पूरुषोत्तमसंबंधि फलमिलवेकी हे. एसें तीनोनके जीव, देह तथा कृति जैसें भिन्नभिन्न हे तेसें श्रुतिके प्रमाणसं ब्रह्मवादमें जीवनकी नित्यता हे, विशिष्टाद्वैत तथा द्वैतमार्गमें अनित्यता हे ओर मायावादमें मायिकत्व हे. यद्यपि एसें अपनेअपने मतके अनुसार सबजीवनकूं सब समानहि माने हैं तथापि “ भगवानको कीर्तनकरिवेचारे जीव ध्रुव (नित्य) हैं ” एसें श्रुतिमें लिख्यो हे ओर जैसें भक्तिवारेनकों भगवान् सुखसं प्राप्त होय हैं, तेसें ओरदेहीनकों तथा ज्ञानीनकों प्राप्त नहि होय हे एसें श्रीभागवतमें लिख्यो हे; तासूं प्रवाही तथा ज्ञानीनको निषेधकरिकें जिनकों जिनकों सुखसं प्राप्त होय हे एसें लिख्यो हे तासूं अनुग्रह विशिष्ट पुष्टिमार्गीय जीव भिन्न हैं एसें सिद्ध होय हे एसें प्रमाणके भेदसं पुष्टिमार्ग भिन्न निरूपित-कियो हे वाहि रीतिसं प्रवाह ओर मर्यादाकोहु भेद समजनो ॥ ७ ॥

अथ प्रमाणत्रलकरिकें तथा साधनके भेदकरिकें तीनो मार्गनको भेद सिद्धकरिवेकेलिये उपर बताये एसे

---

१ मर्यादामार्गीय जीवहु दैव हे परंतु विधिके आधीन हे ओर पुष्टि-मार्गीय जीव हे सो भगवानके अनुग्रहके आधीन हे.

जीवादिकनके भेदयुक्त अत्रिच्छिन्नसर्गको  
जो भेद हे ताकरिकें पुष्टिको भेद  
सिद्धकरिवेकेलिये सामान्यसू  
सर्गके भेदको निरूपण करत हे.

श्लोक—सर्गभेदं प्रवक्ष्यामि स्वरूपांगक्रियायुतम् ॥८॥

इच्छामात्रिण मनसा प्रवाहं सृष्टवान् हरिः ।

वचसा वेदमार्गं हि पुष्टिं कायेन निश्चयः ॥९॥

टीका—स्वरूप, अंग और क्रियायुक्त सृष्टिको भेद कहूंगो  
इतने जीव, देह और कृतिकरिकें युक्त सर्गको भेद कहूंगो.  
जिनको सर्वदा एकीभाव हे ऐसे हरि जो भगवान् हैं सो  
इच्छामात्रहू मनकरिकें प्रवाहमार्गकूं, वचनकरिकें वेदमार्ग  
(मर्यादामार्ग)कूं और कायाकरिकें पुष्टिमार्गकूं सृजतभयेम्  
इतने एकादशस्कंधमें वैकारिक अहंकारके कार्यरूप मनसूं  
सृष्टि भई हे ऐसे लिख्यो हैं तेसें वेदमेंहु मनसूं सृष्टि भई हे  
एसें लिख्यो हे सो प्रवाहसृष्टि हे तामें मायाहु संग कारणभूत हे  
सो आसुररूपमायिकसृष्टि हे वासृष्टिके अभिप्रायसूं हि  
जगत् मायिक हे एसें कितनेक माने हैं, वचनसूं मर्यादासृष्टि  
भई हे सो मांडूक्यउपनिषदमें लिख्यो हे जो “ उँकारसूं हि  
सचनकी उत्पत्ति हे. भूत, भविष्यत् और वर्तमान जो कछु  
हे सो सब उँकारकोहि उपव्याख्यान हे, ” तेसें एकादश-  
स्कंधमेंहु परा, पश्यंतो, मध्यमा और वैखरी ये चारोप्रकारकी

वाणीकी उत्पत्ति लिखिकें वासूंहि जगतकी उत्पत्ति लिखी हे सो प्रभुकी वाणी वेदरूप हे ओर वेद हे सो साक्षात्नारायण हे तासूँ वेदसूँ सृष्टि भई हे सो मर्यादामार्गकी सृष्टि हे ओर पुरुषविधब्राह्मणकी श्रुतिमें “ एक आत्माके दो विभाग किये तामेंसूँ पति ओर पत्नी भये ” एसें लिख्यो हे, तासूँ आनंदात्मक स्वरूपसूँहि अनेकप्रकारके भये सो कायासूँ सृष्टि भई हे सो पुष्टिसृष्टि हे. इतने प्रभूनको वीररसको अनुभव-कारिवेकी इच्छा भई तब अपनो अंश होय सो अपनी विरुद्ध होय नहिं तासूँ मायामेंसूँ आसुरीजीव उत्पन्न किये सो प्रवाहसृष्टि भई. तथा जीवनके दुःखकी निवृत्तिकेलिये वेदमार्ग प्रकट कियो तामें प्रीतिवारे जीवःअक्षरब्रह्मसूँ भये सो मर्यादा-सृष्टि भई, ओर जीवनको भजनानंदको दानकरिवेकेलिये अपने आनंदात्मकस्वरूपसूँ जीव उत्पन्न किये सो पुष्टिसृष्टि भई; अर्थात् प्रावाहिकसृष्टि प्रभुके मनतें मायासूँ उत्पन्न भई हे<sup>१</sup> तथा मर्यादासृष्टि प्रभुके मनःपूर्वक वचनतें अक्षरब्रह्मसूँ<sup>२</sup> भई हे ओर पुष्टिसृष्टि प्रभुके मन तथा वचनपूर्वक स्वरूपसूँ भई हे. एसें तीनोप्रकारकी सृष्टि प्रभूनने करी हे. ॥ ८ ॥ ९ ॥

प्रावाहिकसृष्टिको उपादानकारण माया हे तथा मर्यादा-

१ सहज आसुर तथा आसुरावेशी एसे दोय प्रकारके प्रावाहिक जीव हे तिनमें आसुरावेशी मुक्त होय हे ओरसहज आसुर हे सो अंधतममें जायहे.

२ संकर्षणहे सो वेदरूप हे और शब्दब्रह्म तथा अक्षरब्रह्म संकर्षणकौहि स्वरूपहे तासूँ अक्षरब्रह्मसूँ सृष्टि हे सो वेदसूँहि सृष्टि भई हे एसे समजनी.

सृष्टिको उपादानकारण अक्षरब्रह्म हे ओर पुष्टिसृष्टिको उपादानकारण प्रभुको स्वरूप हे, एसें तीनो सृष्टिको उपादानकारण भिन्नभिन्न हे तथापि जेसें ताम्र, रूप्य ओर सुवर्णरूप भिन्नभिन्न उपादानकारणसूं तीन घट भये होय परंतु जलल्यायवेरूप कार्य तो तीनो घटकों समान होयहे और व्रीहि तथा यवके पुरोडाशसूं यज्ञ तथा फल समानहि होयहे तेसें तीनो-सृष्टिकों फल समानहि होयगो एसी कोउ शंका करे तहां कहतहैं.

श्लोक—मूलेच्छातः फलं लोके वेदोक्तं वैदिकेऽपि च ।  
कायेन तु फलं पुष्टौ भिन्नेच्छातोऽपि नैकधा । १० ।

टीका—अविच्छिन्न सृष्टि चलीजाय एसी मूलइच्छासूं प्रावाहिकजीवनकों लौकिक फल होयहे तामें सहजआसुरजीव हैं सो जन्ममरण लेतेंलेतें छेवट अंधतममें जायहैं ओर आसुरावेशी हैं सो कामनामें आसक्त होयकें धूममार्गमें यज्ञादिक करिकें आवागमन करतकरत आसुरावेश मिटजाय तब मुक्त होयहैं तथा मर्यादामार्गीयजीवनकों वेदमें कह्योहे सो फल मिले हे तामें निष्काम यज्ञादिककरिवेवारेनकों आत्मसुख मिले हे ओर सकामकरिवेवारेनकों स्वर्गादिकलोकको सुख मिलेहे ओरपुष्टिमार्गीयजीवनकों प्रभूनके स्वरूपकरिकें फल मिलेहे इतने वेणुगीतमें श्रुतिरूपाश्रीगोपीजनननें इंद्रियवारेनकों

भजनानंदरूप जो उत्तम फल कछोहे सो फल मिलेहे एसें भिन्नभिन्न इच्छाहे तथा फलकोहू भेदहे तासूं एकप्रकारकी सृष्टि तथा एकप्रकारके मार्ग नहिहे. मूलमें “नैकता” एसोहू पाठहे ताको अर्थ एसोहे जो सर्ग तथा मार्गनकी एकता नहिहे. ॥ १० ॥

तीनो मार्गनके जीवनकों चिद्रूपपनो समान हे तथापि तीनोंके जूदे जूदे धर्म हे तासूं फलमें भेद है पसें सिद्ध करना हे तामें प्रावाहिकजीवनको धर्म अत्यंत भिन्न हे तासूं प्रथम प्रावाहिकनको निरूपक करत हैं.

श्लोकः—“ तानहं द्विषतो ” वाक्याद्भिन्ना जीवाः  
प्रवाहिणः ।

अत एवेतरौ भिन्नौ सांतौ मोक्षप्रवेशतः ॥ ११ ॥

टीका-गीताजीमें कछोहे जो द्वेषकरिवेवारे क्रूर वे प्रवाही हैं; मनुष्यनमें अधम, अशुभ तिनप्रवाहीनकों में संसारमें सर्वदा आसुरीयोनिमें डारूं हूं ” एसें कछोहे तासूं प्रावाहिक जीव मर्षादामार्गीयतथा पुष्टिमार्गीयजीवनसूं भिन्न हैं; इतने भगवानको द्वेष करना येहि जिनको धर्म हे सो आसुरीजीवहें तिनको अंतमें अधतममें प्रवेश हे. एक मूलरूप तथा अवताररूपको द्वेष, दूसरो विभूतिप्रभृतीनको द्वेष ओर तीसरो जगद्रूपको द्वेष एसें तीनप्रकारको भगवानको द्वेष हे, तामें मूलरूप तथा अवताररूपको

द्वेष करिवेवारेनकों बहोतकरिकें भगवान् हि मारेहें तासूं मुक्त होय हैं, तथा विभूत्यादिकके द्वेषकरिवेवारे द्वेषको त्याग करे तब मुक्त होय, ये दोय आसुरावेशी हैं. ओर जगद्रूपको द्वेषकरिवेवारे सहजआसुर हैं सो कौउदिन मुक्त नहोय विनको अंधतममेंहि प्रवेश होय हे कपों जो जगतके द्वेषकरिवेमें भगवद्भक्तनकोहू द्वेष होय हे; तासूंहि दशमस्कंधमें अक्ररजीने धृरातष्ट्रकूं कह्यो हे जो " अधर्मकरिकें जाको पोषण करेहे सो पोषणकरवेवारेकों छोडतहें " ताको श्रीसुबोधिनीजीमें निर्णय कियोहे जो प्राण, स्त्री, पुत्रादिकको अधर्मसूं पोषण कियो होय सो सब, वाकों छोडदेत हैं ओर केवल जीव अंधतममें जायहे एसेद्वेषकरिवेवारे प्रवाहिजीव हैं. तासूंहि मर्यादामार्गीय तथा पुष्टिमार्गीय जीव हैं सो भिन्नहें ओर मर्यादामार्गीय जीवनकों अक्षरब्रह्मप्राप्तिरूप मोक्ष होय हे तथा पुष्टिमार्गीय जीवनकों पुरुषोत्तममें प्रवेश होय हे तासूं ये अंतसहित हैं; इतने विनदोऊनको जीवभाव निवृत्त होय हे. ॥ ११ ॥

एसैं तीनोमार्गनके लक्षण तथा फलके  
भेदको निरूपण कियो ताकरिकें  
जो सिद्ध भयो सो कहत हैं.

श्लोकः—तस्माज्जीवाः पुष्टिमार्गे भिन्ना एव न संशयः।

भगवद्रूपसेवार्थं तत्सृष्टिर्नान्यथा भवेत् ॥१२॥

टीका—तासूं पुष्टिमार्गीय जीव हैं सो दूसरे मार्गनके



जीवसं भिन्न हैं वामें संयम नहीं हे इतने वाराहपुराणमें कथो हे जो “ ब्रह्माजीकी सृष्टिसं जूदी ये सृष्टि कोउ अन्यहि हे ” एसो वाक्य हे तासं पुष्टिमार्गीय जीव सबनसं भिन्नहि हैं. जो पुष्टिमार्गीय जीव भिन्न न होय तो भगवद्रूपकी सेवाकेलिये पुष्टिमार्गीयकजीवन सृष्टिहु न होय. इतने “ प्रभु अकेले आत्मरमणमेंहि हते तब बाहिर कोऊ नहीं हतो तासं रमण नहीं करत भये क्यों जो अकेले हते तब रमण नहीं करत हते सो (रमणकरिवेके लिये) दूसरेकी इच्छाकरतभये ” एसे श्रुतिमें कथो हैं; तासं इच्छाकरके सबजगद्रूप भये हैं; सो न होते; अर्थात् नामसेवा तो मर्यादासृष्टिहु करत हे परंतु रूपसेवा चासं बराबर नहीं होय सके तासं रूपसेवाके लियेहि पुष्टि-सृष्टि हे सो प्रवाह ओर मर्यादासं भिन्न न होय तो पुष्टिसृष्टि करिवेको जो प्रयोजन हतो सो सिद्ध न भयो तब पुष्टिसृष्टिहु न होय तब रमणकरिवेके लिये प्रभु जगद्रूप भये हैं एसे श्रुतिमें कथो हे सो व्यर्थ होय; तासं प्रभूनके रमणार्थ या पुष्टिसृष्टि हे सो सबनसं भिन्न हे. ॥१२॥ एसे सृष्टिके भेदसं सबनके साधन भिन्नभिन्न हे तासं एकदूसरेके साधन मिल नहींजाय हैं तोहु लीलासृष्टिमें उत्पन्नभये एसे भक्तनके स्वरूप, देह तथा क्रियामें कछु तारतम्य नहीं दिखवेमें आवत हैं; तब उपर जो सृष्टिप्रभृतीनको भेद सिद्ध कियो हे सो व्यर्थ हे एसी कोहुकों शंका होय ताकी निवृत्तिकेलिये तारतम्य कहत हैं.

श्लोक—स्वरूपेणावतारेण लिंगेन च गुणेन च ।

तारतम्यं न स्वरूपे देहे वा तत्क्रियासु वा ॥ १३ ॥

तथाऽपि यावता कार्यं तावत्तस्य कराति हि ।

टीका—भक्तनके स्वरूप, देह अथवा क्रियानमें स्वरूप-करिकें अवतारकरिकें, चिह्नकरिकें ओर गुणकरिकें भगवानसं यद्यपि तारतम्य नहिं हे तथापि जितने तारतम्यसं रमणात्मक कार्य सिद्ध होय तितनो भक्तनमें तारतम्य भगवान् करें हैं इतने भगवान् जैसे आनंदरूप रसघन हैं तेसें भक्तहु हैं, जैसे अलौकिकरीतिसं शुद्धसत्त्वमेंहि भगवानको अवतार होय हैं तेसेंहि भक्तनको अवतार हे, जैसे ध्वजा, वज्र, यव, अंकुश, कमलप्रभृति भगवानके चिह्न हैं तेसेंहि भक्तनके हैं, जैसे भगवानके ऐश्वर्यादिक ओर सौकुमार्यादिक गुण हैं तेसेंहि भक्तनके हैं; तासं इनसबधर्मनकरिकें भगवानके स्वरूपसं भक्तनके स्वरूपमें तथा भगवानके देहसं भक्तनके देहमें तथा भगवानकी क्रियासं भक्तनकी क्रियामें तारतम्य नहिं हैं अर्थात् भगवानके समानहि हैं तथापि जितने तारतम्यकरिकें सबप्रकारकी लीला सिद्ध होय तितनो तारतम्य भगवान् भक्तनमें करत हैं ॥ १३ ॥

एसें स्वभावके भेदप्रभृतिसबसंदेहनकुं दूरिकरिकें कितने-कनको भगवानने कहेभये भक्तिमार्गमें प्रवृत्ति होय हैं, कितने-

कनकों भगवाननें कहेभये ज्ञानमार्गमें प्रवृत्ति होय हैं ओर कितनेकनकों भगवाननें कहेभये कर्ममार्गमें प्रवृत्ति तथा आसक्ति होय हैं तामें हु कितनेकनकों शास्त्रमें करिवेको लिख्यो हे तासूं यामें अशुभ प्रवृत्ति करनीचहियें एसें शास्त्र-विधिके बलसूं प्रवृत्ति होय हे ओर कितनेकनकों स्नेहसों प्रवृत्ति होय हे तेसें कितनेकनके स्वभावसूं विरुद्ध देहादिक होय हैं ओर कितनेकनकूं स्वभावके अनुकूल देहादिक होय हैं, सो क्यों हैं ? इत्यादिकसंदेहनकूं मिटायवेकेलिये पुष्टि-जीवनको विभाग कहत हैं.

श्लोकौ—ते हि द्विधा शुद्धमिश्रभेदान्मिश्रास्त्रिधा

पुनः ॥१४॥

प्रवाहादिविभेदेन भगवत्कार्यसिद्धये ।

पुष्ट्या विमिश्राः सर्वज्ञाः प्रवाहेण क्रियारताः ॥१५॥

मर्यादया गुणज्ञास्ते शुद्धाः प्रेम्णाऽतिदुर्लभाः ।

टीका—शुद्धपुष्ट ओर मिश्रपुष्ट एसे भेदसूं वे पुष्टजीव दोय प्रकारके हैं तामें फिर भगवानके कार्यकी सिद्धिकेलिये प्रवाहादिकके भेदकरिकें मिश्रपुष्ट तीनप्रकारके हैं तामें पुष्टि-करके मिश्र जो पुष्टजीव हैं सो सर्वज्ञ हैं अर्थात् भगवानके अभिप्रायकूं जानिवेवारे हैं तथा प्रवाहकरिकें मिश्र पुष्टजीव हैं

सो क्रियामें प्रीतिवारे हैं ओर मर्यादाकरिकें मिश्र जो पुष्टजीव हैं सो भगवानके गुणकूं जानिवेवारे हैं अर्थात् भगवानके गुणनमेहि आसक्त रहे हैं एसें मिश्रपुष्टके तीन भेद हैं ओर शुद्धपुष्ट हैं सो केवल प्रेमकरिकें हैं; अर्थात् शुद्धपुष्टजीवनकों भगवानमें अत्यंत प्रेम होय हैं एसे भक्त अतिदुर्लभ हैं इतने मिश्रपुष्ट तथा शुद्धपुष्ट एसें दोप्रकारके पुष्टजीव हैं तामें मिश्रपुष्टके मुख्य तीन भेद हैं अर्थात् जिनके ऊपर अनुग्रह हे एसेजीवऊपर दूसरो अनुग्रह मिले तब ये पुष्टिमिश्र पुष्टजीव<sup>१</sup> कहेजाय हैं, तथा अनुग्रहयुक्त जो जीव होय सो शास्त्रोक्त-ज्ञानादिकमर्यादामें प्रीतिवारे होय सो मर्यादामिश्र पुष्ट कहेजायहैं ओर प्रवाहकरिकें मिश्रित जो पुष्टजीव हैं सो क्रियामेंहि प्रीतिवारे होय हैं अर्थात् पंचरात्रादिकतंत्रनमें जो पूजाको प्रवाह कह्योहे वाहिप्रकारसूं पूजादिकक्रियाकरिवेमें प्रीतिवारे जो जीव हैं सो प्रवाहमिश्र पुष्ट कहेजाय हैं इतने प्रथमसूं सामान्यरीतिसूं जिनजीवनके<sup>२</sup> ऊपर अनुग्रह होय हे सो फिर विशेषानुग्रहकों प्राप्त होय हैं सो पुष्टिमिश्र पुष्टिजीव जाननें सो भगवानके अभिप्रायताई सब जानिवेवारे होय हैं ओर पुष्टिजीव मर्यादामिश्रित होय सो भगवानके धर्म

१ पुष्टिमिश्र पुष्टिजीवनकों तो भगवानको अनुग्रह मिले एसे हि कार्यनमें प्रवृत्ति होय है. २ इहांसुं श्रीकृत्यणरायजीकी टीकाके अनुसार जीवनके भेद लिखे हैं.

जानिवेवारे होय हैं तथा पुष्टिजीव प्रवाहमिश्रित होय सो भगवद्धर्मकूं कलूक जानिकें तीर्थाटनपरायण होय हैं, प्रवाहि-जीव पुष्टिमिश्रितहैं सो भगवानके भजनके अनुकूल क्रियाकूं अनुसरिवेवारे होय हैं तथा प्रवाहिजीव मर्यादामिश्रित हैं सो कर्मकरिवेवारे होय हैं और प्रवाहिजीव प्रवाहमिश्रित हैं सो केवल लौकिकक्रियामें प्रीतिवारे होय हैं; वेहि आसुरीजीव कहेजाय हैं ओर मर्यादामार्गीयजीव पुष्टिमिश्रित हैं सो भगवानके माहात्म्यकूं जानिकें भगवानकी प्रीतिके लिये कर्मकरिवेवारे होय हैं तथा मर्यादामार्गीयजीव मर्यादामिश्रित हैं सो स्वर्गादिकफलके लिये कर्मकरिवेवारे होय हैं और मर्यादामार्गीयजीव प्रवाहमिश्रित हैं सो लौकिकफलके लिये कर्मकरिवेवारे होय हैं एसे मिश्रजीवके नव भेद हैं. ओर अत्यंत प्रेमकरिकें भगवान्शिवाय अन्यस्फूर्तिरहित हैं सो शुद्ध-पुष्ट जीव हैं एसे भक्त अति दुर्लभ हैं. भगवानके रमणको पात्र यह जगत् हे तासूं रमणरूप भगवानको कार्य सिद्धहोय-वेकेलिये एसे जूदेजूदे प्रकारके जीवनकी सृष्टि हे; वयों जो विचित्रताविना रमण सिद्ध होय नहि तासूं विचित्रजीवनकी सृष्टि करी हे ॥ १४ ॥ १५ ॥

एसे जीवनमें जूदे जूदे भेद हैं तासूं विनके देह तथा क्रियादिकनमें हु जूदो जूदो भेद दीखवेमें आवे हे तिनमें पुष्टिजीवनको फल कायाकरिकें हे एसे प्रथम निरूपण कियो

हे तामें कितनेकभक्तनकूं भगवानकी बाल्यावस्थाको सुख मिले हे, कितनेकनकू पौगंडावस्थाको सुख मिले हे ओर कितनेकनकों किशोरादिकअवस्थाको सुख मिले है एसें शुद्ध-पुष्टनकों हु जूदेजूदेप्रकारको फल दीखवेमें आवे सो शुद्ध-पुष्टिभक्तनकों जूदोजूदो फल क्यों होय ? एसी शंका मिटायवेकेलिये कहत हे.

श्लोकः—एवं सर्गस्तु तेषां हि फलं तत्र  
निरूप्यते ॥१६॥

भगवानेव हि फलं स यथाविभवेद्भुवि ।

गुणस्वरूपभेदेन तथा तेषां फलं भवेत् ॥१७॥

टीका—एसें जीवनको सर्ग जूदोजूदो हे तामें पुष्टिमार्गीयके जीवनके फलको निरूपण करत हैं जो पुष्टिमार्गमें गुण ओर स्वरूपके भेदकरिकें भगवान् जैसें प्रकट होय तेसें पुष्ट जीवनको फल होय. इतने भगवानके स्वरूपहीमें आसक्ति-वारे जो पुष्टजीव जीव हैं तिनके हृदयमें अथवा गृहमें अथवा वृंदावनादिकस्थानमें इनकूं अपने स्वरूपको आनंद देवेकेलिये बाल्यकैशोरादिकअवस्थायुक्तस्वरूपकरिकें भगवान् जैसें प्रकट होय हे तेसो सुख तिनकों प्राप्त होय हे परंतु सबपुष्टिभक्तनकूं भगवानके स्वरूपात्मकहि फल

मिले हे ॥ १६ ॥ १७ ॥

एसें पुष्टिमार्गको फल अन्यमार्गके फलमें नहिं मिले हे एसें सिद्ध कियो; अब मिश्रपुष्टजीवनमें कोउस्थलमें शाप भयो होय एसो दीखयेमें आवे हे सो गर्भस्तुतिमें क्यो हे जो “ ज्ञानामार्गीय जीव जैसे उत्तमपदकूं चढिकें फिर वहांसं गिरत हैं तेसें आपके भक्त कबहु नहिं गिरत हैं ” एसें लिख्यो हे तब पुष्टिमार्गीयजीवनको शाप होयके गिरनों योग्य नहिं हैं तासूं क्यों गिरत हैं ? एसी शंका होय तहां कहत हैं ॥

**श्लोकः—आसक्तो भगवानेव शापं दापयति क्वचित् ।**

**अहंकारेऽथवा लोके तन्मार्गस्थापनाय हि ॥ १८ः ॥**

टीका—मिश्रपुष्टजीवनको अन्यमें आसक्ति होय अथवा अहंकार होय तो कोउसमय भगवानहि शाप दिवावे हैं तेसें कोउसमय लोकमें मर्यादाको स्थापन करवेकेलियेहु भगवान् शाप दिवावे हैं; इतनें जैसे नलकूबर तथा मणिग्रीवकूं अप्सरामें आसक्ति भई तब नारदद्वारा शाप दिवायो तेसें चित्रकेतुकूं तथा परीक्षितकूं अहंकार भयो तब चित्रकेतुकूं पार्वतीद्वारा परीक्षितकूं शमीकके पुत्र शृंगीद्वारा शाप दिवायो ओर इंद्रद्युम्नराजाने अगस्त्यमुनि आये तब अभ्युत्थानादिक कियो नहिं तब लोकमें मर्यादाको स्थापन करवेकेलिये अगस्त्यद्वारा

शाप दिवायो एसें जहां मिश्रपुष्टजीवनकों शापादिक होय हैं भगवानहि तिनकों दंड दिवायके किर पुष्टिमार्गहिमें स्थापन करे हैं अथवा लोकमें मर्षादाको अतिक्रम न होय तासूं हु शापदिवावे हैं ॥ १८ ॥ मिश्रपुष्टनकों भगवानहि शाप दिवावे हैं एसें क्यों जानिये ? एसी शंका होय तेहां कहत हैं ॥

**श्लोकः—न ते पाषंडतां यांति नच रोगाद्युपद्रवाः ।**

**महानुभावाःप्रायेण शास्त्रं शुद्धत्वहेतवे ॥१९॥**

टीका—जिनकों शाप होय सो भक्त पाषंडी नहि होय हैं किंतु अत्यंत भक्त होय हैं तासूंहि भगवाननेहि दंड दियो हे एसें जाननों तेंसें विनकूं रोगादिक उपद्रव नहि होय हैं बहुतकरिकें महानुभाव होय हैं तासूं अन्यकेलिये भगवान् भक्तनकों दुःख देय हैं येदोषहु नहि हे तथापि केवल अल्प-कारणमें इतनो दंड देनो सो प्रभु कृपालु हैं तासूं विनकूं योग्य नहि हैं एसें कोउ कहें तहां कहत हैं जो भगवान् शाप दिवावे हैं सो मिश्रपुष्टकों शुद्धपुष्ट करिबेकेलिये दिवावे हैं जो एसें भगवान् शाप दिवावे नहि तो मिश्रपनेकी निवृत्ति होय नहि तब शुद्धपुष्टपनो होय नहि तासूं शुद्धपुष्टपनो करवेकेलिये शाप दिवावे हैं तामें विनकों फलदेवेकी कृपाहि कारण हैं ॥ १९ ॥



मिश्र पुष्टभक्तनमें जिनको शुद्ध करिवेकी इच्छा  
 है विनकों उसमें कहने चाहियें तब एसेकूं  
 एसी भाव क्यों भयो ? एसें कोउ कहे  
 तहां कहत हैं

**श्लोकः—**भगवत्तारतम्येन तारतम्यं भजंति हि ।

टीका—भगवान् अनंतरूप हैं तासूं जा भगवत्स्वरूपमें भक्तिवारे मिश्रपुष्ट होंय वास्वरूपमें जितनों तारतम्य होय तितनो तारतम्य भुगतें इतनें व्यूहमें, कलामें, आवेशमें ओर पूर्णमें जिनमें विनकी भक्ति होय तिनसबनके तारतम्यसूं मिश्रपुष्टभक्तकोहु तारतम्य होय हे. तासूंहि संकर्षणके उपासक चित्रकेतु पार्वतीके शापसूं वृत्रासुर होयके इंद्रसामें युद्ध करते हते तब वाने संकर्षणके चरणमेंहि मनको निवेश कियो हतो, ओर इंद्रद्युम्नराजा निर्गुणस्वरूपके उपासक हते, सो अगस्त्यमुनिके शापसूं गजेन्द्र भये, तबदु स्तुतिमें निर्गुणकोहु वर्णन कियो हे, तेसें भगवानको स्वरूप तथा विनके भजनके प्रकारके तारतम्यसूं भक्तनकों फलमेंहुं तारतम्य होय हे; इतनें जैसी भक्ति होय तेसो भगवत्स्वरूपको आविर्भाव होय हैं ओर वाहिप्रमाण फल होय हे. ॥१९॥

पुष्टभक्तनकों केवल भगवत्परायणपनोहि जब हे तब विनकों श्रौतस्मार्तकर्मचरण कर्तव्य हे, किंवा नहि ? तेसें जो श्रोत्रस्मार्तकर्म करत हैं सो क्यों करत हैं ? एसी शंकाकी निवृ-

त्तिकेलिये अब जो पुष्टजीव हैं विनको  
स्वरूप ज्ञानवेमें आवे तैसे  
विनकों लक्षण कहतहैं; तासूं  
बाह्यप्रसंगसों सबकोहु  
लक्षण कहत हैं ॥

श्लोक—वैदिकत्वं लौकिकत्वं कापट्यात्तेषु

नान्यथा ॥२०॥

वैष्णवत्वं हि सहजं ततोऽन्यत्र विपर्ययः ।

टीका—पुष्टभक्तनमें वैदिकक्रिया ओर लौकिकक्रिया हे सो कपटपनेसूं हे आसक्तिपनेसूं नहिं हे ओर वैष्णवपनो हे सो विनको स्वभावहि हे सो गीताजीमें कह्यो हे जो “ कर्ममें आसक्तिवारे अज्ञानिजन जेसैं कर्म करें हैं तेसे कर्ममें आसक्त न होय सोहु लोककों शिक्षा करिवेकेलिये करे ” सो अपुनो भक्तपनो गुप्त राखिवेकेलिये वैदिककर्म तथा लौकिककर्म करिकें अपनोवैदिकपनो तथा लौकिकपनो जतावे. तैसें एसे-भक्तनकूं वैदिकलौकिककर्म करवेको कछु प्रयोजन नहिं हे, तथापि इनकूं देखिकें दूसरे लोकहु वैदिक तथा लौकिकमर्या-दामें रहे तासूं करनों परंतु आसक्तिसूं करनों नहिं येहि कपटपनेसूं करनों एसें कह्यो हे ताको अभिप्राय हे तथा मर्यादामार्गीयजीवनकों वैष्णवपनो तथा लौकिकपनो कपटसंहि हे और वैदिकपनो ( मर्यादा मार्गीयपनो ) स्वाभाविक हे

ओर प्रवाहिजीवनकूं वैष्णवपनो तथा वैदिकपनो कपटपनेसूं हे ओर लौकिकपनो स्वाभाविक हे ॥ २० ॥

पुष्टिप्रवाह ओर मर्यादा एसैं तीनप्रकारके जब जीव हैं तब कृतनेक, सबनमें समानदृष्टिवारे आर सबधर्मनमें अभिनिवेशवारे क्यों दीखवेमें आवत हैं ! एसैं जानवेकी इच्छा होय तहां कहत हैं.

लौकौ-संबंधिनस्तु ये जीवाः प्रवाहस्थास्त-  
थाऽपरे ॥२१॥

चर्षणीशब्दवाच्यास्ते ते सर्वे सर्ववर्त्मसु ।

क्षणात्सर्वत्वमायांति रुचिस्तेषां न कुत्रचित् ॥२२॥

तेषां क्रियानुसारेण सर्वत्र सकलं फलं ।

टीका-पुष्टि, प्रवाह ओर मर्यादा ये तीनोमार्गनके संबंधवारे जो जीव हैं ओर इनसंहु हीन दूसरे प्रवाहिजीव हैं सो जीव सर्वमार्गमें क्षणक्षणमें आयजाय हैं, परंतु कोऊमार्गमें विनकी रुचि होय नहीं हे. विनकों जेसी क्रिया करे ताप्रमाण सबमार्गनमें किंचित् फल होय हे; इतने पंचरात्रमें मध्यम ओर अधम जीव कहैं हैं सो ये चर्षणीजीव कहेजाँय हैं उनकी गति यमके आधीन हे; तीनमें तीनोमार्गके संबंधवारे जो जीव हैं सो जन्ममरणहि लियोकरत हैं ओर प्रवाहिमें हैं तिनकी गति नरकमें हैं. ॥ २१ ॥ २२ ॥

एसें प्रसंगसं आईभई सब हकीकत कहिके  
प्रवाहको भेद क्रमसं प्राप्त भयो हे  
ताको निरूपण करत हैं.

श्लोक-प्रवाहस्थान् प्रवक्ष्यामि स्वरूपांगक्रिया-

युतान् ॥२३॥

जीवास्ते ह्यासुरास्सर्वे प्रवृत्तिं चेति वर्णिताः ॥

ते च द्विधा प्रकीर्त्यन्ते ह्यज्ञदुर्ज्ञविभेदतः ॥२४॥

दुर्ज्ञास्ते भगवत्प्रोक्ता ह्यज्ञास्ताननु ये पुनः ॥

टीका-स्वरूप, देह ओर क्रियाकरिकें युक्त, प्रवाहि-  
जीवनकी हकीकत लिखूंहुं. जो भगवाननें गीताजीके षोडशा-  
ध्यायमें “ प्रवृत्तिं च निवृत्तिं च जना न विदुरासुराः ”  
( आसुरीजीव प्रवृत्ति तथा निवृत्तिकूं नहि जाने हैं ) इहांसं  
आरंभकरिकें “ ततो यांत्यधमां गतिम् ” ( तापिछे अधम-  
गतिकूं प्रात्य होय हैं. ) यहांतांई निरूपण किए हैं सो सब  
आसुरीजीव हैं तिनमें सब लक्षण यद्यपि सबनमें न होय  
तथापि जितने लक्षण लिखे हैं तिनमेंसं जोकछलक्षणवारे जीव  
होय सो सब आसुरजीव जाननें; सो जीव अज्ञ ओर दुर्ज्ञ एसे  
भेदसं दोप्रकारके हैं; तामें गीताजीमें भगवानने जिनको  
स्वरूप लिखयो हे सो दुर्ज्ञ जाननें ओर विनकूं अनुसरिवेवारे  
जो जीव हैं सो अज्ञ जानने; सोअज्ञजीवनकूं दुर्ज्ञनके संगसं

भगवान् तथा भक्तनमें द्वेष भयो होय सो द्वेष जब छूटे तब अपनी प्रकृतिमें आयजाय हैं, विनको भगवानके संग द्वेष होय ओर भगवान् मारे तो मुक्त होय तासूं भगवानने मारे एसे जो जो असुर मुक्त भए हैं सो सब अज्ञ जानने ॥ २३ ॥ २४ ॥

ऊपरके निरूपणमें प्राधाहिकसर्ग आसुर और हीन कष्टो हे, तब एसी आसुरसृष्टिमें तो आसुरजीवकी हि उत्पत्ति होनी चाहिये परंतु भगवानके अनुग्रहयोग्य जीवनकी उत्पत्ति नहिं होनी चाहिये ओर बलिराजा तथा प्रह्लादादिककी उत्पत्ति आसुरीमें दीखवेमें आवत है ओर विनके ऊपर भगवानको अनुग्रहहु दीखवेमें आवत हे सो कैसे ? एसे जानवेकी कोऊकूं इच्छा होय तहां कहत हैं.

श्लोक-प्रवाहेऽपि समागत्य पुष्टिस्थस्तैर्न युज्यते । २५ ।

सोऽपि तैस्तत्कुले जातः कर्मणा जायते यतः । २६ ।

इति श्रीमद्ब्रह्मभाचार्यविरचितः पुष्टिप्रवाहमर्यादाभेदः समाप्तः

टीका—जो पुष्टिमार्गीय जीव हैं सो भगवानको अथवा भक्तको अपराध करे तो आसुरकुलमें विनको जन्म होय हे तथापि प्रवाहमें आयकेंहु आसुरधर्ममें आसक्त नहिं होय हैं; इतने पुष्टिमार्गीय जीव प्रवाहमें आवे हैं तासूं प्रवाहिनमें आगमन भयेसूं आसुरधर्मकरिकें युक्त नहिं होय हैं ओर

भगवदअपराध अथवा भक्तनकी अपराध कियो होय तो एसे-  
कर्मकरिकें आसुरकुलमें जन्म होय हे परंतु आसुरधर्म विनमे  
नहि आवे हे ओर जन्म होनों सो तो कर्मसूं होय हे; येहि  
निबंधमें भक्तिप्रकरणमें कह्यो हे जो “याभक्तिमार्गमेंहु वेदकी  
निंदा करे अथवा अधर्म करे तो नरकमें तो प्राप्त न होय  
परंतु हीनयोनिमें जन्म होय. ” ॥ २५ ॥ १६ ॥

इहांसूं अगाडी प्रवाहमार्गीयजीवनके प्रयोजन, स्वरूप,  
साधन, अंग, क्रिया ओर फल तथा मर्यादामार्गीयजीवनके  
प्रयोजन, स्वरूप, अंग, क्रिया, साधन ओर फल, जितने  
ग्रंथसूं जानवेमें आवे तितनों ग्रंथ होनों चाहिये परंतु  
आधुनिकजीवनके प्रारब्धवशसूं इहांसूं अगाडी ग्रंथ मिले नहि  
हे यासूं जितनो ग्रंथ मिले हे तितनेको व्याख्यान लिखयोहे ॥

इति श्रीमद्गोस्वामिश्रीनृसिंहलालजीमहाराजविरचित  
पुष्टिप्रवाहमर्यादाकी टीका व्रजभाषामें संपूण भई ॥



श्रीकृष्णाय नमः श्रीगोपीजनवल्लभाय नमः ॥

## अथ सिद्धांतरहस्यकी ब्रजभाषामें संक्षेपसू टोका लिख्यते ।

जब श्रीठाकुरजीनें अपने मनमें इच्छितप्रकारवारो शुद्ध-  
पुष्टिमार्ग प्रकटकरवेकी इच्छा करी तब अपने मुखारविंदरूप  
श्रीआचार्यजी श्रीमहाप्रभूजीकोहि एसो भक्तिमार्ग प्रकट  
करिवेको सामर्थ्य जानिकें पृथ्वी ऊपर प्रकट होयवेकी आज्ञा  
दीनी तब श्री आचार्यजीहूं भगवानको अभिप्राय जानिकें  
बिनकी आज्ञाके अनुसार प्रकट होयकें भगवानको इच्छित-  
प्रकारवारो पुष्टिभक्तिमार्ग प्रकट करतेभये, तामें अपने मार्गकी  
भक्तिको स्वरूप तथा सेव्यप्रभूको स्वरूप तथा सेवाको प्रकार  
दूसरे मार्गमें नहि मिलवेकेलिये प्रमाणपूर्वक विलक्षणतासं  
निरूपण कियो, एसें दूसरेहु धर्म, अर्थ, काम ओर मोक्ष ये  
चारों पुरुषार्थ, तथा त्यागविवेकादिक दूसरे मार्गसं भिन्न  
निरूपण किये हैं. तथापि पूजामार्गमें दोषनिवृत्तिकेलिये भूत-  
शुद्धिप्रभृति जेसें कियेजाय हैं तेसें स्वमार्गमेंहु सर्वदापकी  
निवृत्तिपूर्वक सेवाके प्रकारको विचार नहि कियो हे एसें  
चिंता करिकें विचारमें परायण जब श्रीआचार्यजी भये तब  
आनंदमात्रकरपादमुखोदरादिरूप श्रीठाकुरजी प्रकट होयकें

सेवामें प्रतिबंध करिवेवारे दोषनकी निवृत्तिको प्रकार यथार्थ जामें आयजाय हैं ओर जेसें अगाड़ी हु जीवितपर्यंत सेवामें दोषको प्रवेश न होय तेसें उपदेश करतभये. वाहि उपदेशकूं अपने हृदयमें समझिकें जामासमें, जापक्षमें, जातिथिमें ओर जासमयमें श्रीठाकुरजीनें उपदेश कियो हे सो सब अपने भक्तनकूं जतायवेकेलिये कहत हैं.

**श्लोकः—श्रावणास्यामले पक्षे एकादश्यां महानिशि ।**

**साक्षाद्भगवता प्रोक्तं तदक्षरश उच्यते ॥१॥**

टीका—श्रावणमासके शुरुपक्षमें एकादशीतिथिमें मध्यरात्रिके समय साक्षाद्भगवानने अपने अभिप्रायपूर्वक कह्यो हे सो एकएकअक्षरसूं याग्रंथमें कह्योजाय हे. श्रावणनक्षत्रके देवता विष्णु हैं सो श्रावण पूर्णिमाके रोज अथवा पूर्णिमाकी संनिहिततिथिमें भावे हैं तासूं श्रावणमास कह्योजाय हे; इतनें श्रावणनक्षत्र विष्णुसंबंधि हे वाके संबंधसूंहि मासको नाम श्रावण भयो हैं तासूं मासको भगवत्संबंधिपनों जतायो हे. ओर शुरुपक्ष कहनों चाहिये ताके बदले अमलपक्ष कहिवेको अभिप्राय एसो हे जो भगवानके पक्षवारे सब निर्दुष्ट हैं काहुप्रकारको दोष विनमें नहि हे ओर एकादशइंद्रियनके दोषकी निवृत्ति करिवेवारी एकादशी तिथि हे तासूं वाहि तिथिमें श्रीठाकुरजीने उपदेश कियो हे. ओर श्रीगोकुलके अंतरंगभक्तनकों सर्वपुरुषार्थकी सिद्धिकेलिये जेसें मध्यरात्रिके



समय प्रादुर्भाव हैं तैसैं इहांहुं श्रीआचार्यजीकेलियें प्रकट होयके विनद्वारा तदीयभक्तनकूं सर्व पुरुषार्थ सिद्ध करिवेकेलिये मध्यरात्रिके समय प्रकट भये हैं. श्रीगोकुलमें जैसैं व्यूहरहित साक्षात्पूर्णपुरुषोत्तमकोहि प्राकटय होयके भक्तनको अभिलषित कियो हे तैसैं इहांहुं भक्तनको अभिलषित सिद्ध होयवेकेलिये पूर्णपुरुषोत्तमको प्राकटय हे एसैं जतायवेकेलिये “ साक्षात् ” पद कह्यो हे ओर सेवकद्वारा; किंवा स्वमद्वारा, किंवा आकाशवाणीद्वारा, उपदेश नहिं कियो हे, किंतु श्री-आचार्यजीकी प्रार्थनाविनाहु साक्षात् पुरुषोत्तमरूप प्रगट होयके ब्रह्मसंबंधरूपसाधनको उपदेश कियो हे. ओर शुक्लपक्षमें दिन-दिनप्रति चन्द्रकी कला अधिक होय हे तैसैं ब्रह्मसंबंधसूं देहके दोष इतने आधिभौतिक दोष निवृत्त होयके दिनदिनप्रति अधिक शुद्धता होयगी. तथा एकादशीके दिन उपवास होय हे ताकरिकें ज्ञानेन्द्रिय पांच तथा पांच कर्मेन्द्रिय ओर एक मन एसैं एकादशइन्द्रियनके दोष निवृत्त होय हैं. ये आध्यात्मिक-दोषकी निवृत्ति कही हे. ओर अपने भक्तनकों स्वरूपानन्दको दानकरिवेकेलिये तथा इनकी रक्षा करिवेकेलिये मध्यरात्रिके समय प्रभु प्रकट भये हैं तासूं मध्यरात्रिको समय आधिदैविक दोषकी निवृत्तिकरवेवारो हे. एसैं ब्रह्मसंबंध करवेवारे जीवनमें तीनप्रकारके दोष सब निवृत्त होय हैं एसैं जतायोंहे.

श्रीठाकुरजीनें जो वाक्य कहे हैं विनके अभिप्रायरूप

यह ग्रंथ है ऐसे प्राचीनटीकाकारनको अभिप्राय है. ओर श्रीपुरुषोत्तमजीको अभिप्राय एसो है जो एकादशस्कंधमें द्वितीयाध्यायमें कवियोगेश्वरने तथा तृतीयाध्यायमें प्रबुद्ध-योगेश्वरने सत्र भगवानकों अर्पण करिवेको लिख्यो है, तेसे ग्यारहमे अध्यायमें सदादत्<sup>१</sup> भक्तिको निरूपण है, तहां दासपनेसूं आत्मनिवेदन करिवेको लिख्यो है, ओर उन्नीसमे अध्यायमें महद्विमृग्य भक्तियोगकों निरूपण है, वहांहुं भगवद्धर्मके अधिकाररूप आत्मनिवेदन लिख्यो है; विनकोहि अनुवाद या ग्रंथमें होयगो एसी शंकाकी निवृत्तिके लिये ब्रह्मसंबंधकी आज्ञाको मास. पक्ष. तिथिप्रभृति कह्यो है, ओर श्रीठाकुरजीने प्रकट होयके पंचाक्षरमंत्र, तथा वाकी टीकारूप गद्य तथा श्लोकरूप ये, वाक्य कहे हैं; तिनमेसूं पंचाक्षरमंत्र, तथा वाकी टीकारूप गद्यमंत्र, मंत्र की रीतिके अनुसार गूढ राखनो चाहिये तासूं ये नहिं कहें हैं और सिद्धांतरूप श्लोक जो श्रीठाकुरजीने कहे हैं सो याग्रंथमें लिखे हैं. ॥ १ ॥

एसे श्रीठाकुरजीने जासमय उपदेश कियो है  
 वासमयको निरूपण करिके स्वमार्गीयसेषाके  
 प्रतिबंधरूप जो असाधारण षोष हैं तिनकी  
 निवृत्तिको प्रकार जो भगवानने  
 कह्यो है सो कहत हैं.

१ सत्पुरुषोंने जाको आदर कियो है सो. २ महत्पुरुषनकों ढुडिवेयोग्य.  
 षो. ६

श्लोकौ—ब्रह्मसंबंधकरणात्सर्वेषां देहजीवयोः ।

सर्वदोषनिवृत्तिर्हि दोषाः पंचविधाः स्मृताः ॥२॥

सहजा देशकालोत्था लोकवेदनिरूपिताः ।

संयोगजाः स्पर्शजाश्च न मंतव्याः कथंचन ॥३॥

टीका—ब्रह्मसंबंध करिवेसूं सबनके देह ओर जीवके सब-दोषनकी निवृत्ति होयहें सो दोष पांचप्रकारके प्रसिद्ध हे ॥ २ ॥ सहज दोष, देशसूं उत्पन्नभये दोष, कालसूं उत्पन्नभये दोष, संयोगसूं भये दोष ओर स्पर्शसूं भये दोष, एसें पांचप्रकारके दोष लोकमें तथा वेदमें निरूपण किये हैं अथवा सहज दोष, देशकालसूं उत्पन्न भये दोष, लोक तथा वेदमें निरूपण किये एसे दोष, संयोगसूं भये दोष ओर स्पर्शसूं भये दोष एसें पांच-प्रकारके दोष हैं सो काहूरीतिसूं नहिं माननं. यहां श्रीपुरुषो-त्तमके संग वोहोतकालनसूं तिगोहित भयो संबंध फिर प्रकट होय हे तथापि वाको नाम ब्रह्मसंबंध हे ताको अभिप्राय एसो हे जो जेसें ब्रह्म निर्दोष ओर सर्वत्र समान हे तेसें यह संबंधहु निर्दोष तथा सामान होय हे देह पंचमहाभूतको हे ओर पंच-महाभूतनमें भगवानको संबंध न होयवेसूं दोष होय हे. जो पूजामार्गमें भूतशुद्ध्यादिकनसूं निवृत्त होय हैं सो सहज दोष हैं ओर पूजाके स्थानमें भूतादिकनको अपसरण करे हैं ओर आसनादिककी शुद्धि करें हैं सो देशदोष कहेंजाय हैं, तेंसें

प्रातःकालको होम करिकें अथवा ब्रह्मयज्ञ करिकें अथवा माध्याह्निक कर्म करिकें पुरुषोत्तमको पूजन करनों एसे मंत्रराजअनुष्टुपके विधानको वाक्य हे, तासूं दूसरे कालमें पूजा करिवेमें कालदोष आवे हैं, ओर पूजादिककरिकें ब्रह्मलोक मिले हैं एसो वाक्य हे; तासूं पूजासूं ब्रह्मलोक प्राप्त होय फिर ब्रह्मलोकपर्यंत पुनरावृत्ति होय हैं एसो गीताजीमें कह्यो हे तासूं पुनरावृत्तिरूप दोष कह्यो हे ओर वैदिकमंत्रनसूं पूजादिक करिवेमें हु न्यूनातिरिक्तदोषकी संभावना हे ताकेलिये त्रिष्णुस्मरण करना परे हे ये वेदनिरूपित दोष हे ओर पूजामें अभिषेकादिककेलिये वैदिकमंत्रके संस्कारवारो संखोदक होय तामें साधारणजलको संयोग होय सो संयोगजदोष हे ओर मूलमें चकार हे तासूं नैवेद्यप्रभृतिमें ओर हुं जो सब आंगंतुक दोष हैं सो सब कहिगये हैं ओर पूजादिकमें उपयुक्त पात्रादिकपदार्थ, पुष्प ओर चंदनादिकनकों स्त्रीशूद्रादिकको स्पर्श होय सो स्पर्शदोष हे एसे पांचप्रकारके दोष भक्तिमार्गमें नहि माननें एसे श्रीगोकुलनाथजीको अभिप्राय हे ओर देहके संग उत्पन्नभये एसे कुष्ठ तथा अपस्मारादिक रोगहैं तेसें जीवके संग उत्पन्नभये एसे कामक्रोधादिक हैं सो सहजदोष कहेजायहैं, ओर मगधदेश तथा म्लेच्छादिकनके देसमें तीर्थयात्रासिवाय जाँय तो फिर संस्कार करनों परे, एसे धर्मशास्त्रमें लिख्यो हे, सो देशोत्थ कहेजायहैं, ओर रौद्रकाल

तथा कलिप्रभृति कालहे तासूं धर्मकी निवृत्तिरूप जो दोष हे सो कालोत्थदोष कहेंजायहें ओर पतितादिकनको संसर्ग होय सो संयोगजदोष कह्योजायहे, ओर इंद्रिय तथा पदार्थका संयोग होय सो स्पर्शज दोष कह्योजायहे, मूलमें जो चकार लिख्यो हे तासूं कर्मसूं जो दोष होयहें सो कर्मजदोषहु आयजायहें सो सबलोक तथा वेदमें कहे हैं, जैसें केश, भस्म, प्रभृतीनसूं दूषित देशमें रहनों, अथवा संध्यासमय चोहटेमें वेठनों अथवा म्लेच्छादिकनको स्पर्श करनों, मुखमें मैथुन करनों, द्वारसिवाय गृहमें प्रवेशकरनों, इत्यादिक लोकप्रसिद्धहैं. ओर अग्निहोत्रवारो अपनेलिये उपर भूमिमें न जाय, अमावास्या तथा पूर्णिमाप्रभृति तिथिमें स्त्रीके पास न जाये, मलयुक्त होये तब बोले नहिं इत्यादिक वेदसिद्ध दोषहैं ये सर्वसिद्ध दोष निवृत्त होय एसें नहिं हैं, तथापि काहुरीतिसूं माननें नहिं इतनें भगवानको संबंध सिद्ध होय तब ये दोष कहा करसकें ? कछहु नहिं करसकें, एसें श्रीरघुनाथजीको अभिप्राय हे. ओर अविद्याको संबंध भयेसूं अभिमानादिक होय हैं, सो जीवके सहजदोष हैं, तथा कामक्रोधादिक लिंगदेहके सहजदोष हे ओर मातपितामें जो दोष तथा रोग रहें होय सो संततिमें आवें सो स्थूलदेहके सहजदोष हैं ओर देश तथा कालसूं जो जो दोष होय हैं सो देहकूं हैं जीवकूं नहिं हैं, जैसें मगध देशमें गयाजीप्रभृति पवित्रस्थल हैं ओर सब अपवित्र हैं जैसें

मरुदेश सगरो अपवित्रहे एसें अपवित्रदेशमें जन्मभयेसू तथा विन-  
 देशनमें गमनकरिवेसू जो दोष होय हैं सो देशोस्थदोष कहेजाय  
 हैं. ओर कलिकालसू, तथा दुष्टमुहूर्तसू तथा अवस्थासू जो दोष  
 होय हैं सो कालोत्थदोष कहेजाय हैं, ओर ज्ञानपूर्वक कामकी  
 प्रवृत्तिसू मनको योगभयेसू जो दोष उत्पन्न होय हैं सो संयोगज-  
 दोष कहेजाय हे, ओर काहूके स्पर्शसू जो दोष होय हैं सो  
 स्पर्शज दोष कहेजाय हे, सो सब लोकमें तथा वेदमें निरूपित  
 हैं, तथापि भक्तिमार्गमें देह, इंद्रिय, अंतःकरण, ओर चिनके  
 धर्मसहित सबको अर्पण कियो हे; तासू सब भगवानके भये  
 हैं, सो भगवानकी सेवामें प्रतिबंध नहि करे हैं; तासू इन  
 दोषनकी निवृत्तिमें प्रयत्न नहि करनो, क्यों जो सब भगव-  
 दीय हैं एसो अनुसंधान रहे तब ये दोष बाधक नहि होय,  
 एसो श्रीपुरुषोत्तमजीको अभिप्राय हे. ओर प्रथमस्कंधके  
 सप्तमाध्यायमें अर्जुनकीस्तुतिमें श्रीसुब्रोधिनीजीमें कर्मज,  
 कालज, स्वभावज, मायोद्भव ओर देशोद्भव, एसें पांच दोष  
 समझने; तामे वहां स्वभावज लिखे हे सो तहां सहजदोष  
 लिखे हैं. ओर वहां कालजदोष लिखे हैं सो यहां कालोत्थ-  
 दोष समझने, ओर वहां देशोद्भवदोष लिखे हैं सो यहां देशो-  
 त्थदोष समझने ओर वहां मायोद्भवदोष लिखे हैं सो अविद्याके  
 संयोगसू स्वधर्म तथा भगवद्धर्मको अज्ञान होय हे सो यहां  
 संयोगजदोष समझने, ओर वहां कर्मजदोष लिखे हैं सो यहां

स्पर्शजदोष समझनें, एसें लाल्लभट्टजीनें लिख्यो हे. सो सब दोष दीखवेमें आवे तथापि दग्ध भये वस्त्रकीसीनाई कछुं कार्य करसकें नहि; तासुं ये दोष भगवत्सेवामें प्रतिबंध करेगे एसें नहि माननों क्यों जो भगवान् निर्दुष्ट हैं विनको संबंध भयेसुं देह, इंद्रिय, अंतःकरण ओर विनके सर्व धर्म निर्दुष्ट होय-जाय हैं. ॥ २ ॥ ३ ॥

भगवान् निर्दुष्टहैं तासुं जो दोषरहित होय ताकोहि संबंध भगवानसुं होनो चाहिये, परंतु जघताई देह, तथा इंद्रियादिकनके दोष निवृत्त नहि भये हैं तबताई विनको संबंध प्रभूनसें कैसें होयस-के ? तासुं प्रथम दोषरहित करिके पिये भगवानको अर्पणकरिवेमें कहा हरकत हे ? पसें कोई कहे तहां कहत हैं.

**श्लोकः—अन्यथा सर्वदोषाणां न निवृत्तिः कथंचन ।**

**असमर्पितवस्तूनां तस्माद्वर्जनमाचरेत् ॥४॥**

टीका—देह, इंद्रिय, प्राण तथा अंतःकरण ये सब भगवानको अर्पणकियेविना सबदोषनकी निवृत्ति काहुप्रकारसुं नहि होय हैं, तासुं भगवानको जाको अर्पण नहि भयो हे सो वस्तु अपनेउपयोगमें नहि लेनी, असमर्पित वस्तुको त्यागहि करनो; इतने श्रीमद्भागवतपण्डस्कंधमें श्रीशुकदेवजीने कही हे जो तप, ब्रह्मचर्य, शांति, इंद्रियको निग्रह, दान, सत्य,

पवित्रता, इनसबनकरिके घीर पुरुष, श्रद्धायुक्त होयके देह, वाणी, ओर बुद्धिसं उत्पन्नभयो एसो बडो पाप होय ताकूं हु अग्नि जैसे काष्ठसं दग्धकरेहें तेसें दग्धकरेहें; अर्थात् अग्नि काष्ठकूं दग्धकरेहे सामें भस्मप्रभृति शेष रहे हैं तेसें तपआदिसं पाप दग्धहोयके तामें मलिनताकरवेवारो कछुकदोष बाकी रहेहें तासूं वहांहि फिर कह्यो हे जो वासुदेवभगवानके परायण कितनेक शक्त जैसे सूर्य, रात्रिमें भये ओसके जलकों, निश्शेष नाश करेहे, तेसें केवलभक्तिकरिकें समग्रपापको नाश करेहे, एसें कह्यो हे तासूं भक्तिसं पापको नाश होय हे एसो दूसरे-साधनसं नहिं होय हे. तासूं असमर्पितवस्तुको त्यागहि करनो ॥ ४ ॥

एसें असमर्पितवस्तुको त्याग करे तब लौकिका-  
लौकिक व्यवहार केसें सिद्ध होय ? एसें  
जानवेकी इच्छा होय तहां कहत हैं.

**श्लोकः—निवेदिभिस्समर्प्यैव सर्वं कुर्यादिति स्थितिः ।  
न मतं देवदेवस्य सामिभुक्तसमर्पणम् ॥५॥**

टीका—पुष्टिमार्गकी रीतिसं आचार्यद्वारा जाजीवको निवेदन भयो हे ताजीवकूं भगवानको अर्पणकरिकेहि सब कार्य करनों, एसी भक्तिमार्गकी दोषरहित मर्यादा हे, तामें जो अर्द्धभुक्त पदार्थ हैं सो देवकेदेव प्रभूनों समर्पण योग्य नहिं हैं; इतनें निवेदन, दान, ओर अर्पण, एसें तीनप्रकार हैं,



तामें वस्तुको नाम लेके प्रभूको जतायदेनों सो निवेदन कह्यो-जाय हे, तथा विधिपूर्वक अपनी सत्ताकों छोड़िके द्रव्यादिक-नमें दूसरेकी सत्ता उत्पन्नकरनी सो दान कह्योजाय हैं, तेसैं रसोई सिद्धकरिकें अपने मालिककों अर्पणकरे हैं, तेसैं स्वामिकों भोगवेयोग्य पदार्थ स्वामिकों जतावनो सो अर्पण कह्योजाय हे, वाहि रीतिसूं प्रथम प्रभूकों निवेदितभई एसी वस्तु फिर अर्पण करिकें लौकिक तथा वैदिक सर्व कार्य करनो एसी भक्तिमार्गकी मर्यादाहे, ताहिरीतिसूं करिवेमें दोष नहि आवे हैं; क्यों जो जाको दान कियोहे सो वस्तु अपने उपयोगमें नहि आयसके तेसैं जो वस्तु प्रभूनकों भेट करी हे सो वस्तुहं अपने उपयोगमें नहि आयसके परंतु जाको अर्पण कियोहे सो वस्तु अपने उपयोगमें लेवे में हरकत नहि हैं; तामें एकपदार्थमेंसूं थोडो भाग अपने उपयोगमें लेकें बाकी बच्यो जो भाग हे सो सामिभुक्त अर्द्धभुक्त कह्योजाय हे सो प्रभूकों अर्पणकरिवेयोग्य नहि हैं, अर्थात् यह सब वस्तु प्रभूनकी हे, एसो अनुसन्धानराखिकें फिर ये प्रभूनकों अर्पणकरिकें ये विनको प्रसादहे एसो समझिकें अपने उपयोगमें लेनी ओर अर्द्धभुक्त होय सो प्रभूनकों नहिसमर्पनी ॥ ५ ॥

एसैं अर्द्धभुक्तके निवेदनको निषेध करिकें,  
सर्वदा कर्तव्यको प्रकार कहत हैं.

श्लोकः—तस्मादादौ सर्वकार्ये सर्ववस्तुसमर्पणम् ।

दत्तापहारवचनं तथा च सकलं हरेः ॥६॥

न ग्राह्यमिति वाक्यं हि भिन्नमार्गपरं मतम् ।

टीका—निवेदितपदार्थ प्रभूनों समर्पिकेहि सर्वकार्य करनों एसी भक्तिमार्गकी मर्यादा हे तासुं प्रथम सर्वकार्यमें सर्व वस्तु अर्पणकरनी; इतने स्त्री, पुत्र, धन, प्रभृति सब प्रभूनों समर्पिकें ये सब भगवानके हैं एसो अनुसन्धानराखिकें अपने उपयोगमें लेनी. एसें प्रभूनों जाको अर्पणभयो हे सो वस्तुप्रभूनकी हे. एसी बुद्धि रहिवेसुं अपनी अभिमान छूटजाय हे ओर प्रभूनके संबंधतें विनमें आसक्ति रहिवेसुं अपनी भक्तिकी दृढता होय हे. ओर कर्ममार्गादिकनमें निवेदन तथा समर्पणको प्रकार नहिं हे. 'केवल दानकोहि प्रकार हे तासुं भगवानकों जो पदार्थ दियो हैं सो पदार्थ अपने नहिं लेनो एसो वाक्य वामार्गके अभिप्रायको हे, भक्तिमार्गको नहिं हे, भक्तिमार्गमें तो सर्व वस्तु भगवानकों समर्पिकेहि उपयोगमें लेनी एसी मर्यादा हे. ॥ ६ ॥

एसें भक्तिमार्गसुं दूसरे मार्गमें भगवानकों अर्पणभई

एसी वस्तुको उपयोग नहिं करनों ओर भक्ति-

मार्गमें तो भगवानकी प्रसादी वस्तुसुंही

भगवदीयनकूं सर्व कार्य कर्तव्य हैं

एस जतायवेकेलिये कहत हैं.

श्लोकः—सेवकानां यथा लोके व्यवहारः प्रसिध्यति । ७ ।

तथा कार्यं समर्प्यैव सर्वेषां ब्रह्मता ततः ॥

टीका—लोकमें सेवकनको व्यवहार जैसे सिद्ध होय हे तेसें प्रभूनकां अर्पणकरिकेहि सब कार्य करनो एसें करिवेसं सबनको ब्रह्मरूपपनो होय; इतने लोकमेंहु जो सेवक होय हैं, सो सबकार्य अपने मालिककी आज्ञासंहि करे हैं मालिककूं बिनापूछे कछु कार्य नहिं करे हैं ओर शिष्य होय सो गुरुकी आज्ञाप्रमाणहि सब कार्य करेहे तेसें अपनो देह आत्मादिक, सब भगवानको अर्पणकरनो तब सब भगवानके भये तासूं भगवानकूं अर्पणकरिकेहि सबकार्य करनो एसें करिवेसं सबनमें निर्दोषपनो तथा समानभगवदीयपनो सिद्ध होय हे, यद्यपि ब्रह्मके अनन्त धर्म हे तथापि गीताजीमें निर्दोष ओर सम ये दौय धर्म ब्रह्मके कहे हैं ओर यहां सेवामेंहु येदोऊ-धर्मकोहि उपयोग हे; तासूं येदोऊधर्मको ले सबनको ब्रह्मपनो होय एसे कह्यो हे ॥ ७ ॥

भक्तिमार्गमें प्रवेश भयो होय तोहु सत्त्वाधिकऊहि

गुणनके भेदकरिके सबनकी प्रवृत्ति भिन्नभिन्न

होय हे समान नहिं होय हे तासूं भगवदीय-

पनो भयो तोहु सबनको समानपनो

केसें होय ? एसी शंकाको गंगा-

जीके दृष्टांतसूं निवृत्त करत हैं.

श्लोकः—गंगात्वे सर्वदोषाणां गुणदोषादिवर्णना ॥८॥

गंगात्वेन निरूप्या स्यात्तद्वदत्रापि चैव हि ॥९॥

टीका—परनालाप्रभृतिको जल गंगामें मिले तब परनाला-प्रभृतिमें रहे ऐसे सबदोषनों गंगापनों होय हे तासूं वाके गुणदोषनकी वर्णन गंगापनेसूंहि होय हैं तेसैं ब्रह्मसंबंध भये पिछे यहांहुं सबनकों ब्रह्मपनो होय हे, इतने परनालके जलके स्पर्शसूं स्नानादिक करनो परे हे ओर येहि जल गंगाजीमें भिल्यो होय तब यत्किंचित् वाकी मलिनता दीखवेमें आवती होय तथापि वाके पानसूं पाप निवृत्त होय हे; क्यों जो सब गंगारूप होयगयो हे इतने फिर आच्छे बुरे जलको वर्णन होय हैं सो गंगाजीकेहि जलको वर्णन होय हे “ परनाला-प्रभृतिको जल स्वगय हे ” एसैं कोऊ नहि कहत हैं, तेसैं गंगाजीमें आच्छो जल मिल्यो होय तोहुं गंगाजीको जल अच्छो हैं एसैं कहतहे परंतु जो जल मिल्योहे वाको नाम नहि लेत हैं, एसैं ब्रह्मसंबंध भये पिछे ब्रह्मसंबंधकरवेवारेमें जो दोष गुण रहे हैं सो सब ब्रह्मरूप होय हैं अर्थात् परनालाको जल गंगाजीमें मिले तब वाके सब दोष नष्ट होयजाय हैं तेसैं ब्रह्मसंबंधकरवेवारेमें जो दोष होय सो सब नष्ट होय-जाय हे ॥९॥

ब्रह्मसंबंधकरिवेसूं सबदोषनकी निवृत्ति होय हैं; तासूं पांचोप्रकारके जो दोष हैं सो माननें नहि एसैं प्रथम कछो हे

तापिछे सबनकों ब्रह्मपनों होय हे एसें कह्यो हे येहि सेवाको आनुषंगिक फल सिद्धांतमुक्तावलीमें कह्यो हैं, वाब्रह्मसंबंधसुं सबदोषनकी निवृत्ति होय हैं एसें कहिकें अगाडी दोष नहिं-होयवेकेलिये सब अर्पणकरिकेंहि कार्यकरिवेको कह्यो हे; तामें भगवद्धर्मके अनुसार तथा लौकिकव्यवहारके अनुसार एसें दोयप्रकारको समर्पण कह्यो हे तामें भगवद्धर्मके अनुसार ( वाक्यको स्वरूप समझिकें ) समर्पण करे तो ब्रह्मतारूप फल होय ओर लौकिकव्यवहारके अनुसार करे तो गंगाजीमें मिलेभये मोरी (परनाला)के जलकीनाई ब्रह्मसंबंधकरिवेवारेमें जो दोष रहे हैं विनकी निवृत्तिमात्रहि फल होय हैं.

इति श्रीमद्वल्लभाचार्यविरचितसिद्धांतरहस्यकी  
संक्षिप्त ब्रजभाषामें टीका गोस्वामिश्रीनृ-  
सिंहलालजीमहाराजविरचित  
समाप्त भई ॥



श्रीकृष्णाय नमः । श्री गोपीजनवल्लभाय नमः ।

## अथ नवरत्नकी ब्रजभाषामें संक्षिप्तटीकाको प्रारंभ



भगवदीयनकों चिंताकी निवृत्तिके लिये ये ग्रंथ हे, तब भगवदीय तो अनन्यभक्त होय हैं ओर “ अनन्य होयकें जो मनुष्य मेरी भक्ति करें हैं. ओर नित्य सत्रतरेहसं मेरेमेंहि चित्तवृत्ति राखत हैं, विनकों जो पदार्थको उपयोग हे सो में मिलायदउंहं, ओर जो उपयुक्त पदार्थ मिल्यो हे वाकी में रक्षा करूं हूं ” एसें गीताजीमें अर्जुनप्रति श्रीकृष्णनें आज्ञा करी हे; तासं भगवदीयनकूं कैसें चिंता उत्पन्न होय ? एसीशंकाकी निवृत्तिके लिये श्रीगुंसाईजीनें आज्ञा करी हे जो आत्मनिवेदन-करिवेवारेहि भगवद्भजनकूं योग्य हैं जिननें आत्मनिवेदन नहिं कियो हे सो भगवद्भजनकों योग्य नहिं हैं. तामें जिननें आत्मनिवेदन कियो हे विनके यालोकके तथा परलोकके अर्थमें भगवानकों जाको अर्पण नहिं कियो हे एसी कोई वस्तु नहिं हे. तब देहादिकनको निर्वाह निवेदितवस्तुनसों करनों किंवा अनिवेदितवस्तुनसों करनो ? जो कहोके निवेदितवस्तुन-सोंहि करनो तो ये पक्ष योग्य नहिं हे; क्यों जो भगवानकी वस्तुको भगवानकी इच्छाविना ग्रहण होयसके नहिं ओर

भगवानकी इच्छा जानिवेमें आयसके नहिं, यथार्थ विचार करो तो भगवानकी इच्छा होय तोहु सेवककों भगवानकी वस्तुको उपयोग करना उचित नहिं हे ओर कदाचित् एसें कहें जो देहादिकहु भगवानके भये हैं विनकों पोषण भगवानकी वस्तुओं करिवेमें दोष नहिं हे एसें नहिं कहेनों क्यों जो अपने विचारसं तेसें करिवेमें स्वतंत्रतारूप दोष आंयजाय हे, ओर भगवानकी इच्छा जानिवेमें नहिं आवत हे ये तो कछोहि हे, तासं भगवानकी जो वस्तु निवेदित भई तासं निर्वाह करना योग्य नहिं हे, तब जो वस्तु निवेदित नहिं भई हे वाहिसं निर्वाह करनों एसें कोऊ कहे ! तहां कहत हैं जो ये पक्षहु नहिं; क्यों जो जावस्तुको निवेदित नहिं भयो हे सो उपयोगमें लेवेको अपनो धर्म नहिं हे, तेसें भगवानकों निवेदित नहिंभई एसी वस्तु राखवेकोहि अपनो धर्म नहिं हे. देहादिकनकों निवेदन भयो हे ताके निर्वाहके लिये अपने विचार करनोहि योग्य नहिं हे, तेसें देहादिकनको निवेदन करिवेके समय वाके निर्वाहके लिये कितनिक वस्तु भगवानकों निवेदित नहिं करिविको विचार करना येहु योग्य नहिं हे, क्यों जो सबनमेंतें अपनो अभिमान छूटवेके लिये निवेदन हे. और देहादिकके निर्वाहको विचार करना सो वामें अपनो अभिमान राखे तब होय तासं अनिवेदितवस्तुसं देहादिकनको निर्वाह करना येपक्षहु योग्य नहिं हे एसें जब देहादिकनको

निर्वाह निवेदितवस्तुनसों अथवा अनिवेदित वस्तुनसों होय-  
सके नहि तत्र देहादिकनके निर्वाहको साधन नहिरहिवेसं  
देहादिकनके नाशको संभव होय तत्र देहादिकनसों भजन करनो  
सो बनसके नहि तब भजनकरिवेकेलिये वाके अधिकाररूप  
निवेदनकी व्यर्थता आयजाय हे तत्र पुष्टिकी मर्यादारूप यह  
भक्तिमार्गहि उच्छिन्न होयजाय; तासं निवेदन करें तत्र  
भगवद्भजनको अधिकार होय और निवेदन भयेसं भगवद्भजन  
होयसके नहि तत्र दोई आडीसूं पाश आवे हे एसें  
कोउ कहे तहां कहत हैं जो स्त्री, पुत्र, गृह, प्राण, ये  
सब भगवानकों अर्पण करनों एसें प्रबुद्धयोगेश्वरनें  
निमिराजाप्रति भगवान्संबंधिधर्मके प्रसंगमें कह्योहे  
ओर उन्नीसमे अध्यायमें श्रीकृष्णभगवाननें उद्धवजीप्रति मह-  
द्विमृग्यभक्तियोग कयाहे तामें मेरी अमृतरूप कथामें श्रद्धा  
राखवानी यहांसंलेयके साडे वारश्लोकनसं आत्मनिवेदीनके धर्म  
कखे हैं वहां अधिकाररूप निवेदन कखो हे; तासं निवेदनको  
आवश्यक हे तासं जेसें ब्राह्मण, क्षत्री तथा वैश्यकों वैदिक-  
कर्ममें अधिकार सिद्धकरिवेवारो गायत्रीके उपदेशसं भयो एसो  
यज्ञोपवीतसंस्कार हे तेसें भगवद्भजनमें अधिकार सिद्धकरिवेवारो  
आत्मनिवेदन हे तासं निवेदनकी सफलताकेलिये भगवद्भजन  
सिद्धकरिवेकों जितनी वस्तुनको आवश्यक उपयोग होय  
तितनी निवेदित वस्तुहि उपयोगमे लेनीं. जो एसो अभिप्राय



नहोय तो स्त्रीको पाणिग्रहण किये पीछे अवश्य वाकूँ निवेदित करनी चाहियें तेसेंहि पुत्रादिकनको निवेदन करनो चाहियें सो न भयो तब ये अपने उपयोगमें आये नहिं तब वाको ग्रहण कियोहे ताकी व्यर्थता आयजाय हे; तासूं जो वस्तु दानमें दीनी हे सो वस्तु अपने उपयोगमें आवे नहिं परंतु निवेदित-वस्तुको उपयोग करिवेमें बाध नहिं हे. जो निवेदितवस्तुमें बाध होय तो भगवानकूं निवेदित कियेगये अन्नादिकनकोहि भोजनकरिवेको सर्वत्र लिख्यो हे सो न होयसके ओर भगवानकों निवेदित कियेसिवाय वस्तु लेवेको सर्वत्र निषेध हे; तासूं जो वस्तु भगवानकों निवेदित भई हे ताको भगवद्भोगके लिये विनियोग भयो तब भगवानने दियोभयो यह प्रसाद हे एसें समझिकें अपने उपयोग करनो सो युक्त हे क्यों जो यामें दासधर्म सिद्ध रहे हे, तासूं हि उद्धवजीनें श्रीकृष्णसूं कह्यो हे “ आपको उच्छिष्ट लेवेवारे हमदासननें आपकी माया जीती हे ” इत्यादिक वाक्यनकरिकें भगवानको प्रसाद आत्माकों शुद्धकरिवेवारेहे ये सिद्ध हे तासूं याचिषयकी चिंता तो होय नहिं परंतु निवेदितअर्थको प्रभुमें विनियोग होयगयो तापीछें विनियोगकरिवेकेलिये वस्तु संपादनकरिवेको यत्न करनो किंवा नहिं करनो ? एसी चिंता भगवदीयनकों होय; क्यों जो भगवानके विनियोगमें उपयुक्त वस्तु संपादनकरिवेको प्रयत्न करें तब भगवानमेंसूं चित्त निकसिकें वावस्तुमें लगे

एसंहि सब इंद्रियनको व्यापार वाहिके अनुकूल होय तब बहि-  
 मुखता होयवेको संभव हे ओर जितनो वामें यत्न करे तितनो  
 सेवामें प्रतिबंध होय तेसैं धर्म, अर्थ, ओर काम ये त्रिवर्गको  
 भ्रम भगवान् निष्फल करतहैं तासूं भगवत्कृतप्रतिबंधहु तामें  
 होय. ओर जो यत्न न करें तो भगवानको विनियोगकरिवेको  
 कछु होय नहि तब दुःख होय, एसैं भगवदीयनको चिंता होय  
 ताकी निवृत्तिके लिये उपदेश करतहैं. ॥

श्लोकः ॥ चिंता काऽपि न कार्या निवेदितात्मभिः  
 कदापीति ।

भगवानपि पुष्टिस्थो न करिष्यति लौकिकीं  
 च गतिम् ॥ १ ॥

टीका ॥ जिननें अपने आत्मादिक सब निवेदित किये हे  
 विनकों काहुममय कोउवातकी चिंता कर्तव्य नहि हे; क्यों जो  
 येजीव पुष्टिमार्गमें रह्यो हे तासूं भगवानहु वाकी लौकिक गति  
 नकरेंगें इतनें लौकिक चिंता न होय तथापि भगवानके लियेहु  
 चिंता न करनी अंगीकारभयेसंहि भगवान् आपसंहि सब सिद्ध-  
 करेंगें एसो विश्वास जीवकों अवश्य राखनों चाहिये. ओर  
 भगवानको हु एसो नियम हे जो जाको अंगीकार कियो वाको  
 पालन अवश्यकरनो, तासूं कदाचित् परीक्षाके लिये अथवा  
 षो. ७

प्रारब्धभोगके लिये प्रभु विलंब करें तोहू चिंता न करनी, जीव पुष्टिमार्गमें रहोहे तासूं मर्यादामार्गीयवैराग्यादिक होय तोहू आचार्यद्वारा भगवानकों निवेदित भये हैं तासूं भगवानने ये जीव स्वकीय हैं एसें अंगीकार कियोहे तासूं दूसरे लोक-किसीनाई कुटुंबादिकनमें आसक्ति होयगी तोहू भगवान् लौकिकगति नहिं करेंगे ॥ १ ॥

एसें चिंताछोडवेसूं स्वच्छंदपनेको व्यवहार आय-जायगो तासूं बहिर्मुखता होयगी एसें कोउ कहे तहां कहत हैं.

**श्लोकः—निवेदनं तु स्मर्तव्यं सर्वथा तादृशैर्जनैः  
सर्वेश्वरश्च सर्वात्मा निजेच्छातः करिष्यति ॥२॥**

टीका ॥ सर्वथा जो तादृश भये हैं इतनें निवेदितात्मा भये हैं तिनकों अवश्य निवेदनको स्मरण करनो अथवा सर्वथा जो तादृशजन होय इतनें भगवदीय होय तिनके संग निवेदनको स्मरण करनो मूलमें सर्वदा पद होय तो हमेशां निवेदनको स्मरण करनो एसो अर्थ समझनों, एसें सर्वकाल स्मरण न करे तो आसुरावेश होय. कदाचित् अलौकिक अथवा लौकिकअर्थकी सिद्धिके लिये प्रभूनकी प्रार्थना करनी के कैसें ? एसी शंका होय तहां कहत हैं जो प्रार्थना करनी नहिं क्यों जो जिनमें निवेदन कियो हे वेसवनके ईश्वर हैं ओर सवनके

आत्मा हैं सो अपनी इच्छातें करेंगे अथवा जिनकी इच्छामें विकार नहीं होय तिनभक्तनकी इच्छाप्रकार प्रभु करेंगे ॥ २ ॥

देहाधिक सब भगवानकों अर्पित किये ह ताको विनियोग स्त्रीपुत्रादिकनमें होय तब स्वधर्मकी हानि होय एसी चिंता होय तहां कहतहैं

**श्लोकः—सर्वेषां प्रभुसंबंधो न प्रत्येकमिति स्थितिः ।**

**अतोऽन्यविनियोगेऽपि चिंता का स्वस्य**

**सोऽपि चेत् ॥३॥**

टीका—सबनकों प्रभुको संबंध हे, एककूं मुख्य संबंधहे ओर एककूं गौण संबंधहे एसें नहीं हे. एसी निवेदनमें अंगीकारकी मर्यादाहे याखूं जो विलक्षण होय इतनें सबनको अंगीकार समान होय तथापि कोउके ऊपर विशेष कृपा दीखयेमें आवे तो तामेंहु अपने संतोष माननों, अर्थात् निवेदन करिवेके समयतो अपने एक मुख्य होयके अपने संग दूसरे-सबनकों अर्पण करें हैं तब अपनी मुख्यता होय हे परंतु निवेदन भये पीछे तो अपना आत्मा, देह, प्राण, इंद्रिय, अंतःकरण, स्त्री, पुत्र, धन, सबनको समान निवेदन होय हे तामें जैसे धनादिक अचेतनपदार्थनको परस्पर<sup>१</sup> विनियोग होय हे तामें

१ यद्य आभरण राखिवेके लिये पेटी राखेहे तामें पेटीको विनियोग वद्य तथा आभरणमे भयो तामें भपनकी चिंता नहीं होय हे तैसें पुत्र तथा स्त्रीप्रभृतिनको परस्पर विनियोग होय तो चिंता नकरनी.

चिंता नहीं होय हे तेसैं स्त्रीपुत्रादिकचेतनको परस्पर विनियोग होयवेमे अपनकों चिंता कहा हे ? तेसैं अपनक अन्यविनियोग होय तोहु चिंता कहा हे ?

यासूं एसो सिद्ध भयो जो अपन समर्पण कियो तब अपने संग स्त्रीपुत्रादिककोहु समर्पण भयो सो विनमें अपनो संबंध हतो ताको समर्पण भयो हे ओर स्त्रीपुत्रादिकनकी जो स्वतंत्र सत्ताहे सो समर्पण करिवेके लिये तिनकों भिन्नर समर्पण करनौ तब सिद्धांतरहस्यमें कहेप्रमाण अपने अपने पंचदोषकी निवृत्ति होय. ओर धनादिकजडपदार्थमें अपनी स्वतंत्र सत्ता रहे हैं तासूं अपने समर्पणके संगहि इनको समर्पण होयगयो ओर येनिर्दुष्ट होयगयो एसैं जाननों ॥ ३ ॥

जेसैं पुत्रादिकनके अन्यविनियोगमें चिंता नहीं करनी तेसैं अपनो अन्य विनियोग होय तोहु चिंता न करनी याविषयमें कहत हैं.

**श्लोकः—अज्ञानादथवा ज्ञानात्कृतमात्मनिवेदनम् ।**

**यैः कृष्णसात्कृतप्राणैस्तेषां का परिदेवना ॥४॥**

टीका—भगवान् सर्वरूप हैं तथा मार्गके प्रवर्तक ओर उपदेशक गुरु निरवधिसच्चिदानंदस्वरूप हैं. तथा भगवानकों सब निवेदन करनौ सो परमफलरूपहे, इत्यादिक ज्ञान जिनकों नहीं हे एसे हीनाधिकारी ओर एसो ज्ञान जिनकों होय सो

मध्यमाधिकारीहैं, एसेहु निवेदितात्मा होय तो विनकों चिंता कर्तव्य नहिं हे तब जिनने केवल प्रभूनकोहि प्राणआधीन किये हैं एसे जो उत्तमाधिकारी हैं तिनकों तो चिंताहि कहा हे ? ॥ ४ ॥

श्रवणादिकन व भक्तिनमेंसं श्रवण, कीर्तन, और स्मरण ये जीवके आधीनहे, तथा पादसेवनके दोय भेदहैं तामें एक तो अपने पादकरिकें भगवन्मंदिरादिकनमें जानों सोहु जीवके आधीनहे, ओर दूसरो भगवानके चरणारविंदको सेवन करनां सो प्रभूनके आधीनहे तेसंहि श्रचन, वंदन, ओर दास्यहे सोहु सेव्यस्वरूपमें चैतन्यको प्राकटय न होय तोहु बनसकेहे, परंतु सख्य ओर आत्मनिवेदन तो सेव्यस्वरूपमें चैतन्यको प्राकटय होय ओर प्रभु स्वीकार करें तब होयसके ओर अब तो सानु-भावपनो नहिं हे तब अपने आत्मनिवेदन कियो हे तथापि प्रभूनने अंगीकार कियोहे किंवा नहिं कियोहे ? एसी चिंता तो होयहे. एसें कोउ कहे, तहां कहतहैं.

श्लोकः—तथा निवेदने चिंता त्याज्या श्रीपुरुषोत्तमे ।

विनियोगेऽपि सा त्याज्या समर्थो हि हरिः

स्वतः ॥५॥

टीका—भक्तयुक्तश्रीपुरुषोत्तममें निवेदन विषयकी चिंता छोडनी; इतनें जेसें सब गोप इंद्रको यज्ञ करत हते तिनकों

निवृत्तकरिकें अपने आधीन किये तेसैं अपने सर्वात्माकरिकें प्रभूनमें सब निवेदन कियोहे तब चिंता करनी योग्य नहिंहे. तामेंहु श्रीयुक्त पुरुषोत्तमहैं सो अपने स्वरूपानंदको दान करिकें भक्तनको पोषण करतहैं तिनमें निवेदन कियो सो प्रभूनमें अंगीकार कियोहे अथवा नहिं कियोहे ! एसी चिंता छोडनी कदाचित् कालभयादिक आयजाय तब वाको निवारण करिवेके लिये जीवस्वभावसूं अन्यविनियोग होय तोहु चिंता छोडनी एसैं कहतहैं जो प्रमादसूं एसैं अन्यविनियोग होयजाय तोहु प्रभु नछोडेगें क्यों जो जीवस्वभावके वशसूं जीव एसैं भयो तो हु वाको उद्धारकरिवेमें वाके साधनकी अपेक्षा नहिं राखतहैं आपस्वतःहि समर्थहैं, ओर सबनके दुःख तथा पापके हरणकरिवेवारेहैं. ॥ ५ ॥

भगवानमें अंगीकार कियो होय तामें दूसरों

लक्षण कहत हैं.

**श्लोकः—**लोके स्वास्थ्यं तथा वेदे हरिस्तु न करिष्यति ।  
पुष्टिमार्गस्थितो यस्मात्साक्षिणो भवताखिलाः ।६।

टीका—लौकिकवाणिज्यादिकनमें तथा वैदिकआश्रमधर्मादिकनमें भक्तनके दुःखहर्ता हरि स्वस्थता न करेंगें अर्थात् काया, वाणी तथा मनसूं आछीरीतिसूं स्थिति लौकिक तथा वैदिकमें होय तामें विघ्न होय इतनें लौकिक तथा वैदिक

कार्यहु यथार्थ न होय तहां वाको फल तो कहाँसुं होय ? क्यों जो प्रभु आप हरिहैं सो अपने बलकरिकेहि सब सिद्धकरि-वेवारेहैं. तासुं पुष्टिमार्गमें अंगीकार भयो तब मर्यादाको सहन नहिं करतहैं. एसें लौकिक तथा वैदिकमें विघ्न होय तब कहा करनो ? एसी शंका होय तहां कहतहैं जो साक्षिवत् सबभक्त होयजाओ इतने लौकिक तथा वैदिकमें भगवान् कहा करतहैं येहि देखनों; अर्थात् सप्तमस्कंधमें भगवदीय, गृहस्थके लक्षणमें लिख्यो हे जो “ ज्ञातिके मनुष्य, माता, पिता, पुत्र, और दूसरे संबंधी जैसे कहे और जेसी इच्छा करे वामें ममता छोडिकें अनुमोदनहिं करनो ” ये वाक्यके अनुसार रहनो, एसें रहे सोहु भगवानके अंगीकारको लक्षण हे ॥ ६ ॥

लौकिकवैदिकमें विघ्न होय तोहु साक्षिवत् भगवानकी कृति देखनी, पसो उपदेश कियो ताकरिकेआधिभौतिक, आध्यात्मिक, और आधिदैविक पसें तीनप्रकारको धैर्यहिं साधनरूप कछो पसो सिद्ध होय हे तब इतनोहि कर्तव्य होय तब यथार्थ सेवा बनसके नहिं तब निवेदनकी व्यर्थता होय ये हु धर्मकी हानिहे पसी धिता होय ताकी निवृत्तिको उपाय कहतहैं.

**श्लोकः—**सेवाकृतिर्गुरोराज्ञा बाधनं वा हरीच्छया ।  
अतः सेवापरं चित्तं विधाय स्थीयतां सुखम् ॥७॥



टीका- “ जैसी उत्तम भक्ति देवमें होय हे तेसी भक्ति गुरुमें राखनी ” एसें श्वेताश्वतरश्रुतिमें लिख्योहे तासूं गुरुकी आज्ञाप्रमाण सेवा करनी सो आत्मनिवेदीनको धर्महे सों जेसें साक्षिवत् रहिवेमें सिद्ध रहे तेसें साक्षिवत् रहनों परंतु सेवाकी विरुद्धतासूं साक्षिवत् नहि रहनों तामेंहु गुरुकी ईच्छासूं विरुद्ध प्रभूनकी इच्छा सेवामें होय तो गुरुकी इच्छाको बाध होय इतनें जाप्रमाण सेवा करिवेको गुरुनकी आज्ञाहे वाहिप्रमाण सेवा करनी ओर सेवामें सामग्रीप्रभृतिविषयमे अंतःकरणद्वारा, स्वप्नद्वारा अथवा साक्षात् भगवानकी विशेष आज्ञा होय तब गुरुनकी आज्ञाको बाध होय प्रभूनकी आज्ञाको बाध न होय, प्रभूनकी आज्ञाप्रमाण करिकें सेवा करनी, इतनें स्वधर्मकी हानि न होय, अर्थात् गुरुनकी आज्ञा सिद्ध रहें तेसें अथवा प्रभूनकी इच्छासूं गुरुनकी आज्ञाको बाध होय तेसें सेवाहि करनी; क्यों जो आत्मनिवेदीनको सेवाहि मुख्यहे; तासूं सेवापरायण चित्त करिकेंहि रहनों तब पर्यवसानमें वाकों सुखहि होय ॥ ७ ॥

अल्प दुःख होय तब तो एसें साक्षिवत् रह्योजाय  
परंतु महादुःख प्राप्त होय तब साक्षिवत् रहि-  
सक्यो नजाय तब तो चिंता होय एसी  
कोऊ शंका करे तहां कहत हैं.

श्लोकः-चित्तोद्वेगं विधायापि हरिर्यद्यत्करिष्यति ।  
तथैव तस्य लीलेति मत्वा चिंतां द्रुतं त्यजेत् ॥८॥

टीका—जेसैं प्रभासोयलीलामें यादवनकों शाप भयो सो भगवाननैं लोकमर्यादारक्षणकेलिये मायिक रचना करीहे कयों जो अगाडी यादवनकों नित्यसुख दियोहे तेसैं भक्तनकों प्रारब्धादिरूप पाप हरिवेके लिये हरि “भगवान्” जोजो करें सो ऊपरसूं शुभ अथवा अशुभ दीखवेमें आवतो होय तामें चित्तकों उद्वेग होय सो उद्वेग करिकेंहि हरि जो जो करेंगे सो अपनो महत्पाप होयगो ताको नाश करिवेकेलिये हरिकी लीलाहे एसैं मानिकें उद्वेग करिवेवारी अथवा उद्वेगसूं भई एसी चिंताकूं शीघ्रहि छोडे. कयों जो बोहोत समय चिंता रहिवेमें काल, कर्म, ओर स्वभावकी प्रचलतासूं आसुरधर्म होयजाय तो फलमें प्रतिबंध तथा विलंब होय तासूं चिंताकूं शीघ्रहि छोडनी. ॥ ८ ॥

या नवरत्नग्रंथमें जितनो लिखयो हे सो सब होयसकें नहिं एसो दीखे हे. कयों जो श्रवणभक्तिको आरंभ करिकें सख्यभक्तिपर्यंत पहुंचे तब निवेदनकी वातांहि तहां निवेदनकी दिशा-तो अत्यंत दूर रही; तासूं निवेदनविषयकी चिंताको तथा अन्यविनियोग-विषयक चिंताको समाधान क्रियो सो व्यर्थ हे एसो त्रिचारिकें साधन ओर फल एक करिकें सबनको समाधान कहतहें.

श्लोकः—तस्मात्सर्वात्मनां नित्यं श्रीकृष्णः शरणं मम ।  
वदद्भिरेव सततं स्थेयमित्येव मे मतिः ॥९॥

टीका-ऊपर कही एसी रीतिस्त्रं जीवनकों आपस्त्रं सब होनों अशक्य हे तास्त्रं सर्वात्माकरिकें “ श्रीकृष्णः शरणं मम ” एसें नित्य सर्वकाल बोलतेहि रहनों एसी मेरी मतिहे; इतनें भक्तिमार्गमें प्रवेश भयो तथा भक्तिमार्गमें रुचि भई तामें भगवानको अनुग्रहहि कारण हे, एसें भक्तिमें प्रवेश भये पीछेहि सेवामे प्रतिबंधको संभव होय तब प्रारब्ध तथा कालादिकस्त्रंहि होय ताकी निवृत्तितो सबनके नियामक एसे प्रभूनस्त्रंहि होय ओर तामें शरणागतिहि साधनहे, सो जीव प्रभुके शरण गयो होय ओर सब करिवेमें प्रभु ताकी अशक्ति देखें तब प्रभुहि सब सिद्ध करें, तास्त्रं सर्वात्माकरिकें शरणागति होयगी तो प्रभुहि सब सिद्ध करेंगे ये गूढ अभिप्रायहे. तब प्रथमस्त्रंहि शरणागतिको उपदेश क्यों नहि करयो, एसी शंकाकी निवृत्तिकेलिये सर्वात्माकरिकें शरणमंत्र कह्योकरनों एसो कह्यो हे, इतनें भक्तिमार्ग संबधी जितनी बाबतहें तितनीं बाबतको विचार करिकें तामें प्रतिबंध तथा अपनी अशक्तिकों जब देखे तब सर्वात्माकरिकें शरणागति होय, निरंतर कह्यो करनों एसें बतायवेकेलिये मूलमे “ नित्य ” पद कह्यो हे, अंतःकरणमें तेसो भाव होय अथवा न होय तथापि तेसें बोलनो आवश्यक हे एसें जतायवेकेलिये सतत बोलनों एसें कह्यो हे. एसें कह्यो करें तामें लोककों शिक्षाहु होयजायहे, अथवा यह अष्टाक्षर मंत्र हमेशां कह्योकरनो ओर सेवापरायण होयके रहनों एसोहु

अर्थ होय हे. येहु अपनसुं होयसके एसो नहि हे एसी शंका होय तहां कहतहें जो एसी मेरी मति हे; इतने दशमस्कंधमें अक्रूरजीनें श्रीकृष्णकों कस्यो हे जो “ आपके चरणारविंदके शरण में आयोहु सो आपको अनुग्रह हे एसें मानूंहुं ” एसो वाक्यहे; तासुं भगवानको अनुग्रह होय तबहि जीव भगवानके शरण जाय, सो जो हमारे भक्त भगवानके शरण गये हैं, विनके ऊपर भगवानको अनुग्रह हे एसें समझिकें हमनें जो कस्यो हे, वा हिप्रमाण करनों एसें जतायो हे ॥ ९ ॥

इति श्रीमद्ब्रह्ममाचार्यविरचितनवरत्नकीसंक्षिप्त  
भाषाटीका श्रीमद्गोस्वामि श्रीनृसिंहलालजी  
महाराजविरचित समाप्त भई ॥



श्रीकृष्णाय नमः श्रीगोपीजनवल्लभाय नमः ॥

## अथ अंतःकरणप्रबोधकी संक्षिप्त भाषाटीकाको प्रारंभ



श्रीआचार्यजीमहाप्रभूनं सेवाको उपदेश कियो ताके निर्दोषपनेकेलिये सिद्धांतरहस्यग्रंथ कन्यो तामें ब्रह्मसंबंध करिकें सेवाकरिवेवारेंकों सर्वदोष अकिंचित्कर होयजायहैं. ओर अगाडी दोषको संसर्ग नहिलगेहे एसी भगवानकी आज्ञा भई ताको निरूपणकरिकें सेवाको आधिदैविकपनो सिद्धहोयवेके लिये नवरत्नग्रंथमें चिंताकी निवृत्तिको उपाय कह्यो ताकरिकें उद्वेगरूप प्रतिबंधको प्रकार निरूपण कन्यो ताप्रमाण सेवा करे तब भगवानको सानुभावनपनो अवश्य होनो चाहियें सो भयेतेंहू प्रारब्धादिकके वशसूं प्रथमके दोष<sup>१</sup> रहें तब छोटे पात्रमें बडी-कृपाको समावेश होय नहिं तब वाकों अपनी बडाईकी स्फूर्ति होय तब भगवानकी आज्ञाको भंग होयवेको हू संभवहे सो जब आज्ञाभंग करे तब भगवानकी अप्रसन्नता होय. परंतु भगवद्धर्मरूपसेवा हमेशां करतहे ताको नाश होय नहिं तथापि

---

१ सेवाकी आधिदैविकता सिद्ध भयेसूं भगवानको प्रागृह्य ओर सानुभाव भयो तब यद्यपि दोष रहिवेको संभव नहिंहे तथापि विशेष कृपाको पात्र न भयो येह दोषहे ऐसे अभिप्रायसूं दोष रहिवेको कश्योहे एसे समझनों.

भगवानको अपराध भयो होय तासूं पश्चात्ताप होय तब चिंता होयवेको संभव हे तब जो सेवा करेहैं तथा करेगें ताकों अधिदैविकीपनों नहिं होय, ताको निवृत्तिके लिये या ग्रंथमें विचाररूप साधनको उपदेश करिवेकूं, तामें विश्वास होयवेके लिये बीचमें अपनी आख्यायिका कहिकें मनकी दुष्टवृत्ति उत्पन्न न होय तब एसी चिंता न होय एसें निश्चय करिकें अपने अंतःकरणकों बोध करिवेके मिषतें अपनो वाक्य श्रवण-करिवेके लिये अपने भक्तनके अंतःकरणकों सावधान करिकें कहतहैं; तामें श्रीठाकुरजीनें अपनी वाणीके अधिपतिरूप श्रीआचार्यजीमहाप्रभूनको प्राकट्य करिकें श्रीभागवतको यथार्थ अर्थ प्रकट करिवेकी आज्ञा देकें श्रीआचार्यजीद्वारा श्रीसुबोधिनीजी (टीका) करवाई, तामें तृतीयस्कंधताई श्रीसुबोधिनी भई तब भगवान् श्रीआचार्यजीके विमयोगकूं सहन न करिसके तासूं अपनी पास पधारवेकी आज्ञा करी तब श्रीमहा-प्रभुनने स्कंधको क्रम छोडिकें दशमस्कंधकी श्रीसुबोधिनीजी करी इतने फेर अपने समीपमें पधारवेकी भगवानकी दूसरी आज्ञा भई, तब संपूर्ण श्रीभागवतके ऊपर श्रीसुबोधिनीजी भई न हती तासूं दोय आज्ञाको उल्लंघन क्रियो तब भगवानकूं श्री-आचार्यजीके मिलनकी आवश्यकता होयवेसूं अति कृपायुक्त रोषपूर्वक अपने पास पधारवेके लिये तीसरी बेर आज्ञा भई तब श्रीआचार्यजी महाप्रभुजी भगवानको आग्रह देखिकें प्रथम

दोय आज्ञाको उल्लंघन कियो हे सो श्रीभागवतकी टीका करिवेकी प्रथम आज्ञा भई हती ताकी दृढ़ता अंतःकरणमें हती तासूं दोय आज्ञाको उल्लंघन कियो तब तीसरी आज्ञा भयेसूं भगवानको आग्रह जानिकें एसी दृढ़ताको स्थानक अंतःकरणहि हे एसो दिखायवेकेलिये अंतःकरणकों प्रबोध करतहें.

**श्लोकः—अंतःकरण ! मद्राक्ष्यं सावधानतया भृणु ।  
कृष्णात्परं नास्ति दैवं वस्तुतो दोषवर्जितम् ।१।**

टीका—हे अंतःकरण ! सावधानतासूं मेरे वाक्यकों श्रवण कर. यहां साधारण अंतःकरण लिख्योहे. तासूं अपनो तथा दूसरेको अंतःकरण समझवेमें आवतहे, तथापि समाप्तिमें कह्योहे जो ये सुनिकें भक्त निश्चितपनेकूं प्राप्त होंय; तासूं भक्तनके अंतःकरणकों बोध करिवेके लिये हि अपने अंतःकरणके मिससूं यह वाक्य कहेहें. एसें अंतःकरणकों सावधान करिकें. ब्रज-भक्तनके दृष्टांतसूं अपने वैष्णव. भगवानकी आज्ञामें प्रमादयुक्त होय सो नहि होयवेके लिये प्रथम भगवानकी बडाईकी भावना करिवेकों कहतहें जो लोक तथा वेदमें कहे एसे दोषनकरिकें विवर्जित जिनकों रासक्रीड़ा मिलेहे एसो ब्रज-भक्तनको समूह श्रीकृष्णसों भिन्न नहिहे तासूं विनको दृष्टांत लेयके भगवानकी आज्ञामें प्रमाद नहि राखनों. यद्यपि भगवानकी सेवामें सर्व इंद्रियनकों बोध करनो योग्यहे तथापि

जेसें राजा स्वाधीन भयेसूं सब राज्यके मनुष्य तथा प्रजा प्रजा स्वाधीन होयजाय तेसें मन हे; सो सब इंद्रियनको राजा हे तासूं मन वशमें आयवेसूं सब इंद्रिय वसमें होयजाय एसें जतायवेके लिये अंतःकरणकों हि बोध कियो हे ॥१॥ एसें अपने अंतःकरणमें भावकी बडाइ आद्यजाय ताकी निवृत्ति करिकें जीवकूं दैन्यकी सिद्धि होयवेकेलिये जीव स्वभावसूं हीन हैं एसें जतायवेकों दृष्टांत कहतहैं.

**श्लोकः—चांडाली चेद्राजपत्नी जाता राज्ञा च मानिता ।  
कदाचिदपमाने वा मूलतः का क्षतिर्भवेत् ॥२॥**

टीका—चांडाली होय सो कछुगुणकरिकें कदाचित् राजाकी पत्नी भई ओर दूसरी पत्नीकी अपेक्षासूं वाकूं मानयुक्त करी, फिर कछुक अपराध भयेसूं राजानें वाको अपमान कियो तामें मानहोयवेके मूळरूप राजपत्नीपनेसूं कहा क्षति होय हे ? इतने राजा विना ओर कोऊ वाकूं देख न सके स्पर्श न करसके ओर अन्यके विनियोगमें न आवे तथा राजपत्नीपनेकी बडाई इत्यादिक धर्म जो आये सो न्यून नहिं होय हैं तेसें चांडाल-जाति अपमानके कारणरूप हे तासूं वामें तो क्षति हेहि नहिं परंतु राजपत्नीपनेसूं हि क्षति नहिं हे यज्ञमें पतिके संग बैठवे योग्य होय सो हि पत्नी कहिजाय हे; तासूं ये चांडाली राजाकी स्त्री भई तोहू पत्नी नहिं कहिजाय तथापि जेसें



पत्नी त्यागयोग्य नहीं है तेसें ये हू त्यागयोग्य न होय एसें जतायवेके लिये यहाँ पत्नीशब्द कह्यो है ॥ २ ॥ एसें दृष्टांत कहिके सिद्धांतमें याकी बरोबरता जतायके तेसी समझको फल कहत हैं.

**श्लोकः—समर्पणादहं पूर्वमुत्तमः किं सदा स्थितः ।**

**का ममाऽधमता भाव्या पश्चात्तापो यतो भवेत् ॥३॥**

टीका—सेवाके अधिकाररूप ब्रह्मसंबंध भयेके पहिले में चांडालीवत् सर्वदोषसहित हतो तब कहा सर्व काल उत्तम हतो ? किंतु उत्तम नहीं हतो; जैसे चांडाली राजपत्नी भई तेसें में हू समर्पणसूँ हि उत्तम भयो हूँ. तासूँ कदाचित् भगवानकी अपसन्नता होय तोहू मेरो अंगीकार कियो है तासूँ भगवान् सर्वथा मेरो त्याग न करेगें ओर में अधम न होऊँगो. जैसे चांडाली राजपत्नी भई होय ताकी राजा त्याग न करे ओर फिर चांडाली न होय तेसे अब मेरी अधमता कहा होयवेवारी है ? जासूँ पश्चात्ताप होय. ईतनें राजाकी स्त्री राजकुमारी होय तब ताको अपमान होय तो पश्चात्ताप होय, क्यों जो दोउ समान हैं परंतु चांडालीको राजाने राजपत्नी करी फिर ताको अपमान होय वामें वारों पश्चात्ताप करनें योग्य नहीं है तेसें जीव अत्यंत हीन हतो ताको अंगीकार करिके भगवदीय कियो तब वारों भावकी बडाई होयवेसूँ अमिमान भयो तब प्रभु

अप्रसन्न भये तामें जीवकी मानहानि कहा हे ? जो पश्चाताप होय ! तासूं पश्चाताप न करनो. ॥ ३ ॥

एसैं जीवके स्वरूपकों देखिकें विचारको उपदेश करिकें भगवानकी इच्छा कोई मिटायसकें एसैं नहि हे एसो अनुसंधान रहिवेके लिये भगवानके धर्मको विचार करिकें उपदेश करत हैं.

**श्लोकः—सत्यसंकल्पतो विष्णुर्नान्यथा तु करिष्यति ।**

**आज्ञैव कार्या सततं स्वामिद्रोहोऽन्यथा भवेत् ॥४॥**

टीका—भगवान् विष्णुहैं इतनें बाहिर-भीतर सर्वत्र व्याप्तहैं तासूं अपने अंतर्ग्रामिपनेसं सबनके भीतर प्रविष्ट हैं और सत्यसंकल्पहैं सो अपना जो सत्य संकल्प हे तासूं दुसरेप्रकार-करिकें तो न करेगें जेसो संकल्प होयगो तेसैं हि करेगें. अथवा भगवान् सत्यसंकल्प हैं तासूं अन्यथा न करेगें इतनें फलदानमें विलंब न करेगें; तासूं सर्वदा प्रभूनकी आज्ञाके अनुसार सब करनो जो एसैं न करे तो स्वामिद्रोहरूप बडो अपराध होय ॥ ४ ॥

सेवकपनेके विचारके अनुसार अपना धर्म करिवेसूं  
स्वामिपनेके विचारके अनुसार प्रभु अपना  
धर्म करेगें ये कहत हैं.

**श्लोकः—सेवकस्य तु धर्मोऽयं स्वामी स्वस्य करिष्यति ।**

टीका—जो ऊपरके श्लोकमें सेवकको धर्म कछो हे सोई

वाको धर्म हे सो धर्म जो तोमें होय तो अपने स्वामी जो प्रभु सो हू अपने स्वामीपनेको जो धर्म हे सो सेवकमें करेंगे, अथवा प्रभु अपने स्वामी हैं आपन त्रिनके सेवक हैं तासों अपने त्रिनके आत्मीय हैं तासूं जो जो भगवाननें विचारधो होयगो सो अपने हितको हि होयगो ओर सोहि करेंगे ऐसे समझनों येहि सेवकको तो धर्म हे ॥

अपने प्रभुके सेवक हैं एसी विचार अवश्य करनो चाहिये एसे जतायवेकेलिये दो-  
श्लोककरिकें अपनी अख्यायिका  
कहत हैं.

श्लोकौः—आज्ञा पूर्व तु या जाता गंगासागरसंगमे ॥५॥

याऽपि पश्चान्मधुवने न कृतं तद्वयं मया ।

देहदेशपरित्यागस्तृतीयो लोकगोचरः ॥६॥

पश्चात्तापः कथं तत्र सेवकोऽहं न चान्यथा ।

टीका—प्रथम गंगासागरसंगमके प्रदेशमें जा आज्ञा भई हती ओर तापीछे मथुराजीमें जो आज्ञा भई सोई आज्ञा प्रमाण मेनें नहि कियो हे क्यों जो प्रभूनके स्वरूपको अनुभाव प्रकट करिवेके लिये तथा श्रीभागवतको गूढार्थ प्रकट करिवेके लिये तो मोकूं पूर्वसहि आज्ञा भई हे तासूं इनदोउआज्ञानको उल्लंघन कियो हे; क्यों जो प्रथम आज्ञा देहके परित्यागविषयकी भई हती, ओर दूसरी आज्ञा देशके परित्यागके विषयकी हती सो

दोउ आज्ञा सिद्ध करतो तो स्वात्मानुभाव तथा श्रीभागवतको गूढार्थ प्रकाश करिवेकी आज्ञा सिद्ध न होती. अब लोकके अनुभवमें आवे एसो परित्याग (संन्यास) करिवेकी तीसरी आज्ञा भई तामें मोकें पश्चात्ताप भयो; क्यों जो मैं सेवक हूं. तासूं स्वामीकी आज्ञाप्रमाण करना योग्य हे; परंतु स्वामीकी आज्ञाको उल्लंघन करना योग्य नहिं हे, एसो विचार करते पश्चात्ताप होना योग्य हे. अथवा (संन्यासग्रहणपूर्वक गृहको परित्याग करिवेकी आज्ञा भई ताप्रमाण संन्यासग्रहणपूर्वगृहको परित्याग कियो. यद्यपि होय आज्ञाको उल्लंघन कियो हे; तासूं अपराध होयवेकों संभव हे. तथापि तृतीय आज्ञाप्रमाण त्याग कियो हे, तासूं प्रथमकी दोयआज्ञाहू सिद्ध भई एसें मानिकें पश्चात्ताप करना योग्य नहिं हे. कदाचित् दोआज्ञाको हू उल्लंघन कियो हे ताकरिकें जो अपराध भयो हे, तासूं प्रभु फलमें विलंब करे तो हू ये फलको विलंब कियोहे सोहि दंड दियो हे एसो जानिकें सेवकको पश्चात्ताप करना योग्य नहिं हे. ओर मैं सेवक हूं अन्यथा नहिं हूं, क्यों जो मेरेमें प्रभु सेवकपनी नहिं मानते तो अपराध भयो तासूं उपेक्षा हि करते, स्वीयपनी जानिकें तीसरी आज्ञा न करते, परंतु तीसरी आज्ञा करी हे, ओर दोय आज्ञाको उल्लंघन भयो तासूं फलमें विलंब होयगो एसो ताप होय हे तासूं प्रभूननें ये अपनों सेवक हे एसें मान्यो हे तासूं पश्चात्ताप करना योग्य

नहिं हे. ॥ ५ ॥ ६ ॥

ये विचार कियो जो पञ्चात्ताप न करनो सो तो योग्य हि हे, तथापि प्रथम दीय आज्ञाको उल्लंघन भयो हे, सो अपराध भयो हे; ताकरिकेँ भगवानकी अप्रसन्नता भई होयगी ताकी निवृत्ति न होय, तब प्रभु कहा करैगे? एसो जो भय होय सो कैसेँ निवृत्त होय? पेसी शंका होय ताकेलिये वूसरे विचारको उपदेश करत हे. ॥

**श्लोकः—लौकिकप्रभुवत्कृष्णो न दृष्टव्यः कदाचन ॥७॥**

सर्वं समर्पितं भक्त्या कृतार्थोऽसि सुखी भव ।

टीका—लौकिक स्वामी जैसेँ सेवकको अपराध भयो होय तो वाको त्याग करत हे, तेसेँ प्रभु अपनो त्याग करैगे एसो संदेह नहिं करनो एसेँ जतायवेके लिये कहत हेँ जो लौकिक-स्वामिवत् फलरूप श्रीकृष्ण काहूदिन नहिं जानने; इतनेँ लौकिकमें स्वामिपनेको व्यवहार हे सो स्वामी प्राकृत होयवेसुँ वाकोँ अंगीकृतको परित्याग ( करे सो ) संभवित हे; परंतु यहाँ तो प्रभुको अलौकिक स्वामिपनो होयवेसुँ चिनको अंगीकार कालत्रयमें हू नित्य हे अंगीकृतको त्याग करिवेकी संभावनाहू नहिं हे ओर तेरेउपर प्रभुकी कृपा हती तासुँहि तेने भक्तिमार्गके अनुसार सर्व समर्पित कियो हे, ईतने तुं कृतार्थ हे अर्थात् सर्व साधनरूप तथा फलरूप अर्थकूँ प्राप्त भयोहे तासू

मनमें चिंता छोड़िकें सुखी हो ॥ ७ ॥

भगवानको अंगीकार निश्चयहे तासूं यद्यपि फल देखेंगे  
तथापि प्रथम फल दियो हतो तैसें देखेंगे किंवा  
नहीं देखेंगे ? पसे संदेहसूं जो क्लेश होय  
ताकी निवृत्तिके लिये दृष्टांत करत हैं.

श्लोकः—प्रौढाऽपि दुहिता यद्वत्स्नेहान्न प्रेष्यते वरे ॥८॥

तथा देहे न कर्त्तव्यं वरस्तुष्यति नान्यथा ।

टीका—जैसें पुत्री बडी भई होय अर्थात् पतिके सर्वकार्यमें  
योग्य भई होय तथापि मातापिताकूं वाके उपर स्नेह होय  
तासूं एसें जाने जो ये बालकहे ओर वाके पतिके घरमें कार्य  
विशेषहे सो करिवेमें थकजायगी अथवा क्लेशयुक्त होयगी,  
एसें जानिकें वाके उपरके स्नेहसूं वाके पतिके समीप भेजे  
नहिं तब वाको पति अप्रसन्न होय तैसें अपने देहमें स्नेह  
राखिके प्रभुको कार्य ( सेवा ) करिवेमें देहकूं क्लेश होयगो,  
एसें जानिकें प्रभुके कार्यमें देहको विनियोग न करे तो प्रभु  
अप्रसन्न होय; तासूं देहमें तेसो स्नेह न करनो; क्यों जो पुत्री  
बडी भई ताकूं घरकी पास न पठावे तो जैसें वर प्रसन्न न होय  
तैसें देहकी ऊपर स्नेह राखिकें भगवानकी सेवामें देहकूं न  
लगावे तो भगवान् प्रसन्न न होय ॥ ८ ॥

यद्यपि भगवानकी आज्ञामें हठ करनो योग्य नहिं हे तथापि  
श्रीभागवतकोअर्थ प्रकटकरिवेको भगवानको अभिप्राय हे  
ताममाण अर्थ प्रकटकरिवेतें लोकमें बडाई होय तामें

कदाचित् थोरीबहोत फलदेवेमें विलंबकी इच्छा  
 संभवे हे; क्योँजो श्रीभागवतको अर्थ प्रकट करें  
 तामें प्रभुकेपासपधारिवेमें विलंब होय; तासूं  
 श्रीभागवतको अर्थ प्रकटकरिवेको प्रमूनको  
 अभिप्रायहे तापेंसूं विलंबेच्छाको संभवहे.  
 ऐसी शंकाको निराकरण करतहें

**श्लोकः-लोकवच्चैस्थितिर्मे स्यात्किं स्यादिति विचारय ।**

**अशक्ये हरिरेवास्ति मोहं मागाः कथञ्चन ॥९॥**

टीका-लोकवत् मेरी स्थिति जो होय तो कहा फल होय?  
 सो विचारकर. ओर जहां अशक्य होय तहां प्रभु हरि हि हैं;  
 अर्थात् भक्तनके दुःख तथा पापकूं हरिवेवारे हैं तासूं काहू-  
 प्रकारसूं मोहकूं प्राप्त मतिहो; इतनें भगवानकू अभिप्रेत श्री-  
 भागवतको अर्थ प्रकटकरिवेतें यद्यपि लोकमें बडाई होय. जैसें  
 जैमिनि तथा व्यासादिकनने वेदसूं अविरुद्ध मीमांसा करी  
 तामें विनकी लोकमें बडाई भई, तेसें मेंहु वेदादिकनसूं अवि-  
 रुद्ध एसो श्रीमद्भागवतको अर्थ प्रकट करूं तामें जैमिनि तथा  
 व्यासादिकवत् मेरीहू बडाई होय. परंतु ये तो लौकिक बडाई  
 हे, कछू स्वमार्गीय अलौकिक बडाई नहिं हे. ओर स्वमार्गीय  
 फलको विचार करें तब मुक्ति विगेरें फल हू फलरूप नहिं हे,  
 तहां लौकिक फल तो गिनतीहूमें कहा हे? एसें विचार कर.  
 अथवा लोक जैसें संसारमें आसक्त हैं ओर जुदे जुदे स्वभाव-  
 वारे में सो अपने स्वभावके अनुसार शास्त्रादिककरिकें चलत

हैं तैसें मेरी स्थिति होती तब एसो पश्चात्ताप नहिं होता तब कहा फल मिलतो ? लोकतुल्य मेंहूँ होतो; परंतु लोकजैसी मेरी स्थिति नहिं भई हे तासूं मेरे उपर भगवान् दया करत हैं. एसो विचार कर. ओर भगवाननें आज्ञा करी हे ताप्रमाण होपसके नहिं एसें दीखतो होय तो भगवान् हरि हैं; इतनें स्मरणकरिवेवारेनके सबपापनके हर्ता हैं. सो अपनें हूँ रक्षक हैं एसो विचार कर. परंतु काहूरीतिसूं मोहकों मति प्राप्त हो. ॥ ९ ॥

एसें सब विचारके वाक्य कहिकें  
समाप्त करत हैं.

श्लोकः-इति श्रीकृष्णदासस्य वल्लभस्य हितं वचः । १० ।

चित्तं प्रति यदाकर्ण्य भक्तो निश्चिततां व्रजेत् । ११ ।

इति श्रीवल्लभाचार्यविरचितोऽतःकरण-

प्रबोधः समाप्तः ॥

टीका-एसें श्रीकृष्णके दासकों सुखसंपादनकरिवेवारे, भगवान् तथा भक्तनके प्रिय एसे श्रीमद्बल्लभाचार्यजीको चित्तकप्रति वचन हे, जो सुनकें भक्त निश्चितपनेकों प्राप्त होय. ॥ १० ॥ ११ ॥

याग्रंथमें इतनो सिद्ध भयो जो श्रीआचार्यजी-महाप्रभूननें जैसें भगवानकी आज्ञाको उल्लंघन कियो तेसें वैष्णवनकूं श्रीआचार्यजीको दृष्टांत लेयकें भगवानकी आज्ञाको उल्लंघन नहिं करनों.



जीव जो हे सो स्वभावसंहि दुष्ट हे, तथापि, समर्पणसं उत्तम होय हे; तासं भगवानकी कृपा विशेष होय तोहू अपनी बडाई न माननी, भगवान् सत्यसंकल्प हैं, सो कहा करिवेकी इच्छा करत हैं? सो जानिवेमें नहिं आवत हे; तासं सर्वदा विनकी आज्ञाहिमें रहनों, जो आज्ञाको उल्लंघन होय तो स्वामिद्रोहरूप बड़ो अपराध होय ओर में सेवक हों तासों मेरे योग्यहि मेरे स्वामी करेगें, एसो विचार करिकें सेवककूं स्वामीकी आज्ञाहिमें रहनो. श्रीआचार्यजीनें अपने प्रौढीकरके दोगआज्ञाको उल्लंघन कियो तामें पश्चात्तापहि कह्यो हे; तासं अपने आज्ञाको उल्लंघन करनो नहिं, लौकिकस्वामी जेसें अपराधकरिकें सेवकको त्याग करे हे तेसें भगवान् सेवकको नहिं छोड़ेंगें. भगवानको अंगीकार नित्य हे सो समर्पणादिकनकूं सिद्ध भयो तब कृतार्थताहि होयगी, एसी भावना राखनीं, वामें संदेह नहिं करनो. ओर प्रौढपुत्रीमें स्नेह जेसें राखेंहें तेसें देहमें स्नेह नहिं राखनो, प्रभुके विनियोगमें लगावनो क्यों जो प्रौढ पुत्री वरके पास भेजवेयोग्य हे तथापि वाकूं स्नेहकरिकें वाके वरके पास भेजे नहिं तो वर प्रसन्न होय नहिं तेसें देह प्रभूनकी सेवाके योग्य हे तथापि याकूं

श्रम होयगो एसे विचारके देहके ऊपर स्नेह राखिके प्रभूनकि  
सेवामें राखे नहि तो प्रभु प्रसन्न होय नहि, तेसे अपनी  
सेवाके लिये प्रभूनने देह दियो हे ओर प्रभूनने अंगीकार  
कियो हे, तथापि जो सेवा न करे तो दूसरेलोककी बराबरी  
अपनकूं होय, ओर सेवामें देहको विनियोग करिवेमें प्रतिबंध  
आयवेको संभव होय तो भगवान् हि रक्षकहैं एसी भावना  
राखनी. या विना दूसरो उपाय नहि हे ॥

इति श्रीमद्ब्रह्मभाष्यार्यविरचित अंतःकरणप्रबोधकी  
संक्षिप्तव्रजभाषाटीका श्रीमद्दोस्वामिश्रीनृसिंह-  
लालजीमहाराजकृत संपूर्ण भयी.



विवेकधैर्याश्रयनिरूपण

श्रीकृष्णाय नमः ॥ श्रीगोपीजनघट्टभाय नमः ॥

## अथ विवेकधैर्याश्रयग्रंथकी संक्षेपसू भावार्थटीका लिखी हे ॥



भक्तिमार्गमें अंगीकारभयेसू जीव, भगवानके दासपनेकूं प्राप्त भयो ओर भगवत्सेवामें प्रवृत्त भयो; तब सेवाकरिकें भक्तिकी दृढता होयवेके लिये नवरत्नग्रंथमें प्रकार कहोहे ताप्रमाण त्याग करिवेको निरूपण करिवेमें यद्यपि विवेक, धैर्य ओर आश्रय संक्षेपसू कहोहे तथापि जबताँई विवेका-दिकनको विशेष ज्ञान न होय तबताँई सेवामें तेसी दृढता होय नहिं; तासू अपने सेवकनकूं विशेष दृढता होयवेकेलिये श्रीआचार्यजीमहाप्रभुजी विवेक, धैर्य ओर आश्रयकों विस्तारसू निरूपण करतहैं

श्लोकः—विवेकधैर्ये सततं रक्षणीये तथाऽऽश्रयः ।

विवेकस्तु हरिः सर्वं निजेच्छातः करिष्यति ॥१॥

टीका—विवेक ओर धैर्य सर्वदा राखने तैसें येदोउनकी सिद्धिकेलिये आश्रय हू सर्वदा राखनो; तामें प्रथमविवेक तो यही हे जो प्रभु हरिहैं; अर्थात् भक्तनके दुःख तथा पापकों

हरिवेवारे हैं एसें समजनो सो प्रथम विवेक हे; इतने अपने प्रयत्नसँ सिद्ध होय एसो लौकिक ओर भगवत्सेवामें उपयोगमें आवे एसो अलौकिक सब भगवानहि सिद्ध करगें तासँ सेवा छोडिके अपनो प्रयत्नादिक नहि करनो सो प्रथम विवेक हे. येहि नवरत्नमें “ चिंता काऽपिन कार्या ” याश्लोकमें निरूपण कियोहे. तहां शंका होय जो प्रार्थना किये बिना भगवान् केसें सिद्ध करेगें ? तहां कहत हैं जो प्रभु अपनी इच्छासँ करेगें अथवा अपने भक्तनकी विकाररहित इच्छा होयगी तो भक्तनकी इच्छाप्रमाण करेगें एसें समजनो; तासँ अपने भक्तनकूं जो इच्छितहे तामे विकार नहि होयगो तो भक्तनको अभीष्ट प्रभु अपनी इच्छासँहि सिद्ध करेगें प्रार्थनाकी अपेक्षा नहि राखेगें; ताते प्रार्थना नहि करनी ये द्वितीय विवेकहे. येहि “ सर्वेश्वरश्च सर्वात्मा ” ये नवरत्नके श्लोकमें निरूपण कियोहे. ॥ १ ॥

घारंघार प्रार्थना क्यों नहि करनी ? एसें

जानिवेकी इच्छा होय तहां कहत हैं.

श्लोकः—प्रार्थिते वा ततः किं स्यात् ? स्वाम्यभि-

प्रायसंशयात् ।

सर्वत्र तस्य सर्वं हि सर्वसामर्थ्यमेव च ॥२॥

टीका—प्रार्थना कियेतें कहा होय ? कलुभी न होय; क्यों

जो स्वामिको अभिप्राय कहाहे ? सो अपन नहिं जानेंहैं. भगवान् अपनी इच्छासंहि देयेंगे इच्छा नहिं होयगी तो नहिं देयेंगे; तासूं प्रार्थना करिकें स्वधर्मकी हानि क्यों करनी ? एसें समजनों सो तृतीय विवेकहे. सबस्थलनमें सर्व वस्तु भगवानकीहीहे ओर जो वस्तु न होय सो सिद्धकरिवेको सामर्थ्य हू भगवानमें हैं तेसें जाकूं जो वस्तु अपेक्षितहे सो साक्षात् अथवा परंपरासूं प्रभुहि देतहें परंतु जीव अज्ञानीहे सो मेनें यत्नकरिकें सिद्ध करी एसें मानतहे; तासूं जीवकूं एस समजनों जो में शरण नहिं आयो हतौ तब मेरी पास जो वस्तु हती सोहू प्रभुननेहि दीनी हती, तब अभीतो प्रभूनने मेरो अंगीकार कियोहे तासूं प्रार्थना कियेविनाही प्रभुही देयेंगे एसो निश्चयकरिकें सेवाही करनी; परंतु सेवा छोडिकें अपनो प्रयत्नादिक नहिं करनो. सो चतुर्थ विवेकहे. ॥ २ ॥

यहां पसी शंका होय जो कछुक समय सेवा करनी ओर बाकीके समयमें दूसरो कार्य करे तो कहा दोष हे ? तहां कहतहें.

**श्लोकः—अभिमानश्च संत्याज्यः स्वाम्यधीनत्वभावनात् ।  
विशेषतश्चेदाज्ञा स्यादंतःकरणगोचरः ॥३॥  
तदा विशेषगत्यादि भाव्यं भिन्नं तु दैहिकात् ।  
टीका—स्वामिके आधीन सबहे एसी भावनासूं वासनासहित**

अभिमानको त्याग करनो; इतने याको अभिप्राय यहहे के समर्पण भये पीछे देहादिकनमें अपनेपनको अभिमान नहि राखनो; क्यों जो देहादिकनमें स्वतंत्रता करिके अभिमान होय तो तिनमें देह तथा इंद्रियनको विनियोग होय; तासूं तिनदेहादिकनमें अमिमानको त्यागकरिके देहादिक सब भगवानमें अर्पित कियेहैं तातें सब भगवानके आधीनहैं एसी भावना करनी ओर जब एसी भावना भयी तब केवल भगवानके आधीनपनेको अनुसंधान सर्वदा रहे इतने भगवत्कार्यविनाके ओर सब कार्यनमें दोषकी स्फूर्ति होयगी ताकरिके अपने स्वामी जो भगवान् तिनसंबंधिकार्यनमेंहि स्वधर्मपनेकी स्फूर्ति होयगी इतने वह वैष्णव प्रभुसेवाहि करेगो, दूसरेमें दोषरूप बुद्धि होयवेसूं दूसरो कार्य करेगो नहि. ये पंचम विवेक हे. येहि नवरत्नमें “ निवेदनं च स्मर्तव्यम् ” याश्लोकके विवरणमें श्रीगुसांइजीने निरूपण कियोहे. अपनो अंगीकार जेसैं प्रभूनने कियोहे तेसैं स्त्री, पुत्रादिक सबनको अंगीकार अपने संगहि प्रभूनने कियो हे तासूं तिनकेलियेहू अपनो प्रयत्नादिक नहि होयगो. येहि नवरत्नमें “ चिंता कापि ” याश्लोकके व्याख्यानमें “ लौकिकी तथा अलौकिकी चिंता छोडनी ” एसी पंक्तिसूं निरूपण कियोहे. एसैं श्रीआचार्यजी-महाप्रभूनकी आज्ञानुसार विवेकादिकनसूं सेवा करनो होय तामें प्रभूनकूं अपेक्षित वस्तु होय ताकी आज्ञा श्रीआचार्यजीकी

आज्ञासं विशेष होय तो प्रभूनकी आज्ञाप्रमाण विशेष करनी ओर जो विशेष आज्ञा होय नहि तो श्रीआचार्यजीकी आज्ञानुसारहि सेवा करनी. प्रभूनकी विशेष आज्ञा कैसें जानिवेमें आवे ? एसी शंका होय तहां कहतहैं जो ( प्रभु अंतःकरणगोचरहैं इतने अंतर्यामीहैं तासं ) अंतःकरणमें जानिवेमें आवे एसी आज्ञा होय; अर्थात् स्वप्नादिद्वारा प्रभु जतावैं अथवा भक्तनके अंतःकरणमें प्रभु बिराजतहैं तासं आत्मापनेसं हि भक्तनकूं स्फूर्ति रहेहे इतने भगवानकी आज्ञाहु जानिवेमें आवतहे. ॥ ३ ॥

भगवानके स्वरूप तथा लीलाके संबंधमें प्रभूनकी विशेष आज्ञा होय तो ताप्रमाण सेवामें कृति करनी, नहि तो श्रीआचार्यजीकी आज्ञानुसारहि करनी; सो प्रभूनकी विशेष आज्ञाहु अपने देहादिकके संबंधसं भिन्न होय तब वाआज्ञा-प्रमाण विशेष करनी; इतने स्त्रीके संबंधको अथवा पुत्रादिकके विवाहादिकके संबंधको जो कार्य होय तामें विशेष आज्ञा होयवेको संभवहू नहि सो मूलमें भिन्नपदसं जतायो हे. येहि निरूपण नवरत्नमें "सेवाकृतिर्गुरोराज्ञा बाधनं वा हरीच्छया" याश्लोकमें कियो हे; तासं समर्पण कियेपीछें तदीयपनेको अनुसंधान राखिकें प्रभूनके प्रसादपनेसं जितनो आवश्यक होय तितनोहि लौकिक सब करनी परंतु आग्रहकरिकें विशेष नहि करनी ये छट्टो विवेकहे.

सेवामें धनप्रभृति खहिये सो न होय तब  
करज करिके सामग्रीप्रभृति सब  
करिवेको आग्रह राखनों के  
नहिं ? एसें जानिवेकी इच्छा  
होय तहां कहतहें.

श्लोकः—आपद्रत्यादिकार्येषु हठस्त्याज्यश्च सर्वथा ॥४॥

अनाग्रहश्च सर्वत्र धर्माधर्माग्रदर्शनम् ।

विवेकोऽयं समाख्यातो धैर्यं तु विनिरूप्यते ॥५॥

टीका—आपत्ति प्राप्त होय तब प्रथम जो सामग्रोप्रभृतिको नियम बांध्यो होय ताहिप्रमाण करिवेको हठ सर्वथा छोडनो; इतने करज करिके नियमानुसार सब करनोहि एसो हठ सर्वथा नहिकरनो किंतु विना प्रयत्न जो मिले तामें संतोष राखिके तितनोहि प्रभूनकों अर्पण करनो विशेषको आग्रह नहिं राखनो; क्यों जो पुष्टिमार्गकी मर्यादाहूँ प्रभूनकूं भक्त जो समर्पेगो सो प्रभु साक्षात् अंगीकार करेंगे. जहां प्रभुसंबंधिकार्यमेंहु हठ नहिं करनो तहां लौकिककार्यमें हठ सर्वथा नहिं करनो तामें तो कहा कहेनो ? ये सप्तम विवेकहे ॥४॥

वैदिककार्यमें कैसें करनो ? एसें जानिवेकी इच्छा होय तहां कहतहें जो स्मार्त्त तथा वैदिक सर्वस्थलनमें आग्रह नहिकरनो; इतने भगवत्सेवाकूं छोडिकेहु स्मार्त्तश्रौतादिकधर्मनको आचरण करनों एसो आग्रह सर्वथा नहिकरनो. किंतु



भगवानकी आज्ञासं प्राप्तभयो जो आवश्यक कर्महे सो सेवाके अनवसरमें करनो. मूलमें चकारहे तासुं साक्षात् भगवानको संबंध जामें न होय एसे सवकार्यनमें अनाग्रहहिं राखनो ये अष्टम विवेक हे. वैदिकधर्मनमें अनाग्रह कैसें होय ? एसें जानिवेकी इच्छा होय तहां कहतहें जो धर्म ओर अधर्मको अग्रदर्शन करनो; इतने परिणामको विचार करनो सो याप्रमाण के जैसें श्रौतस्मार्तादिक धर्म ओर ये नहिं करिवेतें पाप लगे सो अधर्म ताको परिणाम विचारिकें जाके परिणाममें अधर्म दीखवेमें आवे सो नहिंकरनो. जैसें स्मार्त्त, श्रौत ओर भगवद्धर्म तिनमें उत्तरोत्तर बलवान्हे तासुं—श्रौत (वैदिक) धर्म करिवेमें स्मार्त्त धर्मको त्याग होय तामें दोष नहिंहे, तेसें भगवद्धर्म करिवेमें स्मार्त्त तथा श्रौतधर्मको त्याग होय तो दोष<sup>१</sup> नहिंहे; क्यों जो सबसुं अधिकबलवारो भगवद्धर्महे एसें विचारिकें स्मार्त्त तथा श्रौतधर्मनमें आग्रह नहिंकरनो ये नवम विवेक हे. भगवानकी आज्ञा हे जो कर्म

---

१ यहां स्मार्त्त तथा वैदिकधर्मको त्याग होय तामें दोष नहिंहे एसें कहिवेको अभिप्राय एसोहे जो सर्वकाल भगवद्धर्ममें रहतो होय ताकुं स्मार्त्तादिकधर्ममें जितनो समय जाय तितनो समय भगवद्धर्म छुटे तब एसेभक्तके मनमें क्लेश होय तासों स्मार्त्तादिकधर्मको फलहोय नहिं ओर भगवद्धर्म छोडिकें स्मार्त्तादिकधर्म करे तोहु ताको फल न होय ओर उलटो पाप लगे ताकरितें निरंतर भगवद्धमेही मम जो रहतो होय ताकुं स्मार्त्तादिक धर्म छूटजाय तो हरकत नाहिं.

करनों ताकूं यामार्गमें प्रमाण नहिंमानेहैं एसी काहुकूं शंका होय सो नहिंहोयवेके लिये भगवद्भक्तनकूं कर्मादिक करनोहे एसें जाननों. यह विवेक विस्तारसूं कह्यो अब धैर्यको निरूपण विस्तारसूं कहतहैं; इतने नवरत्नमें “ चित्तोद्वेगं विधायपि ” ये श्लोकमें धैर्यको निरूपण कियोहे; परंतु अब विस्तारसूं निरूपण करतहैं. ॥ ५ ॥

अब धैर्यको लक्षण कहतहैं.

श्लोकः—त्रिदुःखसहनं धैर्यमामृतेः सर्वतः सदा ।

तत्र देहवद्भाव्यं जडवद्गोपभार्यवत् ॥६॥

टीका—मरणजैसो कष्ट आयजाय तहाँताँई अथवा आयुष्य रहे तहाँताँई आधिभौतिकादिक तीन्योप्रकारके दुःखनकों सबतरहेसू सहन सदा करनों ताको नाम धैर्यहे, इतने देहसंबंधी जो दुःख होय सो आधिभौतिक, कामादिकनसूं इंद्रियसंबंधी जो दुःख होय सो आध्यात्मिक ओर जीवमें कितनोंक धैर्यहे एसें परीक्षाके अर्थ अथवा दुःख भुगतवेको जीवको प्रारब्ध होय ताके अर्थ भगवदिच्छासंहि दुःख प्राप्त होयहे सो अथवा प्रभूनकूं विनियोगकरिवेकेलिये जा वस्तुकी अपेक्षा होय सो वस्तु मिलिवेमें विलंब होय ताकरिकें जो दुःख होय सो आधिदैविक दुःख समजनो; ये तीन्योप्रकारके दुःख होय तब देह, इंद्रिय ओर चित्त व्याकुल होय तब सेवा सिद्ध न होय; तासूं सेवाकी सिद्धिके लिये तीन्योप्रकारके

दुःखकों सहनकरनों सोहु मरणपर्यंत कष्ट आयपरे तहाँताई अथवा आयुष्य रहे तहाँताई सहनकरनों; सोहु एकप्रकारके अथवा दोयप्रकारके दुःखकों सहनकरनों एसें नहि किंतु सबतरेहके दुःखनकों सहनकरनों तामें दृष्टांत कहत हैं जो तक्र (छाछ) मेंसूं नवनीत (मांखण) निकासलेहें तब तक्र साररहित होयजायहे, पिछे दुलजाय तो जेसें वामे अभिमान नहि होय वेसूं दुःख नहि होय हे तेसें देहके संबधीनमेसूं तक्रकिसीनांइ अभिमान छोडिवेसूं वे अपमानादिक करेगें ताको दुःख नहि होयगो एसे अभिप्रायसूं देहवारेनकूं वाके संबधी जो स्त्रीपुत्रादिक तिनमें तक्रकी भावना राखिवेको कह्यो हे; इतने देहादिकनसूं जो भगवत्संबंधि कार्य होय सोहि नवनीत ( मांखण ) हे एसें समजके भगवत्संबंधि-कार्यनमेंहि नवनीतवत् अभिमान राखनों एसें आधिभौतिक दुःख सहनकरिवेमें दृष्टांत कहिकें आध्यात्मिकदुःख सहनकरिवेमें दृष्टांत कहतहें जो कामक्रोधादिकनसूं इंद्रियसंबंधि जो दुःख होयहे तामें जडभरतकी भावना करनी; इतने जडभरतकूं जेसें भगवद्भावकरिकें आविष्ट सब इंद्रिय भयी हती तासूं दुःखको भान नहि हतो ओर जडपनो भयो हतो तेसें सेवामें जो प्रवृत्त भयोहोय सो, सब इंद्रिय भगवत्संबंधि हैं एसो अनुसंधान राखिकें भगवान-मेंहि विनियोग करे तब निरंतर प्रभूनकी सेवा तथा गुणनके

कीर्तनस्मरणादिकनकोहि आवेश रहे इतने कामक्रोधादिकनको दुःख न होय ऐसे अभिप्रायसूं जडकी भावना करिवेको कह्यो हे. ऐसे आध्यात्मिकदुःख सहनकरिवेमें दृष्टांत कहतहैं जो प्रारब्धके भोग भुगतायवेकी प्रभूनकी इच्छा होय अथवा परीक्षाके अर्थ प्रभु फलदेवेमें विलंब करें तब गोपाभार्यानीकी भावना करनी; इतने जैसे अंतर्गृहगतानकूं सकामबुद्धि हती तासूं दुःख भुगतवेको प्रारब्ध हतो सो, प्रभूनके संग रासमें मिलवेके फलके विलंबमें कारण भयो तातें गृहमेंसूं निकसिवेको रस्ता मिल्यो नहिं तब नेत्रमूंदिकें प्रभूनको ध्यान कियो तब प्रभूनके विरहको दुःख एसो भयो जो कोटानकोटीवर्षताई कुंभीपाकादिकनरक भुगतवेमें जितनो दुःख होय तितनो दुःख विनकूं भगवानके विरहसूं एक क्षणमें भयो सो भुगत्यो तब पापनकी निवृत्ति होयवेसूं ध्यानमें प्रभु पधारे तब प्रभूनको आश्वेष कियो तामे एसो सुखभयो जो कोटानकोटि वर्षताइ स्वर्गादिक भुगतवेमे जितनो सुख होय तितनो सुख भगवानके आश्लेषसूं एकक्षणमें भयो तापाछें सगुणदेहको परित्याग भयो तब भगवानकी प्राप्ति भई तेसैं मोकूंभी प्रारब्धभोग भयेपिछे भगवान् फल देहिगें ऐसे धैर्यसूं दुःख सहनकरनों. तेसैं जिनको निर्गुण देह हतो तिनकूं प्रतिबंध न भयो ओर भगवानकी पास पहाँचे तब प्रभूनने घर जायवेकेलिये कितनेक वचन कहे तासमय यज्ञपत्नीवत् अन्यथाभाव जैसे विनकों

न भयो किंतु जो इच्छा मनमें हती सो पूर्ण नहिं होयवेको संभव भयो ताके दुःखकों सहनकरिके धैर्यसूं भक्तिमार्गके अनुसार उत्तरहि दियो परंतु गृहगमनकी इच्छाहू न भयी तेसैंहिसांप्रतहू विलंबजनितदुःखकों सहनकरिकें निरवधि-स्नेहसूं मार्गकी मर्यादामें रहिवेसूं भगवान् फल देहिगें; एसो धैर्य राखिकें दुःखकों सहनकरनों ॥ ६ ॥

अबइहांतो आधिभौतिकदुःख सहनकरिवेमें देहादिकनके संबन्धी जो भार्यापुत्रादिक अपमानादिक करें ताकूं सहन-करिवेको कछोहे ओर निबंधमें स्त्रीप्रभृति अनुकूल होय तो विनकीपास सेवादिक करावनों; उदासीन होय तो अपने हाथसूं करे ओर प्रतिकूल होय तो गृहको त्याग करे. एसैं कछो हे परंतु तिर-स्कारादिकनसूं भार्यादिक अपनकूं दुःख दे नहिं तथापि त्याग द्वि करनो कहा ! एसी शंका होय, तहां कहतहैं.

**श्लोकः—प्रतीकारो यदृच्छातः सिद्धश्चेन्नाग्रही भवेत् ।**

**भार्यादीनां तथान्येषामसतश्चाकमं सहेत् ॥७॥**

टीका—भगवदिच्छासूं दुःखकी निवृत्तिको उपाय सिद्ध होजाय तो गृहको त्याग करिवेमें आग्रहवारो न होय. एसैं स्त्री-प्रभृतिनको दूसरेनको ओर असत्पुरुषनको आक्रम सहन करे. इतने स्त्रीप्रभृति भगवदिच्छासूं अनुकूल अथवा उदासीन होय तो विनको त्यागकरिवेमें आग्रहवारो न होय; अनुकूल होय तो

विनकीपास प्रभूनकी सेवा करावे, ओर उदासीन होय तो सेवा करे. तथापि विनको योगक्षेम तो अवश्य करनो, त्याग नहिं करनो. सेवामें प्रतिकूल होयकें प्रतिबन्ध करे तोहि त्याग करे नहिं तो त्याग सर्वथा न करे; क्यों जो हठकरिकें विनको त्याग करे तामें स्त्रीप्रभृतीनकूं क्रोधको आवेश होय तब अपनो द्वेष करे तासूं सेवामें प्रतिबंध होय तब सेवा बनसके नहिं सो सेवामें प्रतिबंधक आपहि भये; तासूं आग्रहसूं सर्वथा त्याग नहिं करनो. ये आधिभौतिकदुःखके प्रतिकारमें व्यवस्था कहि. अब आध्यात्मिकदुःखके प्रतिकारमें व्यवस्था कहत हैं जो सबइंद्रियनकूं अपने अपने भोग्यवस्तुके त्यागमें दुःख होयहे सो भगवदिच्छासूं हि इंद्रियनकी प्रवृत्ति विषयमें न होय तब विनको त्यागकरिवेमें आग्रहवान् न होय; क्यों जो सेवामें अंतराय नहिं होय हे ओर प्रभूनके लिये माला, चंदनप्रभृति तथा भोगसामग्री अवश्य अपेक्षितहे सो प्रभूनने अंगिकार किये पीछें महाप्रसाद दियो हे सो अपने सौभाग्यरूप हे एसें जानिकें विनको उपभोग करिवेमें बाह्य तथा भीतरकी शुद्धि होय; तासूं भगवद्धर्ममें आवेश होय तातें विनको त्याग नहिं करनो; क्यों जो सेवाफलग्रन्थमें सेवाके तीन फल लिखेहे तामें ये अलौकिक भोग मुख्यफलमें गिन्यो हे एसें आध्यात्मिक दुःखके प्रतिकारकी व्यवस्था कहिकें आधिदैविकदुःखके प्रतिकारमें व्यवस्था कहत हैं जो प्रारब्धभोग भयेपीछे अथवा

प्रभु परीक्षाकेलिये विलंब करतें होय सो परीक्षा भयेपीछे कृपाकरिकें प्रभु सेवोपयोगि धनादिक साक्षात् अथवा परंपरासं देवेकी इच्छा करे तब विनको त्याग करिवेमें आग्रहवारो न न होय किंतु भगवानने अपने उपभोगके लिये यह दियो हे एसे मानिकें सब भगवानके अर्थहि उपयोग करनो स्वार्थोपयोग नहिं करनो. ऊपर आधिभौतिकादिक दुःखकों सहनकरिवेको कह्यो हतो ताकी हकीकत लिखके अब देहादिसंबंधि दुःख देवेवारे कोन ? एसे जानिवेकी इच्छा होय तहां कहत हैं जो स्त्रीप्रभृति मार्यादिक कहेजाय हैं; तासं भरणपोषण करिवेमें अपने समान हे तिनकों भरणपोषणहि अपेक्षित हे धर्म अपेक्षित नहिं हे; इतने देहादिक सबवस्तुनको अपनी वावतमें विनियोग होय वाको नाम भरणपोषण हे सो न होय तब वे अतिक्रम करे ताकों सहनकरनो, परंतु क्रोधादिक करनो नहिं, तेसे अपने सेवा पधरायी न होय तब सबनके संग मिलनादिकको जेसो व्यवहार करतें होय तेसो व्यवहार सेवा पधराये पीछे न रहे तब मित्रादिक तथा ओर हू लोक इर्ष्या करिकें अतिक्रम करे ताकों सहन करनों. अथवा अपने भ्राताप्रभृति बन्धुलोक वैष्णव होय तथापि बंधुपनेसं धनादिकके विभागादिकनमें द्वेष होयवेसं वेहू अतिक्रम करे तो वाकों सहनकरनों. तेसे अपनो दास होय (जो मूल्यसं लियो होय) सो स्त्रीपुत्रादिकनकीसीनाई पोषणकग्वियोग्यमें अंतर्भूत हे सोहु, विनके

संग्रहं अतिक्रम करे ताकोंहू सहनकरनों. ये सब धर्मविरोधी कहे हे ओर मूलमें चकार हे तासूं धर्मके अनुरोधी शिष्यभक्तादिक होय वे हु प्रमादसूं जीवस्वभावकरिकें अतिक्रम करें तब यह प्रारब्धादिक भोग हे एसी भावनाकरिकें धैर्य राखिकें ताके दुःखकों सहन करनो परंतु बिनके उपर क्रोधादिक नहिं करनो. क्यों जो शिष्यभक्तनकूंहु अपनैहि प्रभुसंबंध करवायो हे फिर बिनकी उपर क्रोधकरिवेमें बिनको अनिष्ट होय सो भगवदीयनको धर्म नहिं हे जो अपनै जिनको अंगीकार कियोहे तिनको अनिष्ट करें; तासूं बिनके अतिक्रमकों सहनहिं करनो ॥ ७ ॥

एसैं सेवाके प्रतिबंधकपनेसूं स्त्रीप्रभृतिनके अतिक्रमकूं सहनकरिवेको निरूपण करिकें सेवाके प्रतिबन्धकपनेसूं भोगको त्यागकरिवेमेंहु तत्तर्दित्रियजनित आध्यात्मिक दुःख होय ताकों सहनकरिवेको प्रकार कहतहैं.

**श्लोकः—स्वयमिन्द्रियकार्याणि कायवाङ्मनसा त्यजेत् ।  
अशूरेणापि कर्त्तव्यं स्वस्यासामर्थ्यभावनात् ॥८॥**

टीका—काया, वाणी ओर मनकरिकें अपने भोगके लिये इंद्रियनके कार्यनकूं छोडनें. दुःख सहनकरिवेमें अपनी शक्ति न होय तोहु अपनो सामर्थ्य नहिं हे एसी भावना करिकें हुःख सहनकरनों; इतनें अपने भोगके लिये इंद्रियनको कार्य



करें तामें सेवामें प्रतिबंध होय तामूं कायिक, वाचनिक ओर मानसिक इंद्रियनके कार्यनकूं छोडनें; इतनें प्राकृतविषयमें इंद्रियनकी प्रवृत्ति भयी होय सो छोडापकें अलौकिकमें प्रवृत्ति करावनीं; तामें जबताई अलौकिकने प्रवृत्ति भयी न होय तबताई प्राकृतविषय छोडायवेमें दुःख होय ताकों सहनकरनों. ओर प्रारब्धभोगके लिये अथवा परीक्षाके लिये प्रभु विलंब करें तब इच्छितवस्तुनकी प्राप्ति होय नहिं. तब वाको दुःख होय सो सहिसक्यो जायनहिं; क्यों जो एसो धैर्य होय नहिं. जेसें नित्य मिले तब अपनो निर्वाह होय एसो दरिद्र होय ताकूं एकदिन कछू मिले नहिं तब सवेरमें लेवे (खावे)को कछू होय नहिं तब दुःख होय परंतु वामें अपनो सामर्थ्य नहिं हे एसि भावना करिकें दुःखकों सहनकरनों. येहि हकिकत नवरत्नमें “ चित्तको उद्वेग होय तबहु भक्तनके दुःखके हरि-बेवारे हरि जो जो करेगें सो एसी हि विनकी लीलाहे एसें मानिकें चिंताकूं शिघ्र हि छोडे. ” एसी आज्ञा करीहे वाको अनुसंधानकरिकें धैर्य हि राखनों ॥ ९ ॥

अपनसूं जो दुःख निवृत्त होयसके एसो होय ताको हु सहन होय सके नहिं तब जहां अपनो सामर्थ्य हि न होय एसो दुःख होय ताको सहन तो सुतरां होय सके हि नहिं तब अशक्य उपदेश क्यों क्यों हे ! एसी शंका होय तहां कहतहें.

**श्लोकः—**अशक्ये हरिरेवास्ति सर्वमाश्रयतो भवेत् ।

एतत्सहनमत्रोक्तमाश्रयोऽतो निरूप्यते ॥९॥

टीका—जब अपनी अशक्ति होय तब हरि हि रक्षकहैं एसें आश्रय राखे तो सब सिद्ध होय. यह धैर्यको स्वरूप कह्यो अब आश्रयकों निरूपण करत हैं; इतनें जो जीव सेवामें प्रवृत्त भयो हे ताकूं विवेकधैर्यादिककी स्थितिमें शक्ति न होय तब हरिहि शरण हैं एसी भावना करनी; कयोंजो हरि भक्तनके सर्वदुःख-हर्त्ता हैं सो कृपाकरिकें सब संपादनकरेंगे तासूं कहत हैं जो आश्रयसूं सब सिद्ध होय; इतनें जो आशक्य होय सो हु हरिके आश्रयसूं सब सिद्ध होय ओर आश्रय न होय तो अपनसूं शक्य होय सोहु सिद्ध न होय अर्थात् निःसाधनपनेसूं शरणागति होय तब प्रभूनकी कृपासूं विवेक ओर धैर्य एकहिसमयमें सब सिद्ध होय. एसें धैर्यको स्वरूप निरूपण करिकें आश्रयसूं सब सिद्ध होय एसें कह्यो हे तासूं आश्रयकों निरूपण करत हैं.

प्रथम समुदायकरिकें आश्रयको स्वरूप कहत हैं.

**श्लोकः—**ऐहिके परलोके च सर्वत्र शरणं हरिः ।

टीका—यालोकमें ओर परलोकमें सबस्थलनमें हरि शरण हैं; इतनें भक्तिमार्गमें जाको अंगीकार भयो हे ओर सेवामें प्रवृत्त भयो हे ताकों सेवासिवाय दूसरो कर्म करनो सो स्वधर्म नहि हे तासूंहि ऐहिक तथा पारलौकिक साधन करे नहि;

क्यों जो तामें सेवामें अंतराय होय तासूं ऐहिक तथा पार-  
लौकिककी सिद्धिके लिये हरिके शरणकीहि भावना करनी  
परंतु सेवा छोड़िकें दूसरो साधन नहिं करनो. एसें समुदाय-  
करिकें आश्रयको स्वरूप कहिकें जब जूदे जूदे भेदसूं  
आश्रयको स्वरूप कहत हैं.

श्लोकः—दुःखहानौ तथा पापे भये कामार्थपूरणे ॥१०॥

भक्तद्रोहे भक्त्यभावे भक्तैश्चातिक्रमे कृते ।

अशक्ये वा सुशक्ये वा सर्वथा शरणं हरिः ॥११॥

टीकाः—दुःखकी हानिमें, पापके निवारणमें, भयमें,  
कामके अर्थके पूरणमें, भक्त अपनो द्रोहकरे अथवा अपनसूं  
भक्तको द्रोह होयजाय तामें, भक्तिके अभावमें, भक्त अतिक्रम  
करे तामें, अशक्यमें और सुशक्यमें सर्वथा हरिहि शरण हैं;  
इतनें भक्तिमार्गीय जीव सेवामें प्रवृत्त भयो होय ताकूं देह  
इंद्रियादि—संबंधि, आधिभौतिकादिक दुःख होय तासूं चित्तमें  
उद्वेगादिक नहिंहोयवेके लिये शरणकीहि भावना करनी, तेसें  
भक्तिमार्गमें प्रवृत्तभयेकी पहिलें प्रमादसूं कछु पाप भयो होय  
अथवा सेवामें प्रवृत्त भये पीछें देह तथा इंद्रियादिकनसूं  
भगवदपराधादि—रूप-पाप होयजाय तो ताकी निवृत्तिके लिये  
शरणकीहि भावना करनी. प्रायश्चित्तादिक करनो नहिं; क्योंकि जो  
प्रायश्चित्तादिक करिवेसूं शरणधर्म जतो रहे, एसें राजा तथा

चौरादिकनस्रं किंवा पापादिकनस्रं भय होय तामेंहु शरणकी भावना करनी. तेसैं इच्छित कामना होय तिनके जो पदार्थ होय तिनकी प्राप्तिमें शरणकी भावना करनी तेसैं प्रमादस्रं भक्तको द्रोह होयजाय अथवा भक्त अपनो द्रोह करे तो तामें शरणकी भावना करनी. तेसैं सेवामें प्रवृत्त भयो होय परंतु भगवत्स्वरूपमें स्नेह उत्पन्न न होय ताके लिये भक्त अतिक्रम करे अथवा तेसीहि कोई धर्मकी बाबतमें भक्त अतिक्रम करे तब अपनो दोष विचारिकें शरणकी भावना करनी. तेसैं अपनस्रं होयसके नहिं एसैं कार्यमें अथवा अपनस्रं होयसके एसे कार्यमेंहु शरणकीहि भावना करनी. अपने सामर्थ्यस्रं यह कार्य भयो है एसो अभिमान करे तो शरणधर्म जाय; तास्रं सर्वात्माकरिकें तदीयपनेको अनुसंधान राखिकें हरिशरणकीहि भावना करनी ॥ १० ॥ ११ ॥

श्लोकौः—अहंकारकृते चैव पोष्यपोषणरक्षणे ।

॥१२॥ पौष्यांतक्रमेण चैव तथोन्तवास्यांतक्रमेण  
 अलौकिकमनःसिद्धौ सर्वार्थे शरणं हरि  
 ॥१३॥ एवं चित्ते सदा भाव्यं वाचा च परिकीर्तये  
 करिवेमें, टीका—जीवस्वभावस्रं कोइके पास अहंका  
 में, स्त्रीपभृ- पोषण करिवेके योग्यनको पोषण तथा रक्षण करिवे  
 र अलौकिक त्तिपोष्यनके अतिक्रममें तथा शिष्यके अतिक्रममें ओ

मन सिद्ध होयवेमें सर्व अर्थमें हरिहि शरण हैं. एसी चित्तमें सदा भावना करनी और वाणीसूं एसें कह्योकरे; इतनें जीवस्वभाववशसूं कोइके संग अथवा भक्तके संग अहंकार होय ताकरिकें आसुरावेश होय ताको विवेक पीछेसूं होय तब पश्चाताप होय तब शरणकीहि भावना करनी अथवा प्रभुकी अत्यन्त कृपा होय तब प्रभूनके संगहि अहंकार होय तबहु ताके दोषकी निवृत्तिके लिये शरणकीहि भावना करनी, तेसें अपनें पोषण करिवेयोग्य जो स्त्रीपुत्रादिकहें तिनको पोषण तथा रक्षण करिवेमें तथा पोष्य एसे स्त्रीपुत्रादिकनको अतिक्रम होय अथवा मूलमें चकार हे तासूं बंधु तथा दासपर्यतनकोहु अतिक्रम होय तामें तथा शिष्य अपनो अतिक्रम करे तामें शरणकीहि भावना करनी, परंतु क्रोध न करनों, तेसें मनकी अलौकिकताकी सिद्धिके लिये शरणकी भावना करनी. यहां मन लिख्यो हे सो सब इंद्रियनको जतायवेवारो हे इतनें देह, इंद्रियादिकसबनको प्राकृत अंश निवृत्त होयकें जेसें अलौकिकपनो सिद्ध होय ओर सो सिद्धभयेपीछें अलौकिकसकल-पदार्थनकी संपत्तिके लियेहु हरिहि शरण हैं एसी भावना करनी; इतनें ज्ञानरूप जो चित्त हे तामें सदा शरणकी भावना करनी ओर वाणीकरिकें उच्चार करनो क्षणमात्रहु उच्चार न करे तो बाहिसमय आसुरभावको प्रवेश होय. चित्तकूं ज्ञान-रूपपनो भयो न होय तोहु वाणीसूं “ श्रीकृष्णः शरणं मम । ”

एसें कह्योहि करनो. मूलमें चकार हे तासूं कायाकरिकें सेवा करनी, मनकरिकें भावना करनी ओर वाणीकरिकें उच्चार करनो एसें तीन्धो प्रकारकी शरणागति निरूपित करी हे ॥१२॥ ॥१३॥

तहां शंका होय के कोइसूं होयसके नहिं एसे बडे अर्थमें हरिकी शरणागतिकी भावना करनी परंतु अपनसूं होयसके एसे अर्थमें भगवानकी उपर भार काय-  
केलिये देनो चाहिये ? साधारण अर्थमें तो देवान्तरको भजन करे तो कहा अड-  
चन हे ? एसी शंका होय  
तहां कहतहे.

श्लोकः—अन्यस्य भजनं तत्र स्वतो गमनमेव च ।

प्रार्थनाकार्यमात्रेऽपि ततोऽन्यत्र विवर्जयेत् ॥१४॥

टीका-अन्यदेवको भजन तथा अन्यदेवके सन्निधान आपसूं चलायकें जानो, ओर प्रार्थनाके कार्यमात्रमें अपने स्वामी हरिसिवाय देवतांतरकी पास सब छोडनों; इतनें अन्य-देवको भजन तथा भजनके लिये गमनहु नहिं करनो. मूलमें चकार हे तासूं दूसरो प्रेरणा करे तोहु अन्यदेवके सन्निधान जाय नहिं; क्यों जो देवांतरभजन ओर देवांतरकी पास गमन छोडे नहिं तो शरणपदार्थ (आश्रय) जतो रहे. येहि न्यासा-देशमें लिख्यो हे जो प्रभूनसूं अन्यको भजन ओर विनकीपाससूं

अपेक्षाहु छोडनी तहां एसी शंका होय जो प्रभुकीपास प्रार्थना करनी येतो योग्य नहिं हे, तासूं कछुकपदार्थकी अपेक्षा होय तब दूसरेदेवकी पास प्रार्थनामात्र करे, भजनगमनादिक करे नहिं तो कहा अड्चन ? एसी शंका होय तहां कहत हैं जो दूसरेदेवको भजन ओर विनकेपास गमनादिक जैसे छोडे तेसैं स्वल्प तथा बडे कार्यमेंहु दूसरेदेवकी पास प्रार्थना छोडे. मूलमें विवर्जयेत् एसे लिख्योहे ताको अभिप्राय एसोहे जो सर्वथा प्रार्थना न करे. मूलमें बहुवचन हे तासूं काहुप्रकारकी प्रार्थना न करनी एसो अभिप्राय जतायो हे. यहां एसी शंका होय जो परम प्रेम, आसक्ति ओर व्यसनपर्यंत प्राप्तभये एसे ब्रजवासीननेहु दावानलकी निवृत्तिके लिये. क्षुधाकी निवृत्तिके लिये ओर वृष्टिकी निवृत्तिके लियेहु प्रार्थना करी हे, तेसैं कितनेक, मुक्तिप्रभृतीनकीहु प्रार्थना करत हैं तो यहां प्रार्थनाको निषेध क्यों कयों हे ? एसी शंकाको समाधान यह हे जो ब्रजवासीनने दावानलके प्रसंगमें दोगविरियां प्रार्थना करी हे तामें प्रथमकी प्रार्थनामें कह्यो हे जो हम आपके चरणकूं छोडिवेमें समर्थ नहिं हैं; इतने दावानल सखो-जाय हे. ओर दूसरीविरियां प्रार्थना करीहे ताको अभिप्राय एसो हे जो प्रभूनके संग क्रीडामें साम्यबुद्धि भयी सो अपराध भयो हे परंतु आपसिवाय हमकूं तथा हमविना आपकूं क्रीडा न होयगी ओर हमरो जीवनहु आपविना न रहेगो,

तासूं दावानलको भय हमकूं नहिं हे परंतु आपके स्वरूपको अंतराय हमकूं नहिं सह्योजाय हे. एसे अभिप्रायसंहि प्रार्थना करी हे; तासूंहि हमारी रक्षा करो एसें नहिं कहिके रक्षाकरिवेयोग्य हो एसें कह्यो हे सो व्यसनभावसूं कह्यो हे अपने सुखकी अभिलाषासूं कह्यो नहिं हे, तेसें श्रीगोकुल तो फलरूप हे सो भगवाननें अपनी लीलाके लिये फलोपयोगी सर्वरसात्मक प्रकट कियो हे; तासूं वहांकी लीला बाहिर लोकानुसारिणी हे ओर भीतर तो बहोतप्रयोजनयुक्त अलौकिक लीलाहे तासूं भगवानकूं जबजब जाप्रकारकी लीला करिवेकी इच्छा होय हे तबतब तेसो कार्य संपादन करत हैं जेसें यज्ञपत्नीके उपर अनुग्रह करिवेकी इच्छा भयी तब गोपनकों सहसा क्षुधा उत्पन्न करी, तेसेंहि श्रीगोकुलमें सवनके निरोधके लियेहि भगवान् सब करत हैं तासूं वामें पूर्वपक्ष करिवेको अवकाश नहिं हे ॥ १४ ॥

सवदेवनको तथा धर्मनको त्याग करिकें भगवानकी शरणागति करिवेको उपर कह्यो परंतु एसें करिवेमेंहु अपनो इच्छित होयगो सो भगवान् देइगें किंवा नहिं देइगें एसें कोन जानत हे ? एसी शंका होय तहां कहत हैं.

श्लोकः-अविश्वासो न कर्तव्यः सर्वथा बाधकस्तु सः ।  
ब्रह्मास्त्रचातकौ भाव्यौ प्राप्तं सेवेत निर्ममः ॥ १५ ॥



टीका—अविश्वास नहिं करना क्यों जो सो सर्वथा बाधक हे; तासूं अविश्वासमें ब्रह्मास्त्रकी ओर विश्वासमें चातककी भावना राखनी. ओर जो प्राप्त होय तामें ममतारहित होयकें प्रभुसेवा करे; इतने शरणगतमें अविश्वास नहिं करना क्यों जो जितने दूसरे बाधक हैं इनसबनकी अपेक्षासूं अविश्वास अधिक बाधक हे, अविश्वास करिकें दूसरे धर्मको संबन्ध होय तो शरणधर्म नष्ट होय, तासूं अविश्वासमें ब्रह्मास्त्रकी भावना करनी; इतने हनूमानजी श्रीजानकीजीकी सुधी लेवेकूं लंका-प्रति गयेहते तब गिरेभये फलादिकनको भक्षण करिवेकी श्रीजानकीजीनें आज्ञा करी तब उपवनके वृक्षकों नीचे पटके तब जो फल नीचे गिरे ताको भक्षण करे, एसें करतकरत सब वृक्षनको नाश हनूमानजीनें कियो सो सुनिकें रावणने अपने पुत्र इंद्रजितकूं पठायो सो आयकें अनेक शस्त्रअस्त्र वाके उपर छोडवे लग्यो, फिर ब्रह्मास्त्र नांख्यो, परंतु वाके उपर विश्वास नाहिं राखिकें नागपाशादिक डारे सो ब्रह्मास्त्रकी उपर विश्वास राखिकें जो दूसरो अस्त्र नहिं डारतो तो ब्रह्मास्त्र अपना कार्य करतो परंतु ब्रह्मास्त्रकी उपर अविश्वास करिकें दूसरे अस्त्र डारे तासूं ब्रह्मास्त्र निष्फल भयो. तेसें शरणगमनमेंहु अविश्वास राखे तो शरणधर्म न रहे; तासूं अविश्वास नहिं करना. ओर विश्वासमें चातकपक्षीकी भावना करनी; इतने स्वातिजलके विश्वासमें चातकपक्षी रहत हे तो मेघ वर्षत हे

ओर चातकपक्षी जलको पान करत हे तेसैं शरणागतिमें विश्वास करे तो भगवान् सब सिद्धि करेंगे एसैं विश्वास-करिके शरणमें स्थिति राखे तामें प्रयत्नविना भगवदिच्छासूं जो प्राप्त होय तामें ममतारहित होयकें प्रभुसेवा करे परंतु विशेषप्राप्तिके लिये यत्नकरे नहिं. जो प्राप्त होय सो सब प्रभूनमें विनियुक्त करे, स्वार्थदृष्टि राखे नहिं. ॥ १५ ॥

दूसरे धर्मको संबंध होय तो शरणपदार्थ चलयोजाय

एतैं कह्यो तब आवश्यक लौकिक ओर वैदिक-

कर्मनकोहू त्याग होय तामें ' यह मार्ग

अप्रमाण हे ' एसी शंका होय सो न

होयवेके लिये लौकिकवैदिककर्म

करिवेको प्रकार कहत हैं.

**श्लोकः-यथाकथंचित् कार्याणि कुर्यादुच्चावचान्यपि ।**

**किं वा प्रोक्तेन बहुना शरणं भावयेद्धरिम् ॥१६॥**

टीका—उच्चावच कार्यहू जेसैंतेसैं करने विशेष कहिवेसूं कहा फल सिद्ध होय ? हरिहि शरण हैं एसी भावना करनी इतने लोकनकूं यह मार्ग अप्रमाण हे, एसी शंका न होय. तेसैं अति-आवश्यक लौकिकवैदिककार्य करे; अर्थात् मार्गकी प्रमाणताके लिये प्रभुकी आज्ञा जानिकें लौकिकवैदिककर्म करने, स्वधर्म-पनेसूं नहिं करने. जेसैं गीताजीमें अर्जुनने छेवट कह्यो हैं जो

जैसे वचन हे ताप्रमाण करुंगो ऐसे कहिके भगवानकी आज्ञा मानिके युद्ध कियो हे, ऐसे करे तो शरणपदार्थ जाय नहि. येहि पुष्टिप्रवाहमर्यादामें कह्यो हे जो लौकिक तथा वैदिकपनों पुष्टभक्तनमें कपटपनेसुं हे स्वधर्मबुद्धिसुं नहि हे, जैसे गीताजीमें कह्यो हे जो "लौकिकमें आसक्त अज्ञानी मनुष्य जैसे कर्म करे तेसें ज्ञानीहु लोकनकों शिखायवेके लिये कर्मकरे." अथवा शरणधर्म सिद्ध राखिवेके लिये कर्म करने नहि तोहु दोष नहि हे; क्यों जो सर्वधर्मरूप शरणधर्म हे. विशेष कहेवेसुं कहा सिद्ध होय हे ? सर्वत्र शरणकी हि भावना राखनी. लोकसंग्रहके लियेह कर्म करनो नहि; क्यों जो लोकसंग्रहके लियेह विधिरूपपनेसुं कर्म करे तो शरणपदार्थ न रहे; इतने

प्रभूनकी आज्ञा मानिके कर्म करनो विधिरूप जानिके करनो नहि. ऐसे सर्वात्माकरिके सर्वधर्मनको त्याग करे तब पापकी संभावना होय तहां कहत हैं जो हरिकी शरणभावना करे; इतने सर्वदुःख तथा पापनकों हरणकरिवेवारे 'हरि' हैं सो पापादिकनकूं दूर करेगे. येहि अर्जुन के प्रति श्रीकृष्णने गीताजीमें "सर्वधर्मान् परित्यज्य" ये श्लोकमें कह्यो हे, जो सबपापनसं में तोकूं छोडाउंगो. ॥१६॥

पसें आश्रयके स्वरूपकों निरूपणकरिके

उपसंहार कहत हैं.

श्लोकः—एवमाश्रयणं प्रोक्तं सर्वेषां सर्वदा हितम् ।  
कलौ भक्त्यादिमार्गा हि दुःसाध्या इति मे मतिः । १७।

इति श्रीबलभाचार्यविरचितं विवेकधैर्याश्रय-  
निरूपणं समाप्तम्.

टीका—एसें सब जीवनकूं सर्वदा हितरूप आश्रय कह्यो हे. कलियुगमें भक्तिप्रभृतिमार्ग दुःसाध्य हैं एसी मेरी मति हे; इतने सबजीवनकूं सब वर्ण तथा आश्रमनमें शरण सर्वदा हितकारि हे तथा साधनविनाहु ऐहिक तथा पारलौकिक संपत्तिको साधक हे. सबयुगनमें साधनकरिकेंहि फल होय हे ओर यहाँ अब साधनकूं छोडिकें केवल शरणको हि उपदेश क्यों करत हैं ? एसी शंका होय तहां कहत हैं जो अन्ययुगनमें धर्मको हि प्राधान्य हतो तासूं मर्यादाभक्तिप्रभृतिनकूं साधनकरिकेंहि साध्यपनो हतो. तासूं साधनकरिकें हि विहितभक्ति, उपासना ओर कर्मादिकनको फल होतो हतो ओर कलियुग तो पापप्रधान हे तासूं साधननके अभावसूं विहितभक्तिप्रभृति मार्गहू होय सके एसें नहिं हे, इतनो हि नहिं परंतु साधनसंपत्ति विना यत्किंचित् करिवेमें हू पाषंडको प्रवेश होयवेसूं पापहू होय हे तासूं सर्वथा दुःसाध्य हैं. सत्ययुगादिकनमेंहू साधनकरिकें जो मार्ग साध्य हते सो हू कलियुगमें साधनके अभावसूं दुःसाध्य भये तब सत्ययुगादिकनमेंहू जो भक्तिमार्ग साधन करिकें साध्य नहिं हतो केवल

भगवानके अनुग्रहकरिकेहि साध्य हतो सो कलियुगमें तो सुतरांदुःसाध्य होय तामें कहाकहनो ? तासूं सर्वात्माकरिकें शरणागति करिवेमें एसे भक्तिमार्गमें हू भगवान् अनुग्रह करेंगे; तासूं सर्वात्मा करिकें शरणकी हि भावना करनी, दूसरो कछु नहिं करनो एसो अपनो सिद्धांत जतायवेके लिये 'एसी मेरी मति हे, ' एसो कह्यो हें. श्रीआचार्यचरणननें मेरी मति हे एसें कह्यो हे तासूं स्वमार्गीयभक्तनकूं तो शरणकीहि भावना करनी, दूसरो कछु नहिं करनो, एसो अभिप्राय हे.

इति श्रीमद्वल्लभाचार्यविरचित 'विवेकधैर्याश्रय-  
निरूपण' की गोस्वामि श्रीनृसिंहलालजी-  
महाराजविरचित ब्रजभाषामें  
संक्षिप्त टीका समाप्त भई ॥



॥ श्रीकृष्णाय नमः ॥ श्रीगोपीजनवल्लभाय नमः ॥

## अथ श्रीकृष्णाश्रयकी ब्रजभाषामें सांक्षिप्त भावार्थटीकाको प्रारंभ.

श्रीकृष्णाश्रयकूं सर्व सिद्धकरिवेपनो हे तासूं अपने भक्तन-  
वरदानदेवेकी सीनाई श्रीआचार्यचरण श्रीकृष्णाश्रयस्तोत्रकों  
निरूपणकरत हैं; तामें अब कलिकालके प्रभावसूं देश, काल,  
द्रव्य, श्रद्धा, मंत्र ओर कर्म यह षट् साधन पुरुषार्थ सिद्ध-  
करिवेवारे नहिं हे; एसें बतायकें भक्तनकूं भगवान् हि सर्व  
साधनरूप हैं; तासूं देशादिक षट्साधन तथा चारप्रकारके  
पुरुषार्थ सबरूप भगवान्हि हैं तासूं तथा सत्त्वगुण, रजोगुण  
ओर तमोगुण एसें तीन्यो गुणनके भेदनसूं नवप्रकारके भक्त हैं.  
तथा दशमभक्त निर्गुण हे एसें दशविधभक्तनकरिकें सेव्य  
भगवान् हैं ओर शरीरकूं सबसिद्धिकरिवेवारे यह स्तोत्र हे एसें  
उपरलिखे सब कारण जतायवेके लिये दशश्लोकन करिकें  
निरूपण करत हैं. तामें प्रथम मुख्य अंग काल हे. तासूं काल-  
धर्मको निराकरण करिकें आश्रयकी प्रार्थना करत हैं.

श्लोकः—सर्वमार्गेषु नष्टेषु कलौ च खलधर्मिणि !

पाषण्डप्रचुरे लोके कृष्ण एव गतिर्मम ॥१॥

टीका—खलधर्मवारे कलियुगमें सर्व मार्ग नष्ट होगये ओर

लोक बहोत पाषंडवारो हो गयो तामें श्रीकृष्णहि मेरी गति हो; इतनें उपरसूं अच्छो देखवेमें आवे ओर भीतर दुष्ट होय सो खल कह्योजाय. एसो धर्म कलियुगमें हे, तामें श्रीकृष्ण हि मेरे गतिरूप हो. एसें कहेवेको अभिप्राय एसो हे जो सत्ता-वाचक "कृष्"शब्द हे ओर आनंदवाचक "ण" शब्द हे. दोयकी एकतासूं सदानंद शब्द होय हे सो एहिक तथा पारलौकिक अर्थके सिद्धकरिवेवारे मोकूं हो. खलधर्मको स्वरूप कहत हैं: जो सबनकी अपेक्षासूं लोकमें पाषंड अधिक भयो हे तासूं हि पुरुषार्थके उपाय दृढिवेमें आवे, एसे कर्मज्ञानादिकमार्ग नष्टप्राय भये हैं तामें यज्ञादिकनसूं स्वर्गकी प्राप्ति होयवेको वेदमें लिख्यो हे; तामें स्वर्ग पद आत्मसुखवाचक हे सो नहि-जानिके लोकवाचक हे एसो भ्रम उत्पन्न करत हे तासूं चित्त-शुद्धि नहिहोयवेसूं कर्ममार्ग नष्ट भयो हे. ओर माया वादके अभिनिवेशसूं ज्ञानमार्ग निरीश्वरपनेके अंगिकारसूं योग नष्ट भये हैं ओर विभूतिपरहोयवेसूं उपासना नष्ट भयी हे. मूलमें चकार हे तासूं कलिकालकूं महादेवादिक अनुगण भये हैं तासूं श्रीकृष्ण हि गति हो. मूलमें एवकार हे सो अन्यके योगको व्यवच्छेदक हे तासूं अंशकलादिक गतिरूप मति हो एसो अभिप्राय हे ॥ १ ॥

पुण्यदेशमें स्थितिमात्रसूं हि पुरुषार्थकी सिद्धि होयहे तब दूसरेको निषेध करिकें आश्रयकी हि प्रार्थना क्यों करत हो ? एसी शंका होय तहां कहत हैं:

**श्लोकः—**म्लेच्छाक्रान्तेषु देशेषु पापैकनिलयेषु च ।  
सत्पीडाव्यग्रलोकेषु कृष्ण एव गतिर्मम ॥२॥

टीका—सब देश म्लेच्छनकरिकें आक्रांत होयगये हैं ओर विनमें पापीनकोहि स्थान हो गयो हे ओर सत्पुरुषनकूं पीडा होयवेसूं सब लोक व्यग्र होयगये हे एसे समयमें श्रीकृष्णहि मेरी गति हो; इतनें सबदेशनमें म्लेच्छादिक—हिनजातिनकी सत्ता होगई हे. एसे वे म्लेच्छ हू धर्ममें चर्तिवेवारे नहिं हे किंतु पापमेंहि मुख्य विनको स्थानक हे अथवा अंगवंगादिक देश एसे हे जो विनमें गमनमात्रसूंहि पुनः संस्कार करनो पडे एसे देशनमें म्लेच्छादिकनें आक्रमण कियो हे तासूं तीर्थयात्रा-दिकके प्रसंगतें जायवेमेंहू पाप लगे हे ओर सत्पुरुषनकूं पीडा होयहे ताकरिकें सब लोक व्यग्र होय हे, क्यों जो स्वधर्मादि-कको आचरण करिवेवारेनकूं पीडा देखिकें ओरनकूं श्रद्धादिक नहिं रहे हे एसे समयमें श्रीकृष्णहि मेरी गति हो. ॥ २ ॥

गंगादिक—तीर्थनकरिकें ही सर्वपुरुषार्थकी सिद्धि  
होयहे, तब केवल आश्रय करिवेको कहा  
प्रयोजन हे ! पेसी शंका होय तहां  
द्रव्यकी असाध्यता कहत हैं.

**श्लोकः—**गंगादितीर्थवयेषु दुष्टैरेवावृतेष्विह !  
तिरोहिताधिदैवेषु कृष्ण एव गतिर्मम ॥३॥



टीका—गंगादिक उत्तम तीर्थ हैं सो दुष्टनकरिकें हि आवृत होयगये हैं तासूं आधिदैविक स्वरूप तिरोहित भयो हे ऐसे समयमें श्रीकृष्ण हि मेरी गति हो इतने तीर्थमें श्रेष्ठ जो गंगादिक हैं सो दुष्टन करिकें आवृत भये हैं, तासूं तीर्थनसूं पुरुषार्थसिद्धि होय ऐसे नहिं हे. ब्राह्मणादिक हू तीर्थनमें रहे हे तब दुष्टनकरिकें हि आवृत्तपनों कैसें ? एसी शंका होय ताको समाधान एसो हे जो विनकूं अति परिचय होयवेसूं तीर्थनमें आदर नहिं रहे हे तासूं वामें भक्ति नहिं होय हे ओर वहां दानादिक लेवेके लिये हि विनकी स्थिति हे; तासों विनकोंहू दुष्टपनो हे क्यों जो “ श्रद्धारहित, पापात्मा नास्तिक, जिनकूं संशय निवृत्त नहिं भयो हे ओर वामें तीर्थपनेको कारण शोधिवेवारो होय विनकूं तीर्थका फल नहिं मिले हे. ” एसे वायुपुराणमें कह्यो हे ओर तीर्थमें जो रहते होय सो सब श्रद्धारहित नास्तिक होय हे विनको दुष्टपनो नहिं मिटेहे. तीर्थमें सब दोष निवृत्त करिवेकी शक्ति हे तासूं जैसें अग्नि सबनको दाह करेहे तेसें तीर्थकी शक्तिसंहि दुष्टपनो क्यों नहिं मिटेहे ? एसी शंका होय तहां कहत हैं: जो देवतारूप—तीर्थको आधिदैविक स्वरूप तिरोहित होयगयो हे सो सत्पुरुषनप्रति हि प्रकट होय हे दुष्टपुरुषनप्रति आधिदैविकस्वरूपको तिरोधान होय हे तासूं श्रीकृष्ण हि मेरी गति हो. ॥ ३ ॥

धर्मकरिवेवारे समीचीन होय तो सर्वफलकी

सिद्धि होय तब आश्रयकरिकें कहा कर्त्तव्य  
हे ! पसी शंका होय तहां कर्त्ताको  
असाधकपनो बतारिकें आश्रयकी  
प्रार्थना करतहें.

**श्लोकः—अहंकारविमूढेषु सत्सु पापानुवर्तिषु ।**

**लाभपूजार्थयत्नेषु कृष्ण एव गतिर्मम ॥४॥**

टीका—पंडित लोक, अहंकारकरिकें विशेष मूढ भयें हे,  
पापीपुरुषनकों अनुसरिवेवारे भयेंहे ओर लाभपूजाके अर्थहि  
विनको यत्न हे, तामें श्रीकृष्णहि मेरी गति हो. इतने पंडित  
लोक, हम शास्त्र जानें हे एसे अभिमानसूं दूसरेकूं पूछतहूं नहिं  
हे ओर मायावादादिकनके अभिनिवेशसूं विशेषकरिकें मूढ  
भयें हे, तेसैं अपनकूं कछुक लाभ होय अथवा अपनी प्रतिष्ठा  
बढे तो अपनो सत्कार होय एसे स्वार्थकेलियेहि यत्न करत हैं  
अर्थात् पारमार्थिक कर्महू लाभपूजार्थहि करत हैं ओर पापी-  
पुरुष अथवा पापनकूंहि अनुसरिवेवारे भयें हे तासूं श्रीकृष्णहि  
मेरी गतिहो ॥४॥

मंत्रसूं फलसिद्धि होय एसैं मंत्रशास्त्रमें लिखयो हे  
तब आश्रयकरिकें कहा कर्त्तव्य हे ? पसी शंका  
होय तहां मंत्रनको असाधकपनो कहिकें  
आश्रयकी प्रार्थना करतहें.

**श्लोकः—अपरिज्ञाननष्टेषु मंत्रेष्वव्रतयोगिषु ।**

**तिरोहितार्थदेवेषु कृष्ण एव गतिर्मम ॥५॥**

टीका-मंत्रको परिज्ञान नहि होयवेसूं, व्रतादिकनको योग नहिं होयवेसूं ओर अर्थ तथा देवता तिरोहित होयवेसूं मंत्र नष्टप्राय भये हैं ऐसे समयमें श्रीकृष्ण हि मेरी गति हो; इतने वैदिक तथा तंत्रोक्त मंत्रको तात्पर्य, फल ओर देवताके स्वरूपको ज्ञान नहिं होयवेसूं मंत्र नष्टप्राय होयगये हैं. वैदिक-मंत्र, गुरुकुलमें वास करे, ब्रह्मचर्यादिकव्रतराखे, शूद्रकी सन्निधिमें अध्ययन करे नहिं इत्यादिक नियमसूं पढे तब फलसाधक होय सो नियम अब रह्यो नहिंहे, तासूं फलसाधक नहिं हे ओर तंत्रोक्तमंत्रनके तात्पर्यको ज्ञान नहिं होयवेसूं विनके अर्थ तथा देवताको तिरोभाव होय गयो हे तासूं मंत्र फलसाधक नहिं रहे हे ओर भगवदाश्रयमें तो “यस्य स्मृत्या” इत्यादिवाक्यनकरिकें न्यून होय सो हू सब पूर्ण होय हे; तासूं श्रीकृष्ण हि मेरी गति हो. ॥५॥

मीमांसादिक (विचार) शास्त्रकरिकें, मंत्रनके तात्पर्यको निद्वार होयसके हे तासूं कर्मनकरिकेंहि फलकी सिद्धि होयगी आश्रयकरिकें कहा करनो हे ?  
 एसी शंका करिकें कर्महू फलसाधक  
 नहिं रहेहे एसो बतायके आश्र-  
 यकी प्रार्थना करत हैं.

श्लोकः-नानावादविनष्टेषु सर्वकर्मव्रतादिषु ।

पाषंडैकप्रयत्नेषु कृष्ण एव गतिर्मम ॥६॥

टीका—सर्व कर्म ओर व्रतादिक जुदे जुदे प्रकारके वाद-करिकें विनष्ट भये हे ओर पाषंडके लिये मुख्य यत्न जामें भयो हे, एसे समयमें श्रीकृष्णहि मेरी गति हो; इतने सोम-यागादिक कर्म ओर व्रतादिकनमें जुदे जुदे वाद भये हे. अर्थात् कोइ कहे के कर्म एसें करो, तो दूसरो दूसरी रीतसूं बतावे तेसें व्रतादिकनमें हू एकनें व्रत बतायो तो दूसरो वाकी ईर्ष्या करिकें दूसरी रीतिसूं बतावे फिर परस्पर वाद करे, तामें कोन सत्य बतावे हे ओर कोन जूठो बतावे हे सो अज्ञलोक जाने नहिं तासूं सब कर्म तथा व्रतादिक नष्ट होयगये हैं. जेसें सगरो प्रपंच मिथ्या हे अपने अज्ञानसूं कल्पित हे. प्रपंचमें रहे एसे वेदहू व्यवहारमात्रमें प्रमाण हे, एसें मायावादीनको वाद हे, ब्रह्मादीकनकूंहू यज्ञनकरिकें हि बडेपनो प्राप्त भयो हे तासूं पूर्वकी वासनासूं उत्तरोत्तर प्रवृत्ति होतीजाय हे सो कर्मसूं हि होय हे तासूं कर्महि कर्तव्य हे. फलहू कर्मसूं हि मिले हे, फलको देवेवारो उपासना करिवेयोग्य चेतनरूप कोउ देवता नहिं हे किंतु मंत्रमयहि देवता हे एसें मीमांसकनको वाद हे, षोडशपदार्थनके ज्ञान भये पीछें श्रवण, मनन तथा निदध्यासन-करिकें अपने आत्माको साक्षात्कार भये सते दुःखकी उत्पत्तिका अभाव होय येहि फल हे एसें नैयायिकनको वाद हे, ओर प्रकृति तथा वाके विकारको लय होथ तब पुरुषकूं अपने स्वरूपकरिकें रहनो ये हि फल हे, कोउ देव सेव्य नहिं हे

एसो सांख्यनको वाद हे. एसो प्रकारके जूदे जूदे वादनकरिकें कर्म तथा व्रत नष्ट होयगये हे वस्तुतासंतो सब जगत् जो दीखवेमें आवेहे सो भगवद्रूप हि हे, भगवान् सबनकूं अपने वशमें राखत हैं भगवानसंहि सबनकी, उत्पत्ति, स्थिति ओर लय होतहे तासूं भगवान् हि सेव्य हैं. “ देव, आसुर, मनुष्य, यक्ष ओर गंधर्व जो कोउ भगवानके चरणको भजन करत हे सो कल्याणकों प्राप्त होत हे ” एसो श्रीभागवतजीको वाक्य हे तासूं भगवान् हि सेव्य हे, प्रपंच सब भगवद्रूप हे, भगवानको सायुज्यादिक होय येहि फल हे इत्यादिक शास्त्रप्रतिपादित अर्थसूं उपर कहे एसे सबवाद विरुद्ध हे तथापि अपने अपने मतके आग्रहसूं शास्त्रविपरीत कर्म ओर दशम्यादिकके वेधवारी एकादशीप्रभृतीनको व्रत करे हे तासूं कर्म ओर व्रत नष्ट होयगये हे. तहां शंका होय जो एसे करिवेवारे आप करे हे ओर दूसरेकूं हू बोध करत हे सो वामें मिथ्यापनो तथा निष्फलपनो तथा: विरुद्धपनो जानते होय तो आप कैसें करे ? तथा औरनकूं बोध कैसें करे ? क्यों जो ये मतहू शंकराचार्य, जैमिनि तथा गौतमादिकपंडितननें हि प्रवृत्त किये हे एसी शंका होय तहां कहत हे जो पाखंडनिमित्त हि विनको मुख्य प्रयत्न हे सो पद्मपुराण तथा वाराहपुराणमें कह्यो हे जो श्रीभगवाननें महादेवजीकूं मोहशास्त्र करिवेकी आज्ञा करी हे ओर महादेवजीकी आराधना करिकें आप विनकी पाससूं वर मांगिके जगतमें

महादेवजीकी आराधनाकी महत्ताकी वृद्धि करिवेको वरदान भगवायने दियो हे; तासूं हि भगवानने महादेवजी उपर तप करिकें वरदान मांग्यो हे सो देखिकें ओर लोकहू अभित होयजाय हैं परंतु एसें नहिं जाने हे जो देवादिकने प्रवृत्त कियो सोहि सत्यमार्ग एसो नियम नहिं हे किंतु वेदादिकनसूं विरुद्ध न होय सोहि सत्य हे ये अभिप्रायकूं नहिं जानत हैं ओर देवादिकनकी प्रवृत्तिसूं आप हि मोहित होयकें प्रवृत्त होय हैं. परंतु कौलमार्ग बृहस्पतिने प्रवृत्त कियो हे और बुद्धने बौद्धमत प्रवृत्त कियो हे तासूं ये ग्राह्य नहिं हे एसें अभिप्रायकूं नहिं जानत हैं तासूं मोहित होयकें वामें प्रवृत्त होय हैं एसे समयमें श्रीकृष्णाहि मेरी गति हो. ॥६॥

‘ धर्मकरिकें पापकूं मिटावे हैं धर्ममें सब रह्यो हे ’ एसें श्रुतिमें कछो हे तासूं पथम, दोषके अभावके लिये धर्म करनो ताकरिकें चित्तशुद्ध होय तब भगवानकी माहात्म्य तथा स्वरूपको ज्ञान होय तब आश्रयादिक करनो चित्तमें दोष होय तब ताई आश्रय नहिं करनो क्यों जो योगीनकूं ध्यानकरिवेयोग्य प्रभु कहां? ओर दुष्ट जीव कहां? पत्नी आशंका होय तहां कहत हैं.

**श्लोकः-अजामिलादिदोषाणां नाशकोऽनुभवे स्थितः ।**

**ज्ञापिताखिलमाहात्म्यः कृष्ण एव गतिर्मम ॥७॥**

टीका-अजामिलादिकनके दोषनकूं नाशकरिवेवारे प्रभु

अनुभवमें रखे हैं जिनने अपनो समग्र माहात्य जतायो हे सो श्रीकृष्ण ही मेरी गति हो; इतने वेदमें लिख्यो हे कि प्रवचनादिककरिकें प्रभु प्राप्य नहिं हे परंतु जिनको वरण (स्वीकार) प्रभु करत हैं विनसूँ हि प्राप्य होय हैं. ओर गीताजीमें अनन्य-भक्तिसूँ प्राप्त होयवेको लिख्यो हे तासूँ प्रभूनको अंगीकार होयगो ओर भगवद्भक्तको अनुग्रह होयगो तो दोषवारेकूँ हूँ भक्तिकरिकें प्रभु गम्य हे; तासूँ महापुरुषद्वारा शरणागति होयगी तो सब सिद्ध होयगो. जैसे अजामिलने विष्णुके पार्षदको वाक्य सुन्यो तब प्रथम जो कृत्य किये हते ताको पश्चात्ताप करिकें गंगरद्वारमें जायके भगवद्भक्ति करी ताकरिकें वाके सबपापकी निवृत्ति होयकेँ उत्तम गति भयी. ये केवल पुत्रके उपचारसूँ नारायणनाम ग्रहणकरिवेमें भगवानके पार्षदको भगवद्धर्मरूप वाक्य सुनिवेको समय अजामिलकूँ प्राप्त भयो ताको फल मिल्यो तो बुद्धिपूर्वक शरणागतिकरिवेचारेनके सब पापनकी निवृत्ति होयवेमें कहा संशय हे ! तासूँ दोष प्राप्त भयो होय तो हूँ केवल भगवानको हि आश्रय करनो परंतु आश्रयकूँ छोडिकें ओर कछु नहिं करनो. ॥७॥

स्वाध्यायको अध्ययन करनी, जो जो ऋतुको अध्ययन करे, ताको फल वाकूँ प्राप्त होय इत्यादिक वेदवाक्य हे तिनकरिकें कर्ममार्गमें हूँ ब्रह्मयज्ञ ओर अध्ययनादिकनसूँ अग्न्यादिकनकी सायुज्यप्राप्ति होय हे ओर ब्रह्मज्ञानकरिकें अक्षरब्रह्मके संग सायुज्य होयवेको

श्रीगीताजीमें हू लिख्यो हे तब श्रीकृष्णाश्रयमें विशेष कहा हे जो वाकीहि प्रार्थना करत हो? एसी शंकाकी निवृत्तिके लिये वाको तारतम्यज्ञानार्थ सर्वस्वरूप भगवान् हि हे एसे स्वरूपके निरूपणपूर्वक अर्थरूपपनेसं आश्रयकी प्रार्थना करत हैं.

**श्लोकः—प्राकृताः सकला देवा गणितानन्दकं बृहत् ।**

**पूर्णानंदो हरिस्तस्मात् कृष्ण एव गतिर्मम॥८॥**

टीका—समग्रदेव प्राकृत हैं तथा अक्षरब्रह्मके आनंदकी गणना होय हे ओर हरि पूर्णानंद हैं तासूं श्रीकृष्णहि मेरी गति हो; इतनें सब देव सात्विकाहंकारसूं उत्पन्न भये हैं तैसें तैत्तरीयोपनिषदमें आनंदकी गणनाके प्रसंगमें समग्र पृथ्वी द्रव्यसूं पूर्ण होय सो मनुष्यनको एक आनंद हे एसे मनुष्यके एकसो आनंदको मनुष्यगंधर्वनको एक आनंद होय हे. यारीतिसूं शतगुण आनंदकी गणना करिहे तहां ब्रह्माजीके एकसो आनंद होय हे एसें आनंदकी गणना करी हे; तासूं अक्षरब्रह्महू गणितानंद हे ओर श्रीकृष्णहि भक्तनके दुःखहर्ता तथा पूर्णानंद हैं; तासूं श्रीकृष्ण हि मेरी गति हो. देवादिकनके सायुज्यमेहू देव प्राकृत होयवेसूं बिनकी सृष्टिकूं सगुणपनो हे ओरब्रह्मलोकपर्यन्तकूं फिर संसारमें आयवेको गीताजीमें लिख्यो हे तासूं अल्पानंदनो हे तैसें ज्ञानमार्गमें अक्षरब्रह्मके संग



सायुक्त्य होय हे तामें गणित आनंद होयवेसूं वहाँत क्षुधितकूं  
अल्प भोजन होय सो अभोजनतुल्य होय हे तेसैं अल्पपनी  
होयवेसूं कछु उपयोगी हे नहि, ओर श्रीकृष्ण तो पूर्ण आनंदरूप  
हैं तेसैं निगुणमुक्तिकूं देवेवारे हैं तासूं विनकी हि शरणभावना  
करनी ॥८॥

विवेक और धैर्यसूं रहिकें भक्तिकरिवेमें भगवान्ह  
घश होत हैं तब दैन्यकरिकें आश्रयकी प्रार्थना  
क्यों करत हो ? ऐसी शंका करिकें सर्व-  
मनोरथके पूरक हैं ओर सर्वफलके-  
लिये इच्छित हैं तासूं इच्छित-  
रूपपणो हे एसें कहिकें  
आश्रयकी प्रार्थना  
करत हैं.

श्लोकः—विवेकधैर्यभक्त्यादिरहितस्य विशेषतः ।

पापासक्तस्य दीनस्य कृष्ण एव गतिर्मम ॥९॥

टीका—विवेक, धैर्य ओर भक्त्यादिककरिकें रहित, विशेष-  
करिकें पापमें आसक्त ओर दीन एसो जो में ताकूं श्रीकृष्ण हि  
गतिरूप हो; इतनें प्रथम जो निरूपण कियो सो प्रभुके  
स्वरूपको विचार करिकें कियोहे ओर अब जीवके स्वरूपको  
विचारकरिकें कहत हैं जो भगवान् अपनी इच्छासूं सब  
करेंगे एसें जानिकें प्रार्थना नहि करनी एसो निश्चय होय  
सो विवेक कछोजाय हे तथा भक्तिविरोधि जो दुःख होय

ताकी निवृत्तिको उपाय नहिं करिकें आधिभौतिक, आध्यात्मिक ओर अधिदैविक एसे तीनप्रकारके दुःखकों सहनकरनो सो धैर्य कइयोजाय हे ओर साधनरूप भक्ति श्रवणादिक कहिजाय हे. मूलमें आदिपद हे. तासूं दूसरो पुण्य हू समजनो सो कइ नहिं हे तेसैं विनके साधन हू मेरेमें नहिं हे पापमें आसक्तहूं अर्थात् विपरीत साधन करूं हूं ओर दीन ( दरिद्र )हूं, एतो जो में हूं ताकूं श्रीकृष्णहि गतिरूप हो. यहां मेरेमें विवेक-धैर्यादिक वाक्य कहे हे सो वाक्य कहिवेशारे श्रीआचार्यचरण हैं विनकों एसे विशेषण नहिं चाहियें एसी शंका मनमें होय ताको समाधान एसें करनो जो वेदमें " में हाथ जोडिकें गुरुकी शरण जाउंहूं " " में नमन करूं हूं " मेरो " कल्याणहो " इत्यादिक वाक्यनमें जेसैं यजमानके अधिकारकरिकें कइयो हे तेसैं यहां श्रीआचार्यचरणनमें भक्तनके अधिकारकरिकें कइयो हे एसें समजनो. ॥ ९ ॥

सर्वथा जो साधनरहित होय ताकूं शरणागतिमेंहू  
इच्छितफलकी सिद्धि कैसें होयगी ? क्यों कि भगवान्  
तो जीवकी कृतिके अनुसार फल देत हैं तब सब  
साधन छोडिवेमें देवतान्तरको हू अनादर  
होयवेसूं देवताहू विघ्न करैंगे पत्नी आशंका-  
करिकें शरणागतिमें मोक्षरूपपनो हे एसें  
सिद्ध करिवेके लिये विज्ञापन करत हैं

श्लोकः । सर्वसामर्थ्यसहितः सर्वत्रैवाखिलार्थकृत् ।  
शरणस्थसभुद्धारं कृष्णं विज्ञापयाम्यहम् ॥१०॥

टीका-श्रीकृष्ण सर्वसामर्थ्ययुक्त हैं और सर्वत्र समग्र-  
अर्थके करिवेवारे हैं, तासूं शरण आये ऐसे जीवनको उद्धार  
करिवेके लिये मैं श्रीकृष्णकी विनति करत हूं; इतने प्रभु  
सर्वसामर्थ्यसहित हैं तासूं आपके सामर्थ्यसंहि सब करसके हैं  
सो जो मर्यादा राखिवेकी इच्छा होयगी तो ज्ञानादिकनको  
दान करिकें हू फल देयगें अथवा सर्वसामर्थ्य जामें हे ऐसे  
सुदर्शनादिकसहित श्रीकृष्ण हैं तासूं सुदर्शनादिककरिकें हू  
भक्तनको अनिष्ट निवृत्त करे हैं ओर सबदेशनमें, वर्णनमें,  
आश्रमनमें, तथा कर्मादिकनमें हू सबअर्थके करिवेवारे  
श्रीकृष्ण ही हैं सो विनके शरण जो जीव आये होय विनकूं  
फलदान करेयगें; क्यों जो “ जो जारीतिसूं मेरि शरण  
आवे हे ताकूं वाहिरीतिसूं में भजत हूं ” एसी गीताजीमें  
आपकी प्रतिज्ञा हे तासूं शरणागतिकी मर्यादा हि एसी हे जो  
शरण आये होय ताकी सबतरेहसूं रक्षा प्रभुहि करत हैं, तासूं  
दीनभावकरिकें शरणागति हि करनी ॥ १० ॥

“ पशुके दश प्राण हैं; आत्मा ग्यारहमो हे ” पसैं श्रुति

में कछो हे, ताखं प्राणनकीसीनाई उपर कछो सब  
 श्लोक सबसिद्धकरिवेवारे हें एसें जतायवेके  
 लिये एशश्लोककरिकें स्तोत्रको निरूपण  
 करिकें आत्माकीसीनाई फल अक्षय्य हे  
 एसें जतायवेके लिये आत्मरूपग्यार-  
 हमेश्लोककरिकें स्तोत्रपाठको  
 फल कहत हे ।

श्लोकः ॥ कृष्णाश्रयमिदं स्तोत्रं यः

पठेत् कृष्णसन्निधौ ॥

तस्याश्रयो भवेत् कृष्ण इति

श्रीवल्लभोऽब्रवीत् ॥ ११ ॥

टीका—यह कृष्णाश्रय—स्तोत्र श्रीकृष्णकी सन्निधिमें जो  
 पढे ताकूंआश्रयरूप श्रीकृष्ण होय एसें श्रीवल्लभाचार्यजीनें  
 कछो हे, इतनें श्रीकृष्णको आश्रय यथार्थ निरूपणकरिवेवारो  
 येहि स्तोत्र हे दूसरो एसो स्तोत्र नहिं हे; ताखं याके पाठसंधि  
 आश्रय दृढ होय. श्रीकृष्णकी संनिधिमे पाठकरे अथवा  
 श्रीकृष्णके निमित्त पाठ करे तोहू आश्रय दृढ होय केवल  
 स्तोत्रके पाठमात्रसूं एसो फल कैसें होय ? एसी शंका होय  
 ताको समाधान एसें हे जो नलकूबर तथा मणिग्रीव नारदजीके

शापते यमलार्जुन भये तव श्रीनारदजीनें देवतानके सोवर्ष  
पीछें श्रीकृष्णको सानिध्य होयवेको कह्यो हतो सो वाक्य  
सिद्धकरिवेकेलिये श्रीकृष्ण आपने वहां पधारिकें नलकूबर-  
मणिग्रीवको उद्धार कियो तत्र श्रीआचार्यजी साक्षात् आपके  
मुखारविंदस्वरूप हैं आपके स्वरूपकूं यथार्थ जानिवेवारे हैं  
ओर दैवीजीवनके उद्धारार्थ आपने प्रकट किये हैं विनके  
वचनसूं तो आप अनुग्रह करेंहिगें ये जतायवेके लिये मूलमें  
आपको नाम धरयो है तामें संशय नहिं राखनो. ॥ १२ ॥

इति श्रीमद्ब्रह्मभाचार्यजीविरचितश्रीकृष्णाश्रयस्तो-  
त्रकी त्रजभाषामें संक्षिप्तटीका गोस्वामिश्री-  
नृसिंहलालजीमहाराजकृत संपूर्ण भई ॥



श्रीकृष्णाय नमः । श्रीगोपीजनचल्लभाय नमः ॥

## अथ श्रीचतुःश्लोकीकी ब्रजभाषामें संक्षिप्तभावार्थटीकाको प्रारंभ ।

लोकमें धर्म, अर्थ, काम और मोक्ष एसें चार पुरुषार्थ स्मृतिमें कहेसाधनसं पूजामार्गके अनुसार प्राप्त होय हैं तामें एसी प्रतिज्ञा हे कि ब्राह्मणदेहविना मुक्ति नहिं होय हे तामे हू बुद्ध्यादिकनकी शुद्धिपूर्वक सांगोपांङ्ग साधन करिवेसं निर्वाह होय हे एसें जो ससाधननकूं मुक्ति होयवेको कह्यो सो हू अक्षरकी प्राप्तिरूप मुक्ति होय हे, सोहू क्वचित् होय हे तब निःसाधनको जन्म तो बृथाहि होय ताकी निवृत्तिकेलिये श्रीप्रभूनने आपके श्रीमुखरूप वाणीके पति ( श्रीमहाप्रभून ) कों भूतलपें प्रकट किये हैं. बिनश्रीमहाप्रभूनने पुष्टिमार्गीय-जीवनकूं स्वसिद्धांतजतायवेकेलिये चतुःश्लोकीनामकग्रंथ निरूपण कियो हे; जासूं मर्यादामार्गीय-धर्म, अर्थ, काम और मोक्षसं जुदे पुष्टिमार्गीय-धर्म, अर्थ, काम और मोक्षको बेग बोध होय हे; तामें चारश्लोकनसं चारचोपुरुषार्थनको निरूपण कियो हे तामें प्रथमश्लोकसं धर्माचरणरूप पहेले पुरुषार्थको निरूपण अनुष्टुप् छंदसं करत हैं.

श्लोकः—सर्वदा सर्वभावेन भजनीयो ब्रजाधिपः।

स्वस्यायमेव धर्मो हि नान्यः कापि कदाचन ॥१॥

अर्थ—निरतर सर्वभावकरिकें व्रजाधिप (श्रीकृष्ण) सेवन-करिवे योग्य हैं. पुष्टिमार्गीय—जीवनकों सेवनरूपहि धर्म हैं, कोउकालमें अथवा कोउस्थलमें अन्य धर्म नहिं हे; इतने व्रजाधिप जो सच्चिदानंद—श्रीकृष्ण सोहि पुष्टिमार्गीयनकों सेवनीय हे. सो श्रीभागवतदशमस्कंधजन्मप्रकरणविवरणमें श्री महाप्रभूनें आज्ञा करी हे जो “ श्रीगोकुलमें निःसाधननकूं फलरूप एसे श्रीकृष्ण प्रकटे हैं तासूं हम सबओरसूं निश्चित भये हैं ” तासूं निःसाधननकेलियेहि भगवानको प्राकट्य होयवेसूं दैवीसृष्टिमें उत्पन्न भये एसे साधनसंपत्तिरहित जो जीव हैं उनकूं श्रीकृष्ण अवश्य सेवाकरिवेयोग्य हैं सो सेवा सर्वभावसूं करनी, इतने देह, इंद्रिय, प्राण, स्त्री, पुत्र, धन ओर गृहादिक सब भगवानकेही हैं मेरे नहिं हैं एसो जो भाव हे सो अहंताममतात्मक—संसारकूं मिटायवेवारो हे. जीवमें जब एसो भाव आवे तब निश्चित होय सो जीव भगवन्मय ओर मुक्त कह्योजाय हे एसेजीवकी दशाको वर्णन भक्तिवर्द्धिनीमें कियो हे. “ जब प्रभूनमें दृढासक्ति होय तब गृहमें स्थित जो स्त्री, पुत्रादि उनको बाधकपनो ओर अनात्मपनो दीखनेमें आवे हे. ओर प्रभुमें व्यसन इतने प्रभुसिवाय रह्यो न जाय एसी दशा जब होय तब सो जीव कृतार्थ होय हे ” तासूं सर्वात्मभाव हे सो दैवीजीवनको मुख्य धर्म हे सो निःसाधननकूं अवश्य करिवेयोग्य हे. एसे भावसूंहि सबकार्य

सिद्ध होय हे सो श्रीभागवतमें कह्यो हे जो “ केवल भावकरिकेंहि श्री गोपीजने, गायें, यमलार्जुनप्रभृति वृक्षें जांबुवान-प्रभृतिमृगें ओर मूढबुद्धिवारे-कालीयप्रभृतिसर्पनहू सिद्ध होयकें मोकों प्राप्त भये हैं. ” ऐसे श्रीभगवानके वचनसंहि सर्वात्म-भावकूं मुख्यधर्मपनो सिद्ध होय हे. यहां शंका होय जो ऊपर कह्यो जो धर्म सो एक-काल अथवा देशमें करिवेयोग्य धर्म होयगो ओर सर्वदा करिवेको न्यारो धर्म होयगो एसी शंका नहि होयवेकेलिये मूलमें ‘ नान्य ’ ओर ‘ कदाचन ’ ऐसे दोय पदको ग्रहण करिकें एसें दिखायो हे जो हमने कह्यो जो धर्म तासूं अन्य कोउ धर्म पुष्टिमार्गीयकों कार्यसिद्धकरिवेवारो नहि हे, क्यों जो मर्यादामार्गीय-धर्मविभूतिपर्यवसायी हे; इतने मर्यादामार्गीयसाधनसूं भगवानकी विभूतिकी प्राप्ति होयसके परंतु पुरुषोत्तमकी प्राप्ति न होय ओर देशकुलके धर्ममेंहू विपर्यास दीखवेमें आवे हे तासूं येहि धर्म कर्तव्य हे एसो मूलके “ क ” शब्दसूं सूचित होय हे. कालान्तरमेंहू यह धर्म त्याज्य नहि हे प्रत्युय विधेय हे एसें मूलके “ कदाचन ” पदसूं सूचित होय हे. ॥१॥

पूर्वश्लोकमें प्रथम-पुरुषार्थ जो पुष्टिमार्गीयनकूं पुरुषोत्तम-सेवनरूप धर्म हे ताको निरूपण करिकें अब

द्वितीयश्लोकसूं द्वितीय-पुरुषार्थ जो  
अर्थ ताको निरूपण करत हैं.



**श्लोकः—एवं सदा स्व कर्तव्यं स्वयमेव करिष्यति ॥  
प्रभुः सर्वसमर्थो हि ततो निश्चिततां व्रजेत् ॥२॥**

अर्थ—ऊपर कहेप्रमाण भगवत्सेवास्मरण निरंतर कर्तव्य हे ओ भक्तनके लौकिक वैदिक कार्यनकूं तो आप सर्वसामर्थ्य-युक्त प्रभु हैं तासूं प्रार्थनाकियेविनाहि संपादन करेगें तासूं भगवद्भक्तकू यहलोकपरलोककी चिंता छोडिकें निश्चित रहेनो; इतने भगवान् आपहि प्रमेयब्रलतें भक्तके सर्वअर्थकूं संपादन करत हैं; तासूं पुष्टिमार्गीयनकूं अर्थरूपहू प्रभुहि हे.

पसैं अर्थको निरूपण करिकें तृतीय-श्लोकसूं  
पुष्टिमार्गीयकामको निरूपण करत हे'.

**श्लोकः—यदि श्रीगोकुलाधीशो धृतः  
सर्वात्मना हृदि ।**

**ततः किमपरं ब्रूहि लौकिकैर्वैदिकैरपि ॥३॥**

अर्थ—जब श्रीगोकुलाधीशकूं सर्वभावकरिकें जाजीवने हृदयमें स्थापन कियो तब वाकूं श्रीपुरुषोत्तमसूं उत्कृष्ट सर्वकाम पूर्णकरिवेवारो कहा पदार्थ हे ? अर्थात् प्रभुसिवाय कोउ ओर भक्तके कामपूरक नहिहे वेहि सर्वकामपूरक हैं. विनकूं जब हृदयमें स्थापित किये तब लौकिक सिद्धकरवेवारी-युक्तीनसूं ओर वैदिक जो यागादिसाधक जो वचन ताकरिकें कहा कर्तव्य हे ? कछु कर्तव्य नाहिहे. सोहि श्रीमहाप्रभूनने

अंतःकरणप्रबोधके प्रथम श्लोकमें कही है जो “ अंतःकरण ! मेरो वाक्य सावधान होयकें सुन जो श्रीकृष्णसूं अधिक कोउ दैवत, दोषकरिकें रहित नहिंहे. ” इतने प्रभु एकहि निर्दोष हैं ओर सब सदोष हैं तासूं निर्दोषकों हृदयमें स्थापितकियेसूं भक्तके सबकामकी सिद्धिहे. ओर पूर्व जो नारदादिक मुनियें भये हैं विननेंहू भगवत्प्राप्तिके लिये प्रभुकी सेवा करिवेको उपदेश कियो हे. जब वह प्रभुहि जाके हृदयमें विराजे वाभक्तकूं सेवाके फलमें कहा न्यून रहेहे ? सब काम पूर्णहि होपहे ॥ ३ ॥

एतें कामरूप-तृतीय-पुरुषार्थको निरूपण करिकें  
मुक्तिरूप चतुर्थ-पुरुषार्थको अब  
निरूपण करत हे.

श्लोक—अतः सर्वात्मना शश्वत् गोकुलेश्वरपादयोः।  
स्मरणं भजनं चापि न त्याज्यमिति मे मतिः॥४॥

इति श्रीबल्लभाचार्यविरचिता चतुः-

श्लोकी समाप्ता

अर्थ—श्रीगोकुलेश्वर हृदयमें विराजे तापीछेंहू सर्वात्मकरिके विनके चरणकमलको स्मरण ओर भजन (सेवा) न छोडनो एसी मेरी मति हे; इतने औषधके सेवनसूं सुखी भयो एतो


पुरुषहू औषध खाय तो आगे रोग होयवेको संभव न रहे  
 ताप्रकार प्रकृतमें प्रभुकी प्राप्तिभयेपीछेहू जीवकूं आसुरजीवके  
 संगसूं आसुरावेश नहिहोयवेकेलिये प्रभुको स्मरण ओर भजनरूप  
 साधन औषधकीनाई सदा कर्त्तव्य हे. एसें श्रीमहाप्रभुजी  
 दैवीजीवनके उपर कृपा करिकें विनकूं जतायवेकेलिये मेरी  
 एसी मति हे याप्रकार आज्ञा करेहैं. ॥४॥

इतिश्री चतुःश्लोकीकी गोस्वामिश्रीनु-  
 सिंहलालजीमदाराजकृत ब्रज-  
 भाषामें संक्षिप्तटीका समाप्त.



श्रीकृष्णाय नमः । श्रीगोपीजनवल्लभाय नमः ।

## अथ भक्तिवर्द्धिनीकी संक्षेप भाषाटीकाको प्रारंभ



अथ पुष्टिमार्गमें अंगीकृत ओर भक्तिको वृद्धिके प्रकारकूं  
नहिंजानवेवारे-जीवनके उपर कृपा करिवेवारे  
श्रीआचार्यजी, स्वप्रकटिमार्गमें प्रवर्तमाना  
भक्ति ओर ताकी वृद्धिके प्रकार  
कहिंवेकी प्रतिज्ञा करत हैं.

श्लोकः—यथा भक्तिः प्रवृद्धा स्यात्  
तथोपायो निरूप्यते ।

बीजभावे दृढे तु स्यात् त्यागाच्छ्रवणकीर्तनात्  
॥ १ ॥

टीका—श्रीआचार्यजी आज्ञा करत हैं जो स्वमार्गीय-  
भक्तिकी वृद्धि होयवेके उपायको निरूपण होय हे जो  
स्वमार्गमें कहेभयेसाधनसं और जो मर्यादामार्गीय साधनहैं  
विनको परित्याग तथा स्वमार्गीय-श्रवण ओर कीर्तनको  
परिशीलन करिवेसं भाव दृढ होय तब भक्तिकी वृद्धि होय  
हे. यहां कोउ कहे जो भक्तिकी उत्पत्ति और ताकी वृद्धिके  
उपाय तो श्रीभागवत तथा गीताजीप्रभृति ग्रन्थमें विस्तारसं  
वर्णित हे. तब श्रीआचार्यजी ताके लिये नूतनग्रंथ करिवेको

परिश्रम क्यों करत हैं ? एसी शंकाको समाधान तो यह हे जो श्रीभागवतादिकमें “ दान, व्रत, तप, होम, स्वाध्याय, संयम ओर इतर श्रेय उनकरिके श्रीकृष्णमें भक्ति सिद्ध होय हे ” इत्यादि श्लोकनसं जो भक्तिकी उत्पत्तिको प्रकार ओर “ आपकी कथाके पान करिवेसं जिनकूं भक्तिकी वृद्धि ओर निर्मल अंतःकरण भये हे वे वैराग्य हे. सार जामें ऐसे ज्ञानकूं प्राप्त होयके आपके स्थानकूं प्राप्त होय हे ” इत्यादिकवाक्यनसं ताकी वृद्धि निरूपित हे सो दान, व्रतादिक मर्यादामार्गीय साधननसं होयसके हे ओर वृद्धिको फल ज्ञान अथवा मर्यादामार्गीय भक्ति हे तासं अक्षरकी प्राप्ति करायवेमें वा भक्ति उपक्षीण होयजाय हे तासं पुरुषोत्तमलीलाको अनुभव करायवेवारी जो पुष्टिभक्ति ओरताकी वृद्धिके उपायको याग्रंथसं श्रीआचार्यजी निरूपण करत हैं सो उचिततर हे. अत्र पहिलें बीजभाव दृढ होयवेको कह्यो ताको स्वरूप कहत हैं जो पुष्टिमार्गके आचार्यद्वारा मार्गरीतिअनुसार प्रभुकूं आत्माप्रभृतिको निवेदन भये पीछें प्रभु स्वतः वा जीवकों शरण सिद्ध करत हैं ताकूं याग्रन्थमें बीजभाव कह्योजाय हे. जेसैं क्षेत्रमें बीज वींये पीछें जलसेचनादिक होय तत्र अंकुरादि होय हे. केवल जलसेचन अंकुरकी उत्पत्तिमें असमर्थ हे एसैं भक्तिमार्गमें आगे कह्यो बीजभाव भयेपीछे श्रवण मननादि भक्तिकूं उत्पन्न करिसके हे विना बीजभाव वे अकिंचित्करप्राय

हे एसें श्रीहरिरायजी आज्ञा करत हैं ॥ १ ॥

पसें बीजकी दृढताको प्रकार प्रथमश्लोकसं कहिकें  
अन्यव्यापारसंह वामें विघ्न नहि आय वेके  
लिये भगवद्भजनरूप उपायकी दृढता  
सिद्धिके लिये अब कहत हैं.

श्लोकः—बीजदाढर्यप्रकारस्तु गृहे स्थित्वा स्वधर्मतः।

अव्यावृत्तो भजेत् कृष्णं पूजया श्रवणादिभिः॥२॥

टीका—स्वधर्माचरणपूर्वक गृहमें रहिकें सेवाप्रतिकूल—  
उद्योगकूं छोडिकें पूजा ( प्रेमपूर्वदर्शन ) ओर श्रवणादिकसं  
श्रीकृष्णको भजन ( सेवा ) करनो सो बीजभावकी दृढताको  
प्रकार हे; इतने पुष्टिमार्गमें उक्तसाधनसं अन्य—मर्यादिक-  
साधनको परित्याग करिवेको मूलके ' तु ' शब्दसं सूचित  
होय हे. ओर पुष्टिमार्गीयसाधनमें मुख्य सेवा सो भजनानुकूल  
—गृहमें रखेविना होयसके नहि तासं मूलमें गृहमें रहिवेको  
कह्यो हे. ओर धर्म दोयप्रकारके हे; तामें एक तो जाको  
शरीरमें अंत आवे सो ओर दूसरो आत्मामें जाको अंत आवे  
हे सो तामें संध्यावंदनसं लेयके यागपर्यंत धर्म स्वर्गादि-  
भोगरूपफलकूं देवेवारे हे सो फल शरीरसं अनुभूत होय हे.  
ओर गीताजीमें कहेप्रमाण फलभोग होयचूके तब पृथ्वीउपर  
गिरे हे तासं स्वधर्मपदसं यह धर्म नहि लेनो किंतु आत्मधर्म  
जो काहुप्रकारसं विकृत नहिहोयवेवारो भगवद्भर्म हे सो

लेनो एसें सूचित होय हे. सो धर्म प्रभुकी सेवा हे सो श्रीभागवतमें प्रह्लादजीको वचन हे जो “ आदर्शमें प्रतिबिंबितमुखकूं देखिकें अपने मुखमें जो जो शृंगार होय सो हि प्रतिबिंबस्थानीयमुखकूं होय तेसे मनुष्य प्रभु कूं जो जो मान देय हे सो आत्माके लियेहि हे. ” एसें वर्णित जो भगवत्सेवारूप-आत्मधर्म सो स्वधर्मपदसूं लियोजाय हे. ओर स्वधर्मतः एसें “ तसिल् ” प्रत्यांतरूप लिखवेको अभिप्राय तो यह हे जो तसिल्प्रत्ययांतशब्द अव्यय होयवेसूं वामें काहुप्रकारकी विकृति नहिं होय हे एसें यहाँहु अव्ययको प्रयोग करघो हे तासूंहु काहुप्रकार विकृत न होय एसी धर्म लेवेको अभिप्राय दीखे हे ओर फलात्मक-श्रीकृष्णके उपादानसूं यह भजन मेरे फलरूप हे एसें जानिकें करिवेको बोध होय हे. यामें जो पूजा शब्द हे तासूं आगमोक्तपूजाको ग्रहण करिवेको नहिं किंतु श्रीगोपीजनने “ प्रणयपूर्वक दर्शनसूं ये हरिणीयें श्रीकृष्णको पूजन करतभई ” एसें दशमस्कंधमें कह्यो हे वहां प्रेमपूर्वकदर्शनकों पूजाके अर्थरूप गिन्यो हे एसी पूजा यहाँहु लेवेकी हे. ओर श्रवणकी जो मूलमें आज्ञा हे सो सेवाके अनोसरमें करिवेकी हे. ॥ २ ॥

अब प्रभुमें दृढविश्वास होय तो प्रभुहि वाको  
योगक्षेम चलावत हैं परंतु दृढविश्वास न  
आवे एसे जीवनकूं गौणपक्षमें

व्यावृत्ति (उद्योग) करिवेकी  
आज्ञा करत हैं.

श्लोक—व्यावृत्तोऽपि हरौ चित्तं श्रवणादौ यतेत् सदा ।  
ततः प्रेम तथाऽऽसक्तिर्व्यसनं च यदा भवेत् ॥३॥  
बीजं तदुच्यते शास्त्रे दृढं यत्रापि नश्यति ।

टीका:—भगवत्सैवामें प्रतिकूल—व्यापारको त्याग करिवेकी आज्ञा आगेके श्लोकसं करी अब कछु उद्योग करना पड़े तोहु चित्तकूं प्रभुमेंहि राखिकें करना. ओर व्यावृत्तिमें तथा व्यावृत्तिसं मुक्त होयके श्रवणादि करने. आदिशब्द मूलमें लिख्यो हे तासं श्रवण, स्मरण, चित्तन, कीर्त्तनप्रभृत्ति अनोसरमें करने. एसे भक्तिमार्गीय—भक्तिकी वृद्धि होयवेको उपाय कहके अब भक्ति बढवेको क्रम कहत हैं जो प्रथम तो श्रीआचार्यजीके कुलद्वारा भगवदंगीकार सिद्ध होय तत्र प्रेम इतने स्वतः प्रभुमें प्रवृत्ति करायवेवारो स्नेहको अंकुर हृदयमें स्फुरे हे तापीछे प्रभुमेंहि मनकूं लगायवेवारी आसक्ति होय हे ताकूं प्रौढस्नेह कहेहे तापीछे एकक्षणहू प्रभुको वियोग सह्यो न जाय एसो प्रभुमें व्यसन होयहे. एसे व्यसनपर्यंत भाव बढे ओर प्रभुको क्षणमात्र वियोग सहन न होयसके तब बीजभाव दृढ भयो एसें जाननो. जाजीवकूं आगेकहेप्रमाण बीजभावकी दृढता भई हे सो, दुःसंगादि लौकिक-दोष



॥ श्रीकृष्णाय नमः ॥ श्रीगोपीजनवल्लभाय नमः ॥

## अथ श्रीजलभेद ग्रन्थकी ब्रजभाषामें संक्षिप्त-टीकाको प्रारंभः



अपने ( पुष्टिमार्गीय-वैष्णवनकूं ) सेव्य श्रीकृष्ण, केवल भावकरिकें हि प्राप्त होयसकें हैं. विनाभावसूं संपादित-ज्ञान-दिकहू प्रभुप्राप्तिमें बाधक हैं एसें श्रीभागवतादिक-सबग्रन्थनमें विदित हे; तासूं भावरहित कृति, अस्नेह ( विनाघृतके ) भोजनकीनाई फलसंपादक नहिहोयवेसूं, श्रीआचार्यजी-महा-प्रभुजी निजजनके उपर, कृपा करिकें, विनके भावकी वृद्धि होयवेके लिये आप भावको निरूपण करिवेकी प्रतिज्ञा करत हैं.

श्लोकः-नमस्कृत्य हरिं वक्ष्ये तद्गुणानां विभेदकान् ।  
भावान् विशतिधा भिन्नान् सर्वसन्देहवारकान् ।१।

टीका-प्रभूनकूं नमनकरिकें भक्तिके साधनमें जो जो संदेह हैं विनकूं मिटायवेवारे, ओर रजोगुण, तमोगुण ओर सत्वगुण विनकूं निवृत्तकरिवेवारे न्यारे न्यारे वीसप्रकारके भावनकूं में आगे निरूपण करूं; इतने जीव प्रभुकूं नमनविना ओर कार्य नहिंकरसकेहे एसें जतायवेके लिये आप प्रथम नमनकरिवेकी अज्ञाकरत हे. “ तद्गुणानां विभेदकान् ” एसे

मूलके वाक्यके दोचार अर्थ होयसकेहे; जैसे प्रभुनके जो सर्वसमत्वादि गुण विनके मिटायवेवारे भाव हे इतने जो भक्त भावकूं बढायकें भक्ति करे तो प्रभु आपको सर्वसमत्वरूप जो गुणहे ताकूं छोडिकें वाजीवके उपर पूर्ण कृपा करेहें सो बात श्रीगीताजीमें "मैं सर्वप्राणीनकूं समान हूं मेरे कोउ शत्रु ओर मित्र यद्यपि नहि हे तो हू जो मेरोहि भजन करे हे सो मेरेमें हें ओर विनमें मै हूँ" एसी आज्ञा स्पष्ट करीहे. अथवा जीवके जो घर्म वामें विलक्षणताकरिवेवारे अथवा प्रभुके जो गुण विनको आकर्षण करिकें जीवमें दिखायवेवारे सब भाव हे. एसें यावाक्यके अनेकप्रकारके अर्थ श्रीकल्याणरायजीप्रभृति-बालकनने किये हे. भावशब्दक यद्यपि अनेक अर्थ होय हे तो हू यहां तो स्नेह ओर तासूं होयवेवारी अवस्था हि भावशब्दसूं जाननी; क्यों जो नाट्याचार्य-भरतमुनि-प्रभृतीनने भावको अर्थ स्नेहरूपहि कियो हे सो "रतिर्देवादिविषया भाव इत्यभिधीयते" (देवादिकनमें जो रति (प्रीति) हे ताकूं भाव कहे हें.) यावाक्यसूं कह्योहे. गुणके भेदकरिकें वे भाव बीस-प्रकारके हें. जब प्रभुमें भाव बढे तब आपहि सर्व संदेह नष्ट होयजाय हे तासूं मूलमें 'सर्वसंदेहवारकान्' एसें कह्योहें. ॥१॥

वेदमेंतैत्तरीय-श्रुतिमें " कुप्याभ्यः स्वाहा " वहांसूं

लेयकें सर्वाभ्यः स्वाहा " वहांताई जलके भेदको

निरूपण हे ता प्रमाण गुणहू भेदकूं प्राप्तहोय

हें सो कहत हें.

आइमिलवेसूं ओर कालादिनकी प्रतिकूलतारूप अलौकिक-  
दोषसंहू भक्तिमार्गसूं सरके नहिं हे. ॥३॥

एसें क्रमसूं स्नेह बढ़वेकी रीति कइकिं अब स्नेह होयवेमें  
बाधकरूप प्रभुसिवाय ओर वस्तुनमें स्नेह. गृहमें आस-  
क्ति ओर प्रभुविनाहु कालनिर्वाह ये तीन दोष हैं  
सो जब प्रभुमें एक भाव बढे तब तक बाधक  
मिटे, दूसरो भाव बढे तब दोय बाधकदोष  
निवृत्त होय ओर जब प्रभुमें व्यसनपर्यंत  
भाव होय तब भावविघातक-दोष  
सब वूरी होय हे सो आक्रमसूं  
एकभावकी वृद्धिमें एक दो-  
षकी निवृत्ति होय सो  
क्रम कहत हैं.

श्लोक—स्नेहाद्रागविनाशः स्यादासक्त्या

स्याद् गृहारुचिः ॥४॥

गृहस्थानां बाधकत्वमनात्मत्वं च भासते ।

यदा स्याद् व्यसनं कृष्णे कृतार्थः स्यादत्तदैव हि ॥५॥

टीका—जब प्रभुमें स्नेह होय तब लौकिकमें स्नेह न रहे,  
एसे जब प्रभुमें आसक्ति होय तब गृहमेंसूं आसक्ति छूटजायहे  
(४) इतनोहि नहिं किंतु गृहमें रह्येएसे स्त्रीपुत्रप्रभृति (भगव-  
दीय न होय तो) मोकूं भगवद्धर्म करिवेमें ये सब बाधक हैं

एसें दीखे ओर विनमें अनात्मताकीहू स्फूर्ति होय; इतने भगवदीयके आत्मा तो श्रीकृष्ण हैं तासूं जो भगवत्संबंधवारे जीव हैं तिनमें अपनेपनेकी स्फूर्ति होय हे, स्त्रीपुत्रादिकनमें अपनेपनेकी स्फूर्ति नहिं होयहे. क्यों जो वे तो लौकिका-सक्तिके कारणरूप हैं वे हू जो भगवदीय होय तो भगवदीय-पनसूं आसक्ति बाधक नहिं हे तासूं विनको बाधकपनी दीखवेमें आवे हे. अब स्नेहवृद्धिकी पराकाष्ठा कहत हैं जो जब प्रभुमें व्यसन भयो तब सो जीव कृतार्थ होय हे; इतने अर्थ जो भक्तिमार्गकी रीतिके अनुसार प्रभुको फलरूप संबंध सो जाकूं भयो हे एसो जीव होयजाय हे. ॥५॥

एसें प्रभुमें व्यसनवारेकी योग्यता, भाव  
ओर फलको निरूपण करिके अब  
श्राकी आगेकी व्यवस्था कहतहैं.

**श्लोकः—**तादृशस्यापि सततं गृहस्थानं विनाशकम् ।  
त्यागं कृत्वा यतेद्यस्तु तदर्थार्थिकमानसः ॥६॥  
लभते सुदढाम् भक्तिं सर्वतोप्यधिकां पराम् ।

टीका—एसेभाववारे जीवकूंहू तादृश—भगवदीयके संगविना वरमे स्थिति हे सो भावको नाश करिवेवारी हे तासूं वाकूं गृहमें रहनो उचित नहिं हे; क्यों जो जो जाको नाश करिवे- वारो हे सो वाके समीप रहि नहिं सके हे. जैसें ” हे कमल  
पो. १२

सरीखे नेत्रवारे जबसुं आपके चरणारविंदको स्पर्श भयो हे तबसुं ओरलोगकें आगें हम ठाड़े रहसके नहिं हैं ' एसें ब्रजरत्नरूप-श्रीगोपीजननें श्रीठाकुरजीसुं कह्यो हे. ताकी विदित्तिमें श्रीआचार्यजी आज्ञा करे हैं जो देहके अभिमानी पुरुष व्याघ्रकूं देहविघातक समझिकें वाकी पास ठाडो नहिं रहिसके हे एसें तादृशीयकूं लोकिकासक्तके पास रहिवेसुं भावकी हानि होयजाय ? तासुं वाभाववारो गृहको त्यागकरि मनमें एक प्रभुकेहि मिलवेकी अभिलाषा राखि भावकूं बढायवेको यत्न करे तो एसें करते करते सुतरां दृढ एसी भक्तिकूं संपादन करे हे. यहां प्रथम व्यसनपर्यंत भावकरिकें सर्वापनोद्य ( सर्व लौकिकासक्तिकूं छुडायवेवारी, ) भक्ति कहिकें पुनः सुदृढ भक्ति कहिवेको अभिप्राय यह हे जो पहेलेकी भक्तिहु फलरूप तो हे परंतु सुदृढ इतनें सर्वात्मभावरूप साक्षात् स्वरूपको अनुभवरूप फल जामें हैं एसी भक्तिकूं प्राप्त होय हे. मूलश्लोकमें लाभ होय हे एसें कह्योहे वाको अभिप्राय यह हे जो पूर्व कह्यो जो अत्यंत गाढभाव ताकरिकें विद्यमानदेहको जब नाश होय तब लीलामें उपयोगी अलौकिक देह बाँकी होय जाय हे पीछे वादेहसुं साक्षात् स्वरूपसंबंधि-फलकूं प्राप्त होय हे. यह भक्ति फलरूप हे एसें जतावेकेलिये सर्वसुं अधिक ओर पर एसे मूलमें दोय विशेषण दिये हे; इतने मुक्त्यादिकसुं अधिक ओर अगणितपरमानंदरूप-

पुरुषोत्तममें जाको संबंध हे एसी भक्ति हे, एसें विशेषणद्वयसं  
सूचित होय हे. ॥ ६ ॥

अब कदाचित् कोउ भक्तिमार्गीय पृषोक त्यागको  
स्वरूप समझेविनाहि 'हमहु गृहको त्याग करिके  
मक्ति षटाश्रमे' एसी मतमें निश्चय करिके  
अधिकार विना जो गृहको त्याग करे  
ताकूं एसें करिवेको निषेध करत हैं.

**श्लोकः—त्यागे बाधकभूयस्त्वं दुःसंसर्गात्तथाऽन्नतः । ७ ।**

टीका—जाकूं व्यसनपर्यंत भाव बढ़यो नहि हे एसे  
पुरुषकूं भक्ति बढायवेके लिये गृहछोडवेमें बाधक बहोत हे.  
पहिले कह्यो जो गृहत्यागी वाकूं वीजभावकी एसी दृढता हैं  
जो वाकूं दुःसंसर्गादि दोष कछु बाधा करिसके नहि हे परंतु  
याकूं तो विशेष भाव नहि होयवेसं दुःसंसर्ग दोष बहोत बाधा  
करे हे ओर शरीरनिर्वाहके लिये लोगमें काहुजगे जानापडे  
वहां जो देय सौ सब लेनो पडे तत्र वामें प्रभुकूं न समर्प्यो  
भयो अन्नहु आवे ताके ग्रहणसं बहिर्मुखपनो होयजाय, एसें  
ओरहु बहोत दोष होय हे विनमें मुख्य तो दुःसंग ओर अन्न-  
दोष हे तासं मूल श्लोकमें दोउको उपादान कियो हे. ॥ ७ ॥

अब एसे अपक्वभाववारेकूं दोष कोउ न आवे और  
कालहु निकसजाय एसी सुलभ रस्ता  
उत्तरश्लोकमें कहत हैं.

श्लोकः—अतःस्थेयं हरिस्थाने तदीयैः सह तत्परैः ।  
अदूरे विप्रकर्षे वा यथा चित्तं न दुष्यति । ८ ।

टीका—कालनिर्वाह होय ओर दोष न आयवेके लिये सो ( त्यागी ) जहां स्वमार्गकी रीतिके अनुसार सेवाको प्रवाह चलतो होय एसे प्रभुके स्थान जो गोवर्द्धनादिप्रभृति तामें रहे; तामेहु भगवद्भक्तके संग निरंतर रहें; तामे हु प्रभुकी सेवा; स्मरणपरायण रहे. वहांहु एसे न करे तो दुःसंगादिक दोष लगजाय तो सब जीवन छिनमें व्यर्थ होयजाय. अब निरंतर एसे स्थिति करिवेसूं कदाचित् कोऊ भगवदीयको अतिपरिचित-पनेसूं दोष दीखवेमें आवे तोहु आछो नहिं तासूं प्रकारांतरसूं रहिवेकी आज्ञा करे हैं जो जेसें प्रभुमें ओर प्रभुके भक्तमें दोषबुद्धि न होय एसें समीपमें अथवा दूरमें रहेनो परंतु भगवदीयके संगविना क्षणवारहु रहेंनो नहिं. तेसें विनकूं विनकी उपर अपनी उपर तथा अपनकूं अभावहु आयवेदेनो नहिं, एसें रहेनो जामें मनमें कोउप्रकारको दोष आयवेकूं न पावे एसी रीतिसूं रहेनो. ॥ ५ ॥

एसें प्रभुमें अत्यंत भाव बढवेसूं गृह छुटजाय वाकी  
ओर अज्ञानसूं गृह छोडे वाकी सिद्धिके उपाय  
ओर फल कहे अब पुष्टिमार्गीय सेवा ओर  
कथा वामें अन्यतरमें आसक्ति

राखिवेवारेकूं हू फलकी सिद्धि  
होय सो कहत हैं.

**श्लोकः—**सेवायां वा कथयां वा यस्यासक्तिर्दृढा भवेत् ।  
यावज्जीवं तस्य नाशो न क्वापीति मतिर्मम ॥९॥

टीका—श्रीआचार्यजी प्रकटित-पुष्टिमार्गानुसारी ऐसी प्रभुकी सेवामें तथा एतन्मार्गीय-भगवल्लीलाकी कथामें जाकी आसक्ति ( चित्त के व्यासंगपूर्वक दृढ आग्रह ) रहें; इतने काहूकूं सेवामें तो काहूकूं कथामें ओर काहूकूं दायमें आसक्ति होय सो हु यावज्जीव नाम जहांताई देहमें प्राण रहे तहांताई रहे तो वाको काहुप्रकारसूं नाश न होय ओर पुष्टिमार्गीय-फल वाकूं सिद्ध होय वामें संशय नहिं होयवेके लिये श्रीमहाप्रभुजी आज्ञा करे हैं जो मेरी बुद्धिमें एसे आवे हे जो वाको काउ-प्रकारसूं नाश न होय. इतनो कहिवेसूं फलकी निःसंदिग्धताको बोध होय हे. ॥ ९ ॥

एसे सेवासक्त ओर कथासक्तकूं देखिकें कोउ आसक्तिके  
अभावमें हु उत्साहसूं सेवा करे तो वाकूं बाधा  
होय सो ओर ताकी निवृत्तिको उपाय  
अब कहत हैं

**श्लोकः—**बाधसंभावनायां तु नैकांते वास ईष्यते ।  
हरिस्तु सर्वतो रक्षां करिष्यति न संशयः ॥१०॥



टीका-सेवा करिवेमें दृढता नहिहोयवेसूं उद्वेग होय ओर भोगकी आसक्ति होय सो सेवामें बाध समजनो एसे बाधकी संभावनामेंहु मोसूं सेवा नहिं बनीसकेहैं तासूं मे गृहकूं छोडिकें कोउ-एकांतमें जायकें भगद्भजन करूगो' एसो विचार करिकें सेवाकूं न छोडे; क्यों जो प्रभु सर्वके दुःखको हरण करिवेवारे हैं तासूं हरिनाम हे सो उद्वेगादिककूं मिटायकें सेवामें आसक्ति दृढ करेगें तासूं जैसे बने तेसें सेवा करे. एसें करन-हारकूं प्रभु भाव बढावे यामें काहुप्रकारको शंशय न करनो. एसें कथामें आसक्त होय वामें विघ्न आवे तोहु वाकूं कथा न छोडनी, तो प्रभु सबबाधानकूं दूर करिकें जामें जाकी प्रवृत्ति होयगी वामें वाके मनकूं निश्चल करेगें एसें विश्वासपूर्वक समजनो. ॥ १० ॥

अथ उपसंहार करत हैं

श्लोकः—इत्येवं भगवच्छास्त्रं गूढतत्त्वं निरूपितम् ।  
य एतत् समधीयेत तस्यापि स्याद् दृढा रतिः । ११ ।

इति श्रीमद्ब्रह्मभाष्यार्यविरचिता भक्तिवर्धिनी समाप्ता ॥

टीका-ऊपर कहेप्रमाण जो वाणीमें हु नहिं आइसके किंतु अनुभवसूं जानिवेलायक गूढ हैं तत्व जाको एसी भक्तिकी

वृद्धिको शास्त्र निरूपित कियोहे याशास्त्रकूं सम्यकप्रकारसूं  
 अर्थानुसंधानपूर्वक जो पाठ करे ताकूंहु एसें करत करत निष्पाप  
 अंतःकरण जब होय तब प्रभुमें दृढ प्रीति होय; इतने याका  
 अर्थानुसंधानपूर्वक नित्य पाठ करिवेसूं मार्गमें रुचि होय ओर  
 भक्तिमार्गीयआचार्यद्वारा शरणागति होयवेसूं प्रभुमें दृढरति  
 इतने रसभावयुक्त स्नेह होय. ॥ ११ ॥

इति श्रीवल्लभाचार्यजीविरचित ' भक्तिवर्द्धिनी 'की  
 गोस्वामिश्रीनृसिंहलालजीमहाजविरचिता  
 ब्रजभाषामें संक्षिप्त टीका समाप्त भई ॥



॥ श्रीकृष्णाय नमः ॥ श्रीगोपीजनवल्लभाय नमः ॥

## अथ श्रीजलभेद ग्रन्थकी ब्रजभाषामें संक्षिप्त-टीकाको प्रारंभः



अपने ( पुष्टिमार्गीय-वैष्णवनकूं ) सेव्य श्रीकृष्ण, केवल भावकरिकें हि प्राप्त होयसकें हैं. विनाभावसूं संपादित-ज्ञान-दिकहू प्रभुप्राप्तिमें बाधक हैं एसें श्रीभागवतादिक-सबग्रन्थनमें विदित हे; तासूं भावरहित कृति, अस्नेह ( विनावृत्तके ) भोजनकीनाई फलसंपादक नहिहोयवेसूं श्रीआचार्यजी-महा-प्रभुजी निजजनके उपर, कृपा करिकें, विनके भावकी वृद्धि होयवेके लिये आप भावको निरूपण करिवेकी प्रतिज्ञा करत हैं.

श्लोकः—नमस्कृत्य हरिं वक्ष्ये तद्गुणानां विभेदकान् ।  
भावान् विंशतिधा भिन्नान् सर्वसन्देहवारकान् ।१।

टीका—प्रभूनकूं नमनकरिकें भक्तिके साधनमें जो जो संदेह हैं विनकूं मिटायवेवारे, और रजोगुण, तमोगुण ओर सत्वगुण विनकूं निवृत्तकरिवेवारे न्यारे न्यारे वीसप्रकारके भावनकूं में आगें निरूपण करूं; इतने जीव प्रभुकूं नमनविना ओर कार्य नहिंकरसकेहे एसें जतायवेके लिये आप प्रथम नमनकरिवेकी अज्ञाकरत हे. “ तद्गुणानां विभेदकान् ” एसे

मूलके वाक्यके दोनार अर्थ होयसकेहे; जेसैं प्रभुनके जो सर्वसमत्वादि गुण विनके मिटायवेवारे भाव हे इतने जो भक्त भावकूं बढायकें भक्ति करे तो प्रभु आपको सर्वसमत्वरूप जो गुणहे ताकूं छोडिकें वाजीवके उपर पूर्ण कृपा करेहैं सो बात श्रीगीताजीमें "मैं सर्वप्राणीनकूं समान हूं मेरे कोउ शत्रु ओर मित्र यद्यपि नहि हे तो हू जो मेरोहि भजन करे हे सो मेरेमें हें ओर विनमें मै हूँ" एसी आज्ञा स्पष्ट करीहे. अथवा जीवके जो घर्म वामें विलक्षणताकरिवेवारे अथवा प्रभुके जो गुण विनको आकर्षण करिकें जीवमें दिखायवेवारे सब भाव हे. एसें यावाक्यके अनेकप्रकारके अर्थ श्रीकल्याणरायजीप्रभृति-बालकनने किये हे. भावशब्दक यद्यपि अनेक अर्थ होय हे तो हू यहां तो स्नेह ओर तासूं होयवेवारी अवस्था हि भावशब्दसूं जाननी; कयों जो नाट्याचार्य-भरतमुनि-प्रभृतीनने भावको अर्थ स्नेहरूपहि क्रियो हे सो "रतिर्देवादिविषया भाव इत्यभिधीयते" (देवादिकनमें जो रति (प्रीति) हे ताकूं भाव कहे हें.) यावाक्यसूं कह्योहे. गुणके भेदकरिकें वे भाव वीस-प्रकारके हें. जब प्रभुमें भाव बढे तब आपहि सर्व संदेह नष्ट होयजाय हे तासूं मूलमें 'सर्वसंदेहवारकान्' एसें कह्योहैं ॥१॥

वेदमेंतैत्तरीय-श्रुतिमें "कुप्याभ्यः स्वाहा" वहांसूं  
लेयकें सर्वाभ्यः स्वाहा" वहांतांई जलके भेदको  
निरूपण हे ता प्रमाण गुणहू भेदकूं प्राप्तहोय  
हैं सो कहत हैं.

**श्लोकः—गुणभेदास्तु तावन्तो यावन्तो हि जले मताः।**

टीका—जितने जलके भेद तैत्तरीय श्रुतिमें प्रतिपादित हैं तितने हि भेदहैं. जैसे जलमें तापनिवृत्तकपनो, शुद्धिकरिवेपनो, ओर पुष्टिकरिवेको गुण हे ऐसे गुण भावमें हू हैं ऐसे जतायवेके लिये जलको दृष्टान्त हे.॥

प्रभुकं गायन विशेष प्रिय होयवेसं प्रथम गायकके भावको निरूपण करत हैं.

**श्लोकः—गायकाः कूपसङ्काशागंधर्वा इति विश्रुताः ।**

**कूपभेदास्तु यावन्तस्तावन्तस्तेऽपि सम्मताः ॥२॥**

टीका—प्रसिद्धगानकरिवेवारे गायक गंधर्वके नामसं प्रसिद्ध हैं वे गायकें कूपजैसे हैं; इतने कूपके जलकीनाई विनगायकनको भावहे कूपको जल शीतकालमें उष्ण ओर उष्णकालमें शीतलहे, तापकूं दूर करे हे ओर व्ययकरिवेसं आछो होयहैं ऐसे गायकको भाव जडपुरुषकी जडताकूं मिटावे हैं, संसारके तापसं तप्तभये-पुरुषनके तापकूं निवृत्तकरेहैं ओर गानकरवेसं बढे हे तथा आछो होयहे. रज्जु (रस्सा) करिकें कूवाको जल ग्रहणकियोजाय हे ऐसे गानकरिकें हि गायकके भावको ग्रहणकरिवेको अभिप्राय यहां दीखेहे. वे सब गायकें तुल्य नहिं हैं किंतु जितने कूवाके भेद हैं तितने हि गायकनके भेद हैं; इतने जैसे कोउकूवाको जल खारो होय, कोउको फिको होय,

कोउको तिक्त जल होय, कोउ परिणाममें सुखदेवेवारे होय ओर कोउ परिणाममें दुःखदेवेवारे-जलयुक्त होयहे तेसैं गायकहू पुरुषोत्तम, विनकी विभूति, गुणावतार, ओर अंशादिनकी लीलाके भेदकरिके गान करे हैं. तेसैं सच्चादिक-गुणनके भेदकरिके कोउ अकाम, कोउ मोक्षकाम, कोउ स्वर्गकाम ओर कोउ लौकिककामनावारे हैं; तासूंविनको भाव कूपके जलकी तुल्य हे या भावकी हकीकत कपिलदेवजीने देवहृतीजीकूं श्रीभागवत-तृतीयस्कंधमें कही हे; तासूंहि ( भावके भेदसूं हि) भक्तिके हू ८२ प्रकार होय हे सो श्रीप्रभुचरणनने भक्तिहंसादिकमें निरूपण किये हैं.

अवणादिनवक हू अधिकारिके भेदसूं कर्म, ज्ञान, उपासना ओर भक्तिमार्गीयपनके भेदसूं अनेक प्रकारको होय हे. अब यहांसूं द्वितीयभावको निरूपण करत हैं.

**श्लोकः—कुल्याः पौराणिकाः प्रौक्ताः पारम्पर्ययुता  
भुवि ॥३॥**

टीका-कृत्रिम नदी 'कुल्या' नामसूं प्रसिद्ध हे वाकीनाई पौराणिक हे सो पारंपर्ययुक्त हैं; इतने जलाशयसूं लेयके क्षेत्रपर्यंत कुल्या परंपरागत-जलप्रवाहयुक्त हे. एसैं पृथ्वीमें पुराणके अर्थ राखिवेमें पौराणिक परंपरासूं अर्थसंग्रह करिवेवारे हे. सद्गुरुनके पास उपदेश ग्रहणकरिके पुराणके अर्थकूं गुरुकी

पाससं पढेहे. एसें उपदेश ग्रहणकियेविना ओर गुरूनके पाससं अर्थ जानेविना श्रीभागवतादिकमें भाषात्रय ओर आसुरन्यामोहादिलीला वर्णित है ताके अज्ञानसं जो पुराणको अर्थ समझावे तोहू वासं कोउ अर्थ सिद्ध न होते है तासं गुरू-पदेशादिककी पौराणिकनकूं अत्यावश्यकता है. ताविना कथा करे सो कथा श्रोताकूं फल देयवेवारी नहिं होय है. जेसें कृत्रिमनदी-(नहेर) प्रतिदिन प्रयत्न करिवेसं आछीरीतिसं जलकूं वहे हे तेसें पौराणिककूं हू निरन्तर पुराणके पाठ करिवेसं भावको उदय होय हे एसें हू यापेसं जान्योजाय हे ॥ ३ ॥

अथ तृतीयभावको निरूपण करत है

**श्लोकः—क्षेत्रप्रविष्टास्ते चापि संसारोत्पत्तिहेतवः ।**

टीका—शरीर ओर स्त्रीको वाचक (क्षेत्र) शब्द हैं तासं वे पौराणिक जो देहनिर्वाह अथवा स्त्रीकुटुंबादिकके लिये पुराण वाचकेको कार्य करे तो वेहू संसारोत्पत्तिके कारणरूप होय हे; इतने जेसें कुल्या को जल क्षेत्रमें जाय तो धान्य उत्पन्नकरिवेमें समर्थ होय हे तेसें पौराणिक हू वृत्तिके लिये पुराण वाचनकरे ओर भीतर भावरहित होय तो संसारकी उत्पत्तिके कारण होय हे जेसें पौराणिक स्त्रीकुटुंबादिकके पोषणार्थहिं पुराणको उपयोग करे ओर आप वाप्रमाण चले नहिं तो संसारकी उत्पत्तिके कारण होय. तेसें पूर्वश्लोकमें कहे गायकप्रभृति हू स्त्रीपुत्रादिकके लिये जो गान करे तो वेहू संसारोत्पत्तिके

कारणरूप होय एसें मूलके (अपि) शब्दसं सूचित होय हे.

अथ चतुर्थभावको निरूपण करत हैं.

**श्लोकः—**वेश्यादिसहिता मत्ता गायका

**गर्तसञ्ज्ञिताः ॥४॥**

टीका—गायक जो वेश्यादियुक्त होयकें मदमें मत्त होय विनको भाव गर्त ( खाडा ) के जलकी तुल्य हे; इतने " जेसें वारांगना-स्त्रीके संसर्गकरिवेवारेनके प्रसंगसं मोह ओर बंध होय हे तेसें याजीवकूं ओरके प्रसंगमें नहिं होय हे" एसें श्रीकपिलदेवजीने आज्ञा करी हे; तासूं वेश्यादिकनको संग महाबाधक हे. स्त्रीके प्रसंग करिकें हू जो प्रभुको भजन करे तो आछो होय परंतु भजन् (सेवा) हू वे नहिं करे हे; क्यों जो मत्त हे तासूं विनकूं स्वामिसेवकभावको अनुसंधान नहिं रहे हे. एसे गायक श्रीकृष्णके गुणको गान करे हे सोहू माहात्म्य जानिकें नहिं करे हे किंतु उत्तम स्वर ओर गीतमें वश होयकें कोउबिरियां करे हे; तासूं विनको भाव खाडाके जलकीनाई कलुषित गिन्योजाय हे. ओर जो निर्मत्सर होयकें प्रभुके गुणगान करिवेवारे हैं विनको भाव तो कूपके जलकी तुल्य जाननो. ॥ ४ ॥

अथ पञ्चमभावको निरूपण करत हैं.

**श्लोकः—**जलार्थमेव गर्तास्तु नीचा गानोपजीविनः ।



टीका—गानकरिकें हि आजीविका करिवेवारे नीच पुरुषहें विनको भाव उच्छिष्ट ( जूठ ) जलसमान हे; इतनें जूठे वामणप्रभृति खासाकरे तब सब जूठो जल एकखाडामें जमा होय हे. वाखाडाको जल जैसें शुद्धिकरिवेके कार्यमें अयोग्य हे. तेसें गानोपजीविनीचपुरुषनको भावहू सत्पुरुषनकूं आदरकरिवेयोग्य नहिं हे.

छठे भावको निरूपण करत हें.

श्लोकःहृदास्तु पण्डिताः प्रोक्ता भगवच्छास्त्रतत्पराः  
॥५॥

टीका—भगवच्छास्त्र जो श्रीभागवत—गीताजी तामें तत्पर ऐसे जो पंडितलोग हे विनको भाव हृद ( दह ) के जलकी तुल्य हे. इतने नदीप्रभृतिमें जहां जल बहोत उंडो निरंतर रहे वाकूं हृद कखोजाय हे वाहृदमें जैसें जल निरंतर शीतल रहेहे ओर पश्चादिकनसूं मिलन नहिं होयसके हे तेसें पंडितनको भावहू सांसारिकतापसूं तप्त नहिं होयहे ओर कुतर्कादिकसूं हू शंशयवारो नहिं होय हे. एसी जतायवेके लिये जलके हृदको दृष्टान्त यहां श्रीमहाप्रभुजीने दीयो हे. ॥ ५ ॥

अब सप्तमभावको निरूपण दृष्टान्तपूर्वक करत हें.

श्लोकः—सन्देहवारकास्तत्र सूदा गम्भीरमानसाः ।

टीका—गंभीर हे मन जिनको इतने अंतर्निष्ठावारे ओर

भगवच्छास्त्रमें संदेहकूं मिटायवेवारे जो पंडित हे विनको भाव आछे जलवारे हृदकी तुल्य हैं; इतनें जेसें बहोत सुंदर जलको इकठो समुदाय देखतखेमहि मनकूं प्रसन्नकरिवेवारो हे तेसें याश्लोकमें कहे एसे पंडितन हू मनके सर्वसंदेहकूं मिटायकें मनकूं प्रसन्नकरिवेवारे हैं एसें समजनो.

अब अष्टमभावको निरूपण करत हैं.

**श्लोकः—सरःकमलसम्पूर्णाप्रेमयुक्तास्तथा बुधाः ।६।**

टीका—पूर्वश्लोकमें कहे एसे अंतर्निष्ठावारे ओर संदेहकूं निवृत्तकरिवेवारे पंडितनहु जो प्रभुमें प्रेमवारे होयें तो कमलयुक्त—तलावके जलकी तुल्य विनको भाव जाननो; इतनें जामें कमल प्रफुल्लित होयस्ये हे एसे तलावको जल दर्शन-मात्रसं हि सर्वइंद्रियनकूं सुखकरिवेवारो हे वाजलमें सुगंध बहोत होयवेसं भ्रमरादिक कमलपे आवे हे ओर बहोत सुंदर जल होयवेसं सारसप्रभृतिपक्षी हू सौंदर्यकूं बढ़ायवेवारे वहां होय हे तेसें पंडित ओर अंतर्निष्ठावारे ओर सर्वसंदेहकूं मिटायवेवारे ओर प्रभुमें प्रेमवारेको भाव हू वाजलकी तुल्य हे. ॥ ६ ॥

अब नवमभावको निरूपण करत हैं.

**श्लोकः—अल्पश्रुताः प्रेमयुक्ताः वेशन्ताः**

**परिकीर्त्तिताः ॥**

टीका—प्रभुके विषे प्रेमवारे ओर शास्त्रकेथोरे अध्ययनवारे

पुरुष वेशंत (छोटेतलाव) जैसे भाववारे हे इतने; छोटे-तलावको जल बहोतपशुप्रभृतिके आक्रमणकरिकें कलुषित होय हे तेसैं वे पुरुष यद्यपि प्रेमवारे हे तोहु शास्त्राध्ययन बहोत नहिहोयवेसूं दुःसंगादिक दोष होयजाय तो विनको भाव क्षीण होयजाय हे एसैं जतायवेके लिये छोटे-तलावजेसो वाको भाव कछो हें.

अब दशमभावको निरूपण करत हें.

**श्लोकः—कर्मशुद्धाः पल्वलानि तथाऽल्पश्रुत-**

**भक्तयः ॥७॥**

टीका—कर्मकरिकें शुद्ध परंतु शास्त्राध्ययन तथा भक्ति जाकी कमति हे विनको भाव अति छोटे तलावके जलकी तुल्य जाननो; इतने विशेष छोटे तलावको जल जेसैं वे पुरुष हू कर्मकरिकें ईश्वरकूं अर्पण करे तासूं विनको चित्त शुद्ध होयजाय हे परंतु छोटे तलावमें जेसैं वराहप्रभृति फिरे तब जल सब कीचयुक्त होयकें पानकरिवेके लायक नहि रहे हे तेसैं विनपुरुषनकूंहू “अग्निहोत्रकूं होमें” “स्वर्गकी कामनावारो अग्निष्टोम यागकरे” इत्यादिश्रुतीनके वाक्यसूं सकामकूं यागको अधिकार हे जामे फलको श्रवण न होय वामेहू विश्वजिन्यासूं फलकी कल्पना होयसके हे तासूं कर्म ईश्वरकूं अर्पण करिवेके-लिये करिवेको नहि हे किंतु फलकेलिये हे ओर “जाकूं यागकरिवेको अधिकार नहि हे सोहि भक्तिको अधिकारी हे.”

इत्यादिक कर्मजडकी असद् ( खोटी ) वार्ताके अभिनिवेशसं वाको भाव क्लृप्त (मलिन) होयजायहे. परंतु चिनकूं “मेरे-लिये कर्मकरिवेवारोहो ” “ मेरे लिये कर्म करिवेसं हि तू सिद्धकूं प्राप्त होयगो ” “मेरेमें मनकूं धारणकर” इत्यादि प्रभूनके श्रीमुखके वाक्यके अज्ञानसं वाको भाव एसो होयजाय हे. पल्वल ओर वेशंत ये दोउ ‘पर्याय’ शब्दहे तोहु “वेशंते-भ्यःस्वाहा पल्वलेभ्यःस्वाहा” यारीतिसं वेदमें पृथक् गिनहे तासं यहां श्रीआचार्यजीने हू पृथक् दृष्टान्तरूप माने हे. तासं जलके स्वादके भेदसं यहां चिनको भेद समजनो. ॥ ७ ॥

अब ग्यारहमे भाषको निरूपण करत हैं.

**श्लोकः-योगध्यानादिसंयुक्ता गुणा वर्ष्याः प्रकीर्त्तिताः ।**

टीका-योगध्यानादिकरिकें संयुक्त-पुरुषनके भाव वृष्टिके जलसमान गिनेजाय हैं; इतने वृष्टिको जल जब पृथ्वीमें गिरेहे तब सर्वदेशमें व्याप्त होयजाय हे, सर्व स्थलनमें सुलभरीतसं मिलसके हैं ओर क्षेत्रादिमें पडे तो आछो धान्य उत्पन्न कर-सके हे तेसैं योगीनकूं हू योगकरतीबिरियां चिनको भाव सफल देह, इंद्रियप्रभृतोनकूं व्याप्त होयजाय हे तेसैं सत्पात्रकूं योगाभ्यास करावे तो स्वसमान (आपके भावकी तुल्य) भावकूं उत्पन्न करिसके हे.

अथ चारमे भावको प्रतिपादन करत हें.

**श्लोकः-तपीज्ञानादिभावेन स्वेदजास्तु**

**प्रकीर्तिताः ॥९॥**

टीका-तप इतने पंचाग्निप्रभृतिकूं सहनकरनो ओर ज्ञान इतने जीव ओर ईश्वरके स्वरूपकूं जाननो इत्यादिक भावकरिकें युक्तपुरुषनको भाव पसीनाके जलकी बराबर जाननो; इतने कितनेक लोग तपसूं हि प्रभुकी आराधना करिवेको कहे हे, कितनेक “वाब्रह्मकूं जानिवेवारे मोक्षकूं प्राप्त होय हे” इत्यादि श्रुतीनको साचो अर्थ (भाव) नहिंजानिवेवारे, ज्ञानसूं हि मोक्ष मिलवेकी बातें करत हें. परंतु श्रीभागवतमें कहे “धन, कुल, रूप, शास्त्र, बल, तेज? प्रताप, पुरुषार्थ ओर बुद्धिप्रभृति प्रभुकूं प्रसन्नकरिवारे नहिं हे किंतु गजेंद्रकी भक्ति देखिकेंहि प्रभुने कृपा करी हे तासूं भक्तिकरिकें हि प्रभु प्रसन्न होय हें एसें में जानूं हूं.” ओर “श्रेयकूं सत्रवेवारी आपकी भक्तिकूं छोडिकें केवल ज्ञानसंपादनमेंहि जो ऐशकूं धारण करेहे तिनकूं, तुष (छिलका) कूटवेवारेकूं जेसें चोखा कोउदिन न मिले तेसें वाकूं भगवान् क्लेशहि देवेवारे होयहें” इत्यादि-वाक्यनमें विनाभक्तिकेवलज्ञान ओर तप तथा आदिशब्द मूलमें हे तासूं वर्णाश्रमके धर्म वे सब व्यर्थ प्रयासरूप गिन्ये हे केवल वर्णाश्रमधर्म भगवत्संबंधरहित होय ताकी श्रीभागवतमें निदा करिहे तासूं मुख्य प्रभुकी भक्तिहे वाकूं छोडिकें तप ओर

ज्ञानमें निष्ठावारे पसीनाके जलकीनाई केवल क्लेशकूंहि प्राप्त होयहे. पसीनाको जलहू स्नान, आचमनमें, ताप मिटायवेमें ओर अन्यकार्यमें उपयोगमें नहि आवेहे किंतु केवलक्लेशकूं देवेवारोहे तेसैं विनको भाव समझनों ॥ ९ ॥

अब तेरहमे भावको निरूपण करत हे.

श्लोकः—अलौकिकेन ज्ञानेन ये तु प्रोक्ता हरेर्गुणाः ।

कदाचित्काः शब्दगम्याः पतच्छब्दाः प्रकीर्तिताः

टीका—महदनुग्रहपूर्वक प्राप्त कियो जो अलौकिक ज्ञान ताकरिकें कदाचित् प्रतीत होयवेवारे ओर वेदसूं जानिवेमें आयवेवारे प्रभुके गुणकूं जो कहिवेवारे हे विनको भाव कदाचित् प्रतीतिमे आवे ओर शब्दसूं जानिवेमें आयवेवारे पर्वतादिमेसूं पडते धाराजलकी तुल्य हे इतने धाराको जल निर्मल, सीतल, माधुर्यवारो ओर स्नान, आचमन और पान-करिवेमें मनोहर—ओर तापकूं मिटायवेवारो हे तेसो भगवद्गुण-वर्णनकरिवेवारेनको भाव काव्यादिकके विषे प्रतीत होयहे ॥९॥

अब चौदमे भावको निरूपण करत हे.

श्लोकः—देवाद्युपासनोद्भूताः पृष्वाभूमेरिवोद्भूताः ।

टीका—देवादिकनकीउपासना करिकें जन्मलेवेवारे भाव पृथ्वीपेसूं निकसे—जलबुद्बुद (बुद्बुदा) अथवा हिमकण-समानहे: इतने जो मनुष्य देवादिकके पूजनमेंहि में प्रभुको

भजन करूँहूँ एसे मानिवेवारो हे और मूलमें आदिशब्दहे तासं पितृमातृप्रभृतीनकी सेवाकू हू भगवद्भजनांतःपातिनी गिनवेवारेहे विनको भाव हिमकण अथवा जलपेँ होयवेवारे—बुद्बुदाजेसो समझनो क्योंजो देवादीनकी उपसनासं विभूतिको आराधन होय ओर पिताप्रभृतिनकी सेवाको फल स्वर्गादिक हे ओर प्रभुकी भक्तिको फल तो स्वरूपानंदरूप हे तासं देवादिककी भक्तिमें ओर प्रभु भक्तिमें जो महदंतर हे वाके अज्ञानसं वे देवादिककी उपासना करे हे, सो विनकी भ्रांति हे ओर जो महापुरुषनको ओर भक्तनको पूजन करिवेकी श्रीभागवतप्रभृति शास्त्रनमें आज्ञा देखिवेमें आवे हे सो तो भगवत्प्रीति ओर शुद्धिप्रभृतिके साधक होयवेसं पूर्वकहेभांतिसं देवादिपूजन तासं भिन्न हे क्यो जो जेसें भक्तादिपूजनमें पुरुषोत्तमभक्तिको साधकपनो हे तेसें देवादिपूजनमें नहि होयवेसं वाकूं भ्रांतिकल्पित गिन्यो हे, तासं पुरुषोत्तमकी प्राप्तिकूं इच्छवेवारेनकूं पुरुषोत्तमको भजन (सेवा) हि मुख्य हे सो वात प्रमाणपुरःसर टीकाग्रंथनमें निरूपित हे सो ग्रंथके विस्तारके भयसं यहां लिखे नहिं हे. जेसें तुषारकण अथवा जलबुद्बुद स्नानाचमन ओर पानादिमें उपयुक्त नहिं हे तेसें देवादिककूं पूजवेवारेनको भाव हू पुरुषोत्तमप्राप्तिमें अनुपयुक्त होयवेसं जलबुद्बुदको दार्ष्टान्तिक यथार्थ होय हे.

पंचदशम भाषको अथ निरूपण करत हैं.

**श्लोकः—साधनादिप्रकारेण नवधाभक्तिमार्गतः।१०।  
प्रेमपूर्त्या स्फुरद्धर्माः स्यन्दमानाः प्रकीर्तिताः ॥**

टीका—साधन हे आदि जामें ऐसे जो भक्तिके प्रकार ताकरिकें नवप्रकारकी भक्तिरूप मार्गसूं जिनको प्रेम पूर्ण होयवेसूं प्रभुके धर्मकी स्फुर्ती होय एसेनको भाव पर्वतादिपेसूं गिरते—जलकी तुल्य हे, याको स्पष्टार्थ यह हे जो जाजीवकी प्रभुने मर्यादामें अंगीकार कियो होय सो सबकामनाकूं छोडिकें वर्णाश्रमधर्मको आचरण करे तासूं अंतःकरण शुद्ध होय तब प्रभुकी भक्ति होय सो पुरुषार्थरूप हे, एसी जाकी मान्यता हे सो पूर्वोक्तसाधनके विचारसूं हि श्रवणादिमें प्रयास करे हे, एसेनको भाव प्रसवणजलकी तुल्य हे; इतने पर्वतके उपर वृष्टि होयवेसूं अथवा तो तलावप्रभृति जलाशय होयवेसूं तापर्वतपेसैं प्रसवणको जल बहोत ओर बिनके अभावमें कमती पडे तेसें पूर्वकहेभाववारेनकूं शुद्ध्यादिककी अपेक्षासूं भावको वृद्धिह्वास होय हे एसें समजनो, सो वात श्रीप्रभुचरणने भक्तिहंसमें कहिहे जो “प्राथमिक (पहेलो) तो भक्तिके साधनमें प्रवृत्त होयहे क्योंजो वाको मर्यादामेंहि अंगीकार भयोहे सोहू जहांताई प्रभुमें स्नेह उत्पन्न न भयो होय तहांताई मर्यादामें रहिकें सेवा करेहे, प्रभुमें स्नेह भये पीछे तो सब उपचार स्नेहपूर्वक होय तब विधिकी अप्रयोजकपनो होयहे ” एसें एकादशस्कंधमेंहू



“श्रद्धामृतकथायां” यहांसं लेयक्रे “कोन्योऽर्थोऽस्यावशिष्यते” यहांताँईमें निरूपण कियो हे नवधाभक्ति तो श्रवण, कीर्त्तन, स्मरण, पादसेवन, अर्चन, वंदन, दास्य, सख्य और आत्म-निवेदन सो ग्रह्यादजीने दैत्यपुत्रनकों सप्तमस्कंधमें कहिहे.

अब सोलमे भाषको निरूपण करत हैं.

**श्लोकः—**यादृशास्तादृशाप्रोक्ता वृद्धिक्षयवि-

वर्जिताः ॥११॥

स्थावरास्ते समाख्याता मर्यादैकप्रतिष्ठिताः ।

टीका—आगें जो कहे विनको प्रेम वृद्धिहासयुक्त कह्यो. एसें जिनके प्रेममें वृद्धि ओर क्षय (न्यूनता) नहिहै ॥११॥ ओर केवल मर्यादामेंहि जिनको अंगीकार हे एसेनको भाव स्थावर (स्थिर) जलतूल्यहे. जेसें स्थिर रह्यो बहोतजल ताप-पडवेसं सूखे नहिं हे तेसें स्नानादि—सवकार्यमें उपयोगी होयहे तेसें जिनको स्थिर प्रेम हे विनको भावहू संसारताप ओर कुतर्कादिकसं कमती नहिं होय हे ओर शुद्ध्यादिकको हेतु हे.

अब सत्तरमे भाषकी स्फुट करत हैं.

**श्लोकः—**अनेकजन्मसंसिद्धा जन्मप्रभृति सर्वदा ।१२

सङ्गादिगुणदोषाभ्यां वृद्धिक्षययुता भुवि ।

निरन्तरोद्गमयुता नद्यस्ते परिकीर्तिताः ।१३।

टीका—अनेकजन्मकरिकें आछीरीतिसं सिद्ध, ओर

जन्मतेसूं लेयँकेँ सत्संग ओर दुःसंगके गुण ओर दोषकरिकेँ प्रेमकी वृद्धि ओर क्षीणतावारे ओर निरंतर जन्मलेयँवेवारे भाव नदीकी तुल्य हैं. इतने नदीको जल वृष्टि ओर धाम-करिकेँ बढे ओर घटे हे, भूमि ओर पर्वतादिकके गुण ओर दोषकरिकेँ जलहू गुणदोषयुक्त होय हे शुद्धि ओर तृप्तिप्रभृतिंकूँकरे हे तेसँ उपर कह्यें, तिनको भावहू तपध्यान, समाधिकरिकेँ पापक्षयद्वारा शुद्ध्यादिककोँ उत्पन्न करेहे. सत्संगकरिकेँ गुणकूँ ओर दुःसंगकरिकेँ दोहकूँ उत्पन्न करेहे ओर बढे हे घटेहें. तासूं नदीप्रमाण गिन्ये हैं ॥ १३ ॥

अथ अठारमे भाषको निरूपण करत हैं.

**श्लोकः—एतादृशाः स्वतन्त्राश्चेत् सिन्धवः  
परिकीर्तिताः ॥**

टीका—पूर्वश्लोकनमें कहे भाव जो स्वतंत्र (उपाधिरहित) होय तो वे आपतें हि समुद्रमें जायवेवारी नदीकी तुल्य हे. जैसे महानदीके जलमें प्रविष्ट भये-जलचर समुद्रमें हू जायसके हे तेसँ उपर कहे निष्काम-प्रेमवारे हू दयाके समुद्ररूप-प्रभुमें प्रवेशकरे हे. महानदीके जलकीनाँई वे भाव सर्वप्रकारकी शुद्धिकूँ उत्पन्नकरिवेवारे हैं.

अथ उन्निसमें भाषको प्रतिपादन होय हैं.

श्लोकः—पूर्णा भगवदीया ये शेषव्यासा-

मिमारुताः ॥ १४ ॥

जडनारदमैत्राद्यास्ते समुद्राः प्रकीर्तिताः ।

टीका—शेष, व्यास, अग्नि, हनुमान्, जडभरत, नारदजी ओर मैत्रेयप्रभृति जो पूर्ण भगवदीय हैं वे समुद्र कहे हैं; इतने समुद्रके जलकी तुल्य विनसवनको भाव हे. भक्ति जो सेवा ताकरिके पूर्वनकूं भगवदीय कहेजाय हैं, इतने जिनकूं प्रभुसेवाव्यतिरिक्त ओर स्वार्थ नहिं हे, जिनकूं प्रभुके लिये हि देहादिककी अपेक्षा हे परंतु देहादिकके लिये प्रभुकी सेवा करिवेकी नहिं हे एसे भगवदीय रत्नाकरके तुल्य हैं विनको भाव रत्नाकरके जलकी तुल्य समजनी. इनभगवदीयनकी गणना मूलश्लोकमें करी हे तामे मुख्य शेष हे सो भगवद्-गुणगानमें तत्पर हैं, शय्यादिभावसों प्रभुकी सेवा करे हैं सो विभूतिरूप हैं सो “सर्पनसैं अनंत मेरोरूप हे” एसे गीताजीमें आपने श्रीमुखसं विभूतिरूप गिन्ये हैं, व्यासजी कलावतार हैं सदा भगवद्धर्मके निरूपणमें तत्पर हैं, अग्नि-श्रीकृष्णके मुखारविंदरूप आप श्रीमहाप्रभुजी जो सर्वांशसं श्रीकृष्णरूपही हैं, हनुमान् श्रीरामचंद्रजीके गुणगानमें तत्पर हैं, जडभरतजी अंतःकरणमें भावपूर्ण होयवेसं बहारसं जडजैसे दीखे हैं, नारदजी सदा पुरुषोत्तमगुणगानमेंहि एकतान हैं, पराशरके शिष्य मैत्रेय भगवद्गुणके वक्ता हैं. मूलमें आदिपद

हे तासूं उद्धवादिक्को भावहू समुद्रजलतुल्य समजनो. जेसैं समुद्रको जल चंद्रकूं देखिकें तरंगित होय हे तेसैं पूर्व कछे भगवदीय हू प्रभुके मुखचंद्रके दर्शनमें प्रवृद्धभाववारे होयकें सेवाव्यतिरिक्त ओरकूं तुच्छ गिने हे सो श्रीकपिलदेवजीने “ सालोक्त्र, साष्टीं सामीप्य, सारूप्य और एकत्वकूंहू मेरे भक्त नहिं चाहतहे ” एसैं आज्ञा करी हे.

स्वरूपभेद ओर ज्ञानभेदकरिकें विलक्षण पसे पूर्ण

भाववारेनको निरूपण अब करत हैं.

**श्लोकः—लोकवेदगुणैर्मिश्रभावेनैके हरेर्गुणान् ॥१५॥**

**वर्णयन्ति समुद्रास्ते क्षाराद्याः षट् प्रकीर्तिताः ॥**

टीका—लोकमिश्रभावसूं, वेदमिश्रभावसूं ओर गुणमिश्रभावसूं कितनेक प्रभुके गुण वर्णन करेहैं वे क्षारादिषट्समुद्रतुल्य हैं. इतने रामकृष्णादि मनुष्यहैं परंतु विनमें बलादि बहोतहे तासूं मनुष्यसूं अधिक मान्येजांयहे एसैं जानिकें वर्णनकरिवेधारनको भाव क्षारसमुद्रके जलकी तुल्य समजनो जेसैं क्षारजल तृषानिवृत्ति ओर तृप्तियप्रभृति सुखदानमें अनुपयोगिहे तेसैं पूर्वोक्तको भाव हू समजनो, कितनेक “सोहाथवारे श्रीकृष्णने वराहरूप धरिकें तुमारो उद्धार कियो हे” इत्यादि—वाक्यार्थके भावकरिकें जगत्कर्त्ता हि विविध शरीरनमें प्रवेश करिकें कार्य करे हैं ओर कार्यार्थ धारणकिये शरीरकूं छोडदेयं हे एसैं जानिके हरिके गुणको गान करे हे

उन वाको भाव दधिमंडोदतुल्य हे इतने दधिमंड साररहित होय वेसूं पोषण करिवेमें निरूपयोगी हे तेसैं वाको भाव समझनो, मायाके गुणकरिकें हि प्रभुमें कर्त्तापनो हे ताविना नहिं हे तासूं मायाके गुणकरिकेंहि हरि सत्र करे हैं एसैं जानिकें जो भगवद्गुणको वर्णन करे हे ताको भाव सुरोदके जलतुल्य हे जैसे सुराकों स्वरूपविस्मारकपनो और दोषउत्पन्नकरिवेपनो हे तेसैं प्रकृतभाववारेनको भाव समझनो, प्रभु सत्रके ईश्वर ओर सर्वकार्यकरिवेमें समर्थ हैं एसैं जानिकें जो प्रभुको वर्णन करे हे ताको भाव क्षीरोदके जलजैसे हे, दूधके गुणसरिखे वाभाववारेके गुण हे, प्रभु महाबलवत्तर हैं तासूं आपने भक्तनकूं ह बलवारे बनाये हे एसैं जानिकें वर्णनकरिवेवारेनको भाव घृतोदके जलकी तुल्य हे; इतने विनभाववारेनको भाव घृतके समान गुणवारो हे प्रभु लक्ष्मीजीके पति हैं सेवकनकूं भोगमोक्षदेवेवारे हैं एसे जानिकें वर्णनकरिवेवारेनको भाव इक्षुरसोदत्समुद्रके जलकी तुल्य गुणवारो हे और शरण आये जीव चाहे जैसे होय तो हू श्रीकृष्ण विनको उद्धार करें हि हैं परंतु शरणागतकूं छोडिदेत नहिं हैं एसैं जानिकें वर्णनकरिवेवारेनको भाव शुद्धोदके जलकी तुल्य गुणवारो जाननो, भगवान् चिद्रूप विज्ञानपूर्ण सर्वसम ओर मोक्षके लिये सेवनकरिवेयोग्य हैं. एसैं जानिके वर्णनकरिवेवारेनको भाव दधिमंडोदतुल्य हे ओर भगवान् वैराग्यपूर्ण होयवेसूं कोईकी पाससूं कछु ग्रहण

नहिं करे हैं ओर इच्छा हू नांहि करे हैं मनुष्य पवित्र होयवेके लिंगे भगवानकूं भजे एसो विधि होयवेसूं लोक स्वार्थके लिये भजन, स्तुति ओर अर्णणप्रभृति करे हे एसें जानिके वर्णन करिवेवारेनको भाव क्षारोदके जलकी तुल्य अग्राह्यजेसो हे.

अब पूर्णभगवदीयनमेंहू उत्तम हैं तिनकी गणनाकरत हैं.

**श्लोकः—गुणातीततया शुद्धान् सच्चिदानन्द-**

**रूपिणः ॥ १६ ॥**

**सर्वानिव गुणान् विष्णोर्वर्णयन्ति विचक्षणाः**

**तेऽमृतोदाः समाख्यातास्तद्वाक्पानं सुदुर्लभम् ॥१७॥**

टीका—गुणते पर तासूं हि सत्, चित् ओर आनंदरूप एसे प्रभुके सर्व गुण हैं एसें जानिके विचक्षण पुरुष भगवद् गुणवर्णन करिवेवारे हे सो अमृतके समुद्रतुल्य हे तिनके वाणीको पान ( श्रवण ) अत्यंत दुर्लभ हैं इतने ( “ ताकी स्तुतिकंरिवेवारे ” एसें वेदके, “ जासूं क्षरसूं पर ओर अक्षरसूं उत्तम हूं ” एसें स्मृतिके, “ मेरेमें रह्यो सब निर्गुण ” एसें श्रीभागवतके ओर “ लोककीं नाई लीला मोक्षरूप हे ” एसे व्याससूत्रके वाक्यसूं ) श्रुति, स्मृति, पुराण ओर न्यायकरिके प्रभुके नाम, रूप ओर धर्मनको निर्गुणपनेको निश्चय करिके, भगवन्नाम सच्चिदानंदात्मक हे, भगवान् अक्षरातीत पुरुषोत्तम हैं, ताकी सब सामग्री निर्गुण हे, ताकी लीला हू फलरूपा

हे, स्मरणकरिवेसूं मोक्षदेवेवारी हे, एसें निरूपण करिकें प्रभुके सर्व गुण नवनीतचौर्य, वेणुनाद, गोवर्द्धनोद्धारणादिकनकूं हू-गुणातीतपनेसूं जानिकें ( मायासंबंधरहित तासूं सच्चिदानंदरूप जानिकें ) वर्णनकरिवेवारेनको भाव अमृतके समुद्रतुल्य हे वे भगवत्कृतचौर्यादिकनके कारणकूं जानिवेवारे हैं तासूं मूलमें विचक्षण कह्ये हैं तिनको वाक्यान इतने वाणिको मनमें धारण करनोत्तथा ताकी पाससूं उपदेश ग्रहण करनो. ओर जो उपदेश दे वाको आदरपूर्वक श्रवण करनो सो बहोत दुर्लभ हे; तासूं हि नामके स्वरूप जानिवेके लिये एसे गुरून ( उपदेशकनके ) के शरण जायवेकी वेदादिकमें आज्ञा करीहे. ताविना स्वतः प्राप्तकिये एसे ज्ञानकर्मादिककूं व्यर्थ कह्यो हे. गुरूपसत्तिपूर्वक भगवद्उपदेश ग्रहणकरिकें प्रभुमें पुरुषोत्तमपनेको ज्ञान होय तत्रहि सर्वज्ञता होय सो वात श्रीगीताजोमें आपनेहि कहीहे “ जो विचक्षण मोकूं पुरुषोत्तम जाने हे सो सब जानेवेवारो सर्वभावकरिकें मेरी सेवा करेहे ” ताप्रमाण पूर्वोक्त-भक्तहू प्रभुको भजवेवारो होय हे. ॥ १७ ॥

अब वे विचक्षण भक्तनकी वाणीकी महिमाकूं-कहत हैं.

श्लोकः—तादृशानां क्वचिद्वाक्यं दूतानामिव वर्णितम् ।  
अजामिलाकर्णनवत् बिन्दुपानं प्रकीर्तितम् ॥१८॥  
रागाज्ञानादिभावानां सर्वथा नाशनं यदा ।

तदा लेहनमित्युक्तं स्वानन्दोद्गमकारणम् ॥१९॥

टीका-एसे भगवदीयनकी प्रसन्नतायुक्त जो आज्ञा हे सो दूतकी बरोबर कहीहे इनके वाक्यको भ्रवण अमृतबिंदुकी बरोबर हे, जैसे अजामिलने भगवद्दूतनके वाक्यको श्रवण कियो हतो ताकीसीनाई वा वाक्य अमृतबिंदुके पानकी तुल्य हे ओर राग ( विषयादिकमें प्रीति ) ओर अज्ञानादिकभावको जत्र नाश होय तत्र स्वरूपानंदकूं प्रकट करेहे ताको नाम लेहन कह्यो हे; इतने पूर्वश्लोकमें कहे पूर्ण-भगवदीय कृपाकरिकें विनाआग्रहं कहत हैं सो वाक्य प्रभुकोहि समझनो. जैसे राजा चाकरद्वारा हुकम करे हे तेसैं प्रभुहू भगवदीयद्वारा उपदेश करतहैं, दूत जैसे राजाके गुणवर्णमें शंकित नहि होयहैं तेसैं भगवदीयनकूं हू प्रभुके गुणवर्णनमें शंका नहि होयहे; तासूं प्रभुकी कृपा ओर भविष्यमें फल मिलवेको योग होय तबहि एसे भगवदीयनको समागम होयहे; तासूं हि तिनके मुखसूं उपदेश लेनो, श्लोकमात्रको श्रवण करनो, शिक्षा सुननी सो अमृतबिंदुके पानरूप ओर अजामिलके श्रवणकी तुल्य हे. जैसे अजामिलने दूतनके मुखसूं भगवद्गर्भके बलको श्रवण कियो तापीछे वाकूं नरकको संबंध छुटिकें भगवद्गर्भके श्रवणतें उत्तमफलकी प्राप्ति भई तेसैं बिंदुपानकरिवेचारेनकूंहू उत्तम-फलकी प्राप्ति होयवेको सूचन यादृष्टान्तसूं होय हे. याबिंदुपानसूं अधिक रसास्वाद हे सो कहतहैं जो



राग ( गृहादिमें स्नेह ) ओर अज्ञान ( भगवत्स्वरूपकूं नहि पहेचाननो अथवा अविद्या ) सो जिनके आदिहे एसे जो शोकमोहादिक इनसबनको जब नाश होयजाय इतनें जब रागादिककी वासनाहू न रहे, तब रसास्वाद होयहे; इननें पूर्वकह्यो बिंदुपान जब रागादिककी अस्फूर्तिसूं कियोजाय ताकूं लेहन ( चाटनो ) कह्यो हे. सो जीवकूं भगवदानंदको अनुभव करायवेवागेहे, जब श्रवणादिकमें व्यसन होयेजाय तब जो कथारसको आस्वाद अनुभवमें आवेहे सो अमृतरूप होय हे. तब हि जीवमें जो आनंदको तिरोभाव भयो हे ताको आविर्भाव होय हे ओर प्रभुमें क्रमसूं प्रेम, आसक्ति ओर व्यसन होयवेसूं प्रपंचकी विस्मृति होयकें जीव कृतकृत्य होयहे सो बात श्रीभागवत ११ स्कंधमें “भक्तिलब्धवतः” याश्लोकसूं ओर श्रीमहाप्रभुजीने स्वकृत-भक्तिवर्द्धिनीनामक ग्रंथमें “स्नेहा-द्रागविनाशः” याश्लोकसूं कहीहे ताप्रमाण जीवकूं भक्तिको पूर्णफल तब (व्यसन होयवेसूं हि) प्राप्त होय हे. ॥१८॥१९॥

अब बीसमे भाषको निरूपण करत हैं.

**श्लोकः—उद्धृतोदकवत् सर्वे पतितोदकवत्तथा ।**

**उक्तातिरिक्तवाक्यानि फलं चापि तथात्मनः ॥**

टीकाः—पूर्वकह्ये जो अमृतोदतुल्य-भाववारे हैं विनकूं छोडिकें ओरभाववारेनके भाव विनकी अप्रत्यक्षदशामें उद्धृतो-दककी तुल्य फलकूं सिद्धकरेहे ओर विनभाववारेनके वाक्य

उपरसंगिरे-जलकी बरोबर फलकूं सिद्ध करिवेबारे हैं, जैसे कूपप्रभृतिनमेंसूं ग्रहनकियो जल जास्थानसूं आयो होय वास्थानके गुणके तुल्यगुणवारो होयहे. अमृत तो सर्वदा एकरस हे तासूं वाकू छोडिकें ओरभाववारेनकी अप्रत्यक्षदशामें वे भाव उद्धृतोदक (कूवादिकनमेंसूं ल्यायोभयो जल) तुल्य गुणवारो होयहे एसें कह्योहे. ॥२०॥

अब ग्रंथकी समाप्ति करे हैं.

श्लोकः—इति जीवेन्द्रियगता नानाभाव गता भुवि ।  
रूपतः फलतश्चैव गुणा विष्णोर्निरूपिताः ॥२०॥

टीका—याप्रकार जीव ओर इंद्रियमें आयके पृथिवीमें अनेकविधभावरूप भये एसे विष्णु (भगवान) के गुण, स्वरूप ओर फलसूं निरूपणकिये हैं. एसें श्रीमहाप्रभुजी आज्ञा करेहैं. सो जलके भेद श्रुतिमें जो कहे हैं ताप्रमाण गुणके भेदको याग्रंथमें वर्णन होयवेसूं याको जलभेद नाम हे.

इति श्रीमद्ब्रह्मभाचार्यजीधिरचित-जलभेदग्रंथकी  
गोस्वामिश्रीनृसिंहलालजीमहाराजधिरचित  
ब्रजभाषामें संक्षिप्त भाषार्थटीका समाप्त भई.



श्रीकृष्णाय नमः श्रीगोपीजनवल्लभाय नमः ॥

## अथ पञ्चपद्यनकी ब्रजभाषामें सक्षिप्त-टीका ।

जलभेदमें २० प्रकारके भिन्नभक्त ओर विनके भाव जलको दृष्टांत देयकें निरूपित किये हे सो जेसैं जल शुष्क-वस्तुकूं आर्द्र करे हे तेसैं उपरलिख्ये-भक्तनके भावहू श्रवण-करिवेवारे मनुष्यनके हृदयकूं आर्द्र करे हे एसैं जतायवेके लिये जलको दृष्टांत देयकें निरूपण कियो हे. शास्त्रमें जो अष्टादश विद्या लिखी हे ताकरिकें प्रतिपादित. एसे भगवानके गुण हू अठारेप्रकारके हैं तासूं वे भक्त हू अष्टादशविद्याप्रतिपादितगुणमें तत्पर होयवेसूं केवल मर्यादामार्गीय अष्टादशप्रकारके हैं ओर पुष्टिमार्गीय शुद्ध तथा मिश्र एसे भेदसूं दोप्रकारके हैं इतने अष्टादशप्रकारके मर्यादामार्गीय भक्त ओर दोइप्रकारके पुष्टि-मार्गीय शुद्ध तथा मिलिकें भक्तनके २० प्रकार भये. अथवा सात्विकादिक तीन गुण हे इनके मिश्रीभावसूं ९ भेद होय हैं ओर १ निर्गुण मिलिकें १० भेद भये सो मर्यादा ओर पुष्टिके दशदशभेद मिलिकें २० प्रकारके भक्त भये तिनके भावहू विनमेहि रखेहे तासूं वीशप्रकारसूं जलभेदमें निरूपित किये हैं. अब जलभेदमे कछे एसे वीशप्रकारके भक्तनके वाक्यद्वारा विनके भावकूं ग्रहणकरवेवारे श्रोतानको निरूपण करत हैं सो

पुष्टि तथा मर्यादाके भेदसं दोषप्रकारके हे तामे पुष्टिमार्गीय श्रोता उत्तम हे सो एकप्रकारके हे ओर मर्यादामार्गीय मध्यम, अधम ओर उत्तम एसे भेदसं तीनप्रकारके हैं एसें चारप्रकारके भक्तनको निरूपण करिवेके लिये प्रथम मुख्यपनेसं पुष्टि-मार्गीयश्रोतानको निरूपम करत हैं.

**श्लोकः—श्रीकृष्णरसविक्षिप्तमानसारतिवर्जिताः ।**

**अनिर्वृत्ता लोकवेदे ते मुख्याः श्रवणोत्सुकाः ॥१॥**

टीका—श्रीकृष्णको जो भजनानंदरूप रस ताकरिकें जिनको मन विक्षिप्त होयगयो हे ओर ताकरिकें भगवानके चरित्र सुनिवेमें अप्रीतिसं वर्जित इतने प्रीतिवारे ओर लोक तथा वेदमें जिनकूं आनंद प्राप्त नहिं होय हैं एसे जो श्रवणमें उत्साहवारे श्रोताजन हैं सो मुख्य हैं; इतने भगवानके चरित्र नहिसुनिवे-रूप जो अप्रीति हे सो मर्यादा ओर पुष्टि एसें मार्गके भेदसं दोषप्रकारसं निवृत्त होय हे; तामें मर्यादामार्गमें जाकूं श्रवण-करिवेकी इच्छा होय ओर श्रद्धायुक्त होय ताकूं महत्पुरुषकी सेवाकरिकें पुण्यतीर्थके सेवनसं रुचि उत्पन्न होय हैं एसें प्रथम-स्कंधमें कह्यो हैं तारीतिसं अप्रीति निवृत्त होय हे ओर पुष्टिमार्गमें तो रसके स्वभावसं हि भ्रमरगीतमें ब्रजभक्तनने कह्यो हे जो “ विनकी कथाको अर्थ दुस्त्यज हैं ” ताहिप्रमाण स्वभावसं हि भगवत्कथामें रस उत्पन्न होय हे तासं जो

भगवत्कथामें अतिकरिक्कें वर्जित कछे हैं वे पुष्टिमार्गीय हैं  
 एसें समजवेकेलिये ये लक्षम कछो हे एसें पुष्टिमार्गीय-  
 श्रोतानकूं भगवच्चरित्रके श्रवणमें अप्रीति नहि हे एसो निरूपण  
 करिवेके लिये लोकवेदमें इनकूं आनंद नहि होय हे सो कहत  
 हैं जो प्रवृत्तिमार्गको बोधकरिवेवारे अथवा भगवानविना  
 ओरको भजन बतायवेवारे लोक ओर वेदमें स्वस्थ नहि हे सो  
 भगवानने उद्धवजीकूं व्रजमें संदेश लेयके पठायें तब कछो हे  
 जो “ जिनने लोकके धर्म छोडे हैं उनको पोषण में करूं हूं ”  
 तासूं यहां लोकवेदमें अनिर्वृत एसें समस्तपद कछो हे सो  
 त्यागनेमें दोग्यनकी तुल्यता जतायवेके लिये हे तासूं हि  
 पञ्चाध्यायीमें श्रीगोपोजनने कछो हे जो “ दुःखकूं देयवेवारे  
 पतिसुतादिकनकरिक्के कहा हे ? ” और भ्रमरगीतमें कछो हे  
 जो “ दुःखके समुद्रमें मग्नभये-व्रजको उद्धार करो. ” इतने  
 दुःखसागरमें निमग्न व्रज हे वाको उद्धार आपहि करें परंतु  
 आपने उद्धृत किये एसे वेदकरिक्के हम उद्धारकरिवेयोग्य नहि  
 हे एसे अभिप्रायसूं प्रार्थना करी हे. एसें पुष्टिमार्गके प्रकारकरिक्के  
 अप्रीतिके अभावपूर्वक प्रीतिपुक्त हैं ते मुख्य हैं. अथवा मुख्य-  
 शब्दको दूसरो अभिप्राय कहत हैं जो मुखरूप जो पुष्टिमार्गीय  
 भक्ति हे तामें वे भये हैं इतने भक्तिरूप जो भगवानको सुखा-  
 रविंद हे तिनमें संलग्न एपे अलकावलीपनेसूं कदिवेमें आवते  
 एसे पुष्टिमार्गीय जीव केवल भक्तिमात्रको आश्रय करिक्के रहत

हं ते मुख्य हैं. तहां संदेह होय जो मूलमें तो लोकवेदमें अनिर्वृत हैं एसें कह्यो ताकरिकें रहित हैं श्रवणादिकमें प्रीतियुक्त हैं एसो अर्थ तो गौणरीतिसूं आवे हे तासूं मुख्यश्रोतापनो कैसें ? एसी शंकाकरिकें कहत हैं जो भगवानमें प्रीतिवारे हैं तोहू वियोगमें श्रवणमें हि उत्साहवारे हैं; क्यों जो परोक्षमें विनको संदेशलायवेवारेमें प्रीति दीखवेमें आवत हे तासूं श्रवणमें उत्साह स्पष्ट जान्योजाय हे तासूं हि भ्रमरगीतके अध्यायमें कह्यो हे जो “उद्धवजीकूं देखिकें ये प्रभुके चरणार्थिके आश्रयवारे हे एसें जानिकें सबआडिसूं मिलकें विनकूं घेरलिये;” इतनें श्रोताजन आप भगवानके रसमें मग्न हैं. भगवानके रससूं विनको मन विशिप्त हे. भगवानके चरित्र सुनिवेमे सहज भावयुक्त हैं, भगवानके विप्रयोगकी आर्तिकरियुक्त हैं ओर भगवानकी वार्त्ताश्रवणमात्रमें हि एकबुद्धिवारे हैं सो पुष्टिमार्गीय श्रोता हैं ॥ १ ॥

एसें पुष्टिमार्गीय भक्तनको निरूपण करिकें मर्यादा मर्गीयनको निरूपण करत हे' तामें उत्तम बहोत बुल्लभ हे तासूं मध्यका निरूपण करत हे'.

**श्लोकः—**विक्लिन्नमनसो ये तु भगवत्स्मृतिविह्वलाः ।

अथैकनिष्ठास्ते चापि मध्यमाः श्रवणोत्सुकाः ॥२॥

टीका—विशेषकरिकें जिनको आर्द्र मन हे, भगवानकी स्मृतिकरिकें विह्वल हैं ओर अर्थमें मुख्यनिष्ठा हे एसे जो

श्रोताजन हैं सो मध्यम कहेजाय हे, इतने भगवानमें परायण होयवेसूं जिनको मन कौमल होय सो आर्द्र कहेजाय हे. जैसे आर्द्र (भीज्यो) वस्त्र होय सो सूकेमे धरिवेसूं सुकेकूं हू आर्द्र करत हैं तेसैं जिनको मन अपने संबंधवारे रुक्षकूं हू आर्द्र करत हे सो शुकादिजेसे समजने मूलमें “ये” कहे हे तासूं सर्वत्र प्रसिद्ध एसे मर्यादामार्गीय कहे हैं ओर “तु” शब्दसूं पुष्टि-मार्गीयनको व्यावर्त्तन किया हे. विक्विलन्नमनपनोतो पुष्टि-मार्गीयनमें हू होय के तासूं पुष्टिमार्गीयनके धर्मसूं भिन्न धर्म जो हे सो कहत हैं जो भगवानकी स्मृतिकरिकें विहल हैं; इतने श्रवणके समयमें ऐश्वर्यादिषड्गुणसंपूर्ण एसे भगवानकी स्मृति जो होय हे ताकरिकें विहल हैं सर्वदा विहल नहि हैं किंतु जब स्मृति होय तत्र हि विहल होय हैं. उपर लिखे एसे दोयधर्मकरिकें उत्तमपनो विनमें भाषत हे तासूं स्पष्टरीतिसूं मध्यमपनोवतायवेवारो धर्म कहत हैं जो अर्थमें हि मुख्य निष्ठावारे हैं; इतने मोक्षादि पुरुषार्थ अथवा अपनी कृतार्थता होय ये हि मुख्य विनकूं प्रयोजन हे वामे निष्ठावारे हैं मुख्य-पनेसूं चरित्रमें निष्ठावारे नहि हैं; अर्थात् फलकी अपेक्षावारे हैं तासूं मध्यम गिन्ये हैं. एसे श्रोताहि होय नहि क्यों जो श्रोतानको अर्थमें तात्पर्य होय नहि एसी आशंका होय तहां कहत हैं जो श्रवणसूं साध्य एसो जो फल तामें इनको तात्पर्य हे तोहू भगवानके चरित्रमें उत्कंठावारे हैं तासूं श्रोतापनेसूं

मध्यमपनो हे. जेसँ परीक्षितादिकनकूँ दूसरे करते पूणवैराग्य होयवेसँ उत्तमपनो हे तथापि उपाधिसहित प्रवृत्ति होयवेसँ विहुर तथा उद्धवादिककी अपेक्षासँ मध्यमपनो हे; तासँ हि गंगाजीमें परीक्षितने प्रायोपवेश कियो सो तीर्थके कारणसँ कियो हे, जो बाके मनमें तीर्थकी अपेक्षा नहिं हती तो भगवानको चरित्र दूसरे साधनकी अपेक्षा नहिं राखिके जहां बैठके श्रवणकरे तहां फलकूँ सिद्धकरिवेवारो हे; क्यों जो भगवानकूँ जेसँ तीर्थकी अपेक्षा नहिं हे तेसँ उनके चरित्रकूँ हू नहिं हे ओर विदुरजी तो चरित्र सुनिवेके लिये जहां मैत्रेयजी हते वहां गये हैं; इतने वक्ताके सन्निधान जायवेकी उद्देश हतो गंगाजीपें जायवेको उद्देश नहिं हतो; तासँ उत्तमपनो हे. परीक्षित ओर विदुरजीं दायनकूँ मर्यादापनो तो समान हे तथापि मर्यादामार्गमें जितनी शुद्धि होय तितनी फलमें विशेषता होय; तासँ विदुरजीमें तीर्थाटन ओर सत्संगकरिके श्रवणको अधिकार सिद्ध भयो हे ओर परीक्षितमें तो स्पष्ट हि हे तासँ हि सिद्धांतमुक्तावलीमें मर्यादामार्गीनकूँ गंगाजीके तटपें श्री भागवतमें तत्पर होयके रहीवेकी आज्ञा करी हे. ॥ २ ॥

पसँ मध्यम श्रोताको निरूपणकरिके अधम श्रोतानको निरूपण भिन्नपनेसँ करिवेको प्रयोजन नहिं हे तासँ उत्तमके निरूपणके मध्यमें हि कोउधर्मकरिके अधमनको निरूपण करिवेके लिये उत्तमनको हि



प्रथम निरूपण करत हे.

श्लोकः—निःसंदिग्धं कृष्णतत्त्वं सर्वभावेन ये विदुः ।  
 तत्त्वावेशात्तु विकला निरोधाद्वा न चान्यथा ॥३॥  
 पूर्णभावेन पूर्णार्थाः कदाचिन्न तु सर्वदा ।  
 अन्यासक्तास्तु ये केचिदधमाः परिकीर्तिताः ॥४॥

टीका—संदेहरहित जो श्रीकृष्णरूप तत्व ताकूं सर्वभाव-  
 करिकें जो जानिवेवारे हैं वे आवेशसूं अथवा निरोधसूं हि  
 विमल होय हैं ओरप्रकारसूं नहिं होय हैं ओर कोउखतपें हि  
 पूर्णभावकरिकें पूर्णअर्थवारे होय परंतु सर्वदा न होय ओर  
 अन्यमें आसक्तिवारे हैं वे अधम कहे हैं, इतनें सदानंद-  
 श्रीकृष्णको तत्त्व जो वास्तवरूप रसात्मककरपादादियुक्त  
 साकार ओर मायाकूं दूरकरिकें प्रकट भयो एसो जो स्वरूप  
 ताकूं शास्त्र ओर अनुभवकरिकें संदेहरहित होयकें जेसो हे  
 तेसो जानवेवारे श्रवणके उत्तमाधिकारी हैं. यहां शंका होय  
 जो एसे दृढज्ञानवारेनकूं श्रवण करिवेकी अपेक्षा न रहे तासूं  
 उनकूं श्रोतापनो केसें ? एसी शंकाके निराकरणमें कहेहैं जो  
 वे ज्ञानवारे हू जब ज्ञानकरिकें हृदयमें भगवदावेश होय तब  
 विकल होयजायहैं तब हम जानिवेवारे हैं एसी स्फूर्ति विनकूं  
 होय नहिं हे तब श्रवण करिवेकी उनकूं योग्यता सिद्ध होय  
 हे, तासूं हि श्रीभागवतके प्रथमस्कंधमें कह्योहे जो “ सतत

भगवद्भक्त जिनकूं भियहें ओर प्रभुके गुणननें जिनकी मतिको आकर्षण कियोहे एसे श्रीशुकदेवजी श्रीभागवतरूप आख्यान पढे ” एसें पूर्णज्ञानवारेनकूं श्रवणकी योग्यता कहीहे. मूलमें तु शब्द कही हे तासूं रसावेशवारेनकूं उपरकहोप्रमाण मति-विक्षेप न होय एसें कही हे; क्योँ जो उनकूं तो निरंतर रसावेश रहिवेसूं ज्ञान कबहू न होय हे; क्योँ जो ज्ञान हे सो रसके उदयको प्रतिबंधकहे तासूं हि सर्वव्यापक ओर अपने हृदयमें बिराजवेवारे-प्रभूनको शोध करिवेकी प्रवृत्ति होयहे सोहि बात सिद्धज्ञानवारे-श्रीशुकदेवजीनें श्रीभागवतदशम-स्कंधमे फलप्रकरणमें कही हे; तासूं हि श्रीटिप्पणीजीमें श्रीगुसाँइजीनें आज्ञा करी हे जो बहिर्मुखनकूं आकाशकीसीनाई सर्वत्र व्याप्त हैं एसो प्रभुको ज्ञान होय हे ओर भक्तनकूं तो बाहिर प्रकटप्रभुको हि आनंद अपेक्षित हैं; तासूं एकादश-स्कंधमें श्रीभगवाननें आज्ञा करी हे जो “ ज्ञान, वैराग्य बहोतकरिकें भक्तके श्रेयःसाधक नहिंहे ” यहां शंका होय जो भगवदावेशमें तो भगवानकीनाई सर्वज्ञपनो होनो योग्य हे तब उनकूं विकलता केसें होय ? तासूं श्रवणादिकमें प्रवृत्ति होय हैं एसी शंका करिकें कहे हैं जो उनकूं प्रभुके गुणकरिकें निरोध होय हे. प्रपंचके विस्मरणपूर्वक प्रभुमें जो आसक्ति वाकूं निरोध कहत हैं सो केवल गुणश्रवणसूं हि होय हैं तासूं निरोधकरिकें वैकल्य होयजाय हे ओररीतिसूं नहिं होय हे.

एसें श्रोतापनेको उपपादन करिकें उनकूं कदाचित् मोक्षादिक-  
 अर्थमें निष्ठा होय तब अर्थमें निष्ठा होय सो तो मध्यममें  
 गिन्येजाय तासूं मध्यमपनेकी निवृत्तिके लिये अब कहत हैं  
 जो सर्वत्र पूर्ण एगो जो भगवद्भाव (भगवदावेश ओर निरोधसं  
 भयो भगवानको ज्ञान) इतने सर्वत्र भगवानकी स्फूर्ति  
 ताकरिकें हि जाके सब अर्थ समाप्त भये हैं तासूं ओर स्वार्थ  
 उनकूं नहिं हे; तासूं हि (स्वार्थनिष्ठाके अभावसूं हि) उनकों  
 मध्यमपनो नहिं हे किं तु उत्तमपनो हि हैं; क्यों जो एक  
 भगवानमें हि निष्ठावारे हैं. जब एसें भयो तो पुष्टिमार्गीयनसूं  
 वामें जूदाई न भई क्यों जो पुष्टिमार्गीय जेसें प्रभुमें हि  
 निष्ठावारे हैं एसें वे हू हैं एसी शंका होय तहां कहत हैं  
 जो उनकों एगो भाव सर्वदा नहिं रहे हे किंतु काउत्रखत  
 रहेहें; इतनें जब भगवद्गुणको श्रवण करे तब हि निरोध  
 होयके प्रभुनिष्ठ होय जाय हैं ओर पुष्टिमार्गीय तो सदाहि  
 भगवन्निष्ठ होयवेसूं सबनसूं न्यारे हि हैं; तासूं हि शुका-  
 दिकनकूं सर्वदा लीलानुसंधान नहिं हे जो होय तो “ मथुरा-  
 जीसूं व्रजप्रति गये ” एसें तटस्थ रहिकें कथन असंगत होय.  
 पुष्टिमार्गीयनके भावको सार्धदिकपनो तो एकादशस्कंधमें  
 प्रभुने हि कह्यो हे जो “ मेरे विषे हि जिनकी अनुषंगकरिकें  
 बुद्धि बंधाई हे एसे श्रीगोपीजननें अपनो आत्मा, यह जगत्  
 ओर परलोग उनसबनकूं न जाने, समाधिमें मुनिजन ओर

समुद्रके जलमें जैसे नदीयें अपना नामरूप छोड़िकें प्रवेश करे हैं तैसें ” यहां नदीके दृष्टान्तकरिकें समुद्रमें प्रवेश करिवेवारी नदी पूर्वरूपकूं कभी प्राप्त नहीं होय हे ओर स्वरूपसूं रहे हे तो हू भेदसू कथन नहीं होय हैं; तासूं हि पुष्टिमार्गीयनके विषे भगवदितर स्फूर्तिके अभाववारो भाव, भगवदीयपनो आर भगवानमें ओतप्रोत होयकें रहनो हे ओर मर्यादामार्गमें तो श्रवणादिकसूं भगवदीयपनो हे तासूं पुष्टिमार्गीय ओर मर्यादामार्गीयमें बहोत भेद हे; तासूं विशेष कहा कहनो ? एसें बहिः संवेदनके अभावकी दशामें मर्यादामार्गीय-उत्तमनको निरूपण करिकें बहिःसंवेदनापन्नको निरूपण करिवेकेलिये बहिःसंवेदनके प्रसंगसूं अधमनको निरूपण करत हैं जो कितनेक अन्यासक्त इतनें ब्राह्मणत्वक्षत्रियत्वादिकरिकें उत्कर्षापकर्षयुक्त ओर गृहादिकमें आसक्त इतनें वृत्तिसंपादनके लिये अथवा लोकनकूं सुनायवेके लिये श्रवणकरिवेवारे जलभेदमें “ क्षेत्र-प्रविष्टास्तेचापिसंसारोत्पत्तिहेतवः ” याश्लोकमें कहे- भाववारे अधम कहे हैं. मूलमें तु शब्द कहेवेको यह अभिप्राय हे जो प्रभुके सेवाकरिवेकेलियें जो घरमें आसक्त होय सो अधम नहीं हे. उनकोंतो पुष्टिमार्गीय-मोक्षरूपपनोकरिकें उत्तमपनो हे. ॥ ३ ॥ ४ ॥

एसें मध्यमें अधमनको निरूपणकरिकें अब बहिःसंवेदनद-शाकेविषेहू जिनको अन्यत्र मन नहीं हे एसे उत्तमनको

निरूपण करत हैं.

**श्लोकः—अनन्यमनसो मर्त्या उत्तमाः श्रवणादिषु ।  
देशकालद्रव्यकर्तृमंत्रकर्मप्रकारतः ॥ ५ ॥**

इति श्रीबल्लभाचार्यविरचितानि पञ्चपद्यानि समाप्तानि.

टीका—देश, काल, द्रव्य, कर्तृ ओर कर्मके प्रकारसूँ जो अनन्य मनवारे हैं सो श्रवणादिकमें उत्तमहैं; इतने सर्वत्र बहारके पदार्थनको ज्ञान होय तब हू प्रभुसिवाय अन्यत्र जिनको मन न होय वे अनन्य कहेजाय हैं. तहां शंका होय जो प्रभु-सिवाय अन्यत्र जिनको मन नहिं हे तिनकूं अंतःसंवेदनमें विशेष कहा ? एसी आशंका करिकेँ अनन्यचित्तपनेमें प्रकार-भेद कहत हैं जो देश, काल, द्रव्य, कर्ता, मंत्र ओर कर्म इतनेप्रकारसूँ अनन्यमनवारे चाहियेँ; इतने अंतःसंवेदनमें भगव-द्रूपसूँ हि देशादिकनकी स्फूर्ति होय हे देशादिकपनेसूँ नहिं होय हे; क्यों जो केवल भगवदाकार अंतःकरण भयो तब सर्वत्र आवरणको नाश होयजाय हे ओर बाहिरके पदार्थको ज्ञान होय तब तो ये देशादिक सब भगवद्रूप हे एसी स्फूर्ति होय हे तामें देशादिकनमें भावनामात्रकरिकेँ भगवद्बुद्धि होय हे; अर्थात् अंतःसंवेदनमें देशादिकनकी स्फूर्ति हि नहिं होय हे ओर बहिःसंवेदनमें देशादिकनकी स्फूर्तिके संग भगद्बुद्धि होय इतनो अंतःसंवेदनमें विशेष हैं. तहां शंका होय जो अंतः

संवेदनमें प्रभुपनेसं देशादिकनमें स्फूर्ति होय ओर बहिः संवे-  
दनमें देशादिकनकी स्फूर्तिमें भावनामात्रकी बुद्धि रहे इतनो  
तारतम्य क्यों रहे ? अंतःसंवेदन ओर बहिःसंवेदनमें अंतःक-  
रणको स्वरूप तो एक हि एसी शंकाकरिकें कहत हैं जो ये  
मर्त्य हैं तासूं अंतःसंवेदनमें भावनाकरिकें भगवद्रूप हि होय-  
जायवेसूं अन्यस्फूर्ति नहि रहे हे ओर बहिःसंवेदनमें तो मर्त्य-  
पनेसूं देशादिकनकी स्फूर्ति रहिवेसूं शास्त्रकरिकें उनमें भगव-  
द्बुद्धि रहे हे. एसे जो होय सो मर्यादामार्गमें ओर कीर्तन  
प्रभृतीनमें उत्तम हैं ॥ ५ ॥

इति श्रीमद्वल्लभाचार्यविरचित पञ्चपद्यनको  
गोस्वामिश्रीनृसिंहलालजीमहाराज-  
कृता ब्रजभाषाटीका समाप्ता.



श्रीकृष्णाय नमः श्रीगोजनबल्लभाय नमः ॥

# अथ श्रीसन्न्यासनिर्णयकी संक्षिप्त- भाषाटीकाको प्रारंभः।

अथ श्रीआचार्यचरण सन्न्यासनिर्णयग्रंथको  
प्रारंभ करत हैं.

श्लोकः—पश्चात्तापनिवृत्त्यर्थं परित्यागो विचार्यते ॥

टीका—पश्चात्तापकी निवृत्तिके लिये परित्यागको विचार कियोजाय है. यहां भक्तिमार्गीय जो परित्याग हे तासूं दूसरे सर्वपदार्थनको विचार करिकें त्याग करनो एसो विचार किये-विना परित्याग कियो होय तासूं जो पश्चात्ताप होय ताकी निवृत्तिके लिये भक्तिमार्गीय-परित्यागके विचारको प्रारंभ करत हैं एसें कोउ कहत हैं. दूसरे एसें कहत हैं जो कम-मार्गीयनकूं शृद्धपनो होय तो हू संसारसूं वैराग्य होयवेको संभव होय नहिं हे तासूं एसे-कर्ममार्गीयनके संगकरिकें कदाचित् भगवदीय हू एसे न होय ताके सुखरूप जाको उपाय हैं एसे-सन्न्यासके निरूपणकी प्रतिज्ञा हे. एसें कहिकें शरीर अशक्त होय तब पूर्वदशाको स्मरण करिकें वाके मनमें एसो विचार होय जो मेनें प्रथमतें हि भगवानके लिये क्यों

यत्न न कियो ? एसो जो भगवदीयनकूं ताप होय सो हि यहाँ ' पश्चात्ताप ' शब्दसूं कह्यो जाय हे, कितनेक एसें कहें हे जो भक्तिमार्गमें ओर ज्ञानमार्गमें साधनदशामें ओर सिद्धदशामें कर्तव्यपनेसूं परित्याग कह्यो हे तामें साधनदशामें पूर्व वैराग्य नहिं होयवेसूं आछी भांति परित्यागको संभव नहिं हे तासूं पापंडिपनेके प्रसंग करिकें पश्चात्तापके लिये हि यह परित्याग होय एसो तारतम्य नहिं जानते होय एसे भगवदीय हू प्रथम परित्याग करिकें पीछे तापयुक्त होय, तेसें एसे तप्तभगवदीयनकूं देखिकें श्रीआचार्यचरण पश्चात्तापकूं प्राप्त होय एसें दोउ प्रकारको पश्चात्ताप नहिं होयवेके लिये यह प्रतिज्ञा हे, कितनेक एसें कहत हैं जो निबंधमें आचार्यचरणननें त्रिदंड धारणकरिवेकी आज्ञा करी हे सो वांचिके पुष्टिमार्गीय जीव हू संन्यासाश्रमपनेसूं त्रिदंडको ग्रहण करिकें पश्चात्तापकूं प्राप्त होय ताकी निवृत्तिके लिये पुष्टिमार्गीय संन्यासके विचारको आरंभ करत हैं. कितनेक तो एसें कहत हैं जो श्रुतिप्रभृति-प्रमाणकरिकें सिद्ध एसे रसात्मक जो भगवान् ताको विरहात्मक-भावको जो अनुभव सो, सर्वात्मभावकरिकें शरणागति होय तब हि प्राप्त होय सो सर्वपरित्याग विना होय नहिं एसो त्यागको स्वरूप नहिं जानिवेवारे जो पुष्टिमार्गीय जीव हैं तिनकूं ज्ञानादिकमार्गनमें हू परित्याग कह्यो हे तासूं संदेह-युक्त होय इनकूं विनाविचारसूं परित्याग भयो होय सो



पश्चात्तापके लिये हि होय ताके अभावके लिये विचारको आरंभ हे एसे कहत हैं, ओर श्रीपुरुषोत्तमजी महाराजने तो एसो अभिप्राय कह्यो हे जो अंतःकरणप्रबोधमें जो पश्चात्ताप ओर परित्याग पदको लेख हे सो जा अभिप्रायसं हे सो हि अभिप्राय यहां लेनो चाहियें एसे अभिप्रायसं लिख्यो हे जो प्रभूनने देह ओर देशके परित्यागविषयक श्रीआचार्यचरणनकूं आज्ञा करी ताप्रमाण उपरदीखवेमें आवते-विचार-करिकें श्रीआचार्यचरणनने जब कयों नहिं तब आपने सेवकपनेको स्वीकार कियो हे तासं पश्चात्ताप भयो तब लोकत्यागविषयक तीसरी आज्ञा भई तासमय आप विचार करत हैं जो भगवान् मेरी उपर प्रसन्न हैं किंवा अप्रसन्न हैं ? जो अप्रसन्न होय तो मेरी उपेक्षा हि करें परंतु आज्ञा नहिं करें ओर यहां तो तीसरी आज्ञा भई तासं प्रसन्न हैं एसो तो निश्चय होय हे परंतु प्रथम दोय आज्ञाको उल्लंघन कियेसं हू प्रसन्न रहिवेको कहा कारण होयगो ? एसो विचार करिवे लगे तब श्रीभागवतकी सूक्ष्म-टीकाकी निवृत्ति भई तासं दानरूप-देशत्याग ओर माध्वभट्ट-काश्मीरीकी देहनिवृत्तिसं वृद्धिरूप-देहत्याग प्रभूननेहि करवायो हे तासं प्रथमकी दोउ आज्ञा प्रभूननेहि सिद्ध करी हे. तेसें तीसरी आज्ञाको अभिप्रायहू जानिवेमें नहिं आवत हे एसो निश्चयकरिकें यद्यपि दोय आज्ञा सिद्धभई हे तथापि प्रभूनने सिद्ध करी हे कछु आपने नहिं करी तासं जो पश्चात्ताप भयो

हे ताकी निवृत्ति कैसे होय ? एसो विचार करिके तीसरी आज्ञा कहा विषयकी हे ? एसे विचारसं हि प्रथमकी दोय आज्ञा नहिं करिवेको पश्चात्ताप भगवान् निवृत्तकरेंगे एसो निश्चय करिके अपनी अवस्थाके सूचनपूर्वक परित्यागके निरूपणकी प्रतिज्ञा करत हैं जो पश्चात्तापकी निवृत्तिके लिये जो परित्याग हे ताको विचार क्रियोजाय हैं. यहां विचारको लिख्यो हे तासूं विधिनिषेध नहिं हे जो विधानकी आज्ञा करतें तो विधिशेषनेसूं सबनकूं कर्तव्यपनो आवतो तासूं विधानकी आज्ञा नहिं करके विचारकी आज्ञा करी हे.

स्वरूपसूं साधनसूं, ओर फलसूं ताके विचारमें सामान्य-परित्यागको स्वरूप जानिवेमें आवे तो अन्यमार्गीय त्यागको तथा यहां जाको विचार होय हे ताको तारतम्य जान्योजाय ताके लिये अन्यमार्गीय-त्यागकूं कहत हैं.

**श्लोकः-स मार्गद्वितये प्रोक्तौ भक्तौ ज्ञाने विशेषतः । १ ।**

टीका—सो त्याग भक्तिमार्गमें ओर ज्ञानमार्गमें विशेष-करिके एसे दोयमार्गमें कह्यो हे. विशेषसूं त्याग, पुष्टिमार्गमें रासमंडलमंडनभूत जो ब्रजभक्त हैं विननेहि कयों हे; तासूं “सबविषयनकूं छोडिके हम आपके चरणविंदके मूलप्रति प्राप्त भये हैं” एसे फलप्रकरणके प्रथमाध्यायमें कह्यो हे ओर विनकी लीलामें हि चतुर्थाध्यायमें ब्रजभक्तनप्रति प्रभूतने कह्यो हैं जो

“मेरे लिये हि लोक, वेद ओर संबंधीनको तुमने त्याग कियो हे ” वहां विशेषसं त्याग कह्यो हे. तेसें ज्ञानमार्गमें हू परि-  
त्याग विशेषसं कह्यो हे; तामें एक विविदिपासन्न्यास ओर  
एक विद्वत्सन्न्यास एसे भेदसं ज्ञानमार्गके शास्त्रमें निरूपण  
कियो हे तासं ‘विशेषतः’ एसें कह्यो हे. ॥ १ ॥

ज्ञान, कर्म ओर भक्ति एसें तीनमार्ग एकादशस्कंधमें  
भगवाननें कल्याणकरिवेवारे कह्यो हैं तामें कर्म-  
मार्ग हू गिन्यो हे तासं कर्ममार्गमें हू परि-  
त्यागकी प्राप्ति होय हे एसी आशंका  
करिके ताको निषेध करत हैं.

**श्लोकः-कर्ममार्गे न कर्त्तव्य सुतरां कलिकालतः**

**अतः आदौ भक्तिमार्गे कर्त्तव्यत्वाद् विचारणा ।२।**

टीका-कर्ममार्गमें परित्याग कर्त्तव्य नहिं हे तामे हू  
कलिकालसं तो कर्ममार्गमें कर्त्तव्य हैं नहिं. अब दोयमार्ग रहे  
तामें प्रथम भक्तिमार्गमें कर्त्तव्यपनो होयवेसं ताको विचार  
होय हे; इतनें कर्ममार्गमें यावज्जीव अग्निहोत्र करिवेको विधि  
होयवेसं संन्यास ग्रहणकरिवेको समय नहिं आवत हे. ‘यद्यपि  
आयुष्यको चतुर्थभाग संन्यासाश्रमकरिके व्यतीत करनो’ एसें  
कोउस्थलमें कह्यो हे तथापि कलिदोषकरिके मनुष्यनको अल्प-  
सामर्थ्य होयवेसं ओर चतुर्थभाग आयुष्यको अतिजराव्याप्त  
होयवेसं आश्रमधर्मको अतिकष्टसं हू सिद्धकरिसके नहिं तासं

विपरीतफलसाधकपनो-ह्येय. ऐसे ज्ञानमार्गमें कर्त्तव्यता और कर्ममार्गमें अकर्त्तव्यता जतायके भक्तिमार्गमें कर्त्तव्यप्रकारको विचार करतहैं जो भक्ति और ज्ञान ऐसे दोयमार्गमें कर्त्तव्यता कही हे तामें प्रथमश्लोकमें प्रथम भक्तिमार्गमें कर्त्तव्यता कही हे तासूं ताको विचार करत हैं; इतने कब करनो ? कैसे करनो ! ओर क्यों करनो ? याको विचार करत हैं ॥ २ ॥

भक्तिमार्गमें श्रवणादि-साधनकी सिद्धिके लिये कर्त्तव्यके पक्षको निराकरण करत हैं.

**श्लोकाः-**श्रवणादिप्रवृत्त्यर्थम् कर्त्तव्यश्चेत् स नेष्यते ।

सहायसंगसाध्यत्वात् साधनानां च रक्षणात् ॥३॥

अभिमानान्नियोगाच्च तद्धर्मैश्च विरोधतः ।

गृहादेर्वाधिकत्वेन साधनार्थं तथा यदि ॥ ४ ॥

अग्रेऽपि तादृशैरेव संगो भवति नान्यथा ।

स्वयं च विषयाक्रान्तः पाषण्डी स्यात् तु कालतः ५

टीकाः—श्रवणादिकनकी प्रवृत्तिके लिये त्याग करनो एसो पक्ष होय तो सो पक्ष योग्य नहिं हे; क्यों जो श्रवणादिनकी सिद्धि सहाय और संगसं हे ओर त्याग (संन्यास) में तो वाके साधन राखने चाहिये तासूं श्रवणादिकनके साधन होयसके नहिं, आश्रमकी उत्तमताको अभिमान होय ओर संन्यासके धर्मनकरिकें भक्तिमार्गके श्रवणके धर्मको विरोध हे

तासूं श्रवणादिक होयसके नहिं ओर गृहादिकके बाधकपनेसूं साधनके लिये परित्याग करना ऐसं जो होय तो त्याग किये पीछें हू ऐसेनको हि संग होय दूसरेनको होय नहिं ओर आप कालसूं पाषंडी होय; इतनें जो त्यागी होय सो अकेलो निःसंग शान्त होयकें फिरे एसो लेखहे ओर श्रवणादिककरिवेमें सहाय तथा संग अवश्य चाहियें तब श्रवणादिक होय ओर त्यागकरिवेमें संग मिले सो अपने मार्गके अनुसारको श्रवण बतावे पुष्टिमार्गीय-श्रवणकूं बतावे नहिं, जेसं मायावादी सगरेजगतकूं कल्पित भानिवेवारे होयवेसूं जगतमें रखे एसे वेदनकूं हू कल्पित मानत हैं ओर वेदनमें ब्रह्मके जो प्रतिपादित हे सो हू व्यवहारोपयोगी हे परमार्थमें नहिं हे तासूं भक्तिमार्गसूं विरुद्ध हैं, नैयायिकनके मतमें तो जगतके कर्त्तापनेसूं ईश्वरकी सिद्धि हे तथापि ज्ञान, इच्छा ओर प्रयत्नादिसिवाय दूसरे धर्म नहिं हे ऐसं मानत हैं तासूं भक्तिमार्गसूं विरुद्ध हैं, मीमांसक मंत्रमयी देवता मानत हैं फलदेववारों दूसरो ईश्वर हे इनकूं नहिं मानत हैं, तासूं वामें तो श्रवणादिक हे हि नहिं, ऐसं भिन्नभिन्नमतवारेनको संग होयवेसूं भक्तिमार्गीय श्रवण सिद्ध होय नहिं, तासूं आश्रमधर्म राखने चाहियें तामें हि सर्वकाल व्यतीत होयजाय इतनें श्रवणादिक करिवेको समय हि मिले नहिं, तेसं सन्न्यासाश्रम सबनकूं आदरणीय हे ताके लिये अपनेमे श्रेष्ठताको अभिमान होय सो हू भक्तिमार्गसूं

विरोधी हे, तेसें सन्न्यासाश्रम शास्त्रकी आज्ञाके आधीन हे ओर सन्न्यासके धर्म तथा भक्तिमार्गीय श्रवणके धर्मनमें परस्पर विरोध हे तासूं श्रवणादिकनकी सिद्धिके लिये सन्न्यास करनो यह पक्ष योग्य नहिं हे. कदाचित् भक्तिमार्गीय-श्रवणादिकके स्वरूपकूं जो जानतो होय ताकूं गृहस्थितिमें व्यासंगकरिकें श्रवणादिक होय नहिं हे एसें त्याग करे तो वाकूं हू साधनदशामें जेसो पूर्णभाव भक्तिमार्गसे चाहियें तेसो नाहिं-होयवेसूं निरंतर श्रवणादिक होयसके नहिं ओर चितकी चंचलतासूं एतन्मार्गसूं जो विजातीय होय विनसूं हि संग होय ओर जिनकूं भगवद्भाव न होय ताको चित्त विषयाक्रांत होय-वेसूं एसेनको संग अल्पसमय होय तोहू प्रथमके भावको नाशकरिकें अपनकूंहू विषयाक्रांत करिवेको संभव होय; इतने प्रथमके भावको निर्वाह नहिंहोयवेसूं त्याग कियो सोहू मुख्य-फलकूं सिद्धकरिवेवारो भयो नहिं तासूं भक्तिमार्गके विचारमें त्यागकरिवेवारो कालक्रमसूं पाषंडी होय, ॥३॥४॥५॥

यद्यपि भावकी स्थितिमें दुःसंग बाधक हे तथापि भावकी स्थितिके लिये हि त्यागको उपक्रम कियो हे तासूं दुःसंग होयगो तो हू भाव रहेगो एसो पक्ष कोउ कहे तो ताके निराकरणके लिये अब कहत हैं.

श्लोकः—विषयाक्रांतदेहानां नावेशः सर्वदा हरेः ॥

अतोऽत्र साधने भक्तौ नैव त्यागः सुखावहः ॥६॥

टीका:—विषयकरिकें जिनका देह आक्रांत हे तिनकूं सर्वदा हरिको आवेश न रहे. मूलमें सर्वथा पाठ होय तो हरिको निश्चय आवेश न रहे एसी अर्थ समजनो; तासूं साधन-रूप-भक्तिमार्गमें अथवा भक्तिमार्गमें साधन दशामें त्याग सुखकूं देवेशरो नहि होय हे; इतने नेत्रप्रभृति-सर्वइन्द्रियनके रूपप्रभृति सब विषय हैं तिनकरिकें जिनको देह व्याप्त हे तिनकूं ( विषयको आवेश हृदयमे होयवेसूं ) सर्वदा हरिको आवेश नहि होय हे; क्यों जो इन्द्रियनके विषयमें आसक्ति होय सो प्रभुके आवेशमें बाधक हे तासूं श्रवणादिक जो साधनरूप भक्ति हे तामें त्याग करे सो पुरुषार्थकूं सिद्धकरिवेशरो न होय. मूलमें एवकार हे तासूं सर्वथा पुरुषार्थको असाधकपनो कह्यो हे ॥ ६ ॥

तत्र भक्तिमार्गमें त्याग कहवेको प्रयोजन नहि होयवेसूं त्यागकी व्यर्थता होय हे. एसी शंका होय तहां कहत हे

श्लोक:—विरहानुभवार्थं तु परित्यागः प्रशस्यते ।  
स्वीयबन्धनिवृत्त्यर्थं वेषः सोऽत्र न चान्यथा ॥७॥

टीका:—भगवानके विरहके अनुभवके लिये तो त्याग उत्तम कह्यो हे ओर त्यागमें काषायवस्त्रादिक वेष हे सो अपने संबंधीनहे बंधकी निवृत्तिके लिये हे अन्यथा नहि हे; इतने पुष्टिमार्गीय-परित्याग संपूर्ण भगवद्भाव भये पीछे होय; क्यों

जो भगवानके विरहको अनुभव करना सो संयोगसुखको अनुभव भयो होय तब वियोगमें विरह होय तासूं प्रथम भावपूर्वक भगवानके श्रीगुखको दर्शन करतो होय ओर श्रीअंगकी सेवा करतो होय तायें जो आनंद प्राप्त होतो होय सो वियोगमें दर्शन तथा सेवाको सुख नहिंमिलवेसूं विरह होय ताको अनुभव करिवेकेलिये गृहादिकको त्याग करे सो उत्तम हे. एसे त्यागमें शुद्ध-पुष्टिमार्गीय-भाववारो होय सो हि अधिकारी हे. एसो पूर्णभाववारो जो होय ताकूं सर्वात्मभाववारे जो भक्त हैं तिनके संबंधवारी जो रासादिकलीला हे ताको विचार अवश्य होय ताकरिकें ओर येलीला परमफलरूप हे ताकरिकें पूर्व कहे एसे भक्तकूं हू एतन्मार्गीयपनो होयवेसूं एसो फल मिलवेकी अत्यंत अभिलाषा होय परंतु यासमयमें वाकी अभिलाषा पूर्ण होय नहिं ओर पूर्ण करिवेवारको दर्शन हू होय नहिं तासूं विरह अवश्य होय ओर गृहमें जो मनुष्य रहें होय सो विजातीयभाववारे होयवेसूं तिनको संग याके भावकूं नाशकरिवेवारो होय ताकरिकें विरहको अनुभव होय नहिं तासूं गृहको त्याग करना आवश्यक हे, ओर वाको त्याग जतायवेकेलिये काषायादिक त्यागके वेषकी कल्पना हे; इतने जो सन्न्यासको वेष न होय तो स्त्रीपुत्रादिक आयकें प्रतिबंध करें ओर वेष कियो होय तो स्त्रीपुत्रादिक देखिकें यह सन्न्यासी होयगयो हे एसे जानिकें दूर रहे तो प्रतिबंध करिसके नहिं



तासुं सन्यासीनको वेष हे ओर कलु प्रयोजन नहिं हे, ॥७॥

मर्यादामार्गमें तथा पुष्टिमार्गमें गृहको त्याग समान  
हे तथापि मार्गके मेदको निरूपण करिवेके  
लिये त्यागको निमित्त तथा त्यागके वेष-  
करिवेको निमित्त भिन्न बतारके गुरु  
ओर साधनको निरूपण करत हे.

श्लोकः—कौण्डिन्यो गोपिकाः प्राक्तागुरवः

साधनं च तत् ।

भावो भावनया सिद्धः साधनं नान्यदिष्यते ।८।

टीका—कौण्डिन्यऋषि ओर श्रीगोपीजन त्यागके गुरु  
कहे हैं ओर साधन हू यह हे जो भावनाकरिकें भाव सिद्ध  
होय सोहि साधन हे ओरसाधन इच्छित नहिं हे; इतनें  
कौण्डिन्यऋषि अनंतव्रतके प्रस्तावमें निरूपित हे ओर  
श्रीगोपीजन प्रसिद्ध हैं तासुं विशेष प्रकार नहिं कह्यो हे,  
यद्यपि कौण्डिन्यऋषि मर्यादामार्गीय होयवेसुं वाकूं एतन्मा-  
र्गको ज्ञान नहिं होयवेसुं उपदेष्टृपतो नहिं हे तासुं गुरुपनो  
संभवे नहिं तथापि दत्तात्रेयकीनाई अपने वैराग्यमें उपयोगी  
एसे विनके धर्म शिखवेसुं जेसें दत्तात्रेयनें पृथ्वीप्रभृतीनको  
गुरुपनेमें अंगीकार कियोहे तेसें कौण्डिन्यकूं अनंतके गुणको  
श्रवणकरिकें विनकूं मिलवेके लिये आर्त्ति भई तासुं विप्रयोग-  
भाव भयो ताकरिक विकलवृत्ता होयवेसुं प्रश्नकरिवेकूं अयोग्य

एसे वृक्षादिनकूँह प्रश्न करिवे लगे. एसे कौण्डिन्यको त्याग ओर एतन्मार्गीय-त्याग समान हे तासुँ कौण्डिन्यमें गुरुपनो कह्यो हे. ओर श्रीगोपीजनन हू उपदेशकरिवेवारे नहिँ हैं तथापि विनको मार्ग प्रकट करिकें ओर विनके भावके अनुकूल आचरण करिकें ओर पंचाध्यायीमें दोहप्रभृतीनको विरहसुँ त्याग करिकें प्रभूनकी पास गये हैं एसो त्याग यहां अमीष्ट होयवेसुँ हू विनगोपीजननको गुरुपनो कह्यो हे. ओर अपनेमें श्रीगोपीजननके भावके अनुरूप भावना करिकें सिद्ध भयो जो भाव ताको साधनपनो उचित हे. दूसरे ( दानव्रता-दिक )को साधनपनो ईच्छित नहिँ हैं. ॥ ९ ॥

एसो भाव उत्पन्न भये पिछें जो अवस्था होयवेवारी हे जो बुद्धिकुँ फिराईदेय तब दुःखके कारणरूप होय ताकरिकें प्राकृतपनो होयजाय. एसी आशंकाको परिहार विनके भावके स्वरूपको निरूपण करिकें करत हैं.

**श्लोकः—विकलत्वं तथाऽस्वास्थ्यं प्रकृतिः**

**प्राकृतं न हि ॥**

**ज्ञानं गुणाश्च तस्यैवं वर्तमानस्य बाधकाः ॥९॥**

टीका—विकल्पनो तथा अस्वस्थपनो विकलभावकी प्रकृति हे प्राकृतपनो नहिँ हे. ओर एसे भावमें जो रह्यो हे

ताकूं ज्ञान विकलता होय ओर काउस्थलमें स्वस्थता न रहे सो हू स्वाभाविक धर्म हे लौकिक नहिं हे. सो अर्थ युक्त हे एसें जतायवेके लिये ' हि ' अव्यय लिख्यो हे; क्यों जो एकादशस्कंधमें ज्ञानके निरूपणके प्रस्तावमें हू कैवल्यादिक-ज्ञानकूं हू सगुणपनो हे एसें निरूपण करिके " मेरेमें जो ज्ञान रह्यो हे सो निर्गुण हे " एसें कहिके स्वविषयक-ज्ञानको निर्गुणपनो कह्यो हे. जहां मर्यादामार्गमें हू भगवानके संबधिपनेसूं वस्तुकों निर्गुणपनो हे तहां साक्षात् सबनसूं अधिक एसे भक्तिमार्गसंबधिभगवद्भावसूं जो धर्म होय हे तिनकूं निर्गुणपनो होय तामें कहां कहेनो ? एसो अभिप्राय ' हि ' अव्ययसूं सूचित होय हे. तहां शंका होय जो भगवानके संबधसूं निर्गुणपनो भलें होय तो हू विप्रयोगभावकों दुःखात्मकपनो होयवेसूं सबनसूं उत्कृष्टपनो क्यों ? एसी शंका होय ताको समाधान एसें करतो जो पुरुषोत्तमको स्वरूप हे. ओर रस संयोग तथा विप्रयोग एसें दोषप्रकारको होयवेसूं विप्रयोगकूं हू रसपनो हिं हे तासूं जेसें शोकसूं अश्रु आवे ताकूं दुःखरूपपनो ओर आनंदसूं अश्रु आवे ताकूं सुखरूपपनो हे

ताम अश्रुपना समान हू तथाप फल समाने नाहे हें तस विप्रयोगकूं दुःखरूपपनो नहिं हें. एसी विकल अवस्थामें रह्यो एसो जो विप्रयोगभावनावारो हे ताकूं सर्वजगत् भगवानको शरीर हे एसो ज्ञान ओर श्रवण, कीर्तन तथा ज्ञानके विषयरूप

भगवानके गुण बाधक हैं; इतने अंतःकरणमें विप्रयोग भाव रह्यो होय सो सर्वजगत् भगवानको शरीर हे ओर सर्वत्र भगवान् विराजे हे एसे ज्ञानसं जातरहे तेसे श्रवणकीर्तनादिकके विषयरूप जो भगवानके गुण तासं भगवानके विरह करिके जो विह्वलता भइ होय सो जातरहे एसे ज्ञान ओर गुणको बाधकपनो हे तेसे लौकिक ज्ञान ओर मनकी स्वस्थाके कारणरूप गुण हू विप्रयोगरसके अनुभव तथा फलमें प्रतिबंधक हैं. ॥९॥

ज्ञानमार्गमें ओर भक्तिमार्गमें घरको त्याग तो समान हे तब ज्ञान तथा मनकी स्वस्थताकूं ज्ञानमार्गमें साधकपनो हे तब भक्तिमार्गमें बाधकपनो कैसे ? एसी शंकाके समाधानके लिये फलभेदकरिके समाधान करत हैं.

**श्लोकः—सत्यलोके स्थितिज्ञानात् संन्यासेन  
विशेषितात् ।**

**भावना साधनं यत्र फलं चापि तथा भवेत् । १० ।**

टीका—संन्यासकरिके विशेष भयो एसो जो ज्ञान तासं सत्यलोकमें स्थिति होय; इतने सर्वत्र ब्रह्म व्यापक हे एसो ज्ञान होय ओर वाके संग संन्यास होय तब ब्रह्मलोकमें स्थिति होय. वाविषयमें तैतरीयश्रुतिमें कह्यो हे जो "वेदान्तमें विज्ञानसं जिनने आछी रीतसं अर्थको निश्चय कियो हे ओर

सन्न्यासयोगसं जिनको अंतःकरण शुद्ध भयो हे ऐसे जो सन्न्यासिलोक हैं वे ब्रह्मलोकमें जाय ओर ब्रह्माजीकी मुक्तिके संग मुक्त होय हैं ” ऐसे कह्यो हे ओर छांदोग्य-श्रुतिमें तो “ यालोकमें जैसे यज्ञवालो पुरुष होय हे तेसो हि मरणानंतर होय हे ” एसो कह्यो हे तामें तैतरीय श्रुतिमें ब्रह्माकी मुक्तिके समयमें मुक्ति होयवेकों लिख्यो हे ओर छांदोग्यश्रुतिमें तो मरणानंतर भावनानुसार पारलौकिकफल होयवेको कह्यो हे तासूं जोपुरुषमें भावना साधन हे वहां एसो फल होय. अर्थात् ज्ञानयुक्त जो संन्यासी हैं वाकूं हि ब्रह्मलोकमें स्थिति होयके ब्रह्माके संग उनको मोक्ष होय हे तासूं ब्रह्मलोकमें जायवेमें ज्ञानकीहि मुख्यता हैं ओर स्वास्थ्य न होय तो ज्ञान स्थिर होय नहिं तासूं मनकी स्वस्थता सिद्ध-करिवेवारो ज्ञानहि हे ओर भक्तिमार्गमें साक्षात् पुरुषोत्तमके संबधकूं हि फलपनो हे ओर पुरुषोत्तम रसात्मक हैं एसो हि श्रुतिमें कह्यो हे तासूं इनके संबधमें विप्रयोगरसात्मक भावकूं हि साधनपनो हे ज्ञान ओर मनकी स्वस्थताप्रभृतीनकूं तो भावको नाशकपनो हैं; तासूं जहां भावनारूप साधन हे वहां फल हू तेसों होय. एसो अमिप्राय छांदोग्यश्रुतिको हे ॥१०॥

एसे दोउमार्गमें प्रकारके भेदकरिकें साधन ओर फलको निरूपण करिकें ज्ञानमार्गमें फल-प्राप्तिमें विलंब नहिं होय हे ताको कारण कहत हैं.

श्लोकः—तादृशाः सत्यलोकादौ तिष्ठंत्येव न संशय ।  
 बहिश्चेत् प्रकटः स्वात्मा वह्निवत् प्रविशेद् यदि  
 ॥११॥

तदैव सकलो बंधो नाशमेति न चान्यथा ।

टीका—संन्यासयुक्त जो ज्ञानी हे सो सत्यलोकादिकमें हि रहे हैं वामें संशय नहिं हे तासूं ज्ञानमार्गमें मुक्ति होयवेमें विलंब होय है ओर भक्तिमार्गमें तो जैसे सबकाष्ठनमें अग्नि व्याप्त होय के रह्यो हे तथापि काष्ठकों दहन करिवेमें समर्थ नहिं हे तासूं वाहिरको अग्नि भीतर प्रविष्ट होयके भीतरके अग्निकूं मिले तत्र काष्ठकूं दहनकरिके अग्निरूप करिदेय हे एसें सर्वत्र व्याप्त जो ब्रह्मको स्वरूप हे सो मुक्ति करिवेमें समर्थ नहिं हे परंतु बाहिर प्रकट भयो एसो जो आत्मस्वरूप हैं सो भीतर प्रविष्ट होयके भीतरके स्वरूपके संग मिले हे तबहिं समग्रबंधकूं नाशकरिके मुक्त करिदेत हे तासिवाइ मुक्त नहिं होय हे; इतनें संन्यासयुक्त ज्ञानीनकी स्थितिसत्यलोकमें होय हे तामें हू जो निष्काम होय सो तो सत्यलोकमें रहे जो सकाम होय सो तो दूसरे लोकमें हू जाय हैं एसें जतायवेके लिये मूलमें ' आदि ' शब्द कह्यो हे. ओर सत्यलोकमें जितने रहत हैं तिनसबनकी मुक्ति ब्रह्माजीके संग होय हे तासूं दोयपरार्द्धताई ब्रह्माजी रहे तबताई उनकूं मुक्ति होयवेमें विलंब

होय हे ओर भक्तिमार्गमें तो अग्निको दृष्टांत दियो हे तासूं  
 एसें जतायो हे जो जेसें काष्ठमें विद्यमान-अग्निकूं काष्ठको  
 दाह करिवेमें योग्यता नहिं हे; परंतु मथनकरिकें वामेंसूं हि  
 अग्निप्रकट होयके भीतरके अग्निकूं जब मिले तब वाको काष्ठ-  
 पनो निवृत्त होयके अग्निपनो सिद्ध होय हे तेसें भक्तनके  
 हृदयमें भगवान् विराजत हैं तथापि त्रिनको भगवद्रूपनो  
 करिवेमें योग्य नहिं हैं परंतु विगाढ भावकरिकें बाहिर प्रकट  
 होयके जब भीतरके स्वरूपकूं मिले तब हि ताके प्रतिबंधकूं  
 दूरकरिकें वाको भगवद्रूपनो संपादन करे हैं एसोफल सिद्ध  
 करिवेमें दूसरो प्रकार नहिं हे ॥ ११ ॥

तहां शंका होयजो विगाढ भावकूं साक्षात्संगके  
 अभावके कारणपनेसूं संगके लिये स्वरूपके  
 अनुसंधानको हू आवश्यकपनो हे तासूं  
 गुणगानकरिकें स्वास्थ्य क्यों न  
 होय ? पसी शंका होय  
 तहां कहत हैं.

**श्लोक :-**गुणास्तु संगराहित्याजीवनार्थं  
 भवन्ति हि ॥१२॥

टीका—संगरहितपनो हे तासूं गुण तो जीवनके लिये होय  
 हैं; इतने जीव जबसूं भगवानसूं त्रिच्छुर्योहे तबसूं वाकूं भगवा-  
 नको संग नहिं हे परंतु जबताई भगवानके वियोगकी स्फूर्ति

नहिं भई हे तबताई वाकूं वियोगको दुःख नहिं हे ओर जब वियोगकी स्फूर्ति होय तब वाकूं वियोगको दुःख होय तासम-  
गयमें वाकी स्वस्थता रहिवेमें भगवानके गुणसिवाइ दूसरो  
कोउ साधन नहिं हे; कशों जो भगवान् परमानंद हैं विनको  
विरह होय तब जीवन रहे नहिं तासमयमें परमानंदके गुणहिं  
जीवनकू संपादन करिसकत हैं. सोहि बात श्रीगोपीजनननें  
गोपिकागीतमें कही हे जो " आपकी कथारूप अमृत हे सो  
तसको जीवन हे " और अक्रूरजीके संग भगवान् मथुराजी  
पधारे तब भगवानके रथकी ध्वजा ओर रथकी रज देखिवेमें  
आई तबताई तो चित्रकोसीनाई सब गोपीजन ठाडे रहें ओर  
पीछे भगवान् पाछे फिरेंगें एसी आशा निवृत्त भई तब विनको  
गुणगान करिकें शोकरहित होयकें दिन व्यतीत करतभये एसें  
कह्यो हे तहां ह गुणगानकों ही जीवनसंपादननों कह्यो हे;  
तासूं जीवनके लिये गुणगान होय हे परंतु वासूं स्वस्थता नहिं  
रहे हे. ॥१२॥

तहां शंका होयजो विप्रयोगभावमें जो रह्यो हे

ताकूं भगवानके गुण ह भावके बाधक हैं तब

जिनकी भावना होय हे सो भगवान् ह

विलंबकू संपादनकरिवेवारे होयवेसूं

बाधक केसे नहिं ? ऐसी शंका

होय तहां कहत हैं.} ॥



**श्लोकः—**भगवान् फलरूपत्वान्नात्र बाधक ईष्यते ।

स्वास्थ्यवाक्यं न कर्त्तव्यं दयालुर्न विरुद्धयते । १३ ।

टीका—भगवान् फलरूप हैं तासूं यहाँ बाधक नहीं हे ओर स्वस्थताको वाक्य भगवानकूं कर्त्तव्य नहीं हैं क्यों जो भगवान् दयालु हैं तासूं विरुद्ध नहीं होय हे; अथवा विरोध नहीं होय हे; इतनें यामार्गमें भगवान् हि फलरूप हैं और विनकी प्राप्तिमें विप्रयोगभावकों हि साधकपनो हे सो न होय तो फलकी प्राप्ति होय नहीं तासूं भगवान् जो प्रतिबंधक होय तो फलपनो हि सिद्ध नहीं होय तासूं भगवान् बाधक नहीं हैं. तहां शंका होय जो भगवानकूं फलात्मकपनो हे ओर फलदेयवेकी उनकी इच्छा हि हे तासूं कदाचित् स्वरूप-करिकें विप्रयोगके दुःखकूं निवृत्त नहीं करें तो भले परंतु कलुष-वाक्यकहिकें स्वस्थता क्यों न करत हैं ? इतनें जेसैं नारदजीकूं दर्शन देयकें प्रभु तिरोहित भये तब फिर दर्शनके लिये नारदजी यत्न करत हते ताकूं जेसैं आकाशवाणीसूं आज्ञा-करी जो “ निदित-यालोककूं छोडिकें मेरे जनपनेकूं तुं प्राप्त होयगो ” एसें स्वस्थताको वाक्य कथो हे तेसें यहां विप्रयोग-भावकरिकें तप्त एसें भगवानकूं स्वस्थता क्यों नहीं करत हैं ? एसी शंका होय ताकी निवृत्तिके लिये कहत हे जो स्वस्थता होय एसो वाक्य भगवानकूं कर्त्तव्य नहीं हे क्यों जो भगवान्

दयालु हैं तासूं विरुद्ध न होय इतने नारदजीके कषाय पक्क नहिं भये हते परंतु शुद्धभाववारे हते तासूं स्वस्थता होयवेके लिये तिरोहित होयके हि वाक्य कहिके स्वस्थ किये हैं. ओर यहां तो अंतर्गृहगताकीनाई विनको प्रतिबंध हे सो तत्काल निवृत्त करनो हे सो प्रतिबंध, विरहके तापके दुःखसूं ओर भीतर आविर्भाव भयेके आलिंगनके सुखसूं हि निवृत्त करनो हे क्यों जो विनको भाव उत्कट हे तासूं एसे भक्तनकूं वाक्य कहिके स्वस्थता करे तो अंतर्गृहगतानकों जेसें फल मिल्यो तेसें शीघ्र फल नहिं मिले तो दयालुपनामें विरोध आवे तासूं स्वस्थताको वाक्य भगवानकूं कर्तव्य नहिं हे ॥ १३ ॥

एसे भक्तमार्गीय-सन्न्यासके स्वरूपको साधन ओर फलके प्रकारको विचारकरिके उपसंहार करत हैं.

श्लोकः—दुर्लभोऽयं परित्यागः प्रेम्णा सिद्ध्यति  
नान्यथा ।

ज्ञानमार्गे तु सन्न्यासो द्विविधोऽपि  
विचारितः ॥१४॥

टीका—एसे भक्तिमार्गीय यह परित्याग दुर्लभ हे सो प्रेमकरिके सिद्ध होय अन्यथा नहिं होय ओर ज्ञानमार्गमें तो विविदिषा ओर विद्वत् एसे दोयप्रकारको सन्न्यास हे; इतने

भक्तिमार्गीय सन्न्यास हे सो व्रत, दान, ओर तप आदि साधनसूँ हू सिद्ध होय एसो नहिँ हे क्यों जो एसे त्यागकों सिद्ध करिवेको साधन कोउशास्त्रमें कह्यो नहिँ हे केवल प्रेम-करिकें हि सिद्ध होय हे भगवानमें प्रेम नहिँ होय तो भक्ति-मार्गीय त्याग सिद्ध न होय ओर ज्ञानमार्गमें विविदिषा ओर विद्वत्सन्न्यास एसे भेदसूँ दोयप्रकारके सन्न्यास कह्य हैं ॥१४॥

अब दोयप्रकारके सन्न्यासको भेद बतावत हैं.

**श्लोकः—ज्ञानार्थमुत्तरांगं च सिद्धिर्जन्मशतैःपरम् ।  
ज्ञानं च साधनापेक्षं यज्ञादिश्रवणान्मतम् ॥१५॥**

टीका—ज्ञानके लिये ओर उत्तरांग जैसे सिद्ध होय तेसेँ दोय प्रकारको सन्न्यास ज्ञानमार्गमें विचारित हे. ओर यज्ञादिकको श्रवण हे तासूँ ज्ञान साधनकी अपेक्षा राखे हे; इतनेँ ज्ञानरूप फलकी सिद्धिके लिये विविदिषा सन्न्यास होय हे ताकी साक्षात्काररूप सिद्धि सेंकडेन वर्षनसूँ होय हे सो गीताजीमें कह्यो हे जो “ ज्ञानवान् हे सो बहोत जन्मनके अंतमें यह सर्व वासुदेव हैं एसेँ जानिके मेरी शरण आवत हे सो महात्मा अत्यंत दुर्लभ हे ” एसेँ कह्यो हे तामें सब वासु-देवरूप हे एसी शरणागति ज्ञानवानकूँ बहोत जन्मके अंतमें होयवेको कह्यो हे ओर ज्ञान हे सो कर्म, ज्ञान तथा भक्तिरूप

साधननकी अपेक्षा राखत हे तामें प्रमाण कहत हैं जो ज्ञानकी उत्पत्तिमें सब साधननकी अपेक्षा हैं जैसे कोउ दूर देशमें प्राप्त होयवेमें अश्ववादिककी अपेक्षा हे एसें ज्ञानकी प्राप्तिमें सब साधनकी अपेक्षा हे ” क्यों जो निष्कामकूं हू यज्ञादि करिवेको श्रुतिमें कह्यो हे. तासूं केवल शमदमादिक करिकें ज्ञान प्राप्त नहिं होय हे किन्तु आश्रमके अनुसार कर्म हू संग हाय तब ज्ञान प्राप्त होयवेको व्यामसूत्रमें कह्यो हे. एसें विविदिषासन्न्यासकी हकीकत कहीकें विद्वत्सन्न्यासकी हकीकत कहत हैं जो “ ज्ञानसूं हि मोक्ष होय हे ” एसें वाक्यसूं ज्ञानकी सिद्धिपीछे मुक्तिरूपफल सिद्ध होय हे तासूं विद्वत्सन्न्यासकूं मुक्तिको अंगपनो हे. यद्यपि विद्वत्सन्न्यासकूं मुक्तिके अंगपनो हे तथापि गीताजीके वाक्यमें ज्ञानवारेकूं बहोत जन्मकी अंतमें शरणागति होयवेको लिख्यो हे ओर शरणागतिकूं भक्तिपनो हे तासूं भक्तिविना केवस ज्ञान मुक्तिको साधक नहिं हे ओर यज्ञ चित्तकी शुद्धिको कारण हे सो निष्काम क्रियो होय तब हि चित्तकी शुद्धि करे हे एसो निष्काम यज्ञ करे तब हि चित्त शुद्ध होयकें ज्ञान प्राप्त होय हे ॥ १५ ॥

अब कलियुगमें सन्न्याससूं कछु फल सिद्ध नहिं होय हे सो कहत हैं.

श्लोकः—अतःकलौ स सन्न्यासः पश्चात्तापाय  
नान्यथा ।

पाषण्डित्वं भवेच्चापि तस्माज्ज्ञाने न सन्न्यसेत् १६  
सुतरां कलिदोषाणां प्रबलत्वादिति स्थितम् ।

टीका—तासूं ज्ञानमार्गीय सन्न्यास कलियुगमें पश्चात्तपके लिये हि होय हे अन्यथा नहिं ओर पाषण्डिपनो हू होय हे; तासूं ज्ञानमार्गमें सन्न्यास ग्रहण न करे क्यों जो कलिके दोषनको अतिशय प्रबल पनो हे. तासूं ज्ञानमार्गमें सन्न्यासको अकर्त्तव्यपनो निश्चित हि हे; इतने ज्ञानमार्गमें विविदिषा-सन्न्यासमें साधनकी अपेक्षा बहोत रहत हे तासिवाय ज्ञानको उदय न होय ओर सन्न्यास ग्रहण करे तो पश्चात्तागके लिये हि होय हे इतनो हि नहिं परंतु पाषण्डिपनो हू होय हे क्यों जो शमदमादिक कछु सिद्ध न भये होय ओर सन्न्यास ग्रहण करे तब मिक्षादिककी शुद्धि होय नहिं तासूं अंतःकरणमें अन्नदोषकी सहायतासूं अंतःकरणकी मलिनता विशेष होयवेसूं कामक्रोधादिक होयके धर्मसूं पात होय हे ओर विद्वत्सन्न्यासको तो कलियुगमें संभव हि नहिं होय हे तासूं कलियुगमें सन्न्यासको निषेध करनहारे शास्त्र-कारनने हि एसो निषेध कियो हे जो कलियुगमें सन्न्यास नहिं करनो क्यों जो सन्न्यासमें इतनो प्रयत्न हे एसं जानिके

हि अपनी प्रतिष्ठाकी वृद्धिके लिये सन्न्यास ग्रहण करे तो सन्न्यासाश्रमके धर्म निभिसके नहि इतनें वेषमात्रमें सन्न्यासको पर्यवसान होयवेसूं पाषण्डिनो होय तासूं ज्ञानमार्गमें सन्न्यास ग्रहण न करे. ऐसें ज्ञानमार्गमें सन्न्यास ग्रहण करिवेमें बाधक हे तथापि आग्रहको सन्न्यास ग्रहण करे तो कलिके दोषनको अतिशय प्रबलपनो होयवेसूं वाको पात हि होय ऐसें शास्त्रकारनने निर्णय कियो हे; इतने श्रीगीताजी तथा श्रीभागवत ११ स्कंदमें भगवाननें सन्न्यासग्रहणकीं आज्ञा करी हे तामें ११ स्कंधमें विस्तारपूर् विवेचन कियो हे ताकी कर्त्तव्यताके विचारमें इतनो सिद्ध भयो जो कर्ममार्गमें जैमिनिके मतमें परित्यागकी अकर्त्तव्यता हे. ज्ञानमार्गमें चतुर्थाश्रमके पक्षकरिकें कर्त्तव्यपनो हे तो हू कलिकालसूं आश्रमधर्म न निभसके तासूं अकर्त्तव्यता हे ओर भक्तिमार्गमें कर्त्तव्यपनेसूं कह्यो हे तो हू सन्न्यासके स्वरूप तथा धर्मसूं विरोध होयवेसूं श्रवणादिककी सिद्धिकेलिये सन्न्यासमे स्वरूपसूं त्याग करिवेकी अकर्त्तव्यता हे तेसें प्रभूनमें स्नेह सिद्धकरिवेके लिये त्यागकरिवेमें हू सन्न्यासके स्वरूप तथा धर्मसूं विरोध हे तासूं सन्न्यासकी अकर्त्तव्यता हे ओर प्रभूनमें प्रेम भये पीछे तो स्वतः हि त्याग सिद्ध होय हे तासूं सन्न्यासकी अपेक्षा नहि हे तब प्रेमकी आरंभदशामें परित्याग करनो के नहि ? ताको विचार प्रश्नकी रीतिसूं करत हैं.

श्लोकः-भक्तिमार्गेंऽपि चेदोषस्तदा किं कार्यमुच्यते  
॥ १७ ॥

अत्रारंभे न नाशः स्यात् दृष्टान्तस्याप्यभावतः ।  
स्वास्थ्यहेतोः परित्यागाद् बाधः केनान्य  
संभवेत् ॥ १८ ॥

टीका-भक्तिमार्गमें हू कलिदोष आयजाय तब कहा करनो ? एसी शंका होय तहां कहत हैं जो भक्तिमार्गमें नाश न होय क्यों जों भक्तिमार्गमें जो प्रवृत्त भयो ताको नाश होय एसो दृष्टांत नहि मिलेहे ओर स्वस्थताके हेतुको गरित्याग हे तासूं वाको बाध कोनकरिकें संभवे ? नहि संभवे; इतने दोष ज्ञानमार्गमें कद्यो सो हि दोष भक्तिमार्गमें आवे तब कहा करनो ? इसी शंका होय तहां कहत हैं जो भक्तिमार्गमें त्यागके आरंभमें नाश नहि हे क्यों ज्ञानमार्गमें आरंभ करिवेवारेकूं दुःसंग ओर सहायादिक करिकें नाशको संभव हे ओर भक्तिमार्गमें तो त्यागको आरंभ करिवेवारो अलौकिक-भगवद्भावकरिकें पूर्ण हे तासूं दुःसंगकी संभावना हू नहि हे ओर दुःसंग जेसो नाशक हे तेसो नाशक दूसरो कोउ नहि हे तासूं वाको नाश नहि होय हे. तहां शंका होय जो दुःसंग नहि होयवेसूं दुःसंगसूं जो नाश होयवेवारो

हे ताकी तो संभावना नहि हे परंतु काल, कर्म ओर स्वभाव-करिकें नाश होय तो कहा करनो ? एसी शंकाकी निवृत्तिके लिये कहत हैं जो मर्यादामार्गीय त्यागकरिवेवारे आग्नीध्र ओर भरतादिकनको कालादिककरिकें नाश भयो हे सो जैसे दिखवेमें आयो हे तेसें शुद्धपुष्टिमार्गीयनको नाश भयो होय एसो कबहू सुनिवेमें आवे नहि हे; क्यों जो कोउको नाश भयो नहि हे ओर भक्तिमार्गको त्याग भगवद्धर्म हे सो निमिराजाने श्रीभागवत ११ स्कंधके द्वितीयाध्यायमें ( भगवद्धर्म कहो एसो ) प्रश्नकर्यो ताके उत्तरमें कवियोगेश्वरनें कह्यो हे जो “ भगवानने आपकी प्राप्तिके लिये उपाय नहि जानिवेवारेनकूं श्रमविना हि आपकी प्राप्ति होय एसे उपाय जो कहे हैं ते भगवद्धर्म हे एसें जानो ” एसें कहिकें फिर कह्यो हे जो “ जिनधर्मनमें रहिकें काहु बिरियां जीव प्रमादयुक्त नहि होय हे. नेत्र मुंदिके दोडतो होय तोह वाकूं ठोकर न लगे ओर वा गिरे हू नाहि ” यहांसूं आरंभिके “ लज्जारहित होयकें भगवद्गुणनके गान करत करत असंग होयकें फिरे ” यहां ताई भगवद्धर्म कह्यो हैं. तहां त्यागकोहू बोधन तासूं भगवद्धर्मके आरंभमें हू नाश नहि हे. तहां शंका होय जो भगवद्धर्मेके आरंभमें भलें नाश न होय तथापि देहरक्षाके लिये भिक्षादिककी आवश्यकता होयवेसूं फलमें विलंब होय एलो बाध होयगो सो केसें निवृत्त होयगो ।



एसी शंकाको निवृत्तिके लिये कइत हैं जो त्याग करिवेवारेकूं स्वस्थताके कारणरूप चार्योवर्णनमें भिक्षाकोहूं त्याग हे ओर मालाचंदन इत्यादिकनको हू त्याग हे तासूं बाध काहेंसूं होय ! नहिं होय; क्यों जो भगवानके विप्रयोगके तापसूं भक्तिमार्गीय त्याग होय हे सो तापकी बाह्य पदार्थसूं निवृत्तिहू नहिं होय हे तासूं काहूसूं हू वाका बाध न होय ॥ १७ ॥ १८ ॥

एसें दृष्ट ओर अदृष्ट उपायसूं चाको नाशक कोउ नहिं हैं एसें कहिकें भगवानहू वाको बाध नहिं करिसकतहें सो कहतहें.

**श्लोकः—हरित्र न शक्नोति कर्तुं बाधां कुतोऽपरे ॥  
अन्यथा मातरो बालान् न स्तन्यैः पुपुषुः  
कचित् ॥ १९ ॥**

टीका—यामार्गमें हरि बाध करिवेमें समर्थ नहिं हैं तो दूसरो कैसेकरसके ? ओर जो हरि बाधा करें तो माता हू स्तन्यकरिकें बालकनको पोषण न करे; इतनें हरि सर्वदुःख-हर्त्ताहैं सो हू यामार्गमें ईश्वरपनेसूं बाधाकरिवेकूं समर्थ नहिं होय हैं क्यों जो जाको जैसो स्वरूप हे ताको तेसो ज्ञान ईश्वरकूं हि हे तासूं याभावने नाशमें कारणको अभाव हे एसें हू प्रभु जानत हैं ओर आप भक्तनके भावके आधीन हैं

सो हू जानत हैं तासूं आपको अशक्तपनो जानिकें बाधकरिवेमें प्रवृत्त हू नहिं होय हैं, जहां भगवानसूं हू बाध न होय तहां ओरसूं तो बाध कैसें होय शके ? तहां दृष्टान्त देत हैं जो भगवान् बाधकरे तो माता हू स्तन्यकरिकें बालकनको पोषण न करे अर्थात् स्वधर्मकूं उत्पन्न करिवेवारे तथा वाकीरक्षा-करिवेवारे प्रभुहि जब बाधा करे तब बालकनकूं उत्पन्न करिवेवारी तथा बिनकी रक्षाकरिवेवारी माता हू स्तनके दूधसूं पोषण न करे. यासूं एसें सिद्ध भयो जो काहूसूं वाको नाश न होय. ॥ १९ ॥

तहां शंका होय जो काहूसूं वाको नाश तो न होय परंतु मोहके कार्यमें नियुक्तभईमाया तो वाकूं मोह करेगी ? एसी शंकाकी निवृत्तिकेलिये कहसहें.

**श्लोकः-ज्ञानिनामपिवाक्येन न भक्तं मोहयिष्यति ।  
आत्मप्रदः प्रियश्चापि किमर्थं मोहयिष्यति ।२०।**

टीका-ज्ञानीनकूं माया मोह करे हे एसों मार्कंडेय-पुराणमें कछो हे तासूं भक्तकूं मोह नहिं करेंगे; क्यों जो प्रभु भक्तनकूं अपने आत्माकूं देयवेवारे ओर प्रिय हू हैं सो काहेके लिये मोह करेंगे ? इतनें मार्कंडेयपुराणमें कछो हे जो “ ज्ञानीनके चित्तकों हू समर्थ एसी देवी बलसूं खेचकें मोहमें

डारिदेत हैं ” एसी वाक्य हे तासूं भक्तकूं मोह नहिं करेंगे; क्यों जो वावाक्यमें ज्ञानीनके चित्तकूं मोह करिवेकों लिख्यो हे. भक्तनकूं मोह करिवेको लिख्यो नहिं हे. ओर भगवान् स्वरूपानंदके देयवेवारे तथा प्रिय हैं सो काहेके लिये मोह करेंगे ? इतनें जो जाकों प्रिय होय सो वाके कार्यमें विलंब होय ताकूं सहन करे तब प्रियपनो हि होय नहिं ओर जहां स्वरूपानंद देयवेकी इच्छा होय वहां हि ज्ञानीनकूं मोह करिवेवारी मायासूं रक्षा करत हैं, जहां स्वरूपानंद देयवेकी इच्छानहिं हे तहां इच्छा नहिं करत हैं. जैसें द्विजपत्नीनको प्रभूनकी पास जायकें विनकी सेवा करेंगे एसी बुद्धिसूं सर्वसामग्रीसंपादनपूर्वक पतिप्रभृति सर्वबन्धूनको त्याग करिकें आगमन भयो हतो तथापि विनकूं स्वरूपानंद देयवेकी इच्छा नहिं होयवेसूं भगवाननें कछो जो “ यहां मनुष्यकूं अंगसंग प्रीति ओर स्नेहके लिये नहिं हे तासूं मेरेमें मन लगायवेवारे तुमसब थोरे समयमें मोकूं प्राप्त होयगें. ” एसी वाक्य कहिकें ज्ञानमार्गजेसो उपदेश दियो. ओर ब्रजभक्तनकूं स्वरूपानंद देयवेकी इच्छा विशेष होयवेसूं घरप्रति पाछे जायवेके वचन वेसेंहि कछे तथापि विनमें रात्रिघोररूप हे, एसें कहिकें रात्रिमें स्त्रीयनसूं पाछो गयो न जाय एसें, चंद्रमाके किरणसूं रंजित एसी वन तुमने देख्यो एसें कहिकें उद्दीपनविभावकूं बतायके रहिवेको ओर “ लोककी इच्छावारी स्त्रीनकूं चाहे

जेसो पति होय तो हू छोडनो नहिं, बाके बंधूनको शुश्रूषण, तथा मजाको पोषण करनो. ” एसे कहिके लोकिक इच्छा-वारेनके धर्म बतायके अपनी इच्छावारीनकूं पृथक् सूचित किये; तासूं हि द्विजपत्नीनकूं मोह भयो सो वे चलिगई ओर ब्रजभक्तनकूं मोह न भयो तासूं विननें प्रत्येकवाक्यनको भगवानकूं उत्तर दियो. तेसे हि उद्धवजीके संदेशके प्रश्नमें हू भगवाननें ज्ञानमार्गीयजेसो संदेश पठायो तथापि ब्रजभक्तनकूं मोह न भयो. तब उद्धवजीनें श्रीगोपीजननकी श्रीकृष्णके आवेशवारे आत्माकि विवलयता देखी तब अपने जो संदेश-द्वारा उपदेश कइयो हतो ताकी निष्फलता ओर विप्रयोगके तापकी अति प्रबलता देखिके विनमें सबनसूं अधिक ओर अनिर्वचनीय उत्कर्ष देख्यो ओर अपनमें हीनताकी स्फूर्ति भई विनके साक्षात् चरणनके स्पर्श करिके नमन करिनेकी अपनी अयोग्यता जानिके विनके चरणरेणुको वंदन कियो. तामें हू बहोतरेणूनकूं वंदन करिवेमें अपनो अधिकार नहिं जानिके एक रेणुकूं हि वंदन कियो हे तासूं जहां स्वरूपानन्द देयवेकी प्रभूनकी इच्छा होय वहां ज्ञानमार्गीयवाक्यनसूं मोह नहिं होय हे. ॥ २० ॥

एसे सन्न्यासनिर्णयको प्रतिपादन करिके, बाको  
उपसंहार करत है.

श्लोकः-तस्मादुक्तप्रकारेण परित्यागो विधीयताम् ।  
 अन्यथा भ्रश्यते स्वार्थादिति मे निश्चिता मतिः २१  
 इति कृष्णप्रसादेन वल्लभेन विनश्चितम् ॥  
 सन्न्यासवरणं भक्तावन्यथा पतिता भवेत् ॥२२॥

इति श्रीमद्वल्लभाचार्यविरचितः सन्न्यासनिर्णयः

समाप्तः ।

टीका-भक्तिमार्गीय-सन्न्यासको प्रकार एसो हे तासूं प्रभूनके विरहको अनुभवकरिवेके लिये उपर कछे प्रकारसूं त्याग करनो. जो एसें नहिं करेगें तो स्वार्थसूं भ्रष्ट होयगें एसी मेरी निश्चित मति हे. एसें श्रीकृष्णके प्रसादकरिकें श्रीवल्लभाचार्यजीनें भक्तिमार्गमें सन्न्यासको वरण निश्चित कियो हे. वारीति विना दूसरी रीतिसूं सन्न्यास करिवेवारो पतित होय; इतनें सन्न्यासके दूसरे सब प्रकार दोषसहित ओर असंभवित हैं तासूं ये हि प्रकार सन्न्यासको हे जो भगवाननें उद्धवजी प्रति कहा हे वाहि प्रकारसूं सन्न्यास करनो. ओर जो एसो अधिकार न होय तो हू त्यागकरे तो स्वार्थसूं भ्रष्ट होयजाय एसे निश्चयवारी मेरी बुदि हे, क्यों जो एसो त्याग उद्धवजीने कियो हे सो तृतीयस्कंधके चतुर्थाध्यायमें निरूपित

हे जो भगवानके विरहकरिकें जाको आत्मा आतुरहे एसोमें यहां आयोहूं सो में भगवानके दर्शनको आल्हाद ओर वियोगकी आर्ति करिकें युक्तहूं ” एसें विदुरजीप्रति उद्धवजीके वाक्यसूं उपर त्यागको स्वरूप श्रीकृष्णके प्रसादसूं हि जान्यो जाय एसो बतायवेकेलिये मूलमें श्रीकृष्णके प्रसादसूं कहिवेकी श्रीमहाप्रभूननें आज्ञा करीहे; तासूं भक्तिमार्गमें सन्न्यास भगवानको वरणरूप हि हे ओर जो भक्तिविना त्यागकरे तो पतित होय. यापेंसूं इतनो सिद्ध भयोजो ग्रंथके प्रारंभमें परित्यागको विचार कियोजाय हे एसें कह्यो हे ओर समाप्तिमें उक्तप्रकारसूं परित्यागकरिवेको कह्यो हे. तापीछें श्रीकृष्णके प्रसादकरिकें सन्न्यासको निश्चय करिवेको कह्यो हे तासूं एसो सूचित होय हे जा श्रीआचार्यचरणनकूं देहदेशपरित्याग विषयक दोय आज्ञा भगवानकी भई हती ताप्रामाण नहि करिवेको खेद हतो तहां जब लोकपरित्यागविषयक तीसरी आज्ञा भई तब याकेवाक्यार्थको विचार करतें जाप्रमाण आज्ञा भई याहीप्रकार करिकें श्रीआचार्यजीने कियो तब भगवान् विशेष प्रसन्न होयकें श्रीआचार्यजीके मनमें सन्न्यासके स्वरूपकी स्फूर्ति करी वाको हि बोध छेल्ले श्लोकमें हे. ताको

अभिप्राय एसो हे जो पूर्वोक्तप्रकारसूं जो परित्यागको विचार कियो ताकरिकें भगवानकों प्रिय एसो जो में वानें भक्ति-मार्गमें उद्ववकीसीनाई. सन्न्यासको अंगीकार निश्चित कियो हे. ओर उद्ववजीकूं “ सब छोडिकें मेरेमें मन प्रविष्टकरिकें पृथ्वीमें फिर. ” एसी भगवानकी आज्ञा भई हतो. ताप्रमाण आज्ञा न होय ओर सन्न्यास ग्रहणकरे तो पतित होय; क्यों जो भक्तिमार्गके ओर सन्न्यासके धर्म परस्पर विरुद्ध होयवेसूं भगवानकी आज्ञासीवाइ ओर अंतकरणमें भगवानके विप्रयोगको भाव न भयो होय तो हू सन्न्यास ग्रहण करे तो भक्तिमार्गसूं च्युत होय. ॥ २१ ॥ २२ ॥

इति श्रीमद्वल्लभाचार्यजीकृत सन्न्यासनिर्णयः  
की गोस्वामिश्रीनृसिंहलालजी  
महाराजविरचित संक्षिप्तभाषा  
टीका समाप्त भई ॥



श्रीकृष्णाय नमः श्रीगोजनचल्लभाय नमः ॥

## ॥ श्री निरोधलक्षणग्रंथकी ब्रजभाषा- टीकाको प्रारंभः ॥



अब निरोधलक्षणमें प्रथम निरोधके स्वरूपको विचार कर्तव्य हे तामें ज्ञानमार्गमें तो वैराग्यसं, इंद्रियनको निग्रह कियेसं साधन करिकें ओर यमनियमादिकनसं जब विज्ञान होय तब निरोधको फल मिले हे. भक्तिमार्गमें यमनियमादि-साधनके अभावसं निरोधकी सिद्धि कैसें होय ? एसी शंकाके समाधानपूर्वक निरोधके स्वरूपसाधनादि ओर निःसाधनरूप अपने मार्गमें निरोधको फल कैसें सिद्ध होय ? सो श्रीमहा-प्रभुजी आज्ञा करतहें; तामें श्रीभागवतदशमस्कंधका निरूपण करतीबिरियां “ निरोधोऽस्यानुशयनं प्रपञ्चे क्रीडनं हरेः” इतने याप्रपंचमें प्रभुकी जो क्रीडा वाको निरोध कह्यो हे सो निरोध तो लीलासृष्टिमें स्थित जो भक्त उनकूं प्रपंचचिस्मरण-पूर्वक सकलेंद्रियनको प्रभुमें निवेश भयो हतो तेसें होय तब होय हे एसें दशमस्कंधमें, भक्तनके चित्तवृत्तिको निरोध हि, भक्तिमार्गीय निरोध कह्यो हे; तामें प्राकट्यदशामें जिनको साक्षात् अंगीकार भयोहे, पुष्टिमार्गीयभावको अंकुर जिनके



हृदयमें वर्द्धमान हे, परमभाग्यवारे ओर ब्रजके संबंधवारेनको तो स्वरूपसंहि प्रभुने निरोध कियो; अब प्रकटितदशा नहि होयवेसूं आजकाल आपने अंगीकार किये पुष्टीमार्गीय-भक्त, निरोधसाधनके अज्ञानसूं कदाचित् ज्ञानमार्गीयनिरोधमें प्रवृत्त होय, ताकी निवृत्तिके लिये स्वमार्गीयनिरोधमें जाकी अपेक्षा हे एसो जो मूळकारण ताको श्री आचार्यजी निरूपण करत हैं

**श्लोकः—यच्च दुखं यशोदाया नन्दादीनां च गोकुले।  
गोपिकानां च यद्दुःखं तद्दुःखं स्यान्ममकचित्॥१**

टीका—श्री गोकुळमें श्रीयशोदाजीकूं नन्दादिकनकूं ओर श्री गोपीजननकूं जो दुःख भयो सो मोकूं कबहू होयगो !!! श्रीगोकुल तो नानाप्रकारके विहारकी इच्छासूं उत्पन्न भयी एसी कृपाकरिकेंहि साक्षात् प्रभुने पुष्टिमार्गमें अंगीकृत कियो हे तासूं पुष्टिमार्गीगोकाररूप भावांकुर वामें हतो ताभावके स्वभावकरिकें दुःख हू वामें रह्यो हे जादुःखरूप कारणसूं प्रभुको प्राकटय भयो हे, आगें सुखादिक हू भयो हे अब हू एसो निरोध हुंढिवेवारे स्वमार्गीयनकूं एसो हि दुःख संभावनीय हैं जो दुःख निरोधकूं सिद्ध करिकें प्रभुके प्राकटयको साधक हे; तासूं वादुःखकी सर्वदा संभावना करिकें श्रीमहाप्रभुजी स्वमार्गीयनकूं लक्षणावृत्तिसूं सूचना करत हैं. दुःख ब्रह्मानंदकूं

तुच्छकरिविवारो होयवेसूं सर्वोत्कृष्ट हे ओर अतिदुर्लभ होयवेसूं वाकी संभावनामात्र करी हे परंतु प्रार्थना कीनी नहिं तामें हू सर्वदा नहिं किंतु कदाचित् जो होय तो फेर कहा कहेनो ? एसें तवथा उत्कंठा हि करनी एसें सूचन कियो हे. श्रीमातृ-चरण ओर श्रीनंदादिकनकूं पुत्रोत्पत्ति ओर तापीछें विनके लालन. क्रीडन, अवलोकन प्रभृति नानाप्रकारके मनोरथरूप, और श्रीस्वामिनीजीप्रभृतिकूं प्रभु प्रकट होयवेकी आशासूं तातामनोरथरूप, आप प्रकटभये तापीछे हू पूतनादिकनकी क्रूरदृष्टिपतनरूप, क्रीडामें आसक्तिसूं भोजनादिमें विलंब-करिकें भयो एसो दुःख यत्शब्दसूं लेयवेको अभिप्राय हे. एसें बहोत दुःख कहे हे सो विस्तारके भयसूं यहां नहिं लिखसके हैं. ॥ १ ॥

एसें इनके दुःखकी संभावना करिकें तापीछें उत्पन्न भये अनिर्वचनीयसुखकी हू संभावना द्वितीयप्रलोकसूं करत हे.

**श्लोकः—गोकुले गोपिकानां च सर्वेषां**

**ब्रजवासिनाम्**

**यत्सुखं समभूतन्मे भगवान् किं विधास्यति ? । २ ।**

टीका—श्रीगोकुसमें श्रीगोपीजनकूं ओर सबब्रजवासीनकूं जा आछिभांतिसूं सुख भयो सो वासुखको दान प्रभु मोकूं

करेंगे ? पूर्वश्लोकमें वणित दुःख प्रभुके प्राकट्यमें कारण हे. कारणरूप दुःख पहिलें भये पीछें प्रभु प्रकटे हैं तापीछें सब सुखरूप होय हैं सो सुख बालभावसूं लेयके प्रेखपर्यकमें आंदोलन, रिंगण, दधिदुग्धादिचौर्यादिकेलि, वत्सगोचारणादि, वेणुगीत, गोवर्द्धनोद्धरणादि सबलीला भक्तमनोरथ पूर्णकरिवेकेलिये होयवेसूं सुखरूप हे तापीछें विप्रयोग भयेपीछें हू प्रभुकी लीलाको स्मरण करिवेसूं तादात्म्य भयेसूं दुःखको भान नहिं रह्यो तासूं सर्वसूं विलक्षण विप्रयोगात्मक सुख. श्रीस्वामिनीजीप्रभृतीनकूं ओर सब ब्रजवासीनकूं श्रीगोकुलमें आछीभांति मिल्यो हतो वाहिसुखकी याश्लोकमें आपश्री स्वसंबंधमें संभावना करत हैं. याश्लोकमें वणित सुख अति-दुर्लभ हैं तथापि सर्वसामर्थ्यवान् प्रभूनने आगें जेसैं आपतेहिं भक्तनकूं दियो एसैं अबहू आपके सामर्थ्यसूं सो सुख देयगें एसैं जतायवेके लिये मूलमें भगवत्पदको ग्रहण कियो हे ॥२॥

एसैं निरुद्धनके दुःख ओर सुखके अभिलाषकी अपनमें संभावना करिकें जब एसो सुख भये पीछें विप्रयोगजन्य दुःखमें विलक्षण सुख उत्पन्नकरिवेवारो काहूप्रकारको उत्सव होय हे जाकी तृतीयश्लोकमें संभावना करत हैं.

श्लोकः—उद्धवागमने जात उत्सवः सुमहान् यथा ॥

वृन्दावने गोकुले वा तथा मे मनसि क्वचित्? ।३।

टीका-उद्धवजीके आगमनसूँ वृंदावन ओर श्रीगोकुलमें जेमें महान् उत्सव भयो एसो मेरे मनमें कबहूँ होयगो ? जेसें पति विदेश गयो होय सो वहांसूँ अपने सेवककूँ घर भेजे तब वाकीं माताप्रभृतिकूँ ओर विशेष करिके वाकीं स्त्रीके मनमें अपने स्वामिके स्मरणसूँ उत्पन्नभये—औत्सुक्यविशेषसूँ उत्सव होयवेकी लोकमें रीति हे. यहां प्रस्तुतमें हूँ भगवत्दाव-  
 वारे ओर प्रभुके संदेश लेयके आयवेवारे उद्धवजी उत्सवरूप हें विनके आगमनसूँ बड़ो उत्सव भयो. ये भगवदीयको आगमन ओर प्रभुको संदेश यह सब अलौकिक होयवेसूँ अनिर्वचनीय उत्सव भयो एसें मूलके महत्शब्दसूँ जान्योजाय हे. तामें श्रीवृंदावनमें श्रीस्वामिनीनकोँ उत्सव भयो ओर श्रीगोकुलमें मातृचरणादीनकूँ उत्सव भयेको समजलेनो. उत्सव मानसधर्म होयवेसूँ मनमें होयवेकी अभिलाषा राखिवेकी आज्ञा मूलश्लोकमें करी हे. भगवदीयकूँ प्रभुके संबंधवारे (भक्त) के समागममें साक्षात् प्रभु पधारे एसो उत्साह सर्वप्रकारसूँ राखनो चाहिये. एसें न मानिवेसूँ भगवदीयत्व न रहे एसो सिद्धान्त हे. श्रीगोकुलवासि सब तथा श्रीस्वामिनी-  
 जीप्रभृति तो सर्वथा प्रपन्न हते इनकूँ उत्सवरूप उद्धवजीके आगमनसूँ प्रथम यह भगवद्वेषधारी कोन हे ? एसे विस्मयसूँ उत्कंठारूप उत्सव भयो, तापीछेँ जब विनकूँ भगवदीयपनेसूँ जाने तब हमारे घर आये तामें हूँ परम भक्त हें ओर निरंतर  
 पौ. १७

पास रहिवेवारे हैं ऐसैं जान्यो तब तो हमारे भाग्य जो यह प्रभुके समाचार लेयकें आये ओर प्रभुनें हि पठाये होयगें ऐसैं न होय तो सेवक स्वामिके चरणकूं न छोडे तासूं प्रभुकी हू हमारी उपर कृपा हे क्यो जो कृपा न होय तो भगवदीयको आगमन न होय. ओर भगवद्भक्त जामें न आवे सो घरहि न बाजे जाघरमें भक्त आवे वामें भक्तके स्नेहसूं प्रभु हू पधारे हैं, उद्धवजीकूं जब भगवदीय जाने तब विनको सत्कार करिवेको उत्साह भयो. आधुनिक-निरोधमार्गीयनकूं हू भगवदीयके संगके अभावको दुःख मनमें राखिवेकी श्रीमहाप्रभुजी आज्ञा करत हैं. ऐसैं करतें सर्वप्रकारसूं चित्तको निरोध भयो तो प्रभु प्रकट होयकें सुखको हू दानकरेगें एसो भावको यासूं ज्ञान होय हे ॥ ३ ॥

यहा शंका करे हैं जो ज्ञानमार्गमें तो चित्तको जब निरोध होय तब ध्यानादिकरिकें आत्मसुख होय हे ओर याभक्तिमार्गमें तो दुःखकरिकें चित्तको निरोध होय तो हू दुःखहि रहे हे वामें कोनसो उत्कर्ष हे ?

एसी शंकाको समाधान अब करत हैं.

श्लोकः—महतां कृपया यावद् भगवान् दययिष्यति ।  
तावदानन्दसन्दोहः कीर्त्यमानः सुखाय हि ॥४॥

टीका—बडेनकी कृपाकरिकें जबताई प्रभु दया करेंगे तबलों आनंदके निधि प्रभु कीर्त्यमान ( कीर्तनकराते ) होय तो सुखके लिये हि हैं. भगवदीयके दर्शनमात्रसं जिनकूं बडो उत्सव होय हे ओर सर्वदा भगवदावेशसं आपहि उत्सवरूप हे अंतरंग भक्त महान् कहेजाय हैं उनकी कृपातें प्रभु दया करें हैं तब प्रकट होयकें स्वरूपानंद देय हैं. तब प्रकटित बहोतभाव-वारे भगवदीयके संग जिनको कीर्तन कियोजाय हे एसे प्रभु साक्षात् उनके अंतःकरणमें प्रकट होयकें सकल इन्द्रियनकी आसक्ति आपके स्वरूपमें करायकें सुखको दान करत हैं. एसें कीर्तनकरिवेसं हू आनंद देत हैं तासं गुणगानहि करनो. एसें याश्लोकसू जतायो हे. याश्लोकमें प्रभुकी दया होयवेमें कारणपनेसं बडेनकी कृपा कही हे. महत्शब्दसं श्रीस्वामिनीजी कहे हे एसें समजनो. अथवा एसे भावात्मक स्वरूप आप ( श्री आचार्यजी ) को सूचन करे हे तासं श्रीमहाप्रभुजीकी कृपा भयेसं हि प्रभु आनंदको दान करे अन्यथा न करे एसो हू सूचन महत्पदसं होय हे तासं कीर्तनद्वारा हू प्रभुनके गुण ताप्रकारके आनंदकूं देवेवारे हैं तासं गुणगानहि करनो. ॥४॥

प्रभुके गुणको गान तो सब कोउ करत हे तासं

सबनकूं सुख होय हे तो फिर निरोधवारेनकूं

कहा विशेष हे ? एसी शंकाको समाधान

अबके श्लोकसं करत हैं.

श्लोकः—महतां कृपया यद्वत् कीर्त्तनं सुखदं सदा ।

न तथा लौकिकानां तु स्निग्धभोजनरूक्षवत् ॥५॥

टीका—बडेनकी कृपाद्वारा कीर्त्तन जैसे सदा सुखकूं देवेवारो हे ऐसे संसागसक्तलौकिको कीर्त्तन सुख नहिं हे जैसे स्निग्धभोजन शरीरमें सकलेंद्रियनको पोषण करे हे एसो रूक्षसूं नहिं होय हे. प्रथमश्लोकमें कहे जो महान्, उनकी अपनो भाव समर्पवेवारी कृपाकरिकें निरोधमार्गीयन, परस्पर गुणगानमें भाव दोहोत बड़िवेसूं सकलेंद्रियनको स्वरूपमें निरोध भयेसूं प्रपंचकी विस्मृतिपूर्वक भगवदानंदमें मग्न होयजाय हैं. लौकिकप्रमाणधर्ममें निष्ठावारे भक्त ओर ज्ञानीनकूं उपर कह्यो निरोधमार्गीयनके भावको अभाव होय-वेसूं कीर्त्तनप्रभृति सुख देवेवारो नहिं होय हे. लौकिक ओर अलौकिकमें जितनो तारतम्य हे इतनो निरोधमार्गीय ओर ज्ञानिप्रभृतिमें तारतम्य हे तासूं निरूद्धनके कीर्त्तनमें बहोत विशेष हे ॥ ५ ॥

यहां शंका होय जो कीर्त्तन सुखदेयवेवारो हे तो हू दुःख तो सदा मिटत नहिं तब गुणगानमें कहा उत्कर्ष हे ? यासूं तो ज्ञानीनकूं सकलेंद्रिय-प्रभृतिको आत्मामें लयभयेसूं अत्यंत दुःखाभावरूप सुख होय सो उत्कर्ष प्रमाणसिद्ध दीखे हे. याको समाधान अब करत हैं.

श्लोकः—गुणगाने सुखावाप्तिर्गोविंदस्य प्रजायते ।

यथा तथा शुकादीनां नैवात्मनि कुताऽन्यतः ॥६॥

टीका—गोविंदके गुणगानमें निरुद्धभक्तनक्रं जेसो सुख होय हे एसो आत्मानंदमें शुकादीनकूंभी नहिं होय हे तो भक्तिरहितकूं तो कहांते होय ? यद्यपि शुकदेवजीने ये लीला गाई हे ओर भक्तिरससूं पूर्ण हे तो हू यह आनंद उनकूं प्राप्त न भयो एसें कहिवेके लिये मूलश्लोकमें श्रीशुकदेवजीको नाम ग्रहण कीयो हैं तासूं यह जान्योजाय हे जो यह आनंद प्रभुकी कृपाकरिकेहि प्राप्त होय हे ओरतरहसूं नहिं होय हे तामें दुःखहि साधक हे तासूं दुःखहि परमपुरुषार्थरूप हे ओर नहिं हे, जहां आत्मसुखकी अपेक्षा यह दुःख सर्वोत्कृष्ट हे तब यह दुःखसाध्य—आनंदकी उत्कृष्टतामें तो कहा कहेनो ! एसें कैमुतिकन्यायसूं आनंदको सर्वोत्कृष्टपनो सिद्ध होय हे, अथवा शुकादिकनक्रं गोविंदके गुणगानमें जेसी सुखप्राप्ति होय हैं तेसी आत्मामेंहू नहिं होय हे तो ओरसूं तो कहांसूं होय ? तासूं शुकदेवजीने कइयो हे जो “ में यद्यपि निर्गुनमें निष्ठावारोहूं तथापि उत्तमश्लोक ( भगवान् )की लीलाकरिकें मेरो चित्त गृहीत भयो हे तासूं श्रीभागवतरूप बडो आख्यान पढ्योहूं. ” यापेसूं एसें सूचित भयो जो आत्मसुखसंहूं भगवद्गुणगानमें अधिक आनंद हे. ॥ ६ ॥

दुःख परमपुरुषार्थरूप होयवेसूं सर्वदा प्रभु निरोध-



मार्गीयनकं दुःखहि स्थिर राखे हे वा कोई समय  
सुखको दान करे' हैं ? पत्नी शंकाको समा-  
धान अब आगैके श्लोकसों करत हे'.

श्लोकः—क्लिश्यमानान् जनान् दृष्ट्वा कृपायुक्तो

यदा भवेत् ।

तदा सर्वं सदानंदं हृदिस्थं निर्गतं बहिः ॥७॥

टीका—जब अपने शरणागतनकूं अत्यंत क्लश्युक्त देखिकें प्रभु कृपायुक्त होय तब सदा आनंदरूप प्रभु हृदयमें विराज-  
वेवारे आपको स्वरूप बहार प्रकटकरें हैं; इतने साक्षात् स्वरूपको संबंध होयवेकी अभिलाषासूं उत्पन्नभई बहोत आर्त्ति ( विरह ) करिकें क्षणक्षणमें जागरणादि अवस्थाके भेदकरिकें क्लेशकूं अनुभविवेवारे अपने जननकूं देखिकें प्रभु कृपा करत हैं तब भक्तनकी ताताइंद्रियनमें सर्वांशकरिकें आनंदकूं पोषण करिवेके लिये भावात्मकताकरिकें सर्वांशपूर्ण सदानंदरूप प्रभुको स्वरूप भक्तके हृदयमें विराजे हैं. सो प्रभु बहार प्रकट करत हैं सो बहार आनंददानदेयवेकेलिये हृदयतें बहार पधारे हैं एसें यह आनंद एककृपासंहि सिद्ध होयवेवारो हे तासूं अत्यंत दुर्लभ हे. ॥ ७ ॥

श्लोकः—सर्वानंदमयस्यापि कृपानन्दः सुदुर्लभः ॥

हृद्गतः स्वगुणान् श्रुत्वा पूर्णः प्लावयते जनान् ॥८॥

टीका—सर्वानंदमयको कृपानंद अत्यंत दुर्लभ हे हृदयमें विराजिवेवारे प्रभु अपने गुणको श्रवणकरिकें पूर्ण होयकें अपने जननकूं स्वानंदनिमग्न करत हैं. मुक्तिप्रभृतिमें मिलवेवारको आनंद हू याकोहि अंश हे परंतु वह साधनकरिकें लभ्य हे ओर यह आनंद तो एक कृपाकरिकें प्राप्य होयवेसूं प्रभु दान करें तब हि मिले तासूं मूललोकमें सुदुर्लभ कद्यो हे अथवा दुःखकरिकें जाको लाभ होय सो दुर्लभ कद्योजाय इतने ससाधननकूं नहि मिलवेवारो किंतु कृपावारेनकूं हि सुलभ हे एसो अर्थ हू होय हे ओर ऐसे प्रभुके संबंधकी अभिलाषाजनित-दुःखसूं भये-तापसूं जो. भक्त परस्पर गुनगान करे ताश्रवणकरिकें हृदयमें विराजवेवारे प्रभु पूर्णकृपाकरिकें बहार प्रकट होयकें अपनेनकूं वारसके समुद्रके तरंगमें तरण करावत हैं. जैसेजेस जाजाइंद्रियनमें दुःख भयो होय ताताइंद्रियनमें तेसेतेसे आनंदपूर्णता करत हैं ॥ ८ ॥

अब ये सब बात कहिवेको प्रयोजन कहत हैं,

श्लोकः—अहं निरुद्धो रोधेन निरोधपदवीं गतः ।

निरुद्धानां तु रोधाय निरोधं वर्णयामि ते ॥९॥

टीका—में निरुद्धनके मार्गमें अंगीकृत हूं ओर सकलेंद्रियनके रोधकरिकें निरोधकी पदवी इतने फलदानकूं प्राप्तभयो हूं तासूं आधुनिक-निरोधमार्गीयनकूं निरोधसिद्धहोयवेकेलिये तेरे अर्थ निरोधको वर्णन करूं हूं; इतने साक्षात् प्रभूनने मेरो

निरोधमार्गमें अंगीकार कियो है तापिछे रोधकरिके गुणगान-  
द्वारा सकलेंद्रियनके निरोधके फलकूं प्राप्त भयो हूं तासूं  
विनप्रभूनकी आज्ञासूं आधुनिकनकूं निरोधहोयवेकेलिवे यह  
तोकूं कहूहूं तासूं मेरे कहेप्रमाणकरिवेसूं सर्वथासिद्धिहोयगी  
एसे श्रीमहाप्रभुजी याश्लोकसूं सूचन करतहैं. कोउ भाग्यवानको  
उद्देश करिके आज्ञाकरेहें जो तेरे अर्थ वर्णन करूहूं, क्यों जो  
साक्षात् प्रभूनने मेरो निरोधमें अंगीकारकियेसंहि में यहवर्णन  
करिसकूंहूं ओरको यह वर्णन करिवेको सामर्थ्य नहिंहे एसोहू  
सूचन होय हे.

एसे निरोधके स्वरूपको वर्णन करिके सर्वप्रकारसूं  
कलेंद्रियताको निरूपण करत हें.

**श्लोकः—तस्मात् सर्वं परित्यज्य निरुद्धैः सर्वदा गुणाः ।**

**सदानन्दपरैर्गेयाः सच्चिदानन्दता ततः ॥१०॥**

टीका—तासूं सर्वको परित्यागकरिके सदानन्दश्रीकृष्णमें  
निष्ठावारे सत्पुरुषनके संग निरंतर गुणगान करनों. एस  
करिवेसूं सच्चिदानन्दपनो होय हे; इतने सर्वसूं उत्कृष्टकृपानन्द  
मिल्यो हे तासूं ओर सबबातको त्यागकरिके (इतनेवासना-  
युक्तसब—अहंताममताको त्याग करिके) उद्भटभावसूं निरंतर  
गुणगान करनो यह हि सेवकको सहजधर्म हे तासूं भगवदानन्द-  
के अभिलाषीनकूं यह हि निरंतर करनों. अब गुणगान  
करिवेकी आज्ञाकरी परंतु गुण, लीलाके भेदकरिके अनेक

प्रकारके होयवेसूं कैसे गुणको गान करिवेको हे ? एसी शंकाकी निवृत्तिके लिये कहत हैं जो साक्षात् रसात्मक जो श्री पुरुषोत्तम तामें पर एसे रसात्मकरासादिलीलारूप-गुण हि गानकरिवेयोग्य हैं. रसात्मक-प्रभुमें निष्ठावारे-भगवदी-यनके हि संग गुणगान करनें एसी हूयापदको अर्थ होयसके हे. तासूं भगवानमें निष्ठा न होय एसेनके संग भगवद्वात्ता हू नहिकरिवेको सूचन होय हे. एसें दुःसंगीनके संग वात्तादिक करिवेसूं हानि हि होय हे. एक क्षण हू अन्यथाभाव नहिं होयवेके लिये सर्वदा पद धर्या हे; तासूं एकक्षणहूं भगवद्गुणगान नहिं छोडनो. एसें करिवेसूं सच्चिदानंदता होय; इतनें अंतःकरणमें साक्षात्पुरुषोत्तमाविर्भावकी योग्यता होय जहां ज्ञानमार्गीय-परंकरु हू गुणगानको आनु-षंगिक फल हे वहां परमफलकी तो क्या बात करनी ? ॥११॥

यहां शंका करे हे जो निदृच्छनकूं हि सर्वपरित्याग-  
पूर्वक गुणगाग करिवेकी आज्ञा करी परंतु  
साधनमें निष्ठावारेनकूं न करी ताको  
अबके श्लोकसूं करत हैं.

**श्लोकः—हरिणा ये विनिर्मुक्तास्ते मम भवसागरे ।  
ये निरुद्धास्तएवात्र मोदमायान्त्यहर्निशम् ॥११॥**

टीका—प्रभूनने जिनकों छोडदिये हे वे संसारसागरमें मग्न भये हैं और जिनकों निरोध (पुष्टि) मार्गमें अंगीकृत किये हैं

वे हि निरंतर (प्रभुके आनंदकूं पायकें) हर्षकूं प्राप्तहोय हैं. प्रभु सर्वके दुःखकों हरे हैं तासूं इनको नाम हरि हे इनहरिननें (स्वानंददान देयकें दुःख मिटायवेकी इच्छा नहिं होयवेसूं) त्याग किये वे सब भवसागरमें डूबे; इतने बहोत अन्यसाधनमें प्रवृत्त रह्ये तो हू यह आनंद प्राप्त नहिंभयेसूं भवसागरमें डूब-गये. और स्वानंदको दान देयवेकी इच्छासूं जिनजीवनको पुष्टिमार्गमें अंगीकार कियो हे और जिनकों स्वरूपनिष्ठामें भावरूपहि एक साधन हे एसे अपने जन प्रभुकृपासूं हि हर्षकूं प्राप्तहोय हैं; इतने बहार ओर भीतर रसमें पूर्ण होय आनंद-समुद्रमें मग्न रहे हे. सो हू अमुकक्षणमें नहिं परंतु रात्रिदिनमें क्षणमात्र हू आनंदविच्छेद नहिं होय हे; तासूं यह सिद्ध होय हे जो निरोधमार्गीयनकूं हि यह आनंद होय हे साधनमें निष्ठा वारेनकूं नहिं होय हे ॥११॥

अब कहे हे जो निरोधमार्गीयनकूं हू पूर्व रह्यो संसार विद्यमान होयवेसूं ताता-विषयनमें आशक्त-ईन्द्रि-यनकूं विषयको विस्मरण होनो अशक्यजेसो दीखे हे, जव विषयविस्मरण न भयो तव तो गुणगानमें हू प्रवृत्ति अशक्य होय हे' पसी शंकाके समाधानपूर्वक कहत हे.

**श्लोकः—संसारावेशदुष्टानामिन्द्रियाणां हिताय वै ।**

**कृष्णस्य सर्ववस्तूनिभूम्न ईशस्य योजयेत् ॥१२॥**

टीप-संसारके आवेशसूं दुष्टमये-इन्द्रियनके हितके लिये

सर्व (इन्द्रियनसहित ऐहिक, पारलौकिक) वस्तु सुखरूप ओर सर्वके नियंता एसे श्रीकृष्णको संबंध करायकें विनमें लगावे निरोधको सुख देयवेकी इच्छासूं जिनको पुष्टिमार्गमें अंगिकार भयो हे एसे जीवनकूं अन्यसाधनमें प्रवृत्ति होय नहिं; क्यों जो अंगीकारके स्वभावसूं हि जेसो स्वरूपमें स्नेह होय एसो विषयादिकनमें न होय तो हू संबंधदोषको निवारण करिवेकेलिये आप श्री (श्रीमहाप्रभुजी) आज्ञा करे हैं जो संसारवेश इतने विषयभोगादिकनमें अहंताममतात्मक आवेश ताकरिकें दुष्टभये ओर अहंताममतासूं उत्पन्नभये-बंधनके दुःखके अज्ञानसूं वाकी निवृत्तिकरिवेमें विमुखतावारी-इन्द्रियनके हितार्थ इनसवनकूं संसारके अन्यधर्ममेंतें छुडायकें श्रीकृष्णमें हि लगावें, ओर वहहि इन्द्रियनकी सार्थकता हे, इन्द्रियनकी (प्रभुमें विनियोग होय तब हि) कृतार्थता होयवेको श्रीभागवतमें 'अक्षण्वतां फलमिदं' इत्यादिश्लोकनसूं कह्यो हे, एसे इन्द्रियादिककूं संसारधर्ममें छुडवायकें प्रभुमें योजवेकी आधुनिकनकूं शिक्षा हू याश्लोकसूं करी हे, एसे प्रभुमें विनियोग भयेपीछें जहांताई प्रभुको साक्षात्कार न होय तहांताई गुणगानमें हि आसक्त रहें एसें करत करत जब विनमेंहि आसक्त होय तब भगवदावेश होय ओररीतिसूं न होय. ॥१२॥

एसें सन्नपदार्थनको प्रभुनमें विनियोग कियेसूं ह

पूर्वके संसाराध्यासस्य विषयनमें कलुक अहंताममता-  
 रूप संसार तो रहे हि ओर वाविषयको त्याग  
 कियेस्य कलुक मनमेंहु तज्जनित क्लेश  
 रहे तो गुनगानमें सुखहि होयवेको  
 कैसे कह्यो हे ? एसी शंका  
 होय तहां कहत हे ।

श्लोकः—गुणेष्वविष्टचित्तानां सर्वदा मुरवैरिणः ।

संसारविरहक्लेशौ न स्यातां हरिवत् सुखम् । १३ ।

टीका- निरंतर मुरवैरि (प्रभु) के गुनगानमें आविष्टचित्त  
 वारेनकूं संसार ओर विरहको क्लेश न होय किंतु हरिकी-  
 नाई सुख होय हे; इतने आसक्तिकरिके गुणगान करे तब  
 वामें चित्त आविष्ट होयजाय तब उनकूं पूर्वोक्तसंसारत्याग  
 ओर तासूं भये क्लेश नहिं होय हे; क्यों जो विनकूं तो  
 प्रपंचके निरोधपूर्वक गुणगानमें चित्तको आवेश होय हे  
 तब विषयादिकके अध्यासकी संभावना हू नहिं होयसके हे  
 तो वाके त्यागसूं भयो क्लेश तो कहांते संभवे ? यह सब बात,  
 वेणुगीतके श्रीसुबोधिनीजीमें हे “ जागृत ओर स्वप्नावस्थामें  
 हू श्रीप्रभुजीकी क्रीडाकों देखते हैं ” एसे विवरणमें आपश्रीने  
 वर्णन कियो हे तहां हे. यहां शंका करे हे जो आसक्तिजन्य  
 सुख हू विषयजन्य-सुखकी तुल्य हि होयगो एसी शंकाको  
 निराश करे हैं जो विषयसुख तो भोगमें आसक्तिबढायवेवारो  
 होयवेसूं वह संसारजनक सुख हे और प्रभुमें आसक्ति तो

जैसे प्रभु सकलके दुःख दूरीकरिवेवारे हैं, नित्य. लौकिक-संसार-निवर्त्तक हैं तैसे वामें आसक्तिजन्य-सुख हू संसार-निवर्त्तक हे तासूं पूर्वोक्त संसारासक्ति ओर भगवदासक्तिके सुखमें बहौत वैलक्षण्य होयवेसूं तुल्यताकी संभावना हू नहि होयसकत हे; तासूं हरिवत् सुखम्' एसे सुखमें हरिको दृष्टांत दियो हे ॥ १३ ॥

एसे सधनको विषयवासनारहित भगवदासक्ति जब दृढ होय तब जो होय सो अब कहत है.

**श्लोकः—तदा भवेत् दयालुत्वमन्यथा क्रूरता मता ।  
वाधशङ्काऽपि नास्त्यत्र तदध्यासोऽपि सिद्ध्यति । १४ ।**

टीका—(जब गुणगान सिद्ध होय) तब प्रभुकी दया होय एसे न होय तो क्रूरता मानिजाय. यामें वाधकी शंका हू नहि हे एसे अत्यंत विरहजतापरूप आसक्तिकरिके सकल इंद्रिये प्रपंचके अध्यासरहित होय. जब पूर्ण निरोध स्वरूपात्मक सिद्ध होय तब भुको दयालुपनो सिद्ध होय ओर प्रचुरतापात्मक भावकी आसक्ति होय तब प्रभु नारदजीकीसीनाई आसक्तिकरिके तापमें प्रतिबंधक होय तब तो प्रभुकी क्रूरता मानिजाय. यहां क्रूरतापदको दूसरो यह अभिप्राय हे जो साक्षात् अपनो करिके जाको अंगीकार कियो हे एसो पुरुष प्रभूकूं आछो लगे एसो स्वधर्मरूप कृत्य जबताई न करे तबताई प्रभूकोहू क्रोध वा जीवपे रहेहें एसो. ' क्रूरता ' यहपदसूं जान्योजाय



हे. अब शंकाकरे हैं जो सर्वत्यागकरिके गुणगानमें प्रवृत्ति करे तब तो कालकर्मादिकको बाध आवे ? याके समाधानमें कहत हैं जो गुणगानमें बाधकी शंका हू नहिं होय हे तो बाध तो कहांते होय, सकलईन्द्रियनमें प्रभुकी अविशिष्टिपनेसं स्थिति होयवेसं कोनसं बाध होयसके ? स्वयं प्रभु हू बाध न करसके तो ओरकी तो कहा बात ? यह सबबात सन्न्यास-निर्णयग्रंथमें अत्रारंभे यहांसं लयेके 'हरिरत्रनशक्नोति' यहां-पर्यंतमें कही हे. यहां अत्र' (यहां) पदसं ज्ञानमार्गमें बहोत विघ्न होयवेको सूचन होय हे. यहां शंका करहें जो स्वरूपकूं मिलवेके अभिलाषको विद्यमानपनो हे तासं प्रभूके संग भेदज्ञान तों रहेहिहे. सो ताके (देहादिकके) अभिमानसं होयहे तब सर्व बाधहिभयो एसी शंका होय—'तहां कहत हैं जो ज्ञानमें जेसे 'सोऽहं' एसी, स्फूर्ति होय तेसी अपने (देहादि) नमें प्रभूको हि अध्यासरूपपनेसों भान सिद्धहोय हे परंतु अपनो भिन्नत्व नहिं स्फुरे हे. जेसे संसारमें रखेनकूं ताको अध्यास होय एसो या अवस्थामें साक्षात् पुरुषोत्तमको अध्यास होय हे. पूर्वस्वभाव हि पलट जाय हे एसो सिद्धयति' पदसु जान्यो-जाय हे. यह बात श्रीभागवतमें 'तन्मनस्कास्तदालापाः' यहश्लोकके विवरणमें सविस्तरहे तासुं विशेषजिज्ञासकूं चापेसुं जानलेनों. ॥१४॥

यहां शंका करे हे जो वैराग्य नहिं होयवेसं पूर्वोक्त

प्राकृत-विषयको अध्यास कैसे निवृत्त  
होय ? याको समाधान करत हैं.

**श्लोकः—भगवद्धर्मसामर्थ्यात् विरागो विषये स्थिरः ।**

**गुणैर्हरेः सुखस्पर्शान्न दुखं भाति कर्हिचित् ॥१५॥**

टीका—भगवद्धर्म बलसो विषयमें दृढ वैराग्य होय हे प्रभुके गुणकरिकें सुखरूप-स्पर्शसों दुःखको कदाचिदपि भान नहिं होय हे सकलऐश्वर्यादिकगुणयुक्त-प्रभुके धर्म गुणगान-द्वारा अंतःकरणमें प्रवेश करे हैं तिनके सामर्थ्यसों प्राकृत-विषयमें ओर प्राकृतपनेसूं प्रभुमें हू एसें धर्मविशिष्ट-पुरुषकूं विराग रह्योहि हे; इतने विषयपनेसूं तो सर्वत्र वैराग्यहि हे परंतु तिनकूं पराकाष्ठापन्न अलौकिकानंदरूप साक्षात् प्रभुमें निरूपधि स्नेहकरिकें केवल तदीयपनेकी हि बुद्धि होय हे सो रासपंचाध्यायीमें ब्रजभक्तनने प्रभूनप्रति कह्यो हे जो “आप हमकूं घर जायवेकी आज्ञा करत हैं सो कछु लौकिक-विषया-दिककी इच्छासूं हम आये हैं एसी संभावना करिकें करत हैं परंतु हम तो सर्वविषयनकूं छोडिकें आपके चरणमूलकी शरण आये हैं” इत्यादिक निरूपणसूं जान्योजाय हे. तासूं हि प्रभुहू आप कृपा करिकें प्रथम कह्यो एसो आनंद अनुभवावे हैं. यहाँ शंका करे हैं जो प्रभु आनंदको अनुभव करावे हे. तब दुःख कैसे रहे हैं ? याके समाधानमें कहत हैं जो प्रभुके गुणगान (रूप-साधन) सूं सुखको स्पर्श होयवेसूं पूर्ण भये एसे

उन (निर धमार्गीयन) कूं सर्वदा तादात्म्य (अकता) सं दुःखस्वरूपको भान हि न होय हे तो दुःखकी संभावना तो कैसें होयसके ? ओर जो तापरूपता दीखवेमें आवे हे ताकूं सुखरूपता होयवेसूं सुखरूप हि हे ॥१५॥

अब उपसंहार करत हे ।

**श्लोकः—**एवं ज्ञात्वा ज्ञानमार्गादुत्कर्षो गुणवर्णने ।

**अमत्सरैरलुब्धैश्च वर्णनीयाः सदा गुणाः ॥१६॥**

टीका—एसें ज्ञानमार्गतें गुणगानमें उत्कर्ष जानिकें मत्सर ओर लोभरहित होयकें निरंतर गुणको हि वर्णन करनो. साक्षात् भगवदानंदको सर्व इन्द्रियनसूं स्वाद लियोजाय हे ओर ताके साधनरूप गुणगानको हू सुखरूपपनी होयवेसूं कष्टमाध्य—ज्ञानमार्गीय—साधन ओर अक्षरपर्यवसावि ज्ञानके फलसूं ज्ञानमार्गसूं गुणगानको बहोत उत्कर्ष जानिकें निरोधमार्गीय भगवद्भावके अंगीकारसूं लेयकें गुणकोहि वर्णन करे ओर कछु साधन न करे. गुणगान करते करते दृढासक्ति होय तब तो आपहितें गुणगान होय हे परंतु आजकाल स्वतःप्रवृत्ति न होयवेसूं गुणगान करिवेको विधि कियो जाय हे. तामें प्रतिबंधक-दोषद्वयको निवारण करिवेकी आज्ञा करतहे जो परको उत्कर्ष सहन न होय सके ताकूं मात्सर्य कहे हे सो मात्सर्य ओर लोभ इनकूं छोडिकें गुणगान करनो. सो काहेसूं छोडने ? जाकी

प्रतिबंधकताको निरूपण करत हैं जो भगवद्भक्तमें मात्सर्य होय तो वामें सौहार्द (मैत्री) न होय तब प्रभुको गुणगानहू न होयसके तासूं मात्सर्यको त्याग करनो ओर लोभमें तो अर्थसंचयकोहि ज्ञान रहे तो भगवदावेश कहातें होय ? भगवदावेश न होय इतनोहि नहि किंतु भगवद्भक्तकूं तो तासूं सर्वस्वकी हानि होय तासूं ताको त्याग करनो ॥ १६ ॥

यहां कहेहे जो सिद्धांत तो यह हे जो प्रभुके मुख-  
दर्शनादिकरिवेसूं भावकी घृद्धि होय हे तापेसूं  
स्वरूपसेवा करिवेको निश्चय होयहे ओर  
प्रकृतमें तो मुख्यपनेसूं गुणगानहि कइयो-  
जाय हे सो कैसें ? एसी शंका-  
होय तहां कहतहैं.

**श्लोकः—हरिमूर्तिः सदा ध्येया संकल्पादपि तत्र हि ।  
दर्शनं स्पर्शनं स्पष्टं तथा कृतिगती सदा ॥१७॥  
श्रवणं कीर्त्तनं स्पष्टं पुत्रे कृष्णप्रिये रतिः ।**

टीका—संकल्पसों हू प्रभुके स्वरूपको सदा ध्यान करनो  
एसें दर्शन ओर स्पर्शन स्पष्ट हे तेसें कृति ओर गति सदा  
करनी. यहां एसी दीखे हे जो प्रभु उद्धार के लिये साधन-  
मर्यादासूं सबनको अंगीकार करे हैं उनकूं मानसी सेवा फलरूप  
हे ताके साधनरूप मार्गमें निष्ठामुक्त सेवा हे सो करनेकी  
आवश्यक हे ओर जिनको पुष्टिमार्गमें निःसाधनपनेसूं अंगी-  
वा. १८

कार भयो हे तिनकों तो अंगीकारतेंहि प्रभुमें अत्यंत स्नेहभाव होयवेसं स्वरूपको अभिलाष होय हे ताकरिकें प्रभुके संग संलापादिरूप भावना होय हे सो भावना मनके धर्मरूप हे तासं ता करत करत मनहि भगवत्पर होयजाय तब मानसी सेवा सिद्धहोय हे उनकूं अब सेवाको प्रयोजकपनी नहि होय-वेसं ताकी दृढताके लिये गुणगान मुख्य हे तासं गुणगान करि-वेकी आगे आजा करी हे; तासं हि भगवद्वरणपीछें हि जिनको बहोत भाव बढ़यो हे एसें कुमारिका पूजादि सब छोडिकें गुणगान करनलगे. यह सविस्तर बात “भूयानन्दसुतः पतिः” या श्लोकके श्रीसुबोधिनीजीमें कही हे. साधनमार्गमें शरण आये भक्तनहू साधनरूप सेवा करे, तापीछें स्नेह होय, स्नेहानंतर ओर भाव उत्पन्न होय, तब गुणगानद्वारा ताभावकी दृढताके लिये त्याग करे. एसेकूंहू गृहस्थिति भावनाशकहे तासं ताको त्यागकरिकें प्रभुमेंहि मन राखिकें भावकी वृद्धिको यत्न करे एसें भक्तिवर्द्धिनीमें ‘तादृशस्यापि’ यहाँतैलयकें ‘त्यागं कृत्वा’ पर्यंत श्लोकमें श्रीमहाप्रभुजीने आजा करी हे. ओर पूर्व कही साधनरूपसेवा ताकियेसं स्नेहभाव होय तासं विरह-तापरूप दुःख होय सोविरहके दुःखकी निवृत्ति गुणगानतें हि होय तासों गुणगानकूं मुख्य कह्यो हे. अब कहत हैं जो ताप्रकार पुष्टिमार्गमें अंगीकार भयो हे ताके स्वभावसंहि उत्पन्न भये भावांकुर, ताकरिकें उत्पन्न भये नानाप्रकारके मनोरथ-

करिकें प्रभूके स्वरूपको ध्यान करना सो स्वरूपहि भावकराय-  
वेवारो हे तासूं नानाप्रकारके मनोरथजनित तापकी निवृत्तिके  
अर्थ ओर भाव के दाढर्थार्थ गुणगानहि करनें. यहां शंका  
करे हे जो अपने मार्गमें भूके स्वरूपको ध्यान करना  
ओर ज्ञानमार्गमें हू ध्यान करना तो अपने मार्गमें ध्यान होय  
तामें कहा विशेष ? तहां कहत हैं जो पूर्वकष्टप्रकारसूं नाना-  
मनोरथकरिकें स्वरूपमें भावना करनी एसें करत भावात्मक  
प्रभू वाहिभावनामें प्रकट होयकें दर्शन देय हैं; स्पर्श करावे हैं,  
सो सबनको भक्तकों अनुभव होय हे तेसें सब क्रिया, ओर  
प्रभूकी निकट गमन, तेसें प्रभूके शब्दको श्रवण, कीर्तन,  
प्रभूकी संग संलाप इत्यादि सबनको अनुभव भक्तिमार्गीय  
भावनामें हि होय हे ज्ञानमार्गमें काहूप्रकारको अनुभव नहि  
होय हे. ओर गानमें तो संकल्पमात्रसूं स्पष्ट अनुभव होय हे  
एसें अपि शब्दसूं सूचित होय हे. एसें भावनामें प्रकट होयकें  
सब दुःख मिटावे हे एसें 'हरिमूर्ति' यह पदसूं सूचित होय  
हे. यहां शंका करे हे जो भगवदंगीकारपूर्वक कृपा होय  
तब यह सब बने एसें " कृपायुक्त जब होय " यहश्लोकमें  
कह्यो परंतु ताप्रभूकी कृपा तो जब महत्पुरुषनकी कृपा होय  
तब होय सो "बडेनकी कृपासूं जब प्रभु कृपा करें" याश्लोकमें  
कह्यो हे; तासूं बडेनकी कृपा संपादन किये बिना प्रभुकी  
प्राप्ति कैसें होय? याको खुलासा करत हैं जो पूर्व कहे भक्त

तो पराकाष्ठापन्न (श्रीपुरुषोत्तम) के रसके भोक्ता और मात्स-  
र्यादिरहित हैं प्रभुके कृपापात्रमें अत्यंत स्नेहवारे होय हैं तासूं  
उनकूं श्रीकृष्ण जाकूं प्रिय हे अथवा फल देवेमें तत्पर ऐसे  
श्रीकृष्णकूं जो प्रिय हे ऐसे भक्तमें पुत्रतुल्य प्रीति होय हे तासूं  
वे कृपाकरिकें भावको दान करत हैं. ओर जब विनने भावको  
दान कियो तब विनको दानगुरुपनो सिद्ध भयो इतनें जाकूं  
भाव दियो ताकूं पुत्रपनो सिद्ध भयो तासूं पुत्ररूपपनो कहा  
हे—ओर अपने मार्गमें तो भाव देवेवारे श्रीगोपीजननहि हैं  
तासूं इनको गुरुपनो तो सन्यासनिर्णयग्रंथमे 'कौण्डिन्यों  
गोपिकाः प्रोक्ताः' याश्लोकमें स्फुट कह्यो हे. ओर जैसे पुत्रकूं  
काहप्रकारको दुःख देखिकें ताके उपर प्रेम होयवेसू ताकी  
निवृत्तिको उपचार करे हे तेसें यहां हूं एसी आर्त्ति देखिकें  
वात्सल्यसूं ताआर्त्तिकी निवृत्तिपूर्वक भावको दान करत हैं.  
तेसें पुत्रके विषे नानाप्रकारके ताके अपराध होय तो हू वाको  
विचार नहिं करतें वास्तल्य हि राखे हे तेसें तादृशभक्तनमें  
हू प्रीति हि राखेःहें सो उनकी प्रीति हू भावात्मिकाहि हे  
एसें तादृशभक्तनको भगवदीयके विषे पुत्रभावहे तेसें पुत्रनकूंहू  
भगवदीयपितामाताके विषे पितृमातृभावरखनो एसो यहां

सूचित होयहे ओर यहां गूढ अभिप्राय अनुमानसं जान्योजाय हे. श्रीकृष्णसं प्रिय तो बहोत हि हे परंतु 'स्फुरत्कृष्णप्रेमामृत' यहलोकमें कह्योआनंदरसरूप श्रीकृष्णको प्रियपनो तो जेसो श्रीमहाप्रभुजीके विषे विलासपामतहे ओरके विषे नहिं हे ता-प्रीतिको हेतुरूप श्रीस्वामिनीजीको प्रियपनोहु श्रीमहाप्रभूके उपर हि हे ओरनके विषे नहिं हे; क्यों जो श्रीमदाचार्यनकूं हि विनके भावात्मकपनो ओर विनके भावके मध्यपातिपनो सवनसं उत्कृष्ट हे तासं श्रीआचार्यजीको अभिप्राय एसो हे जो श्रीप्रभुनकूं में प्रिय हूं ओर पुत्रकी उपर जेसी प्रीति होय तेसी मेरी उपर विनकी (ब्रजभक्तनकी) प्रीति हे तासं मेरो अंगी-कृत जो एसो होयगो तो ताकी उपरहू एसी प्रीति होयगी. अथवा श्रीकृष्णकूं प्रिय एसो जो में ताकी उपर प्रीति हे एसं कहिवेसं आपकूं विनके भावात्मकपनो ओर विनके अंतर्गतपनो होयवेसं आधुनिकजीवनकूं आपकी कृपातें हि प्रियपनो होयगो एसं हू सूचित कियो हे. एसं श्रीआचार्यनकी कृपाकरिकें रतिरूप जो भाव भयो हे सो समग्रप्राकृतांशकूं छोडायकें क्रम-करिकें अलौकिक साक्षात् भगवदात्मक ताताविषनकूं इन्द्रियनमें जोडाईदेत हैं सो दृष्टांतसहित निरूपण करत हैं.



**श्लोकः-**पायोर्मलांशत्यागेन शेषभागं तनौ नयेत् । १८ ।

टीका-पायुइन्द्रियको जो मलांशत्यागकरिवेको धर्म हे सो छोटिकें शेषभाग शरीरको हि हे एसें समजनो; इतनें मलांशको त्यागकरिकें शरीरकूं शुद्धकरिवेवारी वा हि इन्द्रियहे एसें सम-  
झिवेसूं पायुइन्द्रियको शरीरशुद्धिमें उपयोग भयो ओर 'वायु-  
र्मलांशत्यागेन शेषभावं तनौ नयेत्' एसो हू पाठ कोउटीकामें अभिप्रेत हे ताको अभिप्राय एसो हे जो सर्वदेह तथा इन्द्रि-  
यनमें व्याप्त होयके वायु रहत हे सो भुक्तभई सकलवस्तुनके मलांशकूं वद्वार निकासिकें शेष जो सारांश होय ताकूं नाडी-  
द्वारा शरीरमें जेसें लेयँजात हैं तेसें निरोधवारो भक्तहू सब इन्द्रियनको भाव प्रभुनमें लेयजाय एसें पूर्ण निरोधसिद्ध होयहे. ॥१८॥

सब इन्द्रियनको जो जो भाव हे ताके स्वभावसूं हि  
सो सो कार्य आपसूं हि होय हे तेसें होयगो  
तामें इन्द्रियनको भाव प्रभुनमें योजवेकी  
आज्ञा क्यों करत हैं ! एसी जिज्ञासा  
होय तहां कहत हे ।

**श्लोकः-**यस्य वा भगवत्कार्यं यदा स्पष्टं न दृश्यते ।  
तदा विनिग्रहस्तस्य कर्तव्य इति निश्चयः ॥१९॥

टीका—जाजाइन्द्रियको भगवत्कार्य स्पष्ट दीखवेमें नहिं आवे ताताइन्द्रियको निग्रह करनो एसो निश्चय राखनो; इतनें यद्यपि एसो भक्त हे ताकी इन्द्रियन तो ताके भावके स्वभावसंहि एसी होय हैं तथापि लौकिकमनुष्यनके अनुसरिवेधं जाइन्द्रियको भगवत्कार्य स्पष्ट दीखवेमें जब नहिं आवे तब लौकिकसबनको त्याग करिकें भगवदीयनके संग गुणगान करिकें ताइन्द्रियको निग्रह करनो; अर्थात् इन्द्रियनकूं लौकिकमेंसूं फिरायकें भगवत्संबंधमें लगायवेके लिये हि उपर कर्त्तव्यको विधि कइयो हे ॥१९॥

बैतें पूर्णनिरोधस्वरूपको निरूपणकरिकें गुणगान  
निरोधकूं सिद्धकरिवेघारो होयवेसूं यह-  
धिको सर्वैकृष्टपनो निरूपणकरत हे.

श्लोकः—नातः परतरो मंत्रो नातः परतरस्तवः ।

नातः परतरा विद्या तीर्थ नातः परात् परम् ॥२०॥

इति श्रीमद्वल्लभाचार्यजीविरचितं

निरोधलक्षणं समाप्तम् ॥

टीका—यासंपर मंत्र, स्तोत्र, विद्या ओर तीर्थ कोउ नहिं हे; इतने मंत्रस्तोत्रादि हैं सो लोकवेदमें कछे फलकूं प्राप्त करिवेवारे हे तासूं लोक तथा वेदमें जो कामनावारे हैं इनकूं

मंत्रादिकनकी बडाई भलें हो परंतु जाकूं लोकवेदमें कही एसी कामना नहिं हे केवल प्रभुस्वरूपमें हि आसक्तिहे वाकूं मंत्रादिकनकी बडाई नहिं हे; क्यों जो प्रभूनको गुणगान हे सो लोकवेदसूं विलक्षण फल देयवेवारो हे ओर लोकवेदसूं अतीत (लोकवेद जहां न पहाँचिसके एसों), उत्कृष्ट हे सो यह जताय-वेकेलिये फलकी स्तुति करी हे. यद्यपि मंत्रादिद्वारा चित्तशुद्धि होयवेसूं चित्तको निरोध होय हे तथापि वामें क्लेश बहोत ओर फल अत्यंत अल्प हे ओर गुणगानद्वारा चित्तको निग्रह हू सुखसूं होय तथा फल सवनसूं उत्कृष्ट होय हे तासूं गुणगान हि सवनसूं उत्तम हे एसें जाननो. ॥२०॥

इति श्रीमद्भगवत्सामि श्रीनृसिंहलालजीमहाराजविरचित  
निरोधलक्षणकी ब्रजभाषाटीका समाप्त भई.



॥ श्रीकृष्णाय नमः श्रीगोपीजनवल्लभाय नमः ॥

## अथ श्रीसेवाफलकी ब्रजभाषामें संक्षिप्त टीकाको प्रारंभः ॥



अपने मार्गमें स्वतंत्र-पुरुषार्थपनेसूँ हि सेवा कीनीजाय हे ताके फलके निरूपणको यह ग्रंथ हे. तहां शंका होय जो अपने सेवा करे हैं सो स्वतंत्र-पुरुषार्थपनेसूँ हि करेहें ताकों दूसरो फल होय एसी अपेक्षासूँ नहिँ करे हैं तब सेवाके फलको निरूपण कैसे ? एसी शंका होय ताको समाधान एसेँ समजनो जो जीवितपर्यंत एसी सेवा जाजीवने करी होय ताकों देहावसानमें (अंतमें) जो गति होय सो यहां फलपदसूँ कह्यो हे; इतने यहां सेवाको फल होयवेको कह्यो हे सो अंतमें गति होयवेको समजनो सो फल आजके समयमें जो सेवारूप-भजन होय हे तामें अनुस्यूत जो सर्वात्मभाव रहेहे ताकरिकेँ प्राप्तहोयवेवारो जो विशेष भजनानंद हे ताहिरूप हे; तासूँ विशेष भजनानंदरूप जो फल हे ताकूँ सेवासूँ अतिरिक्त (दूसरे) पनो नहिँ आवे हे; इतने श्रीगीताजीमें श्रीकृष्णनेँ अर्जुनप्रति कह्यो हे जो “ अंतमें जाजा भावको स्मरण करतो र शरीरकूँ छोडे हे ताताभावकूँ प्राप्त होय हे. ” ओर “ अंतमें जो मति होय सो गति होय ” एसा न्याय हे; तासूँ सेवाको फल सेवाहि

हे ऐसे समजनो; इतने सेवासं दूसरो फल होयवेकी शंका-  
करिकें विरोध बतायो सो विरोध नहि हे. सो फल केसो  
होय ? ऐसे जानिवेकी इच्छा होय तहां कहत हैं.

**श्लोकः—**यादृशी सेवना प्रोक्ता तत्सिद्धौ फलमुच्यते ।

अलौकिकस्य दाने हि चाद्यः सिद्धयेन्मनोरथः॥१॥

फलं वा ह्यधिकारो वा न कालोऽत्र नियामकः ।

टीका—जैसी सेवा (मेनें) कही हे तेसी सेवा सिद्ध होय  
तत्र वाको फल होय सो याग्रंथमें कहत हैं. अलौकिकको दान  
होय तत्र आद्य (मुख्यफलरूप) मनोरथ सिद्ध होय. फल  
सिद्ध होय अथवा अधिकार सिद्ध होय तामें काल नियामक  
नहि हे; अर्थात् कालकी अपेक्षा नहि हे. सेवाफलको विवरण  
श्रीआचार्यचरणननेंहि कियो हे तामें आज्ञा करीहे जो “ सेवा  
यां फलत्रयम्—अलौकिकसामर्थ्य, सायुज्यं, सेवोपयिकदेहो वा  
वैकुण्ठादिषु ” इतने अलौकिकसामर्थ्य, सायुज्य अथवा  
वकुण्ठादिकलोकनमें सेवामें उपयोगी देह मिले, ऐसे सेवामें  
तीन फल हैं; अर्थात् श्रीआचार्यचरणनें जारीतिसूं स्नेहसहित  
श्रीब्रजभक्तनके भावपूर्वक सेवा करिवेकी आज्ञा करीहे  
ताहिरीतिसूं जीवितपर्यंत सेवा करे तो अंतमें फल होय सो  
कहतहैं. सोहि बात भक्तिवर्द्धिनीमें “सेवायां वा कथायां वा”  
याश्लोकसं जताई हे; तामें एसो अभिप्राय हे जो ‘ जीवित-

पर्यंत सेवामें अथवा कथामें जाकी दृढ आसक्ति होय ताको कोऊस्थलमें नाश नहिं हे' एसें कहिकें जीवितपर्यंत सेवा करिवेसूं फल होयवेकोहि जतायो हे. यहां तीन फल होयवेको विकल्प कियो हे सो भक्तिमार्गमें पुष्टि, मर्यादा ओर प्रवाह एसे भेदकरिकें जीवनमें तीनप्रकारको (भगवानको) अंगीकार हे; तासूं अधिकारिके भेदकरिकें तीन प्रकारकी सेवा होय हे तातें फलहु तीन प्रकारको क्रमकरिकें कह्यो हे: तामें प्रथम पुष्टिसेवाको फल कहत हैं जो अलौकिकसामर्थ्य होय इतने केवल सर्वात्मभावसूं हि प्राप्त होयवेवारो जो भजनानंद हे ताको अनुभव होय सो अलौकिक फलहे सो अपने कियेभये -कोटि साधनसूं प्राप्त होय एसो नहिं हे ताके अनुभवको योग्यताकरिवेवारो जो अधिकार हे सो अलौकिकसामर्थ्य कह्योजाय हे; भगवानके विप्रयोगकूं सहनकरसके सो अलौकिकसामर्थ्य एसोहु कोउ टीकाकारको अभिप्राय हे. एसें दोउप्रकारके अलौकिकसामर्थ्यमें दृष्टान्तरूप ब्रजभक्तहि हैं. दूसरो फल सायुज्य कह्यो हे सो मर्यादामें जाको अंगीकार ताकूं होय सो श्रीपुरुषोत्तममें सायुज्य होय अक्षरमें नहिं; क्यों जो अक्षरमें सायुज्य तो केवलमर्यादामें ज्ञानादिकनसूं होयहे ताकी अपेक्षासूं ता पुष्टिमें विशेष फल होनोहि चाहियें सो श्रीपुरुषोत्तममें सायुज्य होय सोही विशेषता समझनी; क्यों जो श्रीपुरुषोत्तममें सायुज्यवारेभक्तनकूं तो समयपाय बाहिर

प्रकटकरिकें \*भगवान् भजनानंदके अनुभवरूप फल देत हैं; तासूं पुष्टिमर्यादामें प्रथम सायुज्य मध्यमें भजनानंदको अनुभव ओर अंतमे फिर वहांहि सायुज्य होय हे, ओर तीसरो फल वैकुंठादिकनमें सेवौपयिक-देहकी प्राप्तिरूप हे सो प्रवाहमें जाको अंगीकार होय ताकूं होय. यहां जो वैकुंठ कद्यो हे सो श्रीलक्ष्मीजीकी प्रार्थनासूं ' रमावैकुंठ ' लोक सिद्ध कियो हे सो समजनो एसें कोउ ( टीकाकार ) कहतहैं ओर कोउ ( टीकाकार ) अक्षरात्मक व्यापिवैकुंठ कहतहैं तथापि मर्यादामें जाको अंगीकार होय ताकूं अलौकिकसामर्थ्य देकें फल देवेकी इच्छा प्रभु करें तब आद्य ( प्रथम फलरूप ) मनोरथ सिद्ध होय. ओर प्रवाहमें जाको अंगीकार होय ताकूं अलौकिक सामर्थ्य-रूप-फल कबहू न मिले यह अभिप्राय तो दोउअर्थमें समानहि हे. आद्य फल सो केवल स्वरूपकरिकेंहि साध्य हे एसो जतायवेकेलिये मूलमें ' हि ' अव्यय लिख्यो हे. तहां शंका होय जो आद्यफल होयवेको अधिकार न होय तो प्रभु हू केसें मनोरथ पूर्ण करें ? एसी शंकाकी निवृत्तिकेलिये कहतहैं जो फल अथवा अधिकार सिद्ध करें वामें काल नियामक नहिं हे.

---

\* जेसें अंतर्गृहगतानकू सायुज्य दियो हे सो जब विनके संग रमण करिवेकी भगवानकी इच्छा होय तब बाहिर प्रकटकरिकें विनके संग प्रभु रमण करत हैं ओर रमणद्वारा भजनानंदको दान करिकें फिर सायुज्य करत हैं.

अब वामें तीन प्रतिबंधक हे सो कहत हैं.

**श्लोकः—उद्वेगः प्रतिबंधो वा भोगो वा स्यात्तु  
बाधकम् ॥२॥**

टीका—उद्वेग, प्रतिबंध ओर भोग ये तीन सेवाफलमें बाधक हैं; इतनें मनमें उद्वेग रहे तो सेवामें चित्त हि रहे नहिं तब भगवत्प्रवणचित्तहोयवेरूप जो सेवा हे सो सिद्ध होय नहिं तब फल कहांसूं मिले ? दूसरो बाधक प्रतिबंध हे सो साधारण ओर भगवत्कृत एसे भेदसूं दोयप्रकारको हैं ताको विवेचन आगें आवे हे ओर तीसरो प्रतिबंध भोग हे; इतनें लौकिकभोगमें आसक्ति होय तबताई एकाग्रतासूं सेवा होयसके नहिं, एस तीन प्रतिबन्ध हैं ओर भगवत्कृत प्रतिबन्ध हे ताकी तो निवृत्ति होयसके नहिं तासूं उद्वेग लौकिक भोग तथा साधारण प्रतिबन्ध ये तीन्योको त्याग करिवेकी विवरणमें आज्ञा करी हे जो “त्रयाणां साधनपरित्यागः कर्त्तव्यः” इतने तीन्यो प्रतिबन्धनकी उत्पत्तीनके कारणरूप जो होय ताको त्याग करनो.’ तहां शंका होय ‘जो सेवा होय तासमय लौकिक अथवा वैदिक कार्य आयपडे तब सेवामें प्रतिबन्ध होय सो साधारण प्रतिबंध हे परन्तु यह कार्य लोकवेदसिद्ध हे तासूं वाको त्याग तो होयसके नहिं तब कैसें करनो ? एसी शंकाकी निवृत्तिके लिये विवरणमें आज्ञा करी हे जो लौकिक भोग छोडदेनो ओर साधारण



प्रतिबन्ध हे सो बुद्धिकरि के छोडनो; इतने सेवामें प्रतिबन्धक-पनेसं लौकिकवैदिककार्यरूप साधारण प्रतिबंध आवे तब सेवाके अनोरसमें करिवेको निश्चय करनो; अर्थात् पुत्रविवाहादिक लौकिक आवे अथवा कलू वैदिक कार्य आवे तब प्रथमसं हि बुद्धि करिकें सेवामें प्रतिबंध न होय एसी रीतिसं निर्वाह करनो. ओर प्रथमसं निश्चय होय सके एसो कोउ आवश्यक लौकिक, वैदिक कार्य आयपड्यो तब शरीरादिकसं वह कार्य करनो परन्तु बुद्धि भगवत्सेवामें हि राखनी वाकार्यमें राखनी नहिं ओर अलौकिक भोग तो तीन्यो फलमें जो मध्यम फल हे तामें मुख्य हे ॥२॥

एसें साधारण प्रतिबन्धको निरूपण करिकें  
भगवत्कृत प्रतिबन्धको निरूपण करत हैं.

**श्लोकः—अकर्त्तव्यं भगवतः सर्वथा चेद्गतिर्न हि ।**

**यथा वा तत्त्वनिर्द्धारो विवेकः साधनं मतम् ॥३॥**

टीका—भगवान्कूं सर्वथा कर्त्तव्य न होय तब तो गति नहिं हे तब तो जारीतिसं तत्त्वको निर्धार होय वारीतिसं विवेक राखनो येहि साधन मान्यो हे; इतनें जाजीवउपर भगवानकी विशेष कृपा होय ताको द्वेषादिक करिवेसं जो भगवान् सेवामें प्रतिबन्धकरें सो भगवत्कृत प्रतिबन्ध जाननो. तब भगवान् हैं सो सर्वसामर्थ्ययुक्त हैं ओर स्वतंत्र हैं ओर विनकी इच्छा वाजीवकी पास सेवा करायवेकी न भई तब सर्वथा फलको

अभाव हि हे एसें जाननों, तब मनमें एसी विचार होय जो भगवानने प्रतिबन्ध कियो तो दूसरेकी सेवा करिवेसूं दूसरो फल मिलेगो एसे विचारकी निवृत्तिके लिये विवरणमें आज्ञा करी हे जो भगवत्कृत प्रतिबंध होय तब अन्यकी सेवा हू व्यर्थ हे; क्यों जो व्याससूत्रमें कह्यो हे जो "सब फल भगवानसूं हि मिले हे." इतनें सर्वफल देयवेवारे प्रभू हि हैं ओर दूसरे फल देत हैं सो प्रभूके आधीन हैं तासूं प्रभूकी फल देयवेकी इच्छा न होय तब दूसरे हू फल देयसके नहीं तासूं सर्वथा वाकूं फलको अभाव हि हे, तहां शंका होय जो सर्वथा फल देयवेकी इच्छा प्रभूकूं न होय सो तो आसुरजीवनपें हे दैवीनपें नहीं हे ओर ये तो भगवान्मार्गमें आयो हे सेवा करे हे तासूं दैवी जीव हे ताकूं सर्वथा फलको अभाव केसें कह्यो जाय ? एसी शंकाकी निवृत्तिके लिये विवरणमें आज्ञा करी हे जो "तदा आसुरोऽयं जीव इति निर्द्धारः" इतनें सृष्टिकी आदिमें हू प्रभूकी इच्छासूं हि आसुरजीव भये तेसें जब प्रभूकी इच्छा जीवकूं आसुर करिवेकी होय तब जीव आसुर होय तासूं भक्तको अतिद्वेष करे तब वाजीव दैव भयो होय तो हू वाकूं आसुर करें इतनें सेवादिकसूं दैव दीखवेमें आवतो होय ओर भक्तको द्वेष करतो होय तब तो यह आसुर जीव हे एसें जाननो; तासूं प्रतिबंधके स्वरूपकूं जानिवेवारे जो वैष्णव हे उनकूं तो दुःसंगादिकनमें सावधान हि रहेनो, ओर जाजीवकूं

सेवामें भगवत्कृत प्रतिबंध होय ताकूं पीछें पश्चात्ताप होयकें सेवा नहिं बनवेको शोक होय तत्र पूर्वसूं वह भक्तिमार्गीय हे तासूं शोक न होयवेके लिये तत्त्वनिर्द्धारके उपायभूत विवेकरूप साधन कहत हैं जो जाप्रकारसूं शोकको अभाव होय वाप्रकारको ज्ञान राखनो ये हि साधन हे. तामें उपनिषदके ज्ञानकी अपेक्षा नहिं हे किन्तु सांख्यकरिके योगकरिके अथवा अन्य-उपायकरिकें तत्त्वनिश्चयकरिकें प्रभूननेहि यह सच कियो हे, सर्व जगत् ब्रह्मात्मक हे, में कोन हूं, साधन कहा हे फल कहा हे, दाता कोन हे, भोक्ता कोन हे, इत्यादिक तत्त्वको निर्द्धार करनो तासूं शोक निवृत्त होय. येहि अभिप्राय “तदा ज्ञानमार्गेण स्थातव्यं शोकाभावायेति विवेकः” एसी विवरणमें आज्ञाकरिकें जतायो हे. यहां शोकके अभावके लिये ज्ञानमार्गकरिकें रहेनो एसें कह्यो हे ताको अभिप्राय एसो दीखत हे जो ज्ञानमार्गकी स्थितिसूं शोकको अभाव हि फल होय ज्ञानमार्गीय मुक्ति न होय परंतु वाको एसो अभिप्राय हे जो मूलमें जेसो तत्त्वको निर्द्धार होय एसो विवेक राखनो एसें कह्यो हैं तासूं वाआसुरजीवमें हू आवेशी ओर सहज एसे होय भेद हे तामें जो आवेशी हे ताकूं तो आवेश रहे तबताई भक्तको द्वेषादिक करे ओर आवेश मिटिजाय तत्र वाकूं भक्तकी उपर द्वेषादिक हू मिटिजाय एसेकूं तो ज्ञानमार्गकरिकें सत्यलोकमें स्थिति अथवा अक्षरब्रह्मकी प्राप्ति होय ओर सहजासुर

होयगयो होय तासूं सर्वदा भक्त उपर द्वेष राखिकें द्रोह कर्यो-  
करे ताकूं तो ज्ञानमार्गकी स्थितिहूं हू वामार्गको फल न होय  
परंतु शोकाभाव रूप फल होय; इतनें शरणआयवेवारो जीवहू  
सहजासुर होयजायतो हू वाकूं शोकाभावरूप फल तो होय ।३।

अब इनबाधनको निरूपण जाके लिये  
कियो हे ताको प्रयोजन कहत हैं

**श्लोकः—**बाधकानां परित्यागो भोगेऽप्येकं तथा परम्।  
निष्प्रत्यूहं महान् भोगः प्रथमे विशते सदा ॥४॥

टीका—तीन्यो बाधकको परित्याग करनो; तामें भोग जो  
बाधक लिख्यो हे सो लौकिक भोग बाधक हे ओर अलौकिक  
भोग फलरूप हे तासूं भोगमें हू एक फल रूप हे ओर एक  
बाधकरूप हे एसें जाननो ओर निर्विघ्न महान् भोग हे ताको  
प्रवेश सदा प्रथमफलमें हे, इतनें भोगमें हू अलौकिकभोगरूप-  
फलमें प्रविष्ट हे तासूं बाहिप्रकारसूं भोग करनो ओर दोउ  
प्रतिबन्धमें पर नाम भगवत्कृत जो प्रतिबन्ध हे ताको तो  
त्याग होयसके एसें नहिं हैं तासूं वाकूं छोडिकें दूसरो प्रति-  
बन्ध हे सो बुद्धिकरिकें छोडनो. तहां शंका होय जो  
लौकिकभोग तथा अलौकिभोगकी तो तुल्यता हे वामें तार-  
तम्य दीखत नहिं हे ? ताकी निवृत्तिके लिये अलौकिकभोगमें  
विलक्षणता कहत हैं जो अलौकिकसामर्थ्यरूप प्रथमफलमें भग-  
नों. १८॥

वत्स्वरूपानन्दके अनुभवरूप भोग जब कियोजाय हे तब वामें कालादिककरिकें हू अन्तराय नहिं होयसकत हे एसें निर्विघ्न अलौकिक भोग सिद्ध होय हे ओर लौकिकभोगमें तौ सदा विघ्न आयो हि करे हे तासूं निर्विघ्नताको सर्वथा अभावहि हे एसें लौकिक और अलौकिकभोगमें बहोत भेद हे. तासूं हि सन्न्यासनिर्णयमें आज्ञा करी हे जो " वामें वाधा करिवेकूं हरि हू समर्थ नहिं हे तो दूसरो तो कोन करसके ? " तेसें यह भोग स्वरूपसं फलसूं ओर साधनसूं बढो हे क्यों जो विषयानन्द तथा ब्रह्मानन्दकी अपेक्षाकरिकें भजनानन्द बढो हि हे तासूंहि तीन्यो फलनमें अलौकिकसामर्थ्यरूप जो प्रथम फल हे वामें वाको (भजनानन्दको) प्रवेश हे. ॥४॥

एसें अलौकिक भोगमें विलक्षणता निरूपणकरिकें लौकिकभोग तथा साधारणप्रतिबन्धकू एक-करिकें वाके धर्मको निरूपणपुरःसर विलक्षण्यप्रतिपादन करत हैं

श्लोक-सविघ्नोऽल्पो घातकः स्याद् बलादेनौ सदा मतौ ॥  
द्वितीये सर्वथा चिन्ता त्याज्या संसारनिश्चयात् ॥५॥

टीका-लौकिकभोग विघ्नसहित हे तथा अल्प हे ओर साधारण प्रतिबन्ध बलात्कारसूं घातक हे तासूं ये दोउ प्रतिबन्ध माने हे. सो त्यागकरिवेयोग्य हे. ओर दूसरो

(भगवत्कृत) प्रतिबन्ध होय तब तो संसारको हि निश्चय हे तासूं सर्वथा चिन्ता छोडनी; इतनें लौकिकभोगमें आधिव्याधिलक्षण विघ्ने बहोत हैं तेसैं कर्म तथा कालादिकनसूं ह विघ्न होयवेको संभव हे तथा स्वरूपसूं फलसूं और साधनसूं ह अल्प हे ओर साधारण प्रतिबन्ध सेवासमयमें उपरोधवारो होयवेसूं घातक हे. एसैं दोय सदा प्रतिबन्धक माने हे. सो त्यागकरिवेयोग्य हे. एसैं अभिप्रायसूं विवरणमें आज्ञा करी हे जो “ एतौ सदा प्रतिबन्धकौ ” ये दोय सदा प्रतिबन्धक हे. एसैं लौकिकभोग तथा साधारण प्रतिबन्ध त्यागकरिवेयोग्य हे एसैं जतायकें भगवत्कृतप्रतिबन्धको त्याग होयसके नहिं ओर ज्ञानमार्गकी स्थितिमें अधिकार न होय एसा मंदमति होय तब त्राकूं फलकी चिन्ता करिकें शोक होय ताकी निवृत्तिके लिये कहत हैं जो द्वितीय (भगवत्कृत) प्रतिबन्ध होय तब सर्वप्रकारकरिकें अन्यसूं ह सर्वथा फलके संबंधको अभाव हे तासूं फलविषयिणी चिन्ता छोडनी; क्यों जो अहन्ताममतात्मक जो संसार हे सो सर्वथा अनर्थको मूल हे ताको निश्चय हे इतनें भगवत्कृत प्रतिबन्ध होय तब संसारहि फल हे दूसरो फल नहिं हे एसैं निश्चय समजनो ॥५॥

एसें प्रतिबन्धको विचार अत्यन्त करिवेयोग्य हे एसें निरूपण करिकें उद्वेगरूप प्रथमप्रतिबन्धकरिकें फलको अभाव होय तब वामें भगवानकी फलदेय-वेकी इच्छाको अभाव कारणरूप हे एसें निरूपण करत हें.

**श्लोकः—नन्वाद्ये दातृता नास्ति तृतीये बाधकं गृहम् ॥  
अवश्येयं सदा भाव्या सर्वमन्यन् मनोभ्रमः ॥६॥**

टीका—आद्य (उद्वेगरूप भगवत्कृत) प्रतिबन्ध होय तब भगवानकूं फलदेयवेकी इच्छा नहिं हे एसें जाननो और तृतीयप्रतिबन्ध जा लौकिक भोग हे तामें गृहबाधक हे तासूं सेवामें तीनप्रकारके फल तथा तीनप्रकारके प्रतिबन्ध अवश्य विचारिवेयोग्य हे ओर वासूं अन्यसर्व हे सो मनको भ्रम हे, इतनें विवरणमें आज्ञा करी हे जो “ आद्यप्रतिबन्धकरिकें फलको अभाव होय तब भगवानकी फलदेयवेकी इच्छा नहिं हे तब सेवाको आधिदैविकपनो सिद्ध नहिं होय हे ओर गृहको परित्याग होय तब हि लौकिकभोगको अभाव होय” एसें आज्ञा करी हे ताको अभिप्राय एसो हे जो भगवान् सर्वरीतसूं समर्थ हें ओर अन्तःकरणके सम्बन्धवारे हें तथापि चित्तके

विक्षेपरूप उद्वेग करे तब मानसी सेवा सिद्ध नहीं होयवेसं  
 सेवाको आधिदैविकपनो सिद्ध होय नहीं तब भगवानकी  
 फलदेयवेकी इच्छाको अभाव हे. एसे उद्वेगरूप बाधककूं कहिकें  
 भोगरूपबाधकमें विचार करत हैं जो लौकिकभोगमें गृह हि  
 बाधक हे; क्यों जो लौकिक भोग हे सो भगवानसं बहिर्मु-  
 खता सम्पादन करे हे सो जगताई घरमें स्थिति होय  
 तबताई निवृत्त करो तोहू निवृत्त होयसके नहीं तासं हि  
 श्रीमदाचार्यचरणनने निबन्धमें आज्ञा करी हे जो “ गृह  
 सर्वात्माकरिकें छोडनो सो छुटसके नहीं तो श्रीकृष्णके  
 लिये घर जोडिदेनो; क्यों जो श्रीकृष्ण हे सो  
 अहन्ताममतारूप संसारकूं छोडायवेवारे ” हैं एसें तीन फल  
 तथा तीन प्रतिबन्धको निरूपण करिकें अपने सेवनकूं विनको  
 रात्रिदिवस विचार कर्त्तव्य हे एसो जतायवेकेलिये आज्ञा  
 करत हैं जो ये फलत्रयी तथा प्रतिबन्धत्रयी सदा अवश्य  
 विचारणीय हे विनको जो निरन्तर विचार होय तो भक्ति  
 मार्गमें दूसरो प्रतिबन्ध नहीं होयगो एसो जतायवेके लिये  
 कहत हैं जो ये तीन फल तथा तीन प्रतिबन्ध छोडिकें दूसरो  
 सर्व मनको भ्रम हे; अर्थात् दूसरे फलकी ओर दूसरे



प्रतिबन्धकी कल्पना करनी सो मनकी भ्रान्तिहि हे ॥६॥

अब यहां शङ्का होय जो फल तथा प्रतिबन्धको जो उपर  
निरूपण कियो सो जो आपके आश्रित हैं विनकूं  
घटे नहीं क्यों जो विनके देह तथा इन्द्रियादिक  
सब प्रभुनकूं समर्पित हे तासूं सधनकूं फल-  
रूप प्रभुको सम्बन्ध हे तासूं विनकूं तो  
फल भयो हि हे तो विनके लिये फल  
तथा प्रतिबन्धको निरूपण करनो  
सो व्यर्थ हि हे एसी आशङ्का  
होय तहां कहत हैं.

श्लोकः—तदीयैरपि तत्कार्यं पुष्टौ नैव विलम्बयेत् ।  
गुणक्षोभेऽपि द्रष्टव्यमेतदेवेति मे मतिः ॥ ७ ॥

टीका—तदीयनकूं हू फल तथा प्रतिबन्धादिककी भावना  
करनी. केवलपुष्टिमें अंगीकार होय तब तो फलमें विलम्ब करे  
नहिं ओर गुणको क्षोभ होय तत्र हू साधन येहि देखनो एसी  
मेरी मति हे; इतनें जिननें ब्रह्मसम्बन्ध कियो हे विनकों हू  
फल तथा प्रतिबन्धादिकको भावन करनो क्यों जो  
केवल पुष्टिमें अंगीकार होय विनकों तो फलदेयवेमें प्रभु

विलम्ब करे नहीं परन्तु आधुनिकजीवनको तो पुष्टिमर्यादामें हि अंगीकार होयवेसं फलसिद्धिमें विलम्ब होय हे तब प्रोषितभर्तृकाकीसीनाई फलके प्रतिबन्धकी भावना सर्वदा करनी. तेसैं सात्विकादिकगुणकरिकें अंतःकरणमें क्षोभ होय तब हू फलके प्रतिबन्धादिककी हि भावना करनी ताकी निवृत्तिके लिये दूसरे साधन नहीं करने एसी मेरी मति हे. यहां मेरी मति हे एसैं कहिवेको अभिप्राय यह हे जो याविषयमें विचारकरतें करतें मेरी बुद्धि यहां हि निश्चल होयके रही हे दूसरो साधन मेरी बुद्धिमें नहीं आवे हे. ॥७॥

यहां शंका होय जो एसैं करिवेमें दुषणको आभास होय तब मनमें पसो विचार आवे जो अपने समर्पणकरिकें तदीय भये तब फल होयवेको संभव हे तासूं प्रतिबन्धादिकको निरूपण कियो सां व्यर्थ हे एसी शंका होय तहां कहत हे.

श्लोकः—कुष्टिरत्र वा काचिदुत्पद्येत स वै भ्रमः ।  
इति श्रीमद्वल्लभाचार्यजीविरचितं सेवा-  
फलनिरूपणं समाप्तम् ।

टीका-यहां काहुजातकी कुसृष्टि उत्पन्न होय हे निश्चय भ्रमरूप होय हे; इतनें जो तदीय हैं विनकूं तो नियम-करिकें फलको संभव हे तासूं सत्वादिकगुणनकरिकें मनमें अन्यथाभाव होय सो भ्रम हे; क्यों जों प्रभु स्वतंत्रइच्छावारे हैं एसो निरूपण कियो हे तासूं प्रभु फल न देयेंगे एसी अनुपपत्ति मनमें आवे ताको परिहार तो प्रथम हि कियो हे ताकी भावना राखेनी. ॥

इति श्रीमद्ब्रह्मभाचार्यजीविरचितसेवाफलकी  
गोस्वामिश्रीनृसिंहलालजीमहाराजकृत  
ब्रजभाषाटीका समाप्त भई.

